

# PROLOGUS IN LIBRUM CONSTITUTIONUM Fratrum Ordinis Prædicatorum.

**C**Upientes nonnulla loca Constitutionum nostri Ordinis Prædicatorum declarare, à titulo exordium sumendum esse censemus : declarantes, quod hoc Nomen PRÆDicatorum, fuit Ordini nostro impositum à Papa Innocentio III. per literas, quas direxit Beato Patri DOMINICO, & Sociis ejus : & ab HONORIO III. fuit hoc nomen approbatum, & à Gregorio IX. in Bulla Canonizationis Beatiss. Patris DOMINICI confirmatum ; ac demum ab aliis Pontificibus commendatum : qui miris laudibus, & præclarissimis privilegiis prædictum Ordinem exornarunt. Unde Dominus Alexander IV. in laudem, & commendationem præfati Ordinis sic dixit : Cœlestis ille Agricola summus auctor fidei, præcipuusque protector, sacrum Fratrum Prædicatorum Ordinem, quasi lignum fertile in Ecclesiæ Paradiso inseruit, ut delectaret amœnitate, ubertate satiare, & fructuum suavitatem mulceret. Hoc itaque speciosum, fecundum, ac dulce lignum, imbre superno irrigatum, pulchra plurima, ac dulcia poma profert : quorum odore, ac sapore confortantur, & conualescunt debiles, variisque detenti languoribus liberantur. In hoc utique vitæ ligno mortales homines carnis infirmitatibus prægravati, pabulum salutis inveniunt, & internam recipiunt sospitatem. Hujus inquam ligni percepta fragrantia, undique ad libamen ipsius concurrunt innumeri Professores fidei : qui assidue illo perfruentes, & ejus salutaribus fructibus convalescentes, de ipsorum prægustata dulcedine, ministrant & ipsi aliis, suavia libamenta salutis. Hæc est illa generosa plantatio, quæ ramos suos undique expandens, flores plurimos honoris, & honestatis, fructusque uberrimos doctrinæ profert, & virtutis ; & odorem sanctæ, ac laudabilis conversationis longè, latèque diffundit. Hic est Ordo Sacer Prædicatorum, honestate floridus, præclarus scientia, virtute fecundus, à Sedè Apostolica meritò approbatus : qui inter alia plantaria Dominica, puritate conversationis, sapientiæ dono, & virtutis merito dignoscitur specialiter insignitus. Hujus sacri, clari, conspicui, & approbati Ordinis Fratres, Sacrarum Scripturarum studio instanter incumbunt, animarum profectibus, Divinis officiis, & orationibus incessanter intendunt, atque Evangelicæ prædicationi ardentè insistentes, lumen Divinæ doctrinæ ubique per orbem diffundunt. Hi sunt viri doctrina clarissimi, qui contemplationi cœlestium ferventer invigilant, & piæ vitæ studio sine intermissione defudant. Hi sunt viri probati, & plenè in lege Domini eruditi, efficaces quidem in opere, & in prædicatione potentes ; quorum labia gratia cœlestis edocuit ad propinandam salubrem doctrinam aliis, & commodum, ac profectum animarum Christi fidelibus exponendum. Unde ubique per mundum ora ipsorum intonant veluti tubæ, ac in omnem terram exit sonus prædicationis eorum, & usque ad fines Orbis sua salutifera verba sonant. Hi sunt viri præclari, conspicua religione fulgentes, qui tamquam lucentia sydera in Ecclesiæ firmamento, suis splendidissimis documentis, viam cœlestis vitæ mortalibus insinuant. Hi sunt phialæ aureæ plenæ odoramentis, qui sua sacra conversatione suaviter redolentes, hortantur per hanc alios, & inducunt à somno negligentiae celeriter surgere : & excussa prorsus inertia, ad opera lucis, & bonitatis festinanter properare. Hi sunt dilecti Deo, & hominibus, Fratres videlicet Prædicatores, morum honestate conspicui, scientiæ titulis insigniti ; quos æterni Patris benignitas inter plurimas personas divinis obsequiis deputatas, pro sui nominis attollenda gloria, & Fidelium procuranda salute, specialiter elegit : qui suum semper effectum ad amorem cœlestium dirigentes, virtutem Divini nominis ubique publicant, & pro Christianæ Religionis ampliando cultu, vigili attentione laborant. Hi sunt, qui vitam, & merita Beatissimi Pauli Apostoli contemplantes, gloriantur in sola Cruce Domini nostri JESU Christi ; & mundi pompas, ac solatia spernentes, ad solam cœlestem patriam, & ad Paradisi delicias recta intentione suspirant. Hi sunt, qui propter Deum semetipsos salubriter abnegantes, elegerunt sub arctissima paupertate Deo deservire : tamquam nihil habentes, & omnia possidentes. Hi postremò sunt, qui cum omnia terrena propter amorem bonorum cœlestium reliquerint, sobriè, justè, piè, & castè viventes, ac exilia vitæ subsidia mendicantes, Christum pauperem imitantur, perfectionem Evangelicam amplexando. Unde clarissimè constat, eos in statu perfectionis

nis existere, & per suæ Religionis observantiam, quæ quidem ipsius Evangelicæ perfectionis continet formam, in æternæ retributionis præmio præcellentem gloriam promereri.

Quanti autem Ordinem nostrum fecerit, quidvè de successoribus S. Patris DOMINICI præfagiverit Honorius, ex bulla confirmationis Ordinis certissimum est, quæ ita habet ad Verbum: Honorius Episcopus, Servus Servorum Dei. Dilecto Filio Fratri Dominico Priori Sancti Romani de Tolosa, & Fratribus tuis regularem vitam professis, & professuris salutem, & Apostolicam benedictionem. Nos attendentes Fratres Ordinis tui futuros pugiles fidei, & vera mundi lumina: confirmamus Ordinem tuum cum omnibus castris, & possessionibus habitis, & habendis; & ipsum Ordinem, ejusque possessiones, & jura, sub nostra gubernatione, & protectione suscipimus. Datum Romæ apud Sanctam Sabinam XI. Kalendas Januarii, Pontificatus nostri Anno primo.

## TEXTUS I.

Quoniam (a) ex præcepto Regulæ jubemur habere cor unum, & animam unam in Domino; Justum est, ut qui sub una Regula (b) & unius professionis voto vivimus, (c) uniformes in observantiis canonicæ Religionis inveniamur; quatenus unitatem, quæ interius est servanda in cordibus foveat, & repræsentet uniformitas exterius servata in moribus.

(a) *Quoniam ex præcepto Regulæ jubemur habere cor unum, & animam unam in Domino.* ] Declaramus, quòd unitas cordium in his, quæ Dei sunt, secundùm Regulam nostram est in præcepto, sicut & communitas rerum, sed ratione diversa. Nam ad unitatem cordis servandam ex divinæ legis generali præcepto, de quo in Regula admonemur: ad communitatem autem rerum ex ipsius Regulæ præcepto adstringimur. Et ideo circa unitatem cordium, & communitatem rerum magna diligentia adhibenda est.

(b) *Et unius professionis voto vivimus.* ] Declaramus, quòd ideo sub unius professionis voto vivere dicimur, quia sub unius Generalis Capituli, & sub unius Generalis Magistri obedientia regimur, & gubernamur. Sicut enim unitas Ecclesiæ ex unitate capitis dependet, ita & unitas Ordinis nostri ex unitate unius Generalis Capituli, & unius Generalis Magistri, cui secundùm unam Regulam, & secundùm easdem Constitutiones ex Voto nostræ professionis tenemur obedire, absque dubio dependere dignoscitur. Quamobrem in Capitulis Generalibus Romæ celebratis an. 1589. 1601. & Venetiis 1592. & Parisiis 1611. prohibitum fuit strictissimè, ne dimissionem Ordinis quocumque modo Fratres procurent.

(c) *Uniformes in observantiis canonicæ Religionis inveniamur.* ] Declaramus, quòd sicut ex voto nostræ professionis tenemur castè, & sine proprio, & sub unius Generalis Prælati obedientia vivere, ita & exterioribus observantiis, cæremoniis, jejuniis, abstinentiis, & in aliis statutis, quæ ad ornatum, & decorem canonicæ Religionis, seu regularis vitæ observantiam pertinent, uniformes esse debemus. Ideo particulares consuetudines præter Regulam, Constitutiones, & Ordinationes Capitulorum Generalium fugiendæ sunt, & amputandæ: ut uniformitas exterius servata in moribus, foveat, & repræsentet illam unitatem, quam interius servare debemus in cordibus. Quare in Capitulo Generali Vallisoleti 1605. fuit ordinatum, quòd si quis in fundatione alicujus Conventus, novas cæremonas, quæ non sunt in Constitutionibus nostris voluerit introducere, talis Conventus nulla ratione acceptetur. In Capitulo etiam Bononiensi 1564. admonentur Prælati, ut diligenter attendant, ne contra Constitutiones, abusus, aut consuetudines prævalere incipiant: super quo Provincialium, & Visitatorum conscientias oneramus, ut si quos Priores, aut Præsidentes invenerint, qui abusus inducant, aut consuetudines nostris legibus contrarias in communi tolerant, in pœnam ab officiis absolvant.

## II.

Quod profectò eò competentius, & perfectius poterit observari; si ea quæ agenda sunt, scripto fuerint commendata; si omnibus qualiter sit vivendum scriptura teste innotescat: si mutare, vel addere, vel minuere nulli, quidquam propria voluntate liceat; (d) ne si minima neglexerimus, paulatim defluamus.

(d) *Ne si minima neglexerimus, paulatim defluamus.* ] Declaramus, quòd illa, quæ ponuntur in nostris Constitutionibus, & non habent præceptum annexum, sed sunt purè statuta ad ornatum, & decorem Regularis vitæ pertinentia, videntur esse minima respectu illorum, quæ pertinent ad substantiam Religionis, vel quæ habent præceptum annexum. Tamen illorum transgressio ex negligentia, non est sine veniali culpa: quæ disponit ad mortalem, ut docet S. Thom. 2. 2. q. 186. art. 9. ad 1. Et ideo bene dicit Constitutio in textu: Ne si minima neglexerimus, paulatim defluamus. Nam ut est in Ecclesiast. 18. cap. *Qui minima negligit, paulatim decidet.* Et S. Bernardus dicit. *Negligens semper culpabilis est.* Et S. Hieronymus: *Mens Christo dedita, inquit, sic caveat minora.*



quomodo & majora; sciens etiam pro verbo otioso reddendam esse rationem. Et Isidorus: *Qui otiosa verba non deprimit, ad noxia cito transit. Paulatim crescunt vitia, & dum parva non cavemus, in magna prolabimur.*

### I I I.

**A**d hæc tamen in suo Conventu (e) (f) Prælatus dispensandi cum Fratribus habeat potestatem, cum sibi (g) aliquando videbitur expedire; in his præcipue quæ studium, vel prædicationem, vel animarum fructum videbuntur impedire. (b) Cum Ordo noster specialiter ob prædicationem, (i) & animarum salutem ab initio noscatur institutus fuisse, & studium nostrum ad hoc debeat principaliter intendere, ut proximorum animabus possimus utiles esse. (k) Priores etiam utantur dispensationibus, ut alii Fratres.

(e) *Ad hæc tamen in suo Conventu Prælatus dispensandi cum Fratribus habeat potestatem.* ] Declaramus, quod Prælatus hic vocatur solus ille, qui habet curam animarum sicut Prior in ordine nostro canonicè electus, & per Superiores confirmatus, ut dicit Gloss. Clement. c. 1. de elect. Supprior verò, & Vicarius, cum non habeant curam animarum, nisi ex commissione Prioris, vel alterius Superioris, neuter eorum potest dici Prælatus, nec potest sibi eligere Confessorem, nec Priore præsentem in domo potest cum fratribus dispensare ex virtute Constitutionum, sed solum ex commissione Prælati: nisi fortè quando mortuo Priore, vel amoto, ipse sit quasi Ordinarius, vices ejus in omnibus gerens. Et ideo in Capitulis Parisiis 1246. & Metis 1251. celebratis, fuit ordinatum, quod cum Priores sunt præsentem in domo, Supprieores, & Vicarii dispensandi non habeant potestatem. Cæterum, cum contingat Priorem à suo Conventu abesse, declaramus Priorem teneri in primo Capitulo sui Prioratus conferre auctoritatem necessariam Suppriori, & in absentia illius suo Vicario, pro omnibus casibus necessariis emergentibus, & præsertim pro pertinentibus ad forum conscientie, quotiescumque, & quomodocumque ipse Prior sit extra Conventum, præsertim per diætam absens. Et quamvis hoc non habeatur expressum in Constitutionibus, conforme tamen est dispositioni earundem Constitutionum.

(f) *In suo Conventu.* ] Declaramus, quod quilibet Prælatus potest in suo, non autem in alieno Conventu, cum Fratribus non solum suis, sed etiam alienis ex honesta, & rationabili causa dispensare in vigiliis, jejuniis, abstinentiis, & in aliis, quæ dispensabilia sunt, & quæ non sunt sibi expresse prohibita: dummodo hoc non regulariter faciat, nec de facili, sed cum rationabiles causæ id exposcunt: sicut fuit ordinatum Barcinonæ 1261. Quare Magister Humbertus dicit, quod Prælatus honesta, rationabilique de causa, potest compellere Fratrem subditum, & etiam extraneum in suo Conventu, ad recipiendam dispensationem in jejuniis, & comedendis carnibus, aliisque similibus, utpote in casu, in quo non uti dispensatione illa esset peccatum, ac proinde contra Ordinem: aliter, non potest compellere. Unde S. Bernardus in lib. de dispensatione sic ait: *Votum meum non augeat Prælatus absque mea voluntate, nec minuat sine certa necessitate: sed alioquin remissio voti absque necessitate, non dispensatio est, sed dissipatio.* Quando tamen Prælatus præcipit Fratri in suo Conventu, ut dispensationem accipiat, non debet de facili judicare, quod Prælatus non habeat causam rationabilem; quia fortè facit causa humiliandi eum, vel alia, quam ipse nescit: videlicet quia probabiliter de ejus debilitate dubitat, quamvis subditus sibi fortis esse videatur. Et in hoc debet judicium suum judicio supponere Prælati, & ei obedire, quia sæpe evenit, ut alii magis perpendant debilitatem alterius ex aspectu, quàm ipsemet qui eam patitur. Et ideo in dubio tenetur subditus Prælati obedire, quia obedientia excusat in dubiis, 23. quæst. 1. cap. Quid culpatur. Item declaramus, quod Priores in Conventu suo, & in eorum absentia Supprieores, & eorum Vicarii, omnes Fratres nostri Ordinis ad eorum Conventus declinantes, ab omnibus peccatis, & censuris, tam à jure, quàm ab homine generaliter prolatis, Sedi Apostolicæ specialiter non reservatis (ut infra magis explicabitur in cap. de professione) possunt absolvere, ac etiam Sacramentum Eucharistiæ, & Extremæ Unctionis administrare, sicut fuit declaratum Valencenis 1337. & concessum per privilegium, quod dicitur Mare magnum.

(g) *Aliquando.* ] Declaramus, quod dispensationes in jejuniis, & abstinentiis nunquam sunt faciendæ, nisi ex magna causa cum toto Conventu, etsi personis aliquibus merito interdum sint indulgendæ: nec etiam semper fieri debent, & assidue, sed solum aliquando: juxta quod Prælati propter aliquam utilitatem, vel necessitatem, vel honestam, & rationabilem causam videbitur expedire, sicut fuit declaratum Valentie 1364. Barcinonæ 1461. & Venetiis 1592.

(h) *Cum Ordo noster specialiter ob prædicationem, & animarum salutem ab initio noscatur fuisse institutus.* ] Declaramus, quod illa Religio, cujus institutio, & obedientia est essentialiter, principaliter, & nominatim ordinata ad docendum & prædicandum, seu illuminandum & salvandum animos per doctrinam, & prædicationis officium; est omnibus aliis excellentior, & perfectior: quia prædicare, & docere, sunt actus ex abundantia, & plenitudine contemplationis procedentes, & ut dicit S. Gregorius, *doctrina, & prædicatio præfertur simplici contemplationi.* Et sicut majus est illuminare, quàm lucere solum, ita majus est contemplata aliis tradere, quàm solum contemplari. Et sic Religio ad docendum & prædicandum principaliter, & essentialiter ordinata, tenet supremum gradum in Religionibus, utpote instituto Christi Domini magis conformis, ut docet S. Thom. 2. 2. quæst. 188. art. 6. in hæc verba: Summum gradum in Religionibus tenent, quæ ordinantur ad docendum, & prædicandum, quæ & propinquissimæ sunt perfectioni Episcoporum: sicut & in aliis rebus, fines primorum conjunguntur principiis secundorum, ut docet Divus Dionysius c. 7. de Divin. nominib. Hujusmodi autem est Ordo

noſter Prædicatorum, qui ex ſua prima inſtitutione eſt principaliter, eſſentialiter, & nominatim, ad docendum, & prædicandum, ad communicandum aliis contemplata, & ad procurandam animarum ſalutem inſtitutus. Cùm itaque finis Ordinis noſtri ſit prædicatio, & ſalus animarum, ideo ſtatuta Ordinis non debent ita rigide fervari, quod impediunt illud, propter quod Ordo principaliter eſt inſtitutus: quia quod propter aliquid inſtitutum eſt, non debet contra illud militare: Et quæ ſunt ad aliquem finem ordinata, debent eſſe proportionata, & commenſurata eidem fini, & regulari ſecundùm congruentiam ad illum finem. Ea propter bene dicit Conſtitutio, quòd Prælatus poterit in ſuo Conventu cum Fratribus diſpenſare, in iis præcipuè, quæ ſtudium, vel prædicationem, vel animarum fructum videbuntur impedire.

(i) *Animarum ſalutem.* ] Declaramus, quòd tria ſunt præcipuè, quæ ſalutem impediunt animarum, licèt non ſint contra Ordinem. Primum eſt, quæſtus immoderatus. Mundus enim eſt cautus, & fugit quæſtores importunos, & immoderatos. Secundum eſt, officia odioſa, ut ſunt Inquiſitiones ad Tribunal Sancti Officii non pertinentes, viſitationes, correctiones violentæ, executiones teſtamentorum, vel arbitrorum ſententiæ, & aliæ cauſæ arduæ, & odioſæ, ex quibus frequenter perturbatur hominum devotio ad Ordinem, & Fratres. Tertium eſt nimia aſteritas in conſiliis, & opinionibus: terrentur enim homines ex hoc tantùm, ut ſalutem propriam negligant. Quapropter parcendum eſt ab importunitate notabilis quæſtus: fugienda ſunt omnino officia odioſa, licet alicujus ſint utilitatis: & relaxanda eſt (quantùm fieri poteſt) rigiditas & aſteritas in conſiliis, ac homines benignè tractandi ſunt. Et ideo in Capitulo Parisiis 1234. ſic fuit ordinatum: Stricteſſimè prohibemus, ne Fratres ſuſcipiant commiſſiones cauſarum, arbitria, ſive judicia, nec pignora, ſive obſides, neque per juridiſctionem Epiſcopalem aliquos coerceant, & qui contra fecerint graviter puniantur. Et Bononiæ 1252. fuit prohibitum, ne Fratres eſſent diſpenſatores alienarum pecuniarum, nec Teſtamentorum executores. Et Burdegalæ 1287. fuit ditricte prohibitum, ne aliquis Frater de cætero intromittat ſe de matrimoniis conciliandis, ſeu etiam de magnis, & arduis negotiis ſecularium pertractandis, & abſtineat a cauſis odioſis ſuſcipiendis. In Capitulo quoque Generali Romæ 1601. fuit ditricte omnibus noſtri Ordinis Fratribus inhibita, ut neque poſſint ſecularium negotia litigioſa apud quæcumque Tribunalia procurare, neque ſe negotiis ſecularibus, mercimoniis, aut aliis hujusmodi, quæ vitio proprietatis vicinia ſunt, immergere. Ne igitur ſalus animarum impediatur, debemus ab his omnibus odioſis negotiis abſtinere, & laborare, ut noſtra converſatio ſit bona, & ſancta, & ſummam diligentiam adhibere, ut fama Ordinis, & Fratrum integra ſervetur: ac ſtudendum eſt, ut in his, quæ non ſunt reprehendiſſibilia amicabiles nos hominibus reddamus, ac humaniter, & benignè cum eis converſemur.

(k) *Priores etiam utantur diſpenſationibus, ut alii Fratres.* ] Declaramus, quòd Fratres noſtri inferiores, & ſubditi non poſſunt propria auctoritate ſeipſos in his, quæ ad Conſtitutiones pertinent diſpenſare, ſed debent à Prælatiſ, ſub quorum juridiſctione, & foro ſunt, diſpenſationem accipere. Superiores verò, & Prælati per iſtam Conſtitutionem, quando judicaverint expedire, ſunt diſpenſati, & poſſunt ſicut & cæteri, diſpenſatione uti.

## I V.

(l) **UT** igitur unitati, & paci totius Ordinis provideamus, volumus & declaramus, ut Regula noſtra, & Conſtitutiones noſtræ non obligent nos ad culpam, ſed ad pœnam: (m) niſi propter præceptum, (n) vel contemptum. Pœnis tamen abſolutionis ab officio, privationis vocis activæ vel paſſivæ, gravioris culpæ, & aliis majoribus (quantumcumque tam in Conſtitutionibus, quàm extra, ipſo facto ſint incurrendæ) niſi ſit pœna excommunicationis latæ ſententiæ, nullus ſit ſubjectus, (o) niſi ſuperveniat declaratio Prælati in particulari reſpectu, hujus, quantumcumque etiam notorium facti, vel juris, aut utriuſque interveniat. Præceptum autem in Regula nullum (niſi quod de natura ſua eſt, ratione trium votorum, vel Divinæ, aut Eccleſiaſticæ legis) contineri volumus, & declaramus. Et idem in Conſtitutionibus: niſi ubi ponitur ſententia excommunicationis, aut formaliter exprimitur per verbum (præcipimus in virtute ſanctæ Obedientiæ) & hoc idem in Ordinationibus, & Prælatorum verbis, & litteris intelligi volumus: Pœnam Excommunicationis, & Excommunicationem latæ ſententiæ, per nulla verba tam in Conſtitutionibus, quàm extra in noſtro Ordine intelligimus, niſi ubi explicite, & verbaliter pœna Excommunicationis, & Excommunicationis latæ ſententiæ, exprimitur.

## V.

**P**orro Prælati non faciant præcepta obligantia ad mortale peccatum, in ira exteriori, maxime contra ſubditos turbatos: & ſi fecerint, irrita ſint & inania: facta tamen valeat, quoad quæcumque pœnas temporales. Præcepta quoque in ſcriptis facta cenſeantur ſine ira facta. Nec faciant præcepta quieto animo, niſi in ſcriptis, extra neceſſitatis articulum, quod ſit à Viſitoribus in viſitationibus: facta tamen valeant. Nec damnent aliquem ad pœnam gravioris culpæ, aut

carceris, nisi in iudicio confessum, vel conjunctum, & in scriptis. Et si secus factum fuerit, totum sit irritum, & inane.

## V I.

**S**Tatuimus etiam, quòd tam in Constitutionibus, quàm extra, quidquid non secundum se mortale, mandatur sub quacumque pœna nisi Excommunicationis, ad solam pœnam obliget; non obstante, quòd in Capitulo de graviore culpa dicitur: ut qui membrum Diaboli culpam perpetrando non erubuit fieri, &c.

(1) *Ut unitati, & paci totius Ordinis Provideamus, volumus, & declaramus, quod Constitutiones nostræ non obligent nos ad culpam, sed ad pœnam.* ] Declaramus, quòd cum in statutis maxime sit attendenda intentio, & voluntas statuentis, & quæ intentio, ac voluntas eorum, qui nostras Constitutiones ediderunt fuerit, ut nos non obligarent ad culpam: sicut patet ex Capitulo secundo Generalissimo Parisiis celebrato 1236. in quo ista Constitutio propter pacem, & quietem conscientiarum Fratrum fuit confirmata. Idcirco transgressores nostrarum Constitutionum, quando sunt purè Constitutiones, & non habent præceptum annexum, & id quod est in eis non est aliàs lege Divina, vel humana prohibitum, vel mandatum; non obligantur ad aliquam culpam, sed tantum ad pœnam in Constitutionibus taxatam; vel per Prælatos imponendam, vel taxandam: quam si facere recusaverint, non evadent culpam. Nam, ut docet S. Thom. 2. 2. quæst. 186. art. 4. ad 1. In Religione Ordinis Fratrum Prædicatorum, transgressio, vel omissio (scilicet Regulæ, siue Constitutionum) ex suo genere non obligat ad culpam, nec mortalem, neque venialem, sed solum ad pœnam taxatam sustinendam, quia per hunc modum, ad talia observanda obligantur; qui tamen possent venialiter, vel mortaliter peccare, ex negligentia, vel libidine, seu contemptu. Et quamvis pœna non debeat infligi nolenti sine culpa: ei tamen, qui voluntariè se obligavit ad aliquam pœnam, potest talis pœna sine culpa infligi. Tales autem sunt Fratres Ordinis nostri, qui voluntariè in sua professione huic legi se obligaverunt.

(m) *Nisi propter præceptum.* ] Declaramus, quòd Priores in suis Conventibus possunt ex rationabili causa in his, quæ ad Regulam, vel Constitutiones explicite, vel implicite pertinent, præcepta facere; quæ transgressores obligabunt non solum ad pœnam, sed etiam ad mortalem culpam: quia ex voto nostræ professionis tenemur Regulam, & Constitutiones non contemnere; & præceptis Prælati nostri in his, quæ sunt secundum Regulam, & Constitutiones obedire. Non debent tamen Prælati esse faciles, nec precipitantes, & indiscrete præcepta, & excommunicationes fulminare, sed cum maturo consilio, & ex diligenti deliberatione præhabita, & ex causa urgente, & necessaria hujusmodi præcepta discrete facere, sicut fuit ordinatum Parisiis 1269. Oxoniæ 1280. Ferrariæ 1290. Cæterum, de excommunicatione ferenda illud in mente habeant, quod decernitur à Concil. Trident. sess. 25. cap. 3. his verbis: Quamvis excommunicationis gladius, nervus sit Ecclesiasticæ disciplinæ, & ad continendos in officio populos valde salutaris; sobriè tamen, magnæque circumspectione exercendus est: cum experientia doceat, si temerè, aut levibus de causis incutitur, magis contemni, quam formidari, & perniciem potius parere, quam salutem. Unde & in primo Capitulo Generali post Concilium Tridentinum Bononiæ celebrato anno 1564. de sententia excommunicationis sic habetur: Et quoniam in hujusmodi sententiis ferendis S. Synodus moderamen esse voluit, deinceps attendant Reverendi Provinciales, & Definidores, ut nisi pro graviore causis, quæ præsentaneum exigunt remedium, non imponantur. Priores etiam Conventuales, quàm rarissimè, & matura deliberatione censuris uti debent: & qui in hoc faciles inventi fuerint, à suis Superioribus corrigantur. Præcepta etiam ad peccatum mortale obligantia, aut nulla, aut quàm paucissima fiant: maxime circa eas ordinationes, quæ longo tempore sunt duratura. In aliis quoque omnibus, quæ ad relevandas subditorum conscientias necessaria videbantur, Prælati se benignos, & faciles exhibeant, memores illud, qui magis misericordiam dilexit, quàm sacrificium.

(n) *Vel propter contemptum* ] Declaramus, quòd sicut transgressio præcepti in Regula, vel Constitutione positi, siue à Prælato facti obligat ad culpam; ita & transgressio Constitutionis quantumcumque minimæ ex contemptu facta obligat ad culpam mortalem: quia, ut dicit S. Bernardus: *Neglectus semper culpabilis est, contemptus verò damnabilis.* Dicitur autem aliquis peccare ex contemptu, juxta doctrinam S. Thomæ. 2. 2. q. 186. art. 9. ad 3. quando voluntas ejus renuit subiici ordinationi legis, vel Regulæ, & ex hoc procedit ad faciendum contra legem, vel Regulam. Quando autem è converso propter aliquam particularem causam (puta concupiscentiam, vel iram) inducitur ad aliquid faciendum contra statuta legis, vel Regulæ, non peccat ex contemptu, sed ex aliqua alia causa: etiam si frequenter ex eadem causa, vel alia simili peccatum iteret, sicut dicit Sanctus Augustinus in lib. de natura, & gratia cap. 29. *Quod non omnia peccata committuntur ex contemptu superbiæ; frequentia tamen peccati dispositivè inducit ad contemptum:* secundum illud Proverb. 18. *Impius cum in profundum venerit peccatorum, contemnit.*

(o) *Nisi superveniat declaratio Prælati.* ] Denunciamus, juxta declarationem factam, Januæ 1513. quòd pœnæ exigant declarationem Superioris in particulari, nisi ipsemet reus seipsum declararet. Quod facere debet, humiliter cognoscens errorem suum, si factum est publicum, vel notorium. Si enim ipse se declaraverit, alia non est opus declaratione. Et 1518. additum fuit declarando, quòd nullus Præsides potest seipsum declarare absolutum ab officio suo, propter quamcumque transgressionem commissam.



## V I I.

**ET** ut multitudo Constitutionum vitetur, (*p*) prohibemus, ne de cætero aliquid statuatur, nisi per duo Capitula Generalia continua fuerit approbatum, & tunc in tertio Capitulo immediatè sequenti poterit confirmari, vel deleri: sive per Priores Provinciales, sive per alios Diffinitores, ubicumque illud tertium Capitulum celebretur.

(*p*) *Prohibemus ne de cætero aliquid statuatur.* ] Declaramus, quòd nec Prior Provincialis, nec Magister Ordinis, nec aliquod Capitulum, potest facere Constitutionem: sed oportet, quòd ad Constitutionem faciendam concurrant tria Capitula Generalia & continua; vel unum Capitulum Generalissimum, quod tribus Generalibus Capitulis continuis æquipollet. Possunt tamen Capitula Generalia, & Magister Ordinis facere ordinationes, & admonitiones, quæ perpetuo durabunt, quousque non fuerint revocatæ, & poterunt secundum ipsas Prælati corrigere Fratres, & etiam in ipsis ex causa rationabili dispensare, ut communiter tenetur. Et idem dicimus de gratis factis per Capitula Generalia, & Magistrum Ordinis.

## V I I I.

**I**nchoationes autem, quæ sunt in Capitulis Generalibus, non mandentur executioni usquequò approbatæ fuerint per alia duo Capitula, & factæ sint Constitutiones: nisi fortè eadem inchoatio fiat per modum ordinationis. (*q*) Interpretationes Regulæ, vel Constitutionum, factæ à Generali Capitulo, (*r*) non habeant vim Constitutionis, nisi per tria Capitula Generalia continua in modum aliarum Constitutionum, scilicet per viam inchoationis, & confirmationis continuatè fuerint approbatæ.

## I X.

**O**rdinationes tam Capitulorum Generalium, quàm Magistri Ordinis, quoad vim præcepti, & censurarum Ecclesiasticarum, cum ipsis expirare volumus. Vita verò Capituli, usque ad sequens Capitulum intelligitur. Quoad reliqua verò quomodolibet per Generale Capitulum, vel Magistrum Ordinis facta durare volumus, donec fuerint revocata per similem potestatem, excepto si quem Magister Ordinis Vicarium totius Ordinis instituisset; hunc enim volumus cum ipso expirare. Ab inferioribus autem Capitulis, & Prælati quomodolibet ordinata, cum ipsis tanquam ab homine ordinata, expirare volumus: exceptis Supprioribus, Confessoribus tam Fratrum, quàm Monialium, Vicariis Monialium, & Magistris personarum utriusque sexus tertii habitus, & Officialibus Conventuum absque jurisdictione: hos enim volumus durare cum ea quam habeant auctoritate, donec revocentur ab habente potestatem destituendi eosdem.

## X.

**P**orrò Prælati omnes à multitudine præceptorum, & ordinationum abstineant, ne laqueum animabus subditorum injiciant; nec propter defectum unius, vel paucorum, quem, vel quos non audent corrigere, communitatem involvant. Nulla quoque potestate in Ordine nostro in communi, vel particulari aliquid ordinetur, vel prohibeatur cum hac pœna, quod non possit absolvi à peccatis suis. (*f*) Priores tamen possunt aliquos determinatos casus peccati mortalis sibi reservare, ut viderint expedire animabus.

(*q*) *Interpretationes Regulæ, vel Constitutionum.* ] Declaramus, quòd si in aliquo passu Regulæ, vel Constitutionum occurrerit aliquod dubium, stabitur interpretationi, & declarationi Generalis Capituli, vel Magistri Ordinis; dummodò illa declaratio non contineat manifestum errorem, quia in dubiis sequenda est majorum sententia, & obedientia excusat in dubiis. Et Julius III. Pont. Max. Generali Magistro concessit, ut ambiguitates in Constitutionibus; aut circa privilegia, gratias, exemptionesque à Sede Apostolica Ordini concessas, possit auctoritate Apostolica declarare. Et ideo interpretatio, vel declaratio facta per Capitulum Generale, vel per Magistrum Ordinis, licet non habeat vim Constitutionis, à subditis tamen tenenda, & observanda est. Et propterea in pluribus Capitulis Generalibus, à principio Ordinis usque ad hæc tempora celebratis, sæpissimè fuit ordinatum, ut admonitiones, ordinationes, ac declarationes Capitulorum Generalium, à singulis Conventibus in aliquo libro debeant scribi, atque ter, vel quater in anno congregatis Fratribus legi: neque deleri debent, nisi fuerint revocatæ, sicut habetur in Capitulo Colonienfi 1245. In Capitulo etiam Bisuntino 1353. sic dicitur: Imponimus districtè omnibus

nibus, & singulis Prioribus Provincialibus, ut declarationes hujus anni, & omnes alias præeritis temporibus factas, quas habere poterunt, diligenter in uno volumine scribant, & cum aliis scriptis Provinciæ custodiant, & Conventibus suis communicent, ac eas sæpius legi faciant. Omnia autem acta Generalis Capituli, illicò in toto Ordine publicentur per Provinciales, vel per Visitatores, non expectato Provinciali Capitulo, ut Romæ 1542. 1546. & novissimè 1589. in hunc modum ordinatum, & Parisiis 1611. confirmatum fuit.

Item conformiter adea, quæ in pluribus Capitulis Generalibus sancita fuere declaramus, non esse in potestate alicujus Provinciæ, prætextu cujusvis consuetudinis, aut privilegii, non acceptare acta, seu statuta Capitulum Generalium, sed omnes, & singulas Provincias deceris, & ordinatis in eisdem Capitulis, ita subiectas esse, ut unaquæque earum teneatur ipsa acta in unoquoque Conventu publicare, acceptare, & inviolabiliter observare, utpotè pro communi bono universitatis Provinciarum, Conventuum, & Fratrum facta. Et quatenus opus esset auctoritate Apostolica revocamus, & annullamus quamcumque consuetudinem, aut privilegium quomodolibet prætentum, aut in contrarium existens.

Mandamus insuper, ut singulis diebus non solemnibus cujuslibet hebdomadæ per totum annum lectioni mensuræ inferatur lectio de sacris Constitutionibus, & quater in anno Acta Capitulum Generalium coram toto Conventu publicentur, & cum aliis scripturis exemplaria eorum ad eum modum conserventur; ut unum exemplar sit penès Priorem, alterum in deposito communi, tertium penès Magistrum Novitiorum. Romæ 1532. 1580. 1589. 1601. 1608. & Barcinonæ 1574.

(1) *Non habeant vim Constitutionis, nisi per tria Capitula Generalia continua in modum aliarum Constitutionum, scilicet per viam inchoationis, & confirmationis continuatè fuerint approbata.* ] Declaramus, non sufficere ad constitutionem faciendam, ut sint tria Capitula Generalia continuata quomodolibet idem ordinantia, & confirmantia: sed oportere, ut primum Capitulum id ordinet per viam inchoationis, & alia duo immediatè subsequentia, eandem inchoationem confirmant, ut apertissimè textus Constitutionis insinuat.

(5) *Priores tamen possunt aliquos determinatos casus peccati mortalis sibi reservare.* ] Denunciamus fel. rec. Clementem VIII. Apostolicam Constitutionem circa reservationem casuum edidisse in hunc modum: Sanctissimus Dominus Clemens VIII. qui jam pridem accuratè perpenderit, quòd reservatio facultatis absolvendi Religiosos penitentes à quibusdam gravioribus delictis, nisi moderatè fiat, nonnullos infirmiores in æternæ damnationis periculum, & desperationem inducere posset: ideò decrevit, ut nemo Superior Regularis peccatorum absolutiones sibi reservet, exceptis his, quæ sequuntur: aut aliquibus illorum, prout in Domino expedire judicaverit.

Venefica, Incantationes, & Sortilegia.

Apostasia à Religione, sive habitu dimisso, sive retento; quandò eò pervenerit, ut extra septa Conventus fiat egressio.

Nocturna, & furtiva è Conventu egressio, etiam non animo apostatandi facta.

Proprietas contra votum paupertatis, quæ sit mortale peccatum.

Juramentum falsum in judicio regulari, sive legitimo.

Procuratio, auxilium, sive consilium ad abortum faciendum post animatum factum, etiam effectu non secuto.

Falsificatio manus, aut sigilli Officialium Conventus.

Furtum de rebus Conventus in ea quantitate, quæ sit peccatum mortale.

Lapsus carnis voluntarius opere consummatus.

Occisio, vulneratio, seu gravis percussio cujuscumque personæ.

Malitiosum impedimentum, aut retardatio, aut apertio litterarum à Superioribus ad inferiores, & ab inferioribus ad Superiores.

Si quod aliud peccatum grave pro Religionis conservatione, aut pro conscientiarum puritate reservandum videbitur, id non aliter fiat, quàm Generalis Capituli in toto Ordine, aut Provincialis in Provincia matura discussione, & assensu. Non liceat Superioribus Regularium confessiones subditorum audire, nisi quando peccatum aliquod reservatum commiserint; aut ipsimet subditi sponte id petierint. Superiores in singulis domibus duos, vel tres, aut plures Confessarios pro subditorum numero majori, vel minori designent: lique sint docti, prudentes, & charitate præditi; qui à non reservatis eos absolvant, & quibus etiam reservatorum absolutio committatur, quando casus occurrerit: in quo casu debere committi, ipse imprimis Confessarius judicaverit. Tàm Superiores pro tempore existentes, quàm Confessarii, qui postea ad Superioritatis gradum assumpti fuerint; caveant diligentissimè, ne ea notitia, quam de aliorum peccatis in confessione habuerunt, ad exteriorem gubernationem utantur. Licebit tamen Superioribus determinare penitencias graves, quibusdam peccatis etiam non reservatis, à Confessariis imponendas, quæ subditos ab illis cohibere possint. Et ità mandat servari ab omnibus, non obstantibus &c.

Librum autem istum diligenter conscripsimus, in quo duas Distinctiones adnotavimus.

*Explicit Prologus cum suis Declarationibus.*

## PRIMA DISTINCTIO

*Continet viginti Capitula.*

- |                               |   |
|-------------------------------|---|
| I. De Officio Ecclesiae.      | XI. De Rasura.                          |
| II. De Inclinationibus.       | XII. De Silentio.                       |
| III. De Suffragiis mortuorum. | XIII. De Recipiendis.                   |
| IV. De Jeuniis.               | XIV. De Novitiis, & eorum instructione. |
| V. De Cibo.                   | XV. De Professione.                     |
| VI. De Collatione.            | XVI. De levi Culpa.                     |
| VII. De Infirmis.             | XVII. De gravi Culpa.                   |
| VIII. De Minutione.           | XVIII. De graviori Culpa.               |
| IX. De Lectis.                | XIX. De gravissima Culpa.               |
| X. De Vestitu.                | XX. De Apostatis.                       |

## SECUNDA DISTINCTIO

*Continet nouendecem Capitula.*

- |   |  |
|---|--|
| I. De Domibus concedendis, & construendis.                        | XI. De Visitatoribus.  |
| II. De Electione Prioris Conventualis, & institutione Supprioris. | XII. De Prædicatoribus.  |
| III. De Electione Prioris Provincialis.                           | XIII. De Itinerantibus.  |
| IV. De Electione Magistri Ordinis.                                | XIV. De Studentibus.   |
| V. De Electione Diffinitorum Capituli Provincialis, & Generalis.  | XV. De Conversis.  |
| VI. De Capitulo Provinciali.                                      | XVI. De Constitutionibus Capituli Perpiniani.                      |
| VII. De Capitulo quotidiano.                                      | XVII. De Capitulo Biennali, vel Triennali.                         |
| VIII. De Capitulo Generali.                                       | XVIII. De Constitutionibus Bonifacii Papæ IX.                      |
| IX. De solemnī celebratione Capituli.                             | XIX. De Constitutione Alexandri VI. de Electione Magistri Ordinis. |
| X. De Capitulo Generalissimo.                                     |  |

CONSTITUTIONES FRATRUM  
ORDINIS PRÆDICATORUM.

## PRIMA DISTINCTIO.

## CAPUT I.

*De Officio Ecclesiae.*

## CONSTITUTIO I.

(a) **A**udito primo signo, surgant Fratres, (b) & stando dicant Officium de B. Virgine, (c) pro tempore; (d) Matutinas autem & Missam, & omnes alias Horas Canonicas simul audiant Fratres nostri, (e) nisi cum aliquibus Prælatus aliter dispensare voluerit.

(a) *Audito primo signo*) Declaramus, quòd ad Horas Canonicas non debemus regulariter habere nisi duo signa. Primum debet esse breve, quo audito, Fratres debent se præparare, & occupationes, in quibus tunc versantur dimittere, nec novas assumere. Secundum autem

signum debet esse ità prolixum, ut ante ejus terminationem, possint Fratres de omni remotiori loco Domus, secundum existimationem pulsantis, ad Ecclesiam convenire. Inter primum autem, & secundum signum debet esse tantum spatium, ut Fratres se possint præparare.

(b) *Et stando dicant Officium de Beata Virgine.*) Declaramus, quòd in Matutinis, audito primo signo, debent in Dormitorio Fratres stando dicere Officium de B. Virgine, quando pro tempore est dicendum: uno incipiente, & dicente unum versum, & aliis respondentibus, & dicentibus alium versum: & post secundum signum debent Officium de Tempore in Choro devotè, & distinctè cantare. Verumtamen, ut majori qua potest pietate, & devotione erga B. Virginem, specialem Ordinis Advocatam, Officium illius in Dormitorio recitetur, in Dormitoriis Conventuum, locorumque nostrorum, debet esse erectum Altare cum imagine ejusdem Beatis. Virginis, sicut fuit ordinatum Barcinonæ



1574. & Valentiaë 1596. In aliis verò Horis debent post secundum signum in Choro antè Officium de Tempore, stando Officium Beatæ Virginis præmittere: nisi in Completorio, ubi post Officium de Tempore, Officium Beatæ Virginis dicitur, sicut fuit ordinatum Metis 1421.

(c) *Pro tempore.* ) Declaramus, quòd Officium B. Virginis certis diebus in Dormitorio, & in Choro intermittitur, & ad ipsum dicendum Fratres non obligantur: videlicet in Festis Duplicibus, & supra: & in Octavis Solemnibus, & quando de Beata Virgine fit Officium, sive in Octava ipsius, sive extrà Octavam; & certis aliis diebus in Ordinario adnotatis. Et propter hoc dicit Constitutio, quòd Fratres audito primo signo dicant Officium de Beata Virgine, pro tempore, & non semper: propter illos dies, in quibus intermittitur; quamvis & illis diebus ex devotione in privato, semper dici debeat, eò præsertim, quòd beatæ memoriæ Pius V. illud devotè recitantibus quando non tenentur, concessit centum dies indulgentiarum litteris Apostolicis.

(d) *Matutinas autem, & Missam, & omnes Horas Canonicas simul audiant Fratres.* ) Declaramus, quòd omnes Fratres Clerici simul in Ecclesia Missam Conventualem debent audire, & Horas Canonicas dicere; quia Ecclesiæ nostræ sunt Conventuales: nisi Prælatus cum aliquibus propter honestas, & legitimas occupationes voluerit dispensare, ut privatas Missas audiant, & in privato Officium dicant.

Declaramus autem, quòd Fratres Sacerdotes, si à celebratione Sacrosancti Sacrificii Missæ sint legitimè impediti, debent illi aliàs cum magna devotione interesse: & quæ à Sacerdote in Missa dicuntur, quantum fieri poterit, attendere audire, sicut fuit ordinatum Barcinonæ 1574. & Romæ 1589., quia valdè irreligiosum est, quòd Frater quotidie, maxime quando est in primo, non audiat Missam. Nec super hoc debet Prælatus de facili dispensare, sed potius per penitentias debet Fratres ad audiendam quotidie Missam compellere. Si qui autem sint, qui vel senio confecti, vel aliqua infirmitate, vel quocumque alio impedimento detenti celebrare non possunt; teneantur saltem in qualibet Generali Communione sacram Eucharistiam sumere, confessione sacramentali præmissa. Communionem verò Generalem haberi volumus tempore Adventus, & Quadragesimæ singulis diebus Dominicis: reliquis verò temporibus ad minus de quindena in quindenam, & aliis quibusdam solemnitatibus, arbitrio Prælati determinandis, sicut fuit ordinatum Barcinonæ 1574. & Romæ 1589. Horæ autem Canonicae, quando in privato dicuntur, taliter recitari debent, ut ille qui dicit, nisi sit surdus, vocem propriam possit audire.

Debet etiam quilibet distinctè, tractim, & cum debitis punctis, & attentione tam in Choro, quam extra Chorum, Divinum Officium persolvere. Non requiritur tamen actualis attentio per totum Officium, nec sufficit sola habitalis: sed requiritur virtualis attentio, quæ ex primo proposito per totum Officium continuatur; quando scilicet quis ponit se ad dicendum Officium cum intentione attendendi ad illud, vel saltem solvendi suum debitum, quo obligatur ad Officium recitandum: etiam si frequenter intra ipsum Officium ex quadam infirmitate & negligentia distraharur: dum tamen con-

traria intentio (scilicet nullo modo volendi attendere) non interveniat. Sed si quis dicendo Officium, per magnam ejus partem occuper se in aliquo exercitio manuali distractivo, talis non continueret virtutalem attentionem, nec præcepto Ecclesiæ satisfaceret.

Fratres autem Converfi, quia vocati sunt ad officia corporalia, & ut in sudore vultus sui vescantur pane suo, ad prædicta non tenentur: sed sufficit eis audire Missam privatam sine nota, & loco Officii, sua Pater noster, & Ave Maria dicere. Nec debent propter particulares devotiones opera corporalia dimittere, sed in ipsis se debent continuè exercere. Ad Completorium tamen, & ad Salutationem B. Virginis, nisi eos magna excuset necessitas semper cum aliis debent venire. Item declaramus, quòd sicut Clerici seculares, qui non sunt in sacris, si sint Beneficiati, tenentur & obligantur dicere Officium; ità & quilibet Religiosus Clericus, qui ex Eleëmofynis vivit, & ab Ordine provisionem victus, & vestitus habet, tenetur de necessitate salutis Officium dicere. Nec in hoc potest cum eo Prælatus dispensare, nisi fortè sit Novitius, qui non est adhuc Religioni obligatus, nec fortè scit Officium recitare. Debet tamen aliquas orationes pro satisfactione loco Officii dicere. Et debent Fratres libentius in Ecclesia Officium dicere, quam extrà, propter devotionem loci, propter præsentiam Divinissimi Sacramenti Corporis Christi, propter Reliquias Sanctorum, propter Angelos assistentes, propter societatem Fratrum, & denique propter majorem diligentiam, quæ in Officio dicendo solet ibi apponi quam extrà. Ideo non sunt querendæ occasiones, vel licentiæ de facili recedendi a Choro: sed omnes simul ad Officium dicendum, debent in Ecclesia, & Choro convenire. Quapropter in Cap. Placentino 1310. sic dicitur: Volumus, & ordinamus, ut nullus Frater, etiam prætextu Prælationis, vel lecturæ præteritæ, seu alterius officii cujuscumque, à communibus Fratrum obsequiis, & officiis, seu à Choro aliquatenus sit exemptus. Gratiæ autem quibuscumque super hoc hæcenus per Priores Provinciales, vel inferiores eis concessas, ordinatione præfenti penitus revocamus. Et in Capitulo Avenionen. 1561. statutum fuit: Nullus Frater nostri Ordinis, ratione paternitatis, aut alterius gradus exemptionem prætereundere possit à sequela Chori, aut aliis gravaminibus Ordinis, Magistris in Theologia Provinciarum, Lectoribus actu legentibus, & Prædicatoribus actu prædicantibus, dumtaxat exceptis. Circa quos tamen legitimè consuetudines Provinciarum observentur. Prædicatores autem actu prædicantes illi intelliguntur, qui in aliquo Conventu designati sunt ad conciones habendas per totum annum, easque continuò diebus Dominicis, & festivis habent; sicut fuit declaratum in Cap. Avenion. 1561. Lugduni 1536. Venetiis 1542, Valentiaë 1596. & confirmatum in Cap. Generali Parisien. 1611. Quod si in aliqua Provincia mos est, ut nec etiam Prædicatores actu prædicantes sint exempti a Choro; observetur circa eos hujusmodi consuetudo, ut in eodem Capitulo ordinatum est. Additum est etiam istud Venetiis 1592. Reliqui verò tam Lectores, quam Prædicatores nullis prorsus gaudeant privilegiis, & exemptionibus, sed ad sequelam Chori die, nocturne, & ad cætera communia Fratrum officia, ac gravamina, nec non ad Hebdomadariam respectivè teneantur: nec eis exemptionibus gaudere illos permittant Prælati, sub pœna absolutio-

nis a suis officiis, & privatione vocis activæ, & passivæ.

(e) *Nisi cum aliquibus Prælatus aliter dispensare voluerit.* ) Declaramus, quòd Prælati sicut possunt Fratres ex causa rationabili dispensare à Choro, ita possunt eos dispensare quoad proprietatem officii, quæ inducta est ab Ordine: non tamen possunt eos dispensare quoad substantiam Officii, quin illud dicant Fratres quoquo modo, utpote, quando deberet fieri de feria, possunt ex aliqua honesta, & devota causa dispensare, quod fieret de aliquo Sancto Officium trium lectionum, vel novem, vel sicut fit de festo Duplici, & supra. In quo casu Fratres, qui non dixerunt Officium Beatæ Virginis in Choro, tenentur illud dicere in privato. Item declaramus, quòd Fratres tenentur ex præcepto semel in Hebdomada totum Officium Defunctorum dicere, cum dicti debet infra Hebdomadam in Choro, omni antiqua consuetudine rationaliter prætermissa. Nam in Capitulo Salmanticensi. 1551. auctoritate Apostolica statutum fuit tam de Officio Defunctorum, quam de Litanis hoc modo: Absolvimus tam Chorum, quam Ministros Altaris ab obligatione recitandi Vigiliæ trium Lectionum pro mortuis, prout hætenus observatum est. Et in recompensationem, pro debito iustitiæ, & charitatis, ordinamus, & ita servari volumus, ut nullis Festis aut Octavis etiam Solemnibus obstantibus ( præter Octavas Paschæ, & Pentecostes ) totum Officium pro ipsis Defunctis cum novem lectionibus qualibet Hebdomada semel ab omnibus, & singulis Fratribus tam in Choro, quam extra existentibus perfolvatur. Et manè sequenti, pro ipsis una Missa de Requiem canetur, si non sit dies multum sollemnis: aliàs canetur Missa ordinaria, cum Oratione: *Omnipotens sempiterne Deus, qui vivorum dominaris &c.* & cum aliqua processione per claustrum, vel per Ecclesiam, cum Responsorio, vel Responsoriis &c. & hoc inviolabiliter in omnibus Conventibus Ordinis nostri observetur: super quo tam Prælatorum, quam Cantorum conscientias oneramus. Qui etiam curent, ut tali die, & hora, prædicta fiant, quibus omnes possint melius interesse. Ad quæ omnes, & singuli teneantur, etiam Magistri, & actuales Lectores, suis dispensationibus non obstantibus.

Item declaramus Litanias debere dici in Choro quando fit de feria, prout hætenus factum est; sed in eis non repetatur à Choro nomen alicujus Sancti, sed solum respondeatur: *Ora pro nobis.* Neque dicantur post Matutinas, sed in serò præcedente post Completorium, ubi melius omnes Fratres conveniunt. Qui autem non convenierint, vel extra Conventum fuerint, ad eas minimè teneantur. Item quòd in ipsis Litanis nomina Sanctorum, qui non habentur in Ordinario à nemine apponantur, & apposita deleantur.

Pro singulari autem Ordinis nostri erga Beata Virginem, ejusdem Ordinis Patronam devotione, & ut pro innumeris ab ejusdem Virgineis manibus acceptis beneficiis aliquales gratias rependamus, & Ordo noster (cujus singulari favore, ac beneficio procreatus est) ipsius patrocinio protegatur: volumus, & ordinamus, ut in omnibus nostri Ordinis Conventibus, locis, domibus, ac Monasteriis, etiam Monialium, ejusdem Deiparæ Virginis Litanie singulis diebus Sabbati, prout in multis nostri Ordinis

Conventibus, pie fieri jam consueverat, post Salve Regina decantentur. Item ut Octavæ solemnes festi Sanctissimi Rosarii mense Octobri celebrentur, ita tamen, ut Festum Angelorum non prætermittatur.

Ut autem cultus ergà Divinissimum Eucharistiæ Sacramentum magis elucescat, confirmamus illam jam in multis Capitulis Generalibus sancitam Ordinationem: ut videlicet in diebus Cænæ Domini, & Parasceves antè sepulchrum, ubi Sacratissimum Christi Corpus asservatur, à nostris Fratribus cum devotione, & religiosa gravitate, vigiliæ fiant: quod & fieri, ac diligentissimè observari volumus, quoties Sanctissimum Eucharistiæ Sacramentum publicè adorandum proponitur. Præcipimus etiam omnibus Conventuum nostrorum, & Provinciarum Præsidentibus, ut singulis septimanis Sacrosancti Eucharistiæ Sacramenti formæ, seu particule, etiam illæ, quæ secularibus porrigi solent, qua par est reverentia, inspectione, ac munditia, prout tantum Sacramentum decet renoventur. Et quoties Sacerdos ad thurificandum Altaria cappa, seu pluviali indutus procedit, stolam deferat. Bononiæ 1615.

## I I.

**H**Oræ omnes tam diei, quàm noctis in Ecclesia (f) breviter, & succinctè taliter dicantur; ne Fratres devotionem amittant, & studium eorum minimè impediatur. Quod ita dicimus esse faciendum, ut in medio versus metrum cum pausa servetur: non protrahendo vocem in pausa, vel in fine versus; sed sicut dictum est, breviter & succinctè terminetur. (g) Hoc autem magis, & minus pro tempore observe-

(f) *Breviter, & succinctè* ) Declaramus, quòd Divinum Officium debet cantari devotè cum quadam dulcedine, & suavitate vocis, non cum rigiditate, nec cum asperitate, nec nimis altè, sed voce mediocri. Brevitèr, hoc est, distinctè, expeditè, & non nimis morosè. Debet etiam dici succinctè, hoc est sine caudis, & protractione vocis in pausis, vel in fine versus; & hoc ne Fratres devotionem amittant, si festinanter, confusè, & sine pausis: & non tractim, & distinctè dicatur, & ne etiam studium eorum impediatur, si nimis morosè, & cum caudis, & protractione vocis in medio, vel in fine versus decantetur. Et quando versus est longus, debet fieri duplex causa inter principium, & finem versus; una brevis, seu minor, & alia major in medio versus: & hujusmodi pausæ fiunt propter resumptionem anhelitus, & propter decentiam, & decorem psalmodiæ. In fine autem versus non debet fieri pausa inter versum, & versum, quamvis non debeat incipi sequens versus, antè terminationem versus præcedentis. Pulchritudo enim Officii consistit in pausis, & deturpatio ejus consistit in festinatione, & confusione, quæ causatur per remotionem pausæ. Prolixitas autem Officii causatur ex protractione vocis in medio, vel in fine versus. Et idè ut Officium tractim, & distinctè, & devotè dicatur; pausæ sunt faciendæ, & caudæ amputandæ.

(g) *Hoc autem magis, & minus pro tempore observetur.*) Declaramus, quòd pro varietate dierum est major, vel minor solemnitas in Officio Divino observanda. In diebus enim festivis est Divinum Officium cum majoribus pausis celebrandum, quia tunc Fratres sunt minus in studio, & lectionibus occupati; & etiam seculares in præfatis diebus solent magis ad Divinum Officium convenire; & etiam illis diebus magis tenemur Deo vacare, quia ad hoc tales festivitates sunt institutæ. Ideò illis diebus devotè, alacriter, & solemniter Divinum Officium decantandum est: aliis vero diebus poterit minus solemniter, & cum minori pausa, tractum tamen & distinctè, ac devotè celebrari.

## III.

**T**Empore quo bis reficiuntur Fratres, (b) legatur antè Completorium in Ecclesia lectio: Fratres sobrii estote, &c. (i) & facta confessione, & dicto Completorio, det qui præest benedictionem; (k) & Hebdomadarius aquam aspergat benedictam, (l) postea dicatur Pater noster, & Credo in Deum; quod etiam fieri debet ante Primam, & Matutinas.

(h) *Legatur in Ecclesia Lectio: Fratres sobrii estote, &c.*) Declaramus, quòd quando in Ecclesia antè Completorium legitur lectio: *Fratres sobrii estote &c.* debet præmitti: *Jube Domine benedicere*: & Hebdomadarius subungere benedictionem; ad quam omnes Fratres inclinare debent usque ad genua, sicut ad benedictionem, quæ datur antè Lectionem in Refectorio, in prandio, & in cæna. Sicut declaratum fuit Salmanticæ 1551.

(i) *Et facta confessione, & dicto Completorio, det qui præest benedictionem*) Declaramus, quòd quando plures Prælati sunt in Choro, ille qui præest aliis loco, debet dicere *Confiteor*, & dare benedictionem: & in fine Horæ *Fidelium* dicere, cum gravitate, & tali voce, ut possit ab omnibus audiri. In domibus autem, seu Vicariatibus locorum, si Prior Conventualis fuerit præfens, præcedere debet Vicarium, & dicere *Fidelium*, etiam ipso Vicario præfente: sicut fuit ordinatum Barcinonæ 1574. In absentia autem Prælatorum, & Supprioris, Hebdomadarius omnia illa prædicta facere debet. Qui etsi non præsit aliis loco, præest tamen eis pro tunc officio, & auctoritate. Item declaramus, quòd in fine cujuslibet Horæ, quando post ipsam non est immediatè alia Hora, neque Missa dicenda; debet dici *Fidelium*, & statim post *Pater noster*, flexis genibus, debent Fratres dicere: *Salve Regina &c. Pie Pater Domine, &c.* cum versibus, & orationibus notatis. Quando verò Missa Conventualis dicitur post aliquam Horam, & alia Hora non sequitur; debet immediatè post Missam dici *Fidelium*, & *Salve Regina*. Si verò Missa fuerit de Mortuis, dicto *Requiescant in pace*, & responso, *Amen*, debet dici *Pater noster*, & *Salve*, ut supra: sicut fuit ordinatum Bononiæ 1252. & apud Lemovicum 1384.

(k) *Et Hebdomadarius aquam aspergat benedictam.*) Declaramus, quòd in festis Duplicibus, & supra, & quando fit de B. Virgine, & infra Octavas Solemnès, & quando in Choro non recitatur Officium quotidianum B. Vir-

ginis; statim post Completorium de Tempore, hora populo opportuna, debet cantari Antiphona. *Salve Regina*. Cujus in Ecclesia processionaliter decantandæ institutio cum ipso Ordine à Sancto Patre nostro Dominico ortum habuit: sicut fuit denunciatum Barcinonæ 1574. In aliis verò diebus, quando in Choro recitatur Officium quotidianum Beatissimæ Virginis, prædicta Antiphona post Completorium ejusdem Virginis Beatissimæ decantari debet. Ad quam sanè processionem omnes Fratres, etiam quocumque modo à Choro exempti debent convenire; tum propter devotionem erga sacrosanctam Deiparam specialem Ordinis nostri Advocatam, tum propter Indulgentiam ducentorum dierum, omnibus non solum Religiosis, sed etiam secularibus, qui adsunt in Ecclesia dum prædicta Antiphona cantatur, à Paulo Quinto concessam: ut fuit denunciatum Romæ 1608. Quando autem Fratres processionaliter procedendo fuerint in Ecclesia laicorum, debet Hebdomadarius aqua benedicta Fratres omnes aspergere, incipiendo à Choro dextro; nisi major Prælati, qui loco omnes alios Fratres præcederet, esset in Choro sinistro: quia tunc ille primò esset aspergendus, & postea Chorus dexter. Et idem faciendum est in thurificatione, ut scilicet post eum, qui facit officium, & Acolythos, & Cantores, Prælati, qui superiorem locum inter alios Fratres tener, si fuerit in sinistro Choro prius thurificetur, & deindè Chorus dexter. Si autem Prælati, qui est in sinistro Choro haberet aliquem Fratrem Magistrum supra se, tunc aspergendus, & thurificandus esset prius Chorus dexter. Sed si Magister Ordinis (qui in sua semper sede manere debet) fuerit in Choro, thurificato eo qui fecit officium existente in Choro sinistro, debet thurificari ipse Magister Ordinis, deindè Acolythi, ac postremò alii per ordinem.

(l) *postea dicatur Pater noster, & Credo in Deum.*) Declaramus in Capitulo Bononiensi 1564. & in quamplurimis aliis Capitulis ordinatum fuisse, ut post *Pater noster*, & *Credo in Deum*, recitata in fine Completorii, Fratres in Choro persistant ad orationem mentalem saltem per quartam partem horæ. Quæ sanè Oratio post Completorium singulis diebus, & post Matutinas hyberno, post Nonam verò ætivo tempore habenda est. Curent igitur diligenter Prælati, ut tam salubris institutio, ubi jam est inducta servetur: ubi verò intermissa est, omninò restituatur. Quod si in ea re fuerint negligentes, à suis Provincialibus, vel à Visitatoribus corripiantur; sicut fuit ordinatum Romæ 1571. Barcinonæ 1574.

## I V.

**T**Otum Officium, tam diurnum, quam nocturnum, secundum correctionem, & ordinationem Venerabilis P. F. Humberti Magistri Ordinis nostri confirmamus, & volumus uniformiter ab omnibus observari: (m) ità quòd nulli liceat aliquid de cætero innovare. (n) Fratres nostri non habeant in domibus nostris, nisi unam campanam ad omnes Horas. Solus Hebdomadarius tam in Choro, quam in processione cappa serica utatur.

(m) *Ali-*



(m) *Aliquid de cetero innovare.* (Declaramus, quòd Magister Ordinis non potest aliquid innovare circa Divinum Officium ad durandum perpetuò per modum Constitutionis, vel consuetudinis generalis: sicut non potest tollere consuetudines communiter approbatas, & observatas in Ordine, neque novas inducere. Potest tamen ex devotione, vel ex alia causa rationabili in aliquo Conventu, vel aliqua Provincia dispensare, quòd ad horam aliquid immutetur circa proprietatem Officii, inductam ab Ordine: puta, quòd fiat de aliquo Sancto festum Simplex, vel Duplex (obtentò tamen prius Sacrae Rituum Congregationis consensu): servato quoque ordine secundum correctionem Magistri Humberti inducto: videlicet si sit Confessor, dicantur Psalmi, Hymni, Versiculi, & Responsorialia de Confessore; si verò fuerit Martyr dicantur Psalmi, Hymni, Versiculi, & Responsorialia de uno Martyre, & sic de reliquis. Salmanticae etiam 1551. Apostolica auctoritate fuit ordinatum Officium commune unius Sanctae nec Virginis, nec Martyris, sicut in nostro Brevario habetur, & Bononiae institutum 1615. quòd sequitur: Unanimi omnium nostrum voto, pro omnibus nostris Provinciis statuimus, ut festum de Angelo Custode sub Toto Duplici (Officio B. Virginis Mariae non praetermisso,) singulis annis celebretur. Item S. Caroli Borromaei festum 4. Novembris volumus à Fratribus nostris, & Sororibus sub Toto Duplici celebrari. Circumcisionis quoque Dominicae festivitas sub Toto Duplici in posterum celebretur, ibidem Bononiae 1615. & SS. Virginis ad Nives die 5. Augusti, & S. Francisci 4. Octobris, utrumque sub toto Duplici; sicut & Festum Cathedrae S. Petri sub Duplici. Vallisoletani 1605. In omnibus autem Conventibus, ubi viget studium Artium simul, & Theologiae; singulis quartis Feriis fiat Officium de S. Thoma Aquinate; eodem modo, quo in tertiis Feriis fit Officium de S. Dominico; excepto si in Feria quarta occurrat Festum 3. lectionum, quòd ad quindecim dies differri non possit, quia tunc de eo fiet Officium, cum memoria de S. Thoma Aquinate. Parisiis 1611. Neque etiam in Officio quotidiano B. Virginis memoria S. P. Dominici unquam intermittatur, etiam si de eo in Choro agatur; ibidem Parisiis.

Modò verò hæc Festa superius recensita celebrari debent secundum illam solemnitatem, quam habent in Calendario a Sacra Rituum Congregatione, & Summo Pontifice recenter approbato.

(n) *Fratres nostri non habeant in domibus nostris nisi unam campanam.* j Declaramus, quòd in principio Ordinis in domibus nostris non habebamus, nisi unam campanam, ut notatur in *cap. Nimis primo; Extra de excess. Prælat. & in cap. Patentib.* de Privilegio secundum Hostien. & Panormitanum. Sed huic Constitutioni derogatum est, per contrariam consuetudinem quasi generalem non quidem temerè inductam, sed ad excitandam Christiani populi devotionem; quæ cum jam præscripterit, vim sine dubio legis obtinuit. Servatur tamen hæc Constitutio quoad hoc, quòd in diebus non solemnibus, unam tantum campanam pulsamus ad omnes Horas. In festis autem Duplicibus, & supra, ad excitandam populi devotionem pulsamus campanas in Matutinis, & ad Missam Conventualem.

Item declaramus, quòd Innocentius XI. Pontifex Maximus, per Breve, quòd incipit: *Exponi nobis nuper fecit* &c. Datum Romæ die 12. Februarii Anno 1685 concessit; ut Fratres nostri in suis Conventibus, sive Ecclesiis ubicumque locorum existentibus, plures, & quotquot Magister Generalis pro tempore existens, sive Prior Provincialis cujuslibet Provinciae respective determinaverit, Campanas habere, illasque ad excitandam populi devotionem, liberè, & licitè pulsare valeant.

Ordinamus etiam, & ubique ab omnibus prorsus observari volumus, ut Sacerdotes in nostro Ordine post Missam legant Evangelium: *In principio erat Verbum* &c. & etiam ubique in sacro Missæ sacrificio, etiam non solemnì, vel majori accendatur cereus in confectione, & elevatione Sanctissimi Sacramenti Corporis Christi, & aliquor ictibus campanulae admoveatur populus, quo devotius tantum Sacramentum adorare possit; sicut fuit ordinatum Romæ 1589. Ne autem dum nimium secularium devotioni indulgemus, inordinatus à nobis cultus Deo Optimo Maximo reddatur, cum præsertim paupertatis, & instituti nostri memores esse debeamus, utpotè divina Officia ex præscripto nostrarum Constitutionum, cantu Choralì breviter, & succinctè pro qualitate tamen, & varietate solemnitarum taliter persolvantur, ne Fratres devotionem amittant, aut eorum studium impediatur: districtè præcipimus conscientiam Prælatorum aggravantes, ut musicæ in Ecclesiis nostris, quam moderatissimæ fiant, neque liceat eisdem Musicis, seriem nostri Officii contra præscriptum Ordinarii nostri immutare, aut immutare. Cumque domum Dei deceat sanctitudo, ac indè nedum profana, sed etiam religiosa spectacula, sive repræsentationes arcendæ sint; præsertim cum pio illi loco, qui Domus orationis est, minimè congruant: idcirco ab Ecclesiis, & Cæmeteriis nostris sub pœna gravioris culpæ, tam Prælati, quam subditis eliminanda præcipimus, quacumque in contrarium consuetudine, quæ potius abusus est, non obstante. Bononiae 1615.

Cæterum, ut in Divinis observandis, recitandisque uniformitas, juxta præscriptum nostrarum Constitutionum ubique ab omnibus fervetur, plurima à Capitulis Generalibus circa Ecclesiarum venerationem, Altarium ornatum, & sacrificii Missæ celebrationem ordinata fuerunt, præter ea, quæ in Ordinario, & Missali præscripta sunt.

1. Imprimis in Ecclesiis Fratres, nec inter se, nec cum secularibus confabulantes deambulent, maxime in prospectu Sanctissimi Sacramenti, & præsertim coram secularibus. Romæ 1571. Barcin. 1574. Romæ 1580.

2. Ecclesiæ ad eum modum mudentur, & ornentur; ut in eis nihil sit, quòd domum Domini dedecet: vel advenientium oculos offendant.

3. Altaris consecrati mensa decenter strata, ornata, munda sit: tribusque mappis lineis, & mundis cooperta; quæ etiam habeat coopertorium coriaceum, vel ex crassiori, & colorata tela, ut à pulvere, & aliis immundiciis mappæ præserventur.

4. Altaria portatilia ex perpolito lapide, integra, longitudinis unius palmi cum dimidio, latitudinis verò unius palmi ad minus, non computato ornamento ligneo, in medio mensæ Altaris

taris aptè inserta sint: ut non nihil emineant è superficie mensæ; quo Sacerdotis tactu possint dignosci.

5. Corporalia latitudinis duorum palmorum, longitudinis verò duorum, & dimidiū ad minus è tela candida, linea, pura, & simplici; nihil elaborati, aut serico intexti habeant. Hæc vero, & purificatoria, & strophiola sæpius laventur.

6. Bursa Corporalium ex una parte crucem, vel imaginem aliquam sacram, ex altera verò verba consecrationis in scheda descripta (ubi tabellæ non sunt in Altari eadem continentes) intrinsecus serico, aut tela tenui fulciantur.

7. Ampullæ nonnisi è vitro, non depictæ, sed perlucido, opercula stannea, vel argentea, vel alia habeant.

8. Confessionalia à lateribus Ecclesiæ extrà Chorum, locis decentibus cum fenestellis crate aliqua distinctis aptè collocentur.

9. In Sacristia quatuor Tabellæ appendantur: in quarum prima, Processus anniversarius Bullæ Cænæ Domini; in secunda Casus tam Episcopo, quam Summo Pontifici reservati; in tertia Anniversaria, ad quæ Conventus obligatur; & in quarta Missarum quotidianarum numerus repræsentetur.

10. Divinæ Laudes statutis horis diurnis, nocturnisque debita cum attentione, reverentia, ac devotione à Fratribus omnibus: Matutinæ verò Preces nonnisi noctu persolvantur. Venetiis 1592. Romæ 1589.

11. Sacerdos celebraturus antequàm induat sacras vestes confiteatur, sedente Confessore, & illo genuflexo, & capite discooperto.

12. In introitu Missæ usque ad inceptionem *Gloria in excelsis*, ubi deponuntur manus, & postea usque ad ejus terminationem inclusive: deindè in *Graduali*, *Offertorio* prosecutione *Credo*, in principio *Canonis* usque ad *Communicantes*, præmissis benedictionibus &c. manus conjungantur. Ad *Dominus vobiscum*, *Oremus*, *Offertorium* aperiendæ primum, deindè claudendæ sunt: in reliquis attendatur forma ab Ordinario præscripta. Romæ 1569.

13. Missa nec celeriter, nec morosè, voce mediocri, devota, quæ à secularibus audiat: *Secreta* verò, & *Canon*, & præsertim verba consecrationis, submissè dicantur. Valentia 1596. Romæ 1569.

14. *Kyrie*, Sacerdos cum serviente alternatim dicat. Valentia 1596.

15. In Missa tam privata, quam communi, neque inter *Kyrie*, neque inter *Gloria in excelsis* quidquam quod in Missali descriptum non est, interponatur: in reliquis etiam, nihil quod in Ordinario notatum non est, misceatur. Salmantica 1551.

16. Quando pulsantur Organa in Missa, *Gloria in excelsis* à Choro & Organis alternatis: *Credo* autem sine Organis, totum à Choro dextro, & sinistro, vel à Cantoribus, & Choro, alternatis videlicet versibus decantetur. Salmantica 1551. Ad *Gratias agimus tibi*, Fratres usque ad genua inclinent. Romæ 1589.

17. Prophetiam in Missa majori Acolytus, Epistolam Subdiaconus sacris indutus, nec ullo modo alius non ordinatus dicat. Bononia 1564.

18. Epistolam Sacerdos manibus super Altare, vel super librum cancellatis recitet. Valentia 1596.

19. Ad verba in Symbolo: *Et Homo factus est*, omnes genua flectant. Constit. infra Cap. II. Text. 4.

20. In consecratione, & elevatione SS. Sacramenti cereus accendatur, & aliquot ictibus campanulæ populus admoneatur. Romæ 1580. confirm. 16. & 1589. ord. 4.

21. Post consecrationem Hostiæ, & Calicis quoties Sanctissimum Sacramentum manibus tractandum fuerit, Sacerdos antè acceptionem, & post depositionem illius genua flectat. Parisiis 1611. ord. 3. & Romæ 1612.

22. Post sumptionem Sacramenti à Sacerdote dicto, *Quod ore sumpsimus*: neque *O Sacrum*, neque *Nunc dimittis* dicatur. Salmantica 1551. Bina ablutio à Sacerdote sumatur. Neapoli 1600.

23. In Missa Defunctorum Benedictio non detur. Romæ 1608. & Parisiis 1611. confirm. 3.

24. Post Missam Sacerdos Evangelium *In principio* dicat, exceptis Dominicis, & feriabilibus diebus, si in eis Missa, vel votiva, vel de Sancto celebratur: tunc enim Evangelium dici recitabitur. Romæ 1589. ord. 3.

25. Corporale, nonnisi post Evangelium *In principio*, & non antè complice Sacerdos. Salmant 1551.

26. Ut omnia ista servantur, Provinciales irvigilent. Romæ 1569.

Declaramus insuper ordinatum fuisse in Capitulo Mediolanensi 1622. ord. 1. ut PP. Sacerdotes ad Altaria, ubi Corpus Christi affervatur Sacrum facientes, dicturi *Dominus vobiscum*, paulisper ad sinistram cornu declinent, ne Sanctissimo Eucharistiæ Sacramento terga obvertant. Similiter in confessione, quæ fit in inchoatione Missæ, ubi dicitur *Confiteor Deo*, addatur *Omnipotentii*. B. Mariæ, addatur *semper Virgini*. Romæ 1629. ord. 4. Beato Dominico, addatur *Patri nostro*, ibidem 1644. ord. 2. & in Missa pariter Beati Dominici in Feriis Tertiis, post ultimum Alleluja, debent dici postremi Versus Sequentiæ ejusdem: apud Nurembergiam 1405 Reliqua, quæ vel ad integritatem, vel ad solemnitatem Missæ Sacrificii pertinent, in Rubricis Missalis, vel Ceremoniario Ordinis videnda sunt.

## CAPUT II.

### De Inclinationibus.

(a) **F**initis Matutinis de B. Virgine, quando Fratres in Chorum venerint, inclinent antè Altare profundè: & cum ad sedes suas venerint, facto signo à Prælato (b) flexis genibus, & prostrati super formas, (c) vel inclinati profundè pro tempore, dicant Pater noster, & Credo in Deum. Iterum facto signo à Prælato surgant. Horâ itaque devotè inceptâ, versî ad Altare muniant se signo crucis, & ad Gloria Patri inclinet Chorus contra Chorum profundè; vel prosternant se pro tempore usque ad Sicut erat. Hoc etiam faciendum est, quoties Pater noster, & Credo in Deum dicuntur: nisi in Missa, & antè Lectiones, & in gratiarum actione, in quibus inclinamus solum ad utrumque Pater noster, & ad orationem Retribuere. Idem etiam faciendum est ad primam Collectam in Missa, & ad Postcommunionem, & similiter ad Orationem pro Ecclesia, & in singulis Horis ad Collectam, & ad Gloria Patri, quoties in inchoatione Horæ dicitur.

(a) *Finitis Matutinis &c.* ) Declaramus, quodd quando primum Fratres Chorum intrave-  
runt, vel præsentaverint se ante Divinissimum  
Eucharistiæ Sacramentum, etiam transeundo;  
non solum profunda inclinatione, sed etiam  
genuflexione reverenter illud adorare debent:  
tum propter majestatem Dei, tum propter præ-  
sentiam Sacrosancti Corporis Christi, tum eti-  
am propter sanctitatem Altaris. Romæ 1569.  
ord. 2. Et Barcinonæ 1574. confirm. 4. idem  
fuit confirmatum istis verbis: Item confirma-  
mus, & omnino observari volumus, quod jam  
ab universo Ordine est receptum, & in multis  
Capitulis decretum, & approbatum fuit de  
adoratione Divinissimi, & Augustissimi Altaris  
Sacramenti, non solum profunda inclinatione,  
sed etiam genuflexione.

(b) *Flexis genibus, & prostrati super for-  
mas.* ) Declaramus, istam genuflexionem, &  
prostrationem super formas esse, quando flexis  
genibus cum cubitis, & corpore procumbimus,  
& prosternimur super formas, vel super genua  
quando non habemus formas: quæ faciendæ sunt  
quotiescumque fit de feria extra Tempus Paschale  
ad *Pater noster*, quando recitatur ante incho-  
ationem cujuslibet Horæ; & ad primum *Gloria  
Patri* post inchoationem Horæ, & ad primam  
Collectam, & ad præces, quæ dicuntur ante  
ipsam. Et quotiescumque extra Missam *Pater  
noster*, & *Credo in Deum*, & *Confiteor* recitan-  
tur, sive conjunctim, sive disjunctim, sive in  
principio, sive in medio, sive in fine Officii:  
præterquam ad *Pater noster*, cum recitatur ante  
lectiones; & inter *Præloiosa*, & gratiarum ac-  
tiones, ubi solum inclinamus profundè. Item eo-  
dem modo genuflexi prostrationem facimus ad  
*Pater noster*, cum dicitur post *Fidelium*: in Gra-  
tiis quando extra Tempus Paschale fit de Feria,  
si ad Horam immediatè præcedentem prostra-  
tiones sint faciendæ. Et eodem modo fit prostra-  
tio ab eo, qui legit lectionem in Matutinis:  
post finitam lectionem, inter pulpitem, & gra-  
dus presbyterii: nisi in die Animarum, ubi in-  
clinant solum profundè. Eadem prostratio ex-  
tra Tempus Paschale fit, in omnibus diebus Fe-  
rialibus in Missa de Feria, pro Defunctis ad pri-  
mam Collectam, quæ sequitur post *Dominus vo-  
bis cum*, & ad Orationem pro Ecclesia, & ad Post-  
communione: similiter per totam. Quadra-  
gesimam in festo cujuslibet Sancti, in Missa de  
Feria, prostrationes eodem modo fiunt. Item  
Feria Quinta in Cæna Domini, & Feria Sex-  
ta in Parasceve, & Sabbato Sancto finitis Ma-  
tutinis post *Kyrie*, & *Versiculos*, & *Mortem  
autem Crucis*, prostrationem faciant Fratres  
super formas, quousque recitaverint *Pater  
noster*, & *Miserere*, & Orationem *Respice*. Item  
in Parasceve, & Sabbato Sancto, eodem mo-  
do Fratres prostrationes faciant, sicut in aliis die-  
bus ferialibus, & etiam ad *Miserere*, quod re-  
citatur post Antiphonam cujuslibet Horæ. Item  
quotiescumque recitatur Officium Mortuorum  
extra Tempus Paschale, & fit de Feria, Fratres in  
Choro jaceant prostrati: ad *Pater noster*, cum re-  
citatur post Antiphonam ad Magnificat, & ad totum  
Psalmum *Lauda anima mea* &c. in Vesperis Defun-  
ctorum; & ad primam Orationem, & ad *Pater noster*  
post *Requiescant in pace*. Et idem fieri debet in  
Laudibus post Antiphonam ad *Benedictus*, & ad  
Psalmum *De profundis*. Item eodem modo fit pro-  
stratio, quotiescumque dicuntur Litanie in Cho-  
ro: à principio Psalmi *Deus in adjutorium*, us-  
que ad ultimam Orationem.

Similiter quando fit disciplina, à *Confiteor* us-  
que ad finem Orationis. Similiter in die Cine-

rum, & in die Cæna Domini ante Missam Fra-  
tres in Choro prostrationem super formas fa-  
ciant, dum recitantur Psalmi Penitentiales. Si-  
militer quotiescumque Prælati faciunt generalem  
absolutionem, Fratres prostrationem faciunt di-  
cendo, *Confiteor*. Similiter quando Diaconus  
ante Communionem, vel post desert pixidem,  
in qua est Corpus Christi; & quotiescumque  
aliis Fratribus existentibus in Choro, hoc Sa-  
cramentum defertur. Similiter dum fit Com-  
munion, Fratres in Choro existentes, prostra-  
tiones super formas faciant. Item in Parasceve in  
Missa ante adorationem Crucis, quando Prælati  
detegens Crucem, & elevans incipit Antipho-  
nam, *Ecce lignum Crucis*: in ipsius inchoatio-  
ne omnes Fratres genua flectendo prosternant  
se super formas. Et idem faciant, dum post  
adorationem elevans ipsam incipit Antiphonam  
*Super omnia*: quousque Cantor prosecutionem  
Antiphonæ incipiat; similiter quando ille, qui  
legit Passionem pronuntiaverit *emisit spiritum*,  
Fratres prostrationem faciunt super formas,  
Deo devotè gratias agendo; quousque Sa-  
cerdos signum fecerit. Item Ferialibus die-  
bus omni tempore in Missa jaceamus prostrati  
super formas, postquam cantatum est *Sanctus*,  
usque ad *Agnus Dei* exclusivè. In festis  
verò trium, & novem Lectionum, post  
elevationem Calicis, usque ad *Pater noster*  
exclusivè.

(c) *Vel inclinati profundè.* ) Declaramus  
tres esse differentias inclinationum. Prima di-  
citur profunda. Secunda usque ad genua.  
Tertia dicitur inclinatio capitis. Prima est quan-  
do corpus & caput tantum inclinatur, quan-  
tum cubitus potest genibus inherere: & hæc  
faciendæ est ante Altare, quando Fratres in-  
trant Chorum vel exeunt, ut dictum est: &  
quando dicitur *Pater noster* ante Lectiones, &  
infra gratiarum actiones, & ad Orationem *Re-  
tribuere*, tam in Choro, quam in Capitulo; &  
quotiescumque recitatur *Pater noster*, & *Credo*  
in principio, vel in medio, vel etiam in fine  
Horarum: & post gratiarum actiones, & in  
Vesperis, & in Matutinis Defunctorum, & ab  
eo, qui legit, post finitam Lectionem in Ma-  
tutinis inter Pulpitem, & gradus Presbyterii; &  
in festis trium Lectionum, & supra, & ad primam  
Collectam, post *Dominus vobiscum*, sive in Horis, si-  
ve in Missa, & ad Orationem pro Ecclesia, & ad  
primum *Gloria Patri* in inchoatione Horæ, Tem-  
pore videlicet Paschali, & præfatis festis. Item  
faciendæ est profundè, quoties prostrationes  
intermittuntur: videlicet in omni Sabbato, &  
in Vigilia cujuslibet festi novem Lectionum in  
Nona, præterquam in Quadagesima; nam tunc  
etiam in Nona, prædictis diebus prostrationes  
sunt faciendæ. Item intermittuntur in Vesperis  
Sabbati, & Vigiliæ festi novem Lectionum,  
& deinceps usque ad Completorium Dominicæ,  
vel Festi, ubi per totum annum ad Horas, &  
Orationes in Missa, nullæ fiunt prostrationes.  
Similiter in festo trium Lectionum à primis Ve-  
speris usque ad Nonam sequentis diei inclusivè,  
prostrationes non fiunt, nec etiam post Grati-  
arum actiones, quando dictum Festum in die Je-  
junii venerit: similiter quando in Vesperis can-  
tatur Antiphona O, per septem dies ante Vigi-  
liam Nativitatis Domini, intermittuntur pro-  
strationes. Item in quarta Feria Dominicæ in  
Ramis Palmarum in Vesperis, & in Completorio  
prostrationes dimittuntur: & etiam in Cæna  
Domini ad Matutinas, & Horas, & ad Oratio-  
nes in Missa prostrationes non fiunt. Item à Fe-  
ria secunda post Octavam Paschæ, usque ad sex-  
tam



tam Feriam post Octavam Corporis Christi, intermittuntur prostrationes ad Orationes in Missa, ad Matutinas, & ad alias Horas. Item in die Animarum ad Matutinas, & ad Horas, & ad Orationes in Missa, prostrationes non fiant. Item quotiescumque aliquod Festum in jejuniis. Quatuor Temporum venerit, intermittuntur prostrationes: & in Missa de Feria, præterquam in Quadragesima. Item quando in Profetis diebus celebratur *Missa Dominicalis*, quæ in Dominica non fuit celebrata, vel *Missa de Cruce*, vel de *Spiritu Sancto*, vel de *Beatissima Virgine*, vel de aliquo sancto, intermittuntur prostrationes ad Orationes. In prædictis autem diebus, in quibus prostrationes intermittuntur, debent Fratres in Choro vice prostrationis inclinationem profundam facere.

## II.

**A**D omnia autem alia Gloria Patri, & ad extremos versus Hymnorum, & ad penultimum versum Cantici Benedicite, (d) inclinamus usque ad genua. Similiter quando cantatur Gloria in excelsis, ad Suscipe deprecationem nostram: & quotiescumque nomen Jesu in Præfatione, in Collecta, in Antiph. Salve Regina, & in Gloria in excelsis nominatur. (e) Quando verò nomen Jesu aliàs in Choro nominatur, eidem Fratres reverentiam faciant capite devotius inclinato. Item inclinamus usque ad genua in benedictione lectionis, & in Capitulo ad Orationem S. Maria, & in omni Oratione, quando nomen Beatæ Virginis in Antiph. Salve, & in Præfatione nominatur. Idem fiat in qualibet Missa Conventuali, dum dicitur in Præfatione, Gratias agamus Domino DEO nostro: & similiter ad versum, O Crux ave, Fratres reverenter in Choro inclinent, sicut fieri debet, quando nomen Jesu, aut B. M. Virginis Matris ejus in Collecta nominatur.

(d) *Inclinamus usque ad genua.* Declaramus hanc esse secundam inclinationem, quæ dicitur usque ad genua, quando videlicet caput taliter inclinatur, quod sit per directum ad genua oppositum. Et hæc facienda est ad omnia, ad quæ Constitutio præscribit: & ad benedictionem, quæ datur post Completorium. Et ad *Gratias agimus tibi propter magnam gloriam tuam*, quando dicitur, *Gloria in excelsis*: & ad inchoationem Hymni, *Ave maris stella*. Barcinonæ 1574. Declaramus tamen rursus ordinatum fuisse in Capitulis Ulissiponen. 1618. inchoat. 1. Mediolanensi 1622. confirm. 1. & Romano 1629. ordin. 3. ut locò inclinationis profundæ in pronuntiatione Hymni *Ave maris stella*, maneant Fratres genuflexi, usquequo absolvatur prima strophæ.

(e) *Quando verò nomen Jesu aliàs in Choro nominatur, eidem Fratres reverentiam faciant, capite devotius inclinato.* Declaramus hanc esse tertiam inclinationem, quæ dicitur inclinatio capitis, quando simul caput cum corpore aliquantulum inclinatur: & hæc facienda est, quan-

do etiam nomen Jesu extrà Chorum nominatur. Romæ 1558. Item quotiescumque dicitur, *Sit nomen Domini benedictum*, Salamanticæ 1551. Item declaramus, quod etiam devotius inclinamus capite discooperto ad verba in Symbolo, *Qui cum Patre, & Filio simul adoratur*, ut Romæ 1580. inchoatum, & iterum ibidem 1583. confirmatum, & tandem in Constitutionem redactum fuit Romæ 1589. Item caput inclinamus, quotiescumque vel aliquid vestimenti, vel quodcumque aliud Fratri tribuitur: & quando Prælati aliquam commemorationem injunxerit, vel aliquid facere, vel dicere imposuerit. Similiter quando Cantor, vel alius Frater Psalmum, & Antiphonam inchoaverit, debet caput reverenter inclinare. Similiter quando quis transit juxta Prælatus, vel Superiores suos, reverenter caput inclinet. De inclinatione porro ad *O Crux ave*, in sequenti declaratione dicetur.

## III.

**H**Orâ itaque prædicto more inceptâ, postquam ad Gloria Patri post Venite inclinaverint, stet Chorus contra Chorum. Deindè ad primum Psalmum sedeat unus Chorus, & ad secundum similiter stet, & alius sedeat, & sic alternent usque ad Laudate Dominum de cælis: & sic faciant ad omnes Horas. Finita autem lectione in Matutinis, nisi fiat Officium pro Mortuis, ille qui legit inter Pulpitum, quod est in medio Chori, & gradus, inclinationem faciat; vel prosternat se pro tempore. In inclinationibus conformemur moribus eorum, ad quos declinamus.

## IV.

(g) **P**orrò ad Salve sancta parens, & ad Salve post Completorium, & ad Veni Sancte Spiritus, & ad Veni Creator Spiritus, in die Pentecostes, & per totam hebdomadam, & ad Credo in Missa ad, Ex Maria Virgine, & Homo factus est, flectimus genua: In Ferialibus quoque diebus jacemus prostrati, à Sanctus usque ad Agnus: In festo verò trium, & novem lectionum jacemus prostrati ab elevatione calicis, usque ad Pater noster. In prostrationibus idem servamus, in festo trium lectionum, vel novem. Quando Prælatus injunxerit aliquam communem Orationem, inclinent omnes. Similiter omnes faciant, quibus aliquid facere, vel dicere injunxerit. Si autem aliquam obedientiam, vel officium, vel ministerium aliquod cuivis injunxerit, (i) humiliter prosternens se suscipiat, quod injunctum ei fuerit. Quando etiam Fratribus quidpiam vestimenti tribuitur, inclinantes Benedictus Deus dicant.

(g) *Porro ad Salve sancta parens.* Declaramus hanc esse genuflexionem rectam, quando videlicet curvantur genua, toto corpore existen-

te erecto. Et hæc est faciendæ, cum in Choro cantatur in introitu Missæ, *Salve sancta parens*: Et toties pariter, quoties eam faciendam esse statuit Constitutio. Præterea fieri debet ad *Salve Regina* post Horas. Et cum in processione, quæ sit Dominica in Ramis Palmarum, dicantur illa verba *Ave Rex &c.*, & denique in die Parasceve, quando inchoatur *Sanctus Deus &c.* Iterum declaramus noviter Constitutionem esse factam, quod genua flectant Fratres ad illa verba Evangelii Epiphanie: *Et proidentes adoraverunt eum*; & in Cantico: *Te Deum*; ad versiculum, *Te ergo quasumus*; & in Hymno Corporis Christi ad versum *Tantum ergo Sacramentum*, ut Romæ 1580. inchoatum, inchoat. 1. & iterum ibid. 1583. confirm. 1. confirmatum, & novissimè etiam Romæ 1589. confirm. 2. in Constitutionem redactum fuit.

Declaramus insuper in Capitulis Romano 1644. ordin. 16. & Valentino 1647. ordinatum fuisse, quatenus ad demonstrandam exteriorem humiliationem, internæ animi submissioni respondenterem; ad illa verba Invitatorii, *Venite adoremus, & procidamus ante Deum*, Fratres in Choro genua flectant: cantantes verò, vel recitantes post expletum verum reverenter inclinent. Idem dicendum est de illis Evangelii verbis, *Et verbum caro factum est*; juxta ordinationem Capituli Valentini 1596. Tum & ad illum Hymn. de SS. Trinitate: *Adsumus & nos cernui, te adorantes famuli*, ubi Ecclesiæ secularium ita facere solent; & hoc fuit ordinatum Romæ 1624. ordin. 16. Similiter in decantando *Salve Regina* post Completorium, ad illa verba: *Eja ergo advocata nostra*, usque ad illa *post hoc exilium ostende* genuflexi manere debemus. Valentini 1647. Hoc idem observari solet in Missis de Feria tempore Quadrag. ad illa verba Tractus, *Adjuva nos Deus salutaris noster &c.* Romæ 1650. & 1656. Pariter ad *Veni Sancte Spiritus*, in Missa de Spiritu Sancto.

Parisiis quoque novissimè 1611. ordin. 3. ordinatum fuit, ut in Sacrificio Missæ deinceps facta consecratione, tum antè, & post elevationem tam Hostiæ quàm Calicis; tum etiam quotiescumque tantum Sacramentum manu tractandum venit, Sacerdos antè ejus acceptionem, & post ejus depositionem singulis vicibus (emissa profunda venia) genua flectat.

Porro ut memoria Passionis Dominicæ tanto magis in veneratione habeatur, quamquam antiqua Constitutio aliter disponebat, nimirum, ut tantum inclinaremur: nunc autem in Hymno Passionis ad versum illum, *O Crux ave spes unica*, flectimus genua, quod est in Capitulo his verbis decretum Venetiis 1592. Confirmamus id, quod in Capitulo Generali Romæ 1583. inchoat. 2. inchoatum, & in Capitulo Romæ 1589. pariter confirmatum fuit: nempe, quod in Hymno Passionis cum pervenerint Fratres ad versiculum illum, *O Crux ave, &c.* omnes devotè genua flectant; & hoc jam habet vim Constitutionis. Item genua flectimus ad Antiphonam: *Sub tuum Præsidium*, quotiescumque in Choro dicitur. Bononiæ 1615. ordin. 3.

(i) *Humiliter prosternens se.* Declaramus præter inclinationes, & prostrationes, ac genuflexiones prædictas, aliam esse prostrationem, quæ dicitur venia: & est extensio totius corporis super terram; non super ventrem, sed super latus, tibiam unam super aliam tibiam tenendo: & hæc faciendæ est ab omnibus Fratribus.

Cod. Regul. Tom. IV.

bus in Vigilia Annunciationis, quando ab eo, qui legit in Martyrologio pronuntiatur, *Annunciatio Dominica*: & in Vigilia Nativitatis Domini, quando dicitur, *Iesus Christus Filius Dei in Bethleem Juda nascitur*, quousque Prior fecerit signum. Similiter hæc prostratio cum toto corpore super unum latus in longum faciendæ est ab omnibus Fratribus in Capitulo, quando Prælatus dicit: *Qui se reos sentiant, faciant veniam suam.* Item quando Fratres dicunt suam culpam in Capitulo, vel ubicumque reprehensi fuerint à suo Prælato, debent per modum veniæ humiliter toto corpore se in latus prosternere. Similiter quando exituri domo, sunt plus quàm una nocte moraturi: & pariter quando revertuntur, debent se prædicto modo prosternere, & benedictionem à Prælato suscipere. Similiter, quando Frater quovis modo fratrem suum scandalizaverit, vel offenderit, debet ante pedes ejus prædicto modo prosternatus jacere, quousque placatus eum erexerit. Similiter surgentibus Fratribus de mensa, prostratio prædicto modo faciendæ est ab his, qui serviendo, vel comedendo, vel legendo, vel aliud faciendo, in aliquo offenderint: quousque Prælatus signum fecerit. Similiter si quis in Choro malè legendo, vel cantando offenderit, debet post Officium prædicto modo humiliter se prosternere; quousque Prælatus signum fecerit. Cæterum à Prælato, & Sacerdote, ac Ministris in die Cinerum, & in Cæna Domini, quando recitantur septem Psalmi Penitentiales in Choro, non venia, sed prostratio super gradus Altaris faciendæ est: quemadmodum in Ordinario statuitur. Porro declaramus, quod prostrationes, & genuflexiones, ad quas Constitutio in Officio recitando obligat, intelliguntur esse faciendæ in Choro, & non extra Chorum à Fratribus, quando in privato recitant Officium. Ubicumque Conventus est congregatus in Capitulo, vel in Refectorio, in Gratiis, & hujusmodi; debent Fratres loco prostrationum, inclinationes usque ad genua facere, sicut fuit declaratum Carcassonæ 1378. & in multis aliis Capitulis.

### CAPUT III.

#### De Suffragiis Mortuorum.

##### I.

**A** Festo Sancti Dionysii, usque ad Adventum Domini pro Anniversario Fratrum, Sororum, & Familiarium receptorum per literas ad beneficia Ordinis, Clericus Psalterium, Sacerdos tres Missas, Laici quingenta Pater noster dicant.

(a) Idem faciat quilibet Frater pro defuncto Fratre sui Conventus: & idem fiat per totum Ordinem pro Magistro Ordinis, & à Comprovincialibus pro Priore Provinciali defuncto. Idem etiam fiat per totum Ordinem. (b) pro Diffinitore Capituli Generalis, vel Socio ejus, & pro Electoribus Magistri Ord. & Socio Prioris Provincialis euntis ad Capitulum Generale; si aliquem eorum in via, vel in ipso Capitulo mori

D

con-

contigerit. Idem etiam fiat pro Procuratore Ordinis, si in Curia Romana in Procuracionis officio decedat. Idem etiam fiat pro Visitatore, à Domibus quas visitare debet, si in visitatione moriatur.

(c) Quilibet Sacerdos celebret triginta Missas in anno pro Fratribus, & Sororibus nostris defunctis: & quilibet Clericus triginta vicibus septem Psalmos, (d) & quilibet Conversus triginta vicibus centum Pater noster dicat: (e) & quilibet Conventus viginti Missas, in communi. Anniversarium Patrum & Matrum, tertia die post Purificationem B. Mariæ Virginis: Anniversarium verò Benefactorum, & Familiarium, sequenti die post Octavam B. Augustini: (f) Anniversarium verò Fratrum, & Sororum, sequenti die post Festum Sancti Dionysii est faciendum: Anniversarium demum omnium sepulcorum in Cœmeteriis nostris, ubique fiat duodecima Julii. (g) Fratres verò nostri numerum Missarum non admittant.

(a) *Idem faciat quilibet Frater pro defuncto Fratris sui Conventus.* ) Declaramus Romæ 1601. fuisse ordinatum; ut quotiescumque in aliquo Conventu aliquem Fratrem mori contigerit, Prælati illius Conventus infra spatium sex dierum teneatur omnes suæ Provinciæ Præsidentes de morte Fratris certiores facere: quod fuit confirmatum Vallisolei 1605. & tandem Romæ 1613. conf. 4. & insuper ordinatum, ut pro illius anima quilibet Sacerdos ejusdem Provinciæ celebret unam Missam; Clerici verò non Sacerdotes recitent septem Psalmos, & Conversi Rosarium Beatissimæ Virginis. Item Romæ 1580. ord. 5. ordinatum fuit, quod quando aliquem Fratrem, dum est Prior in aliquo Conventu, cujus non est filius, mori contigerit; etiam ipsemet Conventus, in quo erat Prior, ad suffragia pro ejus anima teneatur: non obstante, quod omnia ejus bona ad eum Conventum, cujus erat filius, solummodo spectent.

(b) *Pro Dissinatore Capituli Generalis.* ) Declaramus, quod ista suffragia debeant fieri pro Dissinatore Capituli Generalis, etiam si eum in via, scilicet eundo, vel redeundo mori contigerit. Romæ 1532. declar. 5.

(c) *Quilibet Sacerdos celebret triginta Missas in anno.* ) Declaramus, quod prædictæ triginta Missæ debent esse de Requiem, si commodè dici possunt. Ubi autem propter multitudinem festivitatum, & alias obligationes hoc commodè fieri non possit: sufficit ut quomodocumque dicantur: & quod Fratres numerum prædictarum non omittant. Romæ 1501. declar. 5.

(d) *Et quilibet Conversus, triginta vicibus centum Pater noster.* ) Declaramus, quod Fratres Conversi quoties dicunt Pater noster in Horis, toties Ave Maria dicere tenentur. Treveris 1266. Quot autem Pater noster & Ave Maria singulis diebus pro Divino Officio recitare teneantur, decernitur infra distinct. 2. cap. 15. Text. 1. & 2.

(e) *Et quilibet Conventus viginti Missas in communi.* ) Declaramus, quod litæ 20. Missæ intelliguntur præter Missas mortuorum generales, quæ dicuntur qualibet Hebdomada, quando totum Officium Mortuorum dicitur. Ideo debent specialiter celebrari, & debent esse de Requiem, si commodè fieri potest: aliàs sufficit, quod quomodocumque celebrentur. Nanneris 1453.

(f) *Anniversarium vero Fratrum, & Sororum.* ) Declaramus, quod circa hoc Anniversarium faciendum, debeat observari Rubrica illa, quæ in Breviariis, & Diurnis noviter impressis ad diem 10. Novembr. adscripta est.

(g) *Fratres verò nostri, numerum Missarum non admittant.* ) Declaramus, quod in primis Constitutionibus editis per Magistrum Iordanem, prædicta clausula posita erat in Capitulo de Domibus concedendis, ubi sic dicebatur: Possessiones, sive redditus, nullo modo recipiant Fratres nostri, nec Ecclesias, quibus animarum cura annexa est; & numerum Missarum non admittant. Sanctus autem Raymundus reportavit hanc clausulam in hoc Capitulum, tanquam in proprium locum. Ex quibus patet, quod per illam clausulam intendebat Constitutio prohibere certum numerum Missarum in perpetuum, ne posterius ex hoc nimis gravarentur: vel ne redditus perpetuos propter hujusmodi Missas recipere cogerentur. Unde in Capitulo Parisiens. 1256. sic dicitur: Prohibemus ne Fratres se obligentullo modo ad Anniversaria perpetua. Non autem intendit prohibere, quin possimus numerum Missarum, quæ à laicis quotidie petuntur pro peccatis, sive pro vivis, sive pro mortuis accipere: Dummodo hoc discrete, & sine superstitione fiat: quemadmodum Concil. Trid. præscribit his verbis: *Quarundem verò Missarum, & candelarum, certum numerum, qui magis à superstitioso cultu, quam à vera Religione inventus est, omnino ab Ecclesia removeant.*

Item declaramus, quod non est rationabile, ut aliquis Prior cum Conventu, propter aliquam elemosynam quam de præsentis recipit, obliget posteros ad dicendum certum numerum Missarum in perpetuum; nisi fortè elemosyna esset ita pinguis, & redditus illius annuatim ita in perpetuum durarent, quod merito numerus prædictarum Missarum in perpetuum sibi assignari deberet. Quare prohibemus, ne de cætero Præsidentes, hujusmodi Missas perpetuas acceptent, nisi elemosyna sit perpetua. Quod ad præteritis fundationes attinet, revocanda est in memoriam dispositio Sacri Concilii Tridentini, quæ sic habet sess. 25. de Reform. cap. 4. *Sancta Synodus, cupiens ad pios usus relicta quo plenius, & utilius potest impleri: facultatem dat Episcopis, ut in Synodo Diocesana, itemque Abbasibus, & Generalibus Ordinibus, ut in suis Capitulis Generalibus, re diligenter perspecta possint pro sua conscientia in prædictis Ecclesiis, quas hac provisione indigere cognoverint; statueret circa hæc, quidquid magis ad Dei honorem, & cultum, atque Ecclesiarum utilitatem viderint expedire, ita tamen, ut eorum semper defunctorum commemoratio fiat, qui pro suarum animarum salute, ea legata ad pios usus reliquerunt.* Præter eam Sacri Concilii determinationem, Bononiæ 1564. ordinatum illud fuit: Quæ circa Missarum numerum à Sancta Synodo decreta sunt exequi cupientes, illius auctoritate nostro Generali Capitulo commissa in hac



hac parte fugientes: mandamus omnibus Prioribus, & aliis Præfidentibus nostrorum Conventuum in virtute sanctæ obedientiæ, ut intra mensem à notitia præsentium, major Prælatus cum tribus Patribus, qui à consiliis esse solent in Conventu, omnes Missas, quæ Defunctorum Testamentis relicte, & à Conventu fuerint susceptæ, ut perpetuò, vel singulis, aut aliquibus diebus determinatè dicerentur, in numerum redigant. Et ex alia parte perpendant similiter summam stipendii, sive eleemosynæ, quæ pro qualibet Missa instituta fuit: deinde ratione habita stipendii, ac sustentationis, juxta quod pro more cujusque patriæ pro una Missa, communi existimatione censetur, ex illis omnibus certum aliquem Missarum numerum in posterum dicendarum statuunt, quem inviolabiliter prædicti Conventus Fratres possint implere: super quo eorum conscientias oneramus, ut quantum fieri potest æqua sit æstimatio: cum ad eximendos Fratrum nostrorum scrupulos, hoc remedium sit maxime necessarium. Et nihilominus in quotidianis Capitulis, & aliis suffragiis, quæ extra ea fieri solent, Defunctis, qui talia sacrificia petierunt, coram Divina misericordia subveniatur. At quo minus deinceps hujusmodi suffragiorum, & Missarum gravamina nostris Conventibus imponatur, nulla in posterum perpetua obligatio, ad certas Missas, vel suffragia admittatur: nisi cui fuerit talis sustentationis annexum subsidium, quod prudentum judicio sufficiens æstimetur. Circa quod diligenter observari debent complere Decreta à Sacra Congregatione hoc in passu emanata. Ut verò majori consideratione hæc omnia fiant, nolumus hujusmodi contractus ratos haberi, nisi Prælati, & majoris partis Fratrum consensus accesserit: & Prælati oppositum facientes à suis Officiis absolvantur. Quod si alicubi ea est consuetudo, ut Provincialis ad hoc licentia requiratur, nolumus eam ullo pacto intermitteri. Præfidentibus quoque nostrorum Conventuum, & aliis, qui hujusmodi eleemosynas recipiendis deputati fuerint, districtè præcipimus: quatenus Missarum per singulos dies advenientium, eum numerum dumtaxat admittant, quem commodè possint implere; ne ultra modum gravati, occurrentibus aliis necessitatibus providere nequeant: & ne hac occasione Sacerdotes aut non admodum dispositi, aut ex consuetudine potius, quam ex devotionis affectu, ad tremendum Altare interdum accedant. Cæterum, ut etiam memoriæ Defunctorum consulatur, mandamus omnibus PP. Provincialibus, Prioribus, ac Præfidentibus nostrorum Conventuum, & locorum, ut diligenter invigilent, quatenus Sacristæ in omnibus Conventibus Patrum, & Fratrum Ordinis nostri, imò & secularium sepultorum, sive in Ecclesia, sive in Claustris, nomina, loca, & tempora in certo libro ad hoc præparato describant. Bononiæ 1615. ord. 14.

## CAPUT IV.

## De Jejuniis.

## I.

**A** Paschate usque ad Festum Sanctæ Crucis reficiantur bis Fratres: exceptis diebus Rogationum, & sextis Feriis, & Vigilia Pentecostes, & jejuniis Quatuor Temporum, & Vigilia S. Joannis Baptistæ, Petri, & Pauli, Jaco-

Cod. Regul. Tom. IV.

bi, B. Dominici Patris nostri: Laurentii, Assumptionis S. Mariæ, Bartholomæi, ac Nativitatis B. Virginis. (a) A Festo autem S. Crucis usque ad Pascha, continuum tenebimus jejunium, & Nona dicta comedemus, exceptis Dominicis diebus. In toto autem Adventu, & Quadragesima, & Jejuniis Quatuor Temporum, in Vigilia Ascensionis, & Pentecostes, S. Joannis Baptistæ, Petri, & Pauli, Jacobi, (b) & B. Dominici Patris nostri, Laurentii, Assumptionis S. Mariæ, Bartholomæi, Matthæi, Simonis, & Judæ, & Omnium Sanctorum, Andreæ Apostoli, & omnibus sextis Feriis, Quadragesimali utimur cibo: nisi in prædictis sextis Feriis, tantum cum aliquo propter labores dispensetur; vel in locis in quibus in eisdem sextis Feriis aliter comederetur, vel etiam (c) nisi festum præcipuum fuerit.

(a) *A Festo S. Crucis usque ad Pascha continuum tenebimus jejunium.* ) Declaramus, quòd Priores, & eorum vices gerentes in eorum absentia, in jejunio S. Crucis non debent quotidie, nec cum omnibus Fratribus generaliter, & ordinariè dispensare. Possunt tamen aliquando, ut semel, vel bis in septimana, non cum toto Conventu, sed cum aliquibus ex causa rationabili dispensare. Metis 1251. & Florentiæ 1321. ordin. 6.

(b) *Et in Vigilia Beati Dominici Patris nostri.* ) Hæc Constitutio sic fuit declarata in Capitulo Generali Parisiensi 1286. ordin. 7. Declaramus, quòd Constitutio de jejunio in Vigilia Beati Dominici intelligenda est, sicut de jejuniis Ordinis, in quibus Prælati ex causa rationabili possunt cum Fratribus dispensare. Et ob hoc Priores, & eorum Vicarii non debent exhibere se difficiles ad dispensandum in tali Vigilia cum Fratribus debilibus, vel aliis indigentibus: quando in Sabbato talis Vigilia fuerit jejunanda. Ex quo patet, quòd jejunium sextæ Feriæ est magis strictum, quàm jejunium Vigiliæ B. Patris Dominici.

(c) *Nisi præcipuum festum fuerit.* ) Hæc Constitutio sic fuit declarata in Capitulo Generali apud Savilianum 1439. Præcipuum festum intelligimus illa festa, quæ secundum jura sunt colenda: & quæ secundum nostrum Ordinem Duplicita, & supra appellantur. In his enim festivitatis, poterit Prælatus, si venerint in sexta Feria, dispensare cum Fratribus, & toto Conventu, ut ovis, & lacticiis vescatur, dummodo tamen jejunent. Quod tamen in illis Provinciis intelligi volumus, ubi seculares Feriis sextis promiscuè lactinia & ova comedunt: & non in illis, ubi ex eorum esu scandalizarentur. In Adventu autem, non poterit etiam in hujusmodi festivitatis cum toto Conventu, aut cum Fratribus dispensare, ut ovis, aut lacticiis utantur: nisi ratione infirmitatis cum aliquo Fratre, sicut & in Quadragesima.

## II.

(d) **I**terantes tamen bis refici possunt: nisi in Adventu, & nisi in Vigiliis Nativitatis, & Purificationis B. Virginis, & jejuniis principalibus ab Ecclesia institutis; & sextis Feriis intus, & extra. Quando autem festum habens Vigiliam (in qua secundum Ordinem est jejunandum) venerit in secunda Feria, ejus Vigilia in præcedenti Sabbato jejunetur, contraria consuetudine non obstante. Feria secunda & tertia post Quinquagesimam tam intus, quam extra, Quadragesimali utitur cibo, & jejunamus. In Parasceve verò per totam diem in pane & aqua abstinemus.

(d) *Itinerantes bis refici possunt, nisi in Adventu & sextis Feriis, intus & extra.* ) Declaramus, quòd cum jejunium Adventus in Ordine nostro sit strictissimum, sicut & jejunium Quadragesimæ: nullus Præfident potest in Adventu cum Conventu dispensare, nec etiam cum aliquo particulari Fratre; nisi propter infirmitatem aut debilitatem, sicut posset & in Quadragesima. Itinerantes autem non solum in Adventu, & sextis Feriis debent jejunare, sed etiam tenentur jejunia, quæ communiter servantur in patria, & ipsi observare; sicut fuit ordinatum Budæ 1254. In jejunio autem sextæ Feriæ non potest Præfatus cum toto Conventu dispensare. Mediolani 1340. Florentiæ 1321. & Valentiniæ 1364. Et ideo Præsidentes, qui sunt faciles ad dispensandum regulariter in jejunio S. Crucis, vel in sexta Feria, & duobus diebus immediatè ante Cineres dispensant cum toto Conventu; cum abutantur potestate sibi tradita, debent graviter puniri; & à suis officiis absolvi. Fratres verò, qui sunt sani, & possent jejunare, etsi non quotidie, saltem aliquoties in hebdomada, & propter gulositatem solum, nec sextis Feriis volent à cena abstinere, quin potius nulla petita, vel obrepta licentia, hujusmodi Constitutiones de jejunio transgrediuntur, & in hujusmodi transgressionibus perseverare intendunt, ad damnabilem contemptum quàm facillimè disponuntur.

## CAPUT V.

## De Cibo.

## I.

(a) **H**ora competenti ante prandium, à Sacrista paucis ictibus campana pulsetur, ut Fratres ad Refectionem venire non tardent. Postmodum pulsetur Cymbalum, si cibus sit paratus; alioquin non pulsetur, donec paratus sit. Ablutis verò manibus Prior nolum Refectorii pulset, & tunc Fratres ingrediantur. Quibus ingressis, dicat Benedicite qui dicit Versiculos; & Conventus prosequatur benedictionem. (b) *Servitores autem incipiant ab infe-*

rioribus, usque ad mensam Prioris ascendentes.

(a) *Hora competenti, &c. & infra: Ablutis verò manibus.* ) Declaramus, quòd pulsato cymbalo pro refectione, debent Fratres cum silentio, & matura festinatione venire ad locum, ubi debent manus abluere. Quibus ablutis debent ire ad sedendum secundum ordinem suum, super scamina extra Refectorium preparata: & quando Prior nolum Refectorii pulsare inceperit; debent bini & bini, incipiendo à junioribus, ingredi Refectorium. Et cum fuerit in medio, debent inclinare reverenter ad Crucem, vel imaginem, quæ supra sedem Prioris collocata est; & postea ire ad sua loca ordinatè: & facta benedictione, ire ad sedendum in mensa, & cum silentio, & lectione sumere cibum.

(b) *Servitores autem incipiant ab inferioribus.* ) Declaramus, quòd in deferendis scutellis, vel pïctantiis, servitores semper ab inferioribus debent incipere, & usque ad mensam Prioris ascendere: nisi fortè in mensa Prioris essent aliqui viri illustres, sicuti Episcopi, Comites, vel majores his; quia tunc ab illis personis honorabilibus esset incipiendum. Quando autem servitores deferentes scutellas, ascendendo venerint ad mensam Prioris, si super asserem aliquas scutellas habuerint, debent illas porrigere his qui sunt in mensa Prioris, & non reverti. In auferendis autem scutellis, vel mensæ reliquiis, debent à mensa Prioris incipere: & sic ad inferiores descendere.

## II.

**N**ullus Fratrum presentium à prima mensa remaneat: (præter servitores & custodes) nisi de licentia. Quotquot autem remanserint, comedant in secunda mensa: ita quod tertiam facere non oporteat. Nulla fiat servitoribus, vel ministris pïctantia, quæ non sit Conventui: nisi sint infirmi, vel minuti. Frater non mittat Fratri pïctantiam, excepto Priore, sed sibi datum dare possit, à dextris, vel à sinistris. (c) *Priores comedant in Refectorio, & cibariis Conventus sint contenti.* Similiter infirmarii, & servitores hospitum, & alii Fratres: nisi Prior cum aliquibus dispensaverit ob aliquam causam, ut extra Conventum aliquando comedant.

(c) *Priores comedant in Refectorio.* ) Declaramus, quòd nullus Frater debet in cella, vel in camera tenere mensam, sed omnes Fratres tam Priores, quam alii, debent venire ad communem mensam in Refectorio: nisi fortè Prior aliquando cum aliquo dispensaverit, ut extra Conventum in Hospitio, aut Infirmaria possit comedere. Unde in Capitulo Lugdunensi 1318. sic fuit ordinatum. Cum ex eo quod Priores, & eorum locum tenentes, ac ceteri Fratres à sequela communitatis se retrahunt, Religio plurimum relaxetur, & multi Conventus in diversis Provinciis tam in spiritualibus, quam in temporalibus dissipentur, & destituantur: injungimus, & mandamus Prioribus universis, ut à Choro, & Refectorio nul-

nullatenus se absentent, nisi ex causa rationabili, & urgenti: & hoc idem faciant à suis subditis inviolabiliter observari. Quod si secus factum fuerit, per Provinciale, vel ejus Vicarium, in penam à suis officiis absolvantur. Et hoc idem fuit ordinatum Cadurci 1219. & Coloniae 1428. Vbi additur, ut quotidie teneatur Refectorium, & quod in secunda, & quarta Feria minimè cum aliquo Fratre dispenseretur, nisi propter infirmitatem in loco infirmorum. Et Romae 1553. & Parisiis 1611. statutum fuit, ut omnes etiam Magistri caveant, ne in cubiculis, seu cameris comedant, sed in communi Refectorio; irritantes quamlibet licentiam super hoc indultam, ac concessam. Quodque si qui Conventus existant, ubi nulla fere servetur Communitas, ac præcipuè in comedendo in Refectorio communi: hos privamus omni facultate, & auctoritate recipiendi ad habitum Ordinis.

## III.

(d) *Pulmenta nostra sint ubique sine carnibus in conventibus nostris:* præterquam in infirmariis. Fratribus autem nostris, ne sint hospitibus onerosi, pulmenta cocta cum carnibus comedere liceat extra claustrum. Fratres nostri tam Priores, quàm alii, in locis ubi Conventum habuerimus; nisi cum Episcopo, vel in domibus Religiosorum, & hoc raro, extra Claustrum comedere non præsumant. (e) Singulis diebus duo cocta pulmenta, si fieri potest, habeant. Poterit autem Prior superaddere, prout opus esse judicaverit, & facultas permiserit. Si quis juxta se sedenti viderit aliquid deesse de communi, requirat à servitore. (f) Si quis de servitoribus, vel comedentibus, serviendo, vel comedendo in aliquo offenderit; surgentibus Fratribus veniam petat, & facto signo à Prælatore redeat ad locum suum.

(d) *Pulmenta nostra sint ubique sine carnibus in Conventibus nostris.* Declaramus, quòd Præsidentes Conventuum non possunt dispensare cum Fratribus, ut in Refectorio carnes comedant: nec extra Refectorem cum toto Conventu regulariter, nec cum aliquo Fratre in Adventu. Quod si fecerint, sunt gravissimè puniendi, & in penam à suis officiis absolvendi, ut fuit ordinatum Paviae 1423. Coloniae 1428. & Venetiis 1487.

(e) *Singulis diebus duo cocta pulmenta, si fieri potest habeant.* Declaramus, quòd Præsidentes Conventuum, debent elemosynas ex Missis, Officiis, Collectis, Redditibus, & Proventibus Conventus taliter disponere; ut singulis diebus Fratres pistantiam habeant cum uno ferculo: & tempore jejunii, ultra pistantiam habeant duo fercula, ut jejunare possint: sicut in multis Capitulis ordinatum fuit.

(f) *Si quis de servitoribus, vel comedentibus serviendo, vel comedendo in aliquo offenderit; surgentibus Fratribus veniam petat.* Declaramus, quòd finito prandio, & facto signo à Prælatore cum nola, lectio terminari debeat, di-

cendo: *Tu autem Domine &c.* & Prælatus stando debet pulsare nola, quousque Fratres à mensa surrexerint. Terminata autem pulsatione nola, illi qui serviendo, vel comedendo, vel legendo, in aliquo offenderint, debent suas venias facere modo supradicto in hac distinctione c. 2. Textu 4. Et facto signo à Prælatore surgere debent, & pergere ad propria loca.

## CAPUT VI.

## De Collatione.

## I.

**T**empore jejunii, hora competenti Sacrista ad collationem signum faciat, postea Refectorarius cymbalum pulset: deindè Fratribus (a) venientibus in Refectorem, legat Lector, præmisso Jube Domne benedicere; & sequatur benedictio Noctem quietam, & finem perfectum, tribuat nobis omnipotens, & misericors Dominus. Infra verò lectionem bibere poterunt, facto signo à Prælatore, & dicto Benedicite à Lectore: (b) dataque benedictione ab Hebdomadario: Largitor omnium bonorum benedicat potum servorum suorum. Finita lectione (c) dicat qui præest, adjutorium nostrum in nomine Domini; & tunc cum silentio intrent Fratres Ecclesiam. (d) Quicumque bibere voluerit extra horam, licentiam petat à Prælatore, (e) & unum socium accipiat.

(a) *Venientibus in Refectorem legat Lector.* Declaramus, quòd contra istam Constitutionem invaluerat usus in multis locis propter concursum secularium ad Ecclesias nostras, ut Completorium more aliarum Ecclesiarum inciperetur in Choro per *Jube Domne &c.* Qui usus cum non posset sine magna secularium admiratione revocari, & adjudicaretur rationabile, ut effemus conformes aliis Ecclesiis; idcirco in Capitulo Salmanticensi 1551. ita statuitur: Denunciamus ordinasse nos auctoritate Apostolica, ut Completorium etiam diebus jejuniorum semper in Choro per *Jube Domne benedicere* incipiatur. Et quando dicitur: *Noctem quietam &c.* omnes Fratres, sicut in aliis benedictionibus inclinent. Et quamvis hæc ordinatio Constitutioni contraria videatur, tamen piorum, sanctissimorumque Patrum judicium fuit, antiquitatem Constitutionum nostrarum tanti esse faciendam, ut textum illum à majoribus nostris editum, potius declarandum, quàm delendum esse decreverint.

(b) *Dataque benedictione ab Hebdomadario.* Declaramus, quòd in Refectorio benedictio danda est ab Hebdomadario: qui dum dat benedictionem non debet sedere, sed se elevare, & stando benedictionem dare. Florentiae 1257.

(c) *Dicat, qui præest, Adjutorium.* Declaramus, quòd absente Prælatore, atque ejus Suppore & Vicario, Hebdomadarius in Refectorio debet dicere *Adjutorium*: quia etsi non præsideat omnibus aliis loco, præsidet tamen auctoritate, & Officio. Quando autem Prælatus dicit *Adjutorium*, vel *Fidelium*, præsentem Conventum, debet illud dicere cum magna



gravitate, & ita sonore, quod clare ab omnibus audiat. Et quando sunt plures Prælati simul in Choro, vel Refectorio; ille, qui præest aliis loco, debet *Fidelium*, & *Adjutorium* dicere, & benedictionem in Completorio dare.

(d) *Quicumque bibere voluerit extra horam.*) Declaramus, quod quamvis irreligiosum videatur tempore jejunii post Completorium bibere: & propter hoc aliàs in Capitulo Ferrarienti 1290. fuerit ordinatum, quod Frater, qui post Completorium bibebat, tenebatur iterato dicere Completorium: tamen quia Constitutio inuit, quod de licentia Prælati Fratres possint extra horam bibere; poterit Prælatus tempore jejunii, (quando dies breves sunt) collationem usque ad post Completorium, finitè oratione differre.

(e) *Socium accipiat.*) Declaramus, quod causa honestatis & Religionis, nullus Frater debet bibere sine licentia, & præsentia Socii. Prælati autem faciant Constitutionem de Jejuniis à Fratribus diligenter observari, sicut fuit ordinatum in Capitulo apud Pestum 1273.

## CAPUT VII.

### De Infirmis.

#### I.

(a) *Circa infirmos caveat ne sit negligens Prælatus, sic enim procurandi sunt infirmi, ut citius releventur: sicut dicit noster Pater Augustinus.* (b) *Poterunt autem quidam vesci carnibus, prout eorum gravior exigit infirmitas, secundum quod Prælato visum fuerit.* (c) *In locis verò ubi Conventum habemus, extra domum nostram carnes non comedant.* (d) *Si quis autem talem habuerit infirmitatem, quæ nec multum eum debilitet, nec comedendi turbet appetitum: talis nec super culcitram jaceat; nec jejunia consuetudinaria frangat; nec cibos Refectorii mutet.*

(a) *Circa infirmos caveat ne sit negligens Prælatus.*) Declaramus, quod in singulis Conventibus debent esse aliquæ cameræ deputatæ pro infirmis, benè fulcitæ lectis, & linteaminibus, & aliis necessariis pro Infirmaria: & debet institui unus Infirmary principalis, discretus, qui provideat infirmis de cibariis, lectis, medicinis, & omnibus aliis necessariis ad eorum releuationem: sicut fuit ordinatum Parisiis 1286. Salmanticæ 1551. & in multis aliis Capitulis. Ut autem hæc facere possit, debet ei deputari aliqua pars pecuniæ, quæ ad Conventum ex elemosynis venit: sicut ordinavit Joan. XXII. Prælati autem, qui in hoc inventi fuerint negligentes, in pœnam à suis officiis abfolvantur.

(b) *Poterunt autem quidam vesci carnibus, prout eorum gravior exigit infirmitas, secundum quod Prælato visum fuerit.*) Declaramus, quod in Constitutione de carnibus non comedendis, non debet Prælatus dispensare, nisi cum infirmis, vel evidenter indigentibus: quamvis etiam

extra casum infirmitatis, possit cum aliquibus ex rationabili causa dispensare: ut cum notabiliter antiquis, & cum Lectoribus, & debilibus. Non debet hoc tamen regulariter, & quotidie facere; sed aliquibus diebus, & cum discretionem: sicut fuit ordinatum Florentiæ 1321. & Narbonæ 1394.

(c) *In locis verò ubi habemus Conventum, extra domum nostram carnes non comedant.*) Declaramus, quod licet in domibus Religiosorum, vel Episcoporum, delicta Prælati possint Fratres quandoque, & raro comedere: non tamen aliàs extra Conventum, etiam si sint infirmi, licitum est carnibus vesci. Et qui in hoc deliquerint, graviter puniendi sunt: sicut fuit ordinatum Bononiæ 1240. & Narbonæ 1394.

(d) *Si quis autem talem habuerit infirmitatem, quæ nec eum multum debilitet, nec comedendi turbet appetitum.*) Declaramus, quod illi Fratres, qui sunt sani, sed tantum propter gulositatem, & sensualitatem volunt continuè vesci carnibus: & cum possent aliquibus diebus abstinere, tamen nulla petita, & obtenta licentia, carnes quotidie comedunt, & in hoc perseverare intendunt: ad culpabilem, & damnabilem contemptum quam maximè disponuntur.

#### II.

(e) *In domibus nostris non sint nisi duo loca, in quibus comedant debiles, vel infirmi: unus carniū, & alius aliorum ciborum; nisi sit evidens necessitas, vel urgens infirmitas.* Similiter nec alii Fratres comedant, nisi in communi Refectorio, vel Hospitum domo: nec Priores Provinciales, nec Magistri in Theologia, etiam actus legentes comedant in cameris, sed in communi Refectorio, vel Hospitio, vel in domo infirmorum, aut domo debilium. Si autem Priores infirmari contigerint: in Infirmaria cum aliis procurentur. (f) *Fratres verò leprosi infra septa sui Conventus seorsum ab aliis procurentur: Conventus autem suus ille dicitur, cujus est filius. Quod si arctitudo loci illius, vel alia causa legitima non permiserit; ad alium Conventum nostri Ordinis per Priorem Provincialem transferantur.*

(e) *In domibus nostris non sint nisi duo loca.*) Declaramus, quod Fratres sani, tam Priores, quam alii, debent in Refectorio comedere, vel in domo hospitum de cibariis Ordinis, debiles verò, & infirmi debent in Infirmaria comedere; & poterunt de licentia Prælati carnibus vesci. Alibi autem comedere non licebit, nisi propter evidentem necessitatem, vel urgentem infirmitatem: sicut fuit ordinatum Parisiis 1269. & Mediolani 1278. & apud CæsarAugustam 1391.

(f) *Fratres verò leprosi &c.*) Declaramus, quod si contingat Fratrem quempiam laborare quocumque morbo contagioso; debent in loco separato, & seorsum ab aliis infirmis ita curari, prout statuit Constitutio de leprosis: qua enim de causa seorsum leprosi curari debent; ea etiam illi, qui quocumque contagioso morbo

laborant, curandi sunt: ne videlicet contagione sui morbi alios infirmos inficiant.

## CAPUT VIII.

*De Minutione.*

## I.

(a) **M**inutio quater in anno fieri possit. Prima in mense Septembri. Secunda post Natale. Tertia post Pascha. Quarta post festum Sancti Joannis Baptiste. Præter has minutiones, nullus audeat sibi minuere: nisi discretio Prioris propter aliquam causam judicaverit aliter esse alicui faciendum. Minuti extra Refectorium cum silentio comedant, ubi commodè poterit observari: & secundum quod facultas domus permiserit, commodius procurentur. (b) Causâ verò minutionis carnes non comedant.

(a) *Minutio quater in anno fieri possit.* ) Declaramus, quod Fratres non teneantur uti minutione, nisi de consilio Medici. Qui autem sine consilio Medici voluerit minutionem facere, teneatur illis quatuor temporibus eam facere. Quod autem Religiosi licetè possint minutione uti, textus est, *de statu Monachorum*, cap. cum ad Monasterium, §. Porro.

(b) *Causâ verò minutionis carnes non comedant.* ) Declaramus, quod minuti cum propter extractionem sanguinis in quo vita consistit, debilitari soleant; debent extra Refectorium cominodè, & frugaliter procurari: quantum facultas ipsius Domus permiserit. Quod si Priori videbitur, & non aliter, poterunt vesci carnibus, juxta quod eorum complexio, vel debilitas postulaverit.

## CAPUT IX.

*De Lectis.*

## I.

(a) **S**uper culcitra non dormiant Fratres nostri, nisi fortè stramen, vel aliquid tale, super quo dormiant, habere non possint. Super stramina, & saccones laneos dormire licebit. Extra domum verò dormire poterunt, sicut fuerit eis stratum; ne hospites molestantur. Qui autem culcitram petierit, jejuset una die in pane, & aqua. (b) Cum tunica & caligis cincti dormiant. (c) Nullus (Magistro Ordinis excepto,) qui in communi tolerari possit, habeat specialem locum ad jacendum, nisi propter rerum custodiam; Lectoribus tamen secundum discretionem Prioris provideatur.

(a) *Super culcitra non dormiant Fratres nostri.* ) Declaramus, quod licet Fratres sani non

debeant dormire super culcitra, infirmi tamen de licentia suorum Superiorum possunt super culcitra dormire. Unde in infirmariis nostris solemus habere culcitra pro infirmis, & hæc consuetudo satis rationabilis esse videtur.

(b) *Cum tunica, & caligis cincti dormiant.* ) Declaramus, quod cum Constitutio ista non dicat, quod debeamus dormire cum scapulari, quod est habitus Ordinis nostri; & quod semper debeamus illud deferre, quando procedimus in publicum, cum sit protestativum nostræ professionis: non peccat Frater nostri Ordinis si sine scapulari dormiat. Ideo possunt licite Fratres nostri sine illo dormire. Debent tamen cum tunicella, cingulo, & caligis dormire, quia tunicella videtur pertinere ad habitum nostrum de nocte, qui semper debet ossibus nostris adhærere. Narbonæ 1394. Et ideo illi, qui nulla subsistente causa, sed ex sola sensualitate sine tunicella, & caligis dormiunt, maxime quando hoc habent in consuetudine: ita hanc transgrediuntur Constitutionem, ut ad damnabilem contemptum qui non est sine culpa, disponantur.

(c) *Nullus, Magistro Ordinis excepto &c.* ) Declaramus, quod omnes Fratres nostri (Magistro Ordinis, & infirmis, atque hospitibus dumtaxat exceptis) debent in communi Dormitorio dormire: quod quidem taliter debet esse dispositum, ut serò claudi possit: & claves debent apud Priorem, vel aliam personam securam remanere. Qui autem extra Dormitorium sine licentia dormire præsumperit, debet à suo Præfato graviter puniri. Narbonæ 1394. & in multis aliis Capitulis.

## CAPUT X.

*De Vestitu.*

## I.

(a) **V**estes laneas non attonfas ubi servari poterit, deferant Fratres nostri. Ubi verò servari non poterit, utantur vilibus: & potius utilitas in cappis fervetur. (b) Lineis non utantur ad carnem, nec etiam infirmi. Linteamina in infirmariis nostris concedimus, quod haberi possint; & similiter in cameris hospitum. Nullus habeat plures tunicas, quam tres cum pelliceo in hyeme: & quatuor sine pelliceo, quod semper tunica coopertum deferatur. Pelliceis silvestribus, aut etiam coopertoriis quarumcumque pellium Fratres nostri non utantur, nisi in infirmaria. Nec tamen utantur ibidem coopertoriis pellium silvestrium. (c) Tunicae circa cavillam pedum inclusive, & non plus descendant: Scapularia circa cooperturam genuum: Cappa verò sit brevior tunica, & etiam pelliceum. Caligas, & soccos habebimus, ut necesse fuerit, & ut facultas permiserit. (d) Ocreas non habebimus, nec Chirotecas. Botæ extra septa Monasterii non portentur.

(a)

(a) *Vestes laneas &c. & infra: Vestibus utantur vilibus.*) Declaramus, quod Fratres nostri cum sint Mendicantes, non debent uti pretiosis, sed vilibus vestibus: nec debent habere corrigias, nec cultellos curiosos deferre. Bononiæ 1285. Unde illi qui habent tunicas & cappas magni pretii, & ultra numerum à Constitutione præscriptum, & in huiusmodi transgressione Constitutionis perseverant, ac perseverare intendunt; debent graviter puniri, & talibus vestibus privari. Coloniae 1428. & Venetiis 1437. Item declaramus, quod Præsidentes Conventuum debent studium & diligentiam adhibere, ut ex elemosynis, & redditibus ad Conventum pertinentibus, provideatur Fratribus indigentibus de vestibus. Et si alicui Fratri à parentibus, vel ab amicis dentur pecuniæ pro vestibus, tales pecuniæ dentur Procuratori Conventus, qui pannum emat pro illo Fratrem: ut sicut pascimur ex uno cellario, ita induamur ex uno vestiario. Tolosæ 1258. & 1304. & Januæ 1305. & Placentiæ 1310.

(b) *Lineis non utantur ad carnes, nec etiam infirmi.*) Declaramus, quod qui nulla subsistente causa, lineis utuntur ad carnem, & in huiusmodi transgressione intendunt perseverare; ad damnabilem contemptum disponuntur. Idem intelligimus de canapo, & bombice.

(c) *Tunica circa cavillam pedum Scapularia circa cooperturam gentium &c.*) Declaramus, quod habitus Ordinis nostri est tunica alba, & præsertim scapulare album quoad Clericos: & nigrum quoad Conversos, & cappa nigricoloris. Atque hunc habitum, & præsertim scapulare, debemus patenter deferre, quando procedimus in publicum; cum sit protestativum nostræ professionis. Narbonæ 1394. Et in Concilio Tridentino *sess. 25. de Regularib. cap. 19.* prohibetur, ne cuiquam Regulari concedatur licentia occultè ferendi habitum suæ Religionis. Et quia brevitatis vestium levitatem quandam significare videtur, longitudo verò honestatem, & gravitatem designant: non debent tunicae nostræ esse notabiliter breves, sed debent usque ad cavillam pedum inclusivè descendere, & ante, ac retrò confutæ esse. Infra verò tunicam, non debemus caligas, vel alias vestes alterius coloris, quàm alibi habere. Cappa verò debet saltem quatuor digitis brevior, quam tunica esse, Scapulare verò propter honestatem non debet esse notabiliter breve, nec etiam nimis strictum, nec nimis latum, sed sufficit ut cooperiat commissuram manicarum & tunicae; & debet caputium cappæ, cum ipsa cappa esse confutum. Et quando in publicum procedimus, vel in Choro sumus, debemus semper habere caput coopertum caputio. Et quando procedimus extra Conventum, debemus cappam deferre propter Ordinis honestatem. Januæ 1305.

Item in Capitulo Salmanticensi. 1551. ordinatum fuit pro uniformitate nostri Ordinis, ut cappæ in Conventu à Paschate Resurrectionis usque ad Festum Omnium Sanctorum, nonnisi in communione, & à servitoribus Missarum portentur. In hyeme verò, in Provinciis ubi confuetum est, portari possint, præterquàm in menia.

Item Venetiis 1592. ordinatum fuit, ut nemo Confessoriorum audeat sub pœna suspensionis ab audientia confessionum, mulierum confessiones nisi ad fenestrellam cratis ferreæ, vel lignæ, aut alterius materiæ, & cum cappa

semper audire: quod intelligendum est quando patenter in Ecclesia confessiones audiunt.

Item declaramus, quod quotiescumque Fratres, sive ad Officium Missæ; sive ad alia Officia utuntur superpelliceis, debent deferre scapulare sub ipsis: ita tamen ut caputium scapularis sit extra scapulas ordinatum. Similiter Sacerdotes, Diaconi, & Subdiaconi cum induunt sacras vestes, portent scapularia cum caputio sub ipsis, nec ullo modo ea deponant. Et hoc idem in Missis privatis observetur, Parisiis 1286. Neapoli 1311.

(d) *Ocreas non habebimus, nec Chirotecas.*) Declaramus, quod Fratres itinerantes possunt ocreas, & chirotecas portare, prout necessitas postulaverit: intra Clausura vero, & per Civitatem nullo modo deferantur.

Item declaramus Venetiis 1592. confirmatum fuisse ordinationem aliàs factam, quod nullus Frater, aut Soror Ordinis nostri cuiuscumque gradus, & conditionis existat uti debet cochlearibus, & instrumentis aureis vel argenteis, aut etiam ex lapidibus pretiosis: sive in menia, sive in cingulis, sive in cappis, cultris, vel eorum vaginis, sive in quocumque alio genere rerum utensilium. Qui autem transgressores reperti fuerint, iisdem instrumentis omnino priventur, & illa Communitati applicentur, & graviter præterea transgressores puniantur.

## CAPUT XI.

### De Rasura.

#### I.

(a) *Rasura sit superius non modica, ut Religiosum decet: sic ut inter ipsam, & aures non sint plusquam tres digiti. Tonsura quoque fiat desuper aures. Rasura verò fiat à Paschate usque ad Festum Omnium Sanctorum de quindena in quindenam, deinde autem semel in tribus septimanis: ita tamen quod propter festa solemnia possit per dies aliquot præveniri, vel retardari.*

(a) *Rasura sit superius non modica.*) Declaramus, quod Prælati & Præsidentes Conventuum, debent diligentem curam & sollicitudinem adhibere, ut Fratres omnes sint uniformes in capillorum rasura: & ut decentem, ac religiosam habeant coronam. Nec ullo modo patiantur, quod Fratres, aut barbam nutriant, aut more secularium capillos longos deferant. Debet autem tonsura capillorum solum usque ad summitatem aurium descendere, & inter ipsam, & rasuram capitis desuper, non debent esse plusquam tres digiti. Poterit autem in regionibus calidis rasura fieri etiam in hyeme, de quindena in quindenam, secundum quod Prælati iudicaverit expedire.



## CAPUT XII.

*De Silentio.*

## I.

(a) *Silentium* Fratres nostri teneant in Claustro, Dormitorio, in Cellis, in Refectorio, & in Oratorio Fratrum: nisi fortè silenter aliquid loquantur, non tamen oratione perfectæ. Alibi tamen loqui poterunt de licentia speciali. (b) Omnes Fratres ubique intus & extra, silentium teneant, in mensa tam Priores, quàm alii: excepto uno, qui major fuerit inter eos, vel alio, cui pro se loqui commiserit: & tunc ipse taceat, exceptis Magistris in Theologia. Prior tamen Conventualis potest licentiam unum de secum comedentibus ad loquendum. Si verò plures Priores Conventuales simul comedere contigerit, (c) Prior antiquioris Conventus loquatur, & uni loquendi licentiam dare potest.

(a) *Silentium Fratres nostri teneant.*) Declaramus, quòd in locis supra nominatis, continuum debent tenere silentium, nec in prædictis locis debet Prælatus dispensare cum Fratribus, ut silentium frangant. Et quidem cum Fratres transeunt per Claustrum, debent Psalmum *De Profundis*, & alias Orationes pro Defunctis dicere. In cellis vero Dormitorii possunt scribere, legere, orare, & dormire. In Refectorio verò, dum sunt in mensa, debent continuam lectionem habere. In Oratorio autem debent orare, & nihil aliud quam id, ad quod factum est, agere. In aliis autem locis prædictis poterunt Fratres loqui de licentia speciali. A signo autem quod fit cum parva Campana post Completorium usque ad Primam: & similiter à signo quod fit in æstate post prandium usque post Nonam dictam, nulli loqui licebit; sed omnes silentium servabunt. Tolosæ 1258.

(b) *Omnes Fratres nostri ubique intus & extra &c.*) Declaramus, quòd omnes Fratres simul comedentes, sive in terra, sive in mari, silentium servare tenentur: excepto uno, qui major fuerit inter eos, & exceptis Magistris in Theologia, qui extra Refectorium loqui poterunt, sicut fuit declaratum in Monte Pefulano 1271.

(c) *Prior antiquioris Conventus.*) Declaramus, quòd quando plures Priores simul extra Refectorium, vel extra Conventum, vel extra Domum comedere contigerit: solus ille Prior, qui superiorem locum tenet, loqui poterit & uni licentiam loquendi dare. Prior, autem antiquioris Conventus, qui comedit cum aliis Prioribus, si nullus eorum sit Magister in Theologia, debet superiorem locum tenere.

## II.

**N**ullus autem aliorum ibidem loquatur, nisi de necessariis mensæ, & hoc per unicam orationem breviter & *Cod. Regul. Tom. IV.*

submissè; nisi de licentia Episcoporum, seu Electorum, aut etiam majorum his: seu etiam Regum, vel etiam Magistris Ordinis, aut Ministri Generalis Ordinis Minorum, (d) cum contigerit nos cum eis comedere. Prior autem Provincialis, absente Magistro Ordinis, Fratribus secum comedentibus in sua dumtaxat Provincia, potest dare (e) licentiam loquendi: in alia autem Provincia tantum uni. Si quis silentium fregerit ex proposito, vel licentiam loquendi dederit; in uno prandio aquam bibat, & in Capitulo coram omnibus unam disciplinam recipiat exceptis infirmis decumbentibus. (f) Et in hoc non dispensetur, nisi per Magistrum Ordinis, & Priorem Provinciale, & hoc rarò, & ex rationabili causa. Infirmi verò non decumbentes, à prandio usque ad Vesperas silentium teneant: similiter (g) post signum, quod fit post Completorium. A minutis verò, post primam diem suæ minutionis idem observetur. (b) Fratres in Capitulo de silentio se accusent, sicut de aliis culpis; & Priorum arbitrio puniantur. (i) Si quis tamen inter duo Capitula septies silentium fregerit, in uno prandio sedeat in terra.

(d) *Cum contigerit nos cum eis comedere.*) Declaramus, quòd Magister Ordinis cum omnibus Fratribus secum comedentibus extra Refectorium, videlicet in Hospitio, vel in Infirmaria, vel in sua camera: potest dare licentiam loquendi in mensa. Quando verò ipse comedit cum Fratribus in Refectorio, talem licentiam dare non potest, quia ibi continuum habemus silentium: & idem dicimus de Priore Provinciali; quòd in absentia Magistris Ordinis, in sua dumtaxat Provincia, Fratribus secum comedentibus potest loquendi licentiam dare; non autem in Refectorio, quando ipse cum Fratribus comedit.

(e) *Licentiam loquendi.*) Declaramus, quòd licet Vicarii particulares Magistris Ordinis, vel Priores Provinciales, non habeant auctoritatem concedendi Fratribus facultatem ad loquendum in mensa; nec talem auctoritatem possit eis Magister Ordinis, vel Prior Provincialis conferre: sicut fuit declaratum Lucæ 1288. tamen quilibet Vicarius Ordinis, qui mortuo vel amoto Magistro vices ejus obtinet; & quilibet Vicarius Generalis Provinciæ per quemcumque modum legitimè fuerint instituti, hanc loquendi licentiam extra Refectorium secum comedentibus dare possunt.

(f) *Et in hoc non dispensetur, nisi per Magistrum &c.*) Declaramus, quòd Vicarii Magistris Ordinis, & Priorum Provincialium, quamvis non possint licentiam loquendi in mensa Fratribus dare; possunt tamen Fratres sibi commissos à pena, quæ eis debetur pro fractione silentii absolvere; vel talem penam commutare, si eis à Magistro Ordinis, vel Priore Provinciali fuerit concessum: sicut fuit declaratum Bononiæ 1302. Possunt enim Magister

ster Ordinis, & Priores Provinciales facultatem dispensandi, seu relaxandi, vel commutandi penitentiam pro fractione silentii in mensa taxatam, aliis concedere; auctoritatem autem dandi licentiam loquendi in mensa, non possunt aliis delegare.

(g) *Post signum, quod fit post Completorium.* Declaramus, quod cum Ordo noster refugiat tanquam irreligiosum loqui post Completorium, debent Fratres post signum, quod fit post Completorium, tenere silentium usque post Primam: quod etiam fuit in Capitulo Parisiis 1611. strictissime commendatum. Quando autem Fratres cenant post Completorium, sicut in Dominicis diebus in hyeme, non est opus, quod tale signum post Completorium pulsetur: sed poterit differri usque post secundam mensam completam; & postea tenebuntur Fratres predictum silentium servare.

(h) *Eratres in Capitulo de silentio se accusent.* Declaramus, quod non solum Fratres in Capitulo de silentio se debent accusare, sed etiam de aliis culpis, & transgressionibus quarumcumque Constitutionum & Institutionum Ordinis: sicut habetur in Capitulis de levi & gravi culpa, ac de Capitulo quotidiano, & debent arbitrio Prælati puniri.

(i) *Si quis tamen inter duo Capitula &c.* Declaramus, quod sedentes in terra pro fractione silentii, non tenentur abstinere in pane & aqua: sed solum in terra sedere, & comedere, quod alii comedunt. Et debent in prandio, & non in cena hanc penitentiam facere: sicut Magister Ordinis & Diffinitores coram toto Capitulo declaraverunt, quando ista Constitutio fuit confirmata, & hoc declaratum fuit Tolosæ 1258. admonit. 15.

### CAPUT XIII.

#### De Recipiendis.

##### I.

(a) **I**N quolibet Conventu tres idonei Fratres eligantur de communi consilio Capituli, qui recipiendos in moribus & scientia (b) diligenter examinent, & examinationem Priori, & Capitulo referant, eorum iudicio an recipi debeant, relinquentes. Qui dum adducti fuerint in Capitulum, prosternant se in medio. Interrogati vero à Prælato, quid quærant; respondeant: Misericordiam Dei, & vestram. Quibus ad iussu Prælati erectis, exponat eis austeritates Ordinis, voluntatem eorum requirens. Qui si respondeant, se velle cuncta servare, dicat post cætera: Dominus qui incepit, ipse perficiat, & Conventus respondeat. Amen. Tunc depositis secularibus vestibus, & religiosis induti; in nostram societatem in Capitulo recipiantur.

(a) *In quolibet Conventu tres idonei Fratres eligantur de communi consilio Capituli &c.*

Declaramus, quod isti tres Fratres eligendi, debent esse prudentes & discreti, ac de consilio Patrum. In quolibet enim Conventu nostri Ordinis debent esse deputati aliqui Patres à consiliis, viri prudentia præditi, sine quibus non liceat Prioribus graviora Conventus negotia tractare: nec possunt Priores ad libitum hos Patres instituere, vel destituere, ut fuit ordinatum Romæ 1569. Vocandi autem sunt ad consilium, imprimis Magistri in suis Provinciis acceptati, & qui fuerint in aliqua Provincia Provinciales. Item Inquisitores. Veneriis 1592. & Vallisoleti 1605. Et qui fuerint Priores: in ipsis tamen Conventibus, in quibus habetur consilium. Romæ 1553. & 1558. & Vallisoleti 1605. Item qui actualiter sunt Supprieores; deinde Baccalaurei, seu Præsentati, Lectores primi, & Prædicatores Generales. Veneriis 1592. Et qui per decennium integra Quadragesima munus prædicationis gratiose exercuerunt, in illis dumtaxat Conventibus, in quibus fuerint assignati. Barcinonæ 1574. & Romæ 1589. Magistri etiam Novitiorum, ut ibidem, necnon Parisiis 1611. confirmatum fuit. Vicarii nationum, vel qui per Magistrum Ordinis, vel per Priorem Provinciale, Patres à consiliis instituti fuerint. Cæsaraugustæ 1391. & Papiæ 1423. Cæterum hic numerus Patrum à consiliis, in nullo Conventu (excepto Parisiensi, ob multitudinem graduatorum) duodenarium numerum excedat: & ad quem nullus minor quadraginta annis, his exceptis, qui Patres de jure sunt, admittatur. Romæ 1553. & 1558. In Capitulo enim Romæ 1589. Prioribus sub pœna abolitionis ab officiis, ipso facto incurrenda mandatum fuit, ne aliquem ultra prædictum numerum ad consilium vocent, aut admittant. Et si secus fecerint, totum sit irritum & inane: & quæ in ipsis consiliis decreta ab hujusmodi Patribus fuerint, nullius sunt roboris, vel momenti.

Quod verò ad locum eorundem Patrum attinet in præscripto duodenario numero, post Priorem, Magistri in Provinciis acceptati primo loco computari debent: deinde qui fuerint illius, vel alterius Provinciæ Provinciales etiam non Magistri, Inquisitores, postea Supprior: deinde Baccalaurei, deinde Lector primus: & ad extremum successive cæteri, prout juris ratio postulaverit. Neapoli 1600. Cæteri vero locum suæ professionis, etiam inter alios Fratres retineant, siue sint Patres, de jure, siue ex gratia. Salmanticæ 1551. Quæ autem in consiliis tractabuntur, postquam voce publica consultiva (si voluerint aliquid dicere) fuerint discussa; subsequenter per vota secreta approbentur. Neapoli 1600. & in libro ad hæc deputato, vel per aliquem ex Patribus, vel per aliquem Sacerdotem ex assignatis in Conventu ad officium Secretarii per vota secreta electum, describantur. Qui Secretarius consilii, si non erit ex numero Patrum à consiliis, non habebit vocem decisivam, sed tantummodo consultivam: & nihilominus ad secretum, sicut & alii tenebitur, ut in eodem Capitulo Neapoli 1600. dicitur. Qui autem ex Patribus secreta consilii in præjudicium justitiæ, vel correctionis, vel etiam personæ cujuscumque quomodocumque revelaverit, privatus sit Paternitate à consiliis: neque unquam inter Patres à consiliis coopari possit, nisi à Magistro Ordinis, vel Generali Capitulo cum eo dispensetur. Barcinonæ 1574. & Romæ 1580.

Potissimè autem hæc in Patrum consilio pertractanda sunt: Institutio Supprioris, quando fit à Priore, cap. de elect. Prioris. Ædificia notabilia in Conventibus. Romæ 1589. Absolutio Supprioris instituti, sive à Priore, sive à Provinciali. Valentia 1596. Institutio & absolutio Magistri Novitiorum quando extra Capitulum Provinciale de hoc disceptatur. Electio Novitiorum ab Ordine ante professionem. Venetiis 1592. Extractio librorum à communi Bibliotheca. Neapoli 1600. Romæ 1601. & Vallisoleti 1605. Alienatio, sive commutatio bonorum immobilium, etiam habita licentia Provincialis. Vallisoleti 1605. Electio Depositariorum Conventus, ibidem, & Romæ 1608. Licentia itinerandi extra fines sui Conventus. Romæ 1589. Concessio litterarum testimonialium de doctrina & moribus, Fratribus mittendis ex Conventu, in quo vixerunt, ad Collegia, seu studia generalia. Romæ 1589. Destinatio Prædicatoris ad instituendam societatem sanctissimi Rosarii. Venetiis 1592. Examen, & approbatio Fratrum ad audiendas confessiones sive Fratrum, sive secularium; & insuper ea omnia, quæ à toto Capitulo Fratrum definienda sunt, prius in Consilio Patrum proponenda, tractanda, & per vota secreta concludenda erunt. Quæ omnia, ut tantò amplius observentur, in memoriam revocamus Leonis X. Pontificis Maximi Constitutionem Salmant. 1551. à Patribus acceptam, cujus ea est particula: *Nihilominus mandamus vobis, ut illa, quæ per suffragia absque canonica electione circa determinatas personas per vos concludenda sunt collatione prius facta, & auditis omnibus volentibus aliquid in negotio, de quo agitur dicere; cum ad vota pervenitur, per fabas, vel aliud simile, vota nonnisi secreta dentur. Non obstantibus Constitutionibus, & Ordinationibus Apostolicis, ac dicti Ordinis, ceterisque in contrarium facientibus quibuscumque.*

(b) *Diligenter examinent.*) Declaramus, quòd recenter in Capitulo Bononiensi. 1615. fuit ordinatum, ut recipiendorum ad habitum clericalem, tum ad probationis annum, tum ad professionem, à designatis juxta Constitutiones nostras Examinatoribus coram Patrum consilio examen fiat: utque similiter coram Patribus prævio examine Fratres Conversi ad professionem recipiantur; & non admittantur, nisi fuerint in fide Christiana, & Officio pro eorum debita sufficientia instructi. In quo Præsidentium, & Examinatorum, ac reliquorum Patrum conscientias aggravamus.

Debent autem prædicti Examinatores, urbanè, lenitè, & inprimis de impedimentis in Constitutionibus expressis inquirere: & omnium, quæ invenerint, fideliter Conventui relationem facere. Summopere autem cavendum est, ne recipiantur ignari, aut inepti ad litteras, vel qui habent quædam vitia quasi inseparabilia, & naturalia, sicut est innata iracundia, ebrietas, debilitas naturæ ex vitiosa consuetudine, & dispositio ad furorem, & hujusmodi, de quorum correctione vix spes potest haberi.

Item debent inquirere, quo spiritu, qua mente & voluntate, id regularis vitæ genus elegerint; quem sibi finem proposuerint: num zelo perfectioris vitæ, & ut Deo liberius famulari possint, vel levitate, vel humano affectu, aut inordinato animi motu ducantur. Clemens VIII. in Constitut. Apostolica.

*Cod. Regul. Tom. IV.*

Præterea declaramus, quòd fel. recor. Sixtus Papa V. edidit Constitutionem de non recipiendis ad Ordinem criminosis, ære ingenti alieno oppressis, ratiociniis obligatis, homicidiis, & reliquis facinorosis: & si fuerint tales recepti, receptionem & professionem eorum annullavit. Gregorius etiam XIV. declaravit, aliquam informationem recipi debere ante habitus susceptionem, dummodò ante professionem plena, atque eo modo, quo Sixtus V. disponebat informatio caperetur: simulque declaravit sufficere, ut Superiores Conventuum, cum tribus aut quatuor de Capitulo per vota secreta captas informationes approbent. Tandem fel. recor. Clemens VIII. casus in quibus professio à Sixto V. nulla declarabatur, reduxit ad terminos juris: salvas tamen omnino voluit esse penas contra Superiores, non servantes in reliquis formam prædictarum Constitutionum, de criminosis & aliis supra nominatis non recipiendis ad Ordinem, decretas. Item declaramus in Capitulo Romæ 1589. ordinatum fuisse, & auctoritate Apostolica confirmatum; ut nullus ad habitum Clericalem in Ordine nostro recipiatur, nisi qui calleat linguam latinam, & sciat distinctè & clarè legere, benèque intelligat ac declaret ea quæ legit. Porro per callere linguam latinam intelligitur, quòd sit in Grammaticalibus sufficienter instructus: prout Venetiis 1592. eadem Apostolica auctoritate fuit declaratum. Clemens etiam VIII. ita statuit: *Tantum vero litterarum sufficientiam calleat recipiendus in Clericum, ut illius addiscendæ spem indubitatam præferat; quod minores & suo tempore majores Ordines, juxta Decreta Concilii Tridentini suscipere valeat.* Sed si quis annum vigesimum quintum excedens, ad habitum regularem admitti postulaverit, & talis eruditionis expertus inventus fuerit; in Conversorum tantum numerum, quibus litterarum sufficientia necessaria non est, referatur,

## II.

**V**erumtamen antequam stabilitatem & communem vitam promittant, & obedientiam Prælato, & successoribus suis faciant, (c) tempus probationis eis assignetur: (d) ut ipsi austeritates Ordinis, & Fratres mores eorum experiantur. Nullus recipiatur, nisi sit requisitus an sit conjugatus, (e) an servus, (f) an ratiociniis obligatus, (g) an alterius professionis, vel occultam habeat infirmitatem.

(c) *Tempus probationis eis assignetur.*) Declaramus, quòd tempus probationis est unus annus completus, qui non potest incipere ante annum quintumdecimum completum. Et ita nullus Clericus potest profiteri, nisi completo sextodecimo anno: juxta Constitutionem Concilii Trident. sess. 25. cap. 15. Si quis autem infra annum probationis, vel infra ætatem à jure taxatam aliquem ad professionem receperit, aut tali receptioni una cum effectu consenserit: suspensus est à receptione cujuscumque Novitii: donec à Magistro Ordinis, vel Diffinitoribus Capituli Generalis, vel Provincialis fuerit restitutus. Et præter hæc peccat mortaliter faciens contra præceptum Ecclesiæ, debet puniri pena gravioris culpæ, ut habetur in cap. *Non solum*, & cap. *Constitutionum* de Regularib. lib. 6. & in Capitulo Carcassonæ 1312. ordin. 7.

E 2

(d).



(d) *ut & ipsi austeritates Ordinis &c.*) Declaramus, quòd cum austeritas Ordinis præcipue in continuatione consistat, debet annus probationis integer esse, & continua. Et ideo si quis steterit in Religione nostra per sex menses, & postmodum egrederetur; & transacto aliquo tempore reverteretur ad Ordinem: non posset post sex menses recipi ad professionem, sed oporteret, ut annum integrum continuaret: quia non posset verè dici, quòd esset expertus austeritates Religionis, quæ pro maxima sui parte in continuatione consistunt. Nam aliquis posset faciliter jejunare, & à carnibus abstinere, & castitatem servare per unum, vel duos menses, qui non posset prædicta continuare. Et ideo ad veram probationem austeritatum requiritur continuatio unius anni integri: quæ juxta decisionem Romanæ Rotæ interruptur etiam per spatium unius noctis, vel unius diei; ac proinde talis non potest recipi ad professionem Religionis. Nec obstat textus Constitutionis de Novitiis cap. 14. qui alias observabatur ante Concilium Tridentinum.

(e) *An servus.*) Declaramus, quòd servus non debet recipi in Religionem, nisi de licentia sui Domini, vel nisi omnino factus sit liber: & si receptus, fecerit professionem, & Monasterium fuerit in culpa; puta, quia sciebat ipsum esse servum, vel fuit negligens ad hoc investigandum: facta professio tenet, tenebatur tamen Conventus satisfacere Domino suo.

(f) *An ratiociniis obligatus.*) Declaramus, quòd si quis est obligatus ad ratiocinia Reipublicæ, non potest recipi in Religionem, nisi prius de ratiociniis se expediat; imò nec qui ad ratiocinia privatorum hominum obligatus est; quia, ut docet S. Thomas 2. 2. q. 189. art. 6. ad 3. argumentum, ille qui est obligatus ad aliquid certum, non potest illud licitè prætermittere, facultate existente. Et ideo si aliquis sit obligatus, ut aliqui rationem ponat, vel ut certum debitum reddat: non potest hoc licitè prætermittere, ut Religionem ingrediatur. Præ oculis quoque habenda est Constitutio Clementis VIII. de receptione Novitiorum, quæ sic habet: *Quod attinet ad recipiendorum Novitiorum formam, ultra diligentem perquisitionem, quæ habenda erit de naturalibus uniuscujusque corporis vassitudine, moribus, & antea vita: & præcipue eorum, qui annum sextum decimum excesserint; an criminosi, aut ere alieno gravati, vel reddende rationi obnoxii sint: juxta formam Constit. Sixti V. &c. illud etiam Superiores perquirant, ut nullus admittatur, qui ex honestis parentibus natus non sit &c.* Et infra: *Et ne eorum parentes, ope & subsidio ipsorum indigentes deserant.*

De criminosi porro illud habetur in Capit. Romano 1583. Facinorosi & homicidæ non recipiantur ad habitum, nisi maximam suorum errorum poenitentiam ostenderint: aut ferventissimo spiritu ducti, ad Religionem venerint. Idque non sine licentia Magistri Ordinis speciali.

(g) *An alterius professionis.*) Statuimus, ut nullus in alia Religione Professus, vel ab ea ejectus, ad habitum Religionis nostræ à quoquam recipiatur. Quod si receptus fuerit, præterquam quòd recipientes graviter puniantur, receptio, sicut & professio, (si tamen postmodum fuerit subsecuta) pro nulla habeatur, & talis statim ad seculum remittatur. Valentia 1526. Romæ 1601. Vallisoleti 1605.

## III.

(b) *Nullus recipiatur in Fratrem Clericum ad probationem, vel professionem, nisi à Priore Provinciali, vel ab eo, cui super hoc dederit licentiam specialem; vel à Priore Conventuali cum assensu totius, vel majoris partis Capituli.* Conversum autem non recipiat Prior Provincialis, nec aliquis de ejus licentia, nisi de consensu Prioris, & duarum partium Fratrum, qui sunt de Conventu, (i) quo pro fuerit induendus. Nec Conventus aliquis recipiat Conversum, sine licentia Prioris Provincialis.

(h) *Nullus recipiatur.*) Declaramus, quòd Supprior, vel Vicarius Prioris in ejus absentia non possunt recipere Fratrem ad Ordinem, nisi ex commissione speciali, & expressè sibi facta per Priorem Provinciale, vel Magistrum Ordinis. Apud Verdunum 1356. & Infulis 1393. Itaque in Capitulo Vallisoleti 1605. interdictum est omnibus Prioribus, in posterum ne suis Supprioribus, vel Vicariis licentiam committant recipiendi quemquam ad habitum, vel professionem, sine licentia Provincialis: & qui contra fecerint, in pœnam ab officiis absolvantur. Mortuo tamen, vel amoto Priore, cum Supprior vices Prioris in omnibus plenarie gerat ex nostris Constitutionibus, poterit Fratres ad Ordinem, vel ad professionem recipere.

(i) *Pro quo fuerit induendus.*) Declaramus, quòd Novitii ad illos Conventus perpetuo pertinent, pro quibus fuerunt recepti. Lugduni 1348. Nec debent in alienis Conventibus ad professionem recipi, nisi de voluntate illorum Conventuum, pro quibus sunt recepti ad Ordinem. Massiliæ 1300. Declarantes etiam, quòd Priores Provinciales non possunt determinare aliquem Fratrem pertinere ad alium Conventum, quàm ad illum, pro quo est professus, nisi per simplicem assignationem in Ordine nostro consuetam. Victoriæ 1331.

## I V.

(k) *Nullus Conversus recipiatur infra decem & octo annos, (l) nec receptus fiat Clericus, nisi de licentia Magistri Ordinis speciali.* Nullus Religiosus professus (m) cujuscunque Ordinis Mendicantium, recipiatur ad Ordinem nostrum, sine licentia Magistri Ordinis, vel Capituli Generalis. (n) Nec quicumque illegitimè natus, nisi de Prioris Provincialis licentia speciali. Si autem talis illegitimè natus ad Ordinem receptus fuerit, & dispensatum fuerit cum eodem, quòd possit fieri Prior; non propter hoc Diffinitor fiat Capituli Generalis, aut Provincialis, nec Prædicator Generalis: nec Elector Magistri Ordinis, absque Magistri Ordinis licentia speciali.

(k) *Nullus Conversus recipiatur infra decem & octo annos.*) Declaramus, quòd Fratres Conversi vocantur ad opera corporalia in Conventibus exercenda, ut in sudore vultus sui vescantur pane suo. Et quamvis juxta Constitutionem, decimo octavo ætatis suæ anno recipi possint; tamen Clemens VIII. decrevit non esse recipiendos ante annum vigesimum, & nisi doctrinæ Christianæ capita præcipua sciant. Tempore verò probationis elapso, qui religiosæ perfectionis capaces sunt, & ad laborem corporalem apti; dummodò ætatis suæ annum vigesimum primum exceßerint professionem emittant. Bononiæ quoque 1615. istud pro recipiendis Conversis ordinatum fuit. Ubi est consuetudo recipiendorum Tertiariorum, statuimus, ut nullus ad habitum Conversorum recipiatur, nisi prius per annos duos in habitu Tertiarii Conventui inseruiet: ut sic spiritus, atque vires, quibus præcipue in Fratribus Conversis Ordo noster opus habet, probentur. Ubi verò consuetudo non est recipiendi Tertiarios, ordinamus, ut recepti ad habitum Conversorum, primò duobus annis integris habitum Conversorum deferant: quo biennio eorum vires, & obsequia videantur, & probentur, an idonei sint ad labores. Deindè verò post biennium, annus tertius in eodem habitu pro probatione illis assignetur; ita quod si benè, ut par est, se gesserint, ad professionem post tertium annum recipiantur.

(l) *Nec receptus fiat Clericus, nisi de licentia Magistri Ordinis.*) Declaramus, quòd Priores Provinciales non possunt dare licentiam, quod aliquis Conversus transferatur ad statum Clericorum, sed solus Magister Ordinis. Nullus etiam Conversum habitu albo in Ordine nostro, excepto Magistro Ordinis, induere potest. Quod si secus fecerit, totum sit irritum & inane: & Prælatus contraveniens, in pœnam ab officio absolvatur, necnon voce passiva privetur. Bononiæ 1564. Barcinonæ 574. & Romæ 1580. atque idem de Tertiariis observetur. Quicumque autem Conversus, Oblatus, vel Tertiarius inventus fuerit sine Magistri Ordinis licentia Clericalem habitum assumpsisse; ipso omnino exuatur. Conversus per sex menses etiam, scapulari nigro privetur, & in Conventu pro carcere uno anno detineatur, & ad pristinum statum redire cogatur. Romæ 1580 & Bononiæ 1615. Si quis autem Conversus se ipsum tali habitu induere ausus fuerit, & quod pejus est Ordines sacros fraudulenter susceperit: ultra Constitutiones Apostolicas de malè promotis, juxta leges nostras severe puniatur, & ipso etiam habitu Conversorum exuatur, atque solo habitu Tertiarii indutus, toto tempore suæ vitæ ab executione dictorum Ordinum sit suspensus, perpetuòque inhabilis. Neque ab aliquo ad suum habitum restituatur, nisi à Capitulo Generali. Neapoli 1600. Romæ etiam 1608. ordinatum fuit, ut Conversi, qui habitum Clericalem, vel jam susceperunt, vel in posterum cum licentia Magistri Ordinis susceperint; nullo pacto sine licentia Magistri Ordinis, sacris Ordinibus initiuntur. Quod si Magister Ordinis cum aliquo dispensaverit, non poterit habere vocem in quacunque electione canonica: nec ad eligendum eos, qui sunt mittendi ad Capitulum Generale, vel Provinciale, ante sex annos completos, à die receptionis habitus Clericorum computandos: & nisi etiam fuerit Sacerdos, ut infra distinct. 2. cap. 2. de electione Prioris clarius explicatur. Et quoad vocem, & quoad locum ubique esse debet post Fratres Clericos, qui cum in statu Clericorum præcesserunt. Bisuntii 1303. & Burgis 1369.

Præterea denunciamus Clementem VIII. statuisse, ut qui ad Conversorum habitum recepti fuerint, ad Clericorum statum, etiam durante probationis anno transire non possint. Et cum professionem emisissent, quemadmodum & Clerici in libro designato, professionem suam subscribant. Qui autem literarum ignari sunt, signum Crucis in eodem libro professioni suæ aliena manu descriptæ apponant, & testes affistentes subscribant.

(m) *Cujuscumque Ordinis Mendicantium.*) Declaramus, quòd per Religiosos Mendicantes, intelligit Constitutio non solum illos Religiosos, qui possessiones non habent, nec in communi, nec in particulari: sed etiam illos, qui de jure, vel ex indulto Apostolico sunt Mendicantes. Valentiniæ 1337.

*Ad Ordinem nostrum.*) Declaramus, quòd quamvis de jure antiquo communiter poterant Fratres quorumcumque Ordinum, sive Mendicantium, sive non Mendicantium ad Ordinem nostrum propter sui præstantiam cum licentia Magistri Ordinis transire: tamen postea propter Constitutionem Bonifacii IX. Papæ nullus ex alio Ordine Mendicantium potest ad Ordinem nostrum, neque ex nostro ad alium, nisi de licentia Sedis Apostolicæ transire. Martinus quoque V. sub pœna excommunicationis latæ sententiæ prohibuit, ne ullus Religiosus quorumcumque Ordinum Mendicantium, cujuscumque status, conditionis &c. virtute quorumcumque facultatum concessarum etiam auctoritate Apostolica &c. admitti, vel recipi possit per quoscunque Superiores Monasticos in Monachum cujuscumque Ordinis Monastici, (Carthusiensi dumtaxat excepto,) sub pœna excommunicationis latæ sententiæ: quam incurrunt ipso facto receptores, & recepti, à qua absolvi non possunt extra articulum mortis, nisi à Romano Pontifice.

(n) *Nec quicumque illegitimè natus.*) Declaramus, quòd nullatenus illegitimè natus potest recipi ad Ordinem sine licentia Provincialis, vel Magistri Ordinis, & si fuerit receptus, non poterit esse Supprior, nec Vicarius Prioris in aliquo Conventu, etiam Priore illius Conventus mortuo, vel amoto: nisi cum eo fuerit dispensatum. Apud Podium 1344. declaratum fuit, quòd illegitimè natus non potest fieri Prior, nec Supprior, nec Visitator sine dispensatione. Et si dispensatum fuerit, quòd possit esse Prior: non poterit tamen propter hoc esse Vicarius Provincialis, aut Provinciae: nec Diffinitor Capituli Generalis, nisi in dispensatione de prædictis facta fuerit expressa mentio.

Item denunciamus Sixtum V. olim prohibuisse, ne illegitimè quicumque ad Religionem recipiantur. Clemens tamen VIII. ejusdem Sixti Constitutionem ad terminos juris reduxit: posseque illegitimos recipi indulgit; cum hac tamen clausula: ut hi, ad quos spectat hujusmodi receptio, præter alia, quæ inquirere debent, diligenter vitam, & mores examinent, & illos recipiant: si tamen bonam indolem, & virtutis specimen præferant, ut merita suppleant natalium defectum, & illorum receptio Ordini profutura esse videatur. Dummodò tamen in eadem Religione filius, in qua pater professus fuerit, vivente patre non admittatur. Voluit etiam idem Summus Pontifex licere Generali, aut Provinciali, ad quos spectat dicta dispensatio, juxta privilegia illis concessa dis-

pensare posse cum illegitimis, suffragantibus meritis ad gradus, honores, & dignitates obtinendas.

## V.

**P**rohibemus autem ne aliquis de cætero (o) aliquam mulierem tondeat, vel induat, vel ad professionem recipiat. Pueri intra quartumdecimum annum, aut non recipiantur, aut si in aliquibus Conventibus oporteat eos communiter recipere, recipiantur de consensu Capituli Conventus, a Priore, & non aliàs. Nec retineri possint in aliquo Conventu, (p) ubi non est Novitiorum similitum congregatio cum proprio dormitorio & Magistro: ita quòd alibi non recipiantur, nisi statim mittantur ad hujusmodi Conventus, in quibus profitebuntur: pro Conventibus tamen, in quibus receperunt habitum, & à quibus Conventibus de vestimentis provideri eis debet.

(o) *Aliquam mulierem tondeat, vel induat*) Declaramus Salmanticæ 1551. ita ordinatum fuisse. Strictissimè inhibemus Prælati, & Conventuum Præsidentibus, ne de cætero aliquam mulierem ad habitum Tertii Ordinis recipiant, quæ sit minoris ætatis quam annorum quadraginta, & quæ non habeat unde de victu, & vestitu sibi sufficienter valeat providere: quod intelligimus de his, quæ in propriis domibus habitant, & non de his, quæ sunt in Monasteriis collegiatis.

(p) *Ubi non est Novitiorum similitum congregatio.*) Declaramus, quòd hujusmodi Congregatio debet esse ad minus in numero tenario. Salmanticæ. 1551 & Romæ 1553. & 1558. & Avenione 1561. addita sunt hæc verba: Quæ ordinatio cum jam habeat tria, & quatuor Capitula, & admodum necessaria sit, præcipimus, ut inviolabiliter observetur ab omnibus Prælati. Declaramus etiam, quòd Romæ 1589. Sixtus V. dato vivæ Vocis oraculo fel. record. Cardinali Alexandrino Ordinis nostri (ex quo fuit assumptus) Protectori, decrevit, & perpetuis temporibus observandum in universo nostro Prædicatorum Ordine præcepit, ut de cætero Novitii, qui in minoribus Conventibus habitum Religionis assumpserint, ad Conventus majores & religiosos transmittantur, ubi in Dormitorio communi eorum, cum debita clausura, & saltem in numero senario educari possint sub discreto & religioso Magistro. Quod si quis Prælati in posterum professionem alicujus Novitii recipere præsumperit, qui juxta tenorem hujus Decreti non fuerit instructus, ac educatus, vel intra mensem scienter Novitium non transmiserit ad Conventum (ut dictum est) in quo religiose, ut supra instruat: ipso facto sit excommunicatus & gradu atque officio Ordinis indispensabiliter privatus. Ut autem hæc ordinatio debite observetur, eadem Apostolica auctoritate in virtute Spiritus Sancti, & sub sanctæ obedienciæ formali præcepto Provincialibus, seu Vicariis præcepit: ut in suis Provinciis, vel Congregationibus intra spatium duorum mensium à notitia præsentium, Conventus aliquos religiosos designent, ad quos transmittantur, qui in mi-

noribus non aptis ad eorum instructionem sint vestiti: ubi annum probationis peragant, & suo tempore professionem faciant: pro illis tamen Conventibus, pro quibus habitum Ordinis susceperunt; & sic professi ab illa religiosa, & consimili societate, & à cura Magistri Novitiorum ad minus post biennium integrum ab emissâ professione non amoveantur. Non tamen prohibuit idem Sixtus V. quominus longiori tempore sub cura Magistri Novitiorum remaneant: quemadmodum postea Romæ 1608. & Parisiis 1611. ordinatum fuit istis verbis: Ordinamus, ut Novitii in posterum post emissam professionem maneat in domo Novitiorum, & sub cura sui Magistri usque ad Sacerdotium: nec ante id tempus, vel extra domum Novitiorum, vel à cura sui Magistri subduci possint. Cæterum Venetiis 1552. eadem Apostolica auctoritate declaratum fuit, prædictum senarium numerum, ut in pluribus requiri: Provinciis autem desolatiss, sufficere duntaxat quaternarium. Item declaramus in Capitulo Salmanticensi 1551. acceptam fuisse Constitutionem Leonis X. in qua statutum est, ut in juvenum susceptione ad habitum & professionem, suffragia per vota secreta, seu per fabas in Capitulo ab omnibus ferantur: quod idem in Capitulo Valentia 1596. ordinatum fuit. Neque etiam in cellis, aut locis privatis, sed in Capitulo ad habitum & professionem Novitii recipiantur; non obstantibus in contrarium quibuscumque. Romæ 1601. & Vallisoleri 1605. Item, ætas illorum & tempus, in quo vel habitum recipiunt, vel postea votum professionis emittunt, adnotetur. Romæ 1589. & infra *Cap. de Professione*.

## CAPUT XIV.

*De Novitiis, & eorum instructione.*

## I.

(a) **P**Rior Novitiis Magistrum diligentem in instructione eorum præponat; qui eos de Ordine doceat, excitet in Ecclesia, & ubicumque negligenter se habuerint, verbo vel signo quantum poterit eos studeat emendare. Necessaria prout potest debet eis procurare. De apertis negligentibus cum ante eum petierint veniam, pœnitentiam dare: vel eos in suo Capitulo proclamare. Humilitatem cordis, & corporis doceat eos habere, juxta illud: Discite à me, quia mitis sum, & humilis corde.

(a) *Prior Novitiis Magistrum diligentem præponat.*) Declaramus, fel. recor. Clementem VIII. statuisse, Novitiorum simplicium Magistrum non debere vacare officiis, & oneribus, quæ Novitiorum curam possint impedire.

Item statuit Magistrum debere esse Sacerdotem, qui expleverit trigésimum quintum ætatis suæ annum; & decimum suæ professionis: doctrinæ & antecæctæ vitæ exemplo præstantem: orationi præterea & mortificationis operibus addictum: prudentia, & charitate præditum, affabilem, gravem, zelum Dei cum mansuetudine præferentem: ab omni cordis, & animi perturbatione, præsertim indignatione, quam



longiffimè alienum : & talem denique qui in omnibus bonorum operum exemplum se præbeat , & potius amari apperatur , quam timeri . Pro communibus autem , & propriis uniuscujusque necessitatibus , quæ accidere possunt , unus ex Novitiis ætate , & moribus provectior deputetur : qui , Magistro permittente , omnia prout opus fuerit agat ; cui etiam portæ Novitiatu custodiæ , & rerum levioris momenti provisio intra Novitiatum poterit committi . Porro auctoritate Apostolica à Sixto V. in Capitulo Romæ 1589. sub pœna absolutionis ab officio ipso factò incurrenda fuit inhibiti , ne Prior Provincialis seu Conventualis possit ad nutum instituire Magistrum Novitiorum , vel jam institutum ab officio amovere : nisi ex consensu Diffinitorum , si de hoc tractatur in Provinciali Capitulo ; vel ex consensu majoris partis Patrum à consiliis illius Conventus , in quo Magister Novitiorum est instituendus vel amovendus , quando de tali re tractatur extra Capitulum . Ne autem Patres à tam necessaria cura juvenum refugiant , Romæ 1608. ord. 13. fuit ordinatum : ut recusantes officium Magistri Novitiorum sibi à Provincialibus vel à Capitulo Provinciali , vel Prioribus de consilio Patrum impositum ; non possint eligi per unum annum in Priores . Magistris in Theologia , Patribus Provinciæ , & Lectoribus actu legentibus dumtaxat exceptis .

Ut autem istud officium tanto libentius suscipiant , in eodem Capitulo ordinatum , & Parisiis 1611. confirmatum fuit : ut Magistri Novitiorum simplicium sint Patres à consiliis , & ab onere hebdomadariæ exempti .

## I I.

(b) **F**requenter , pure & discretè , (c) doceat eos confiteri , (d) sine proprio vivere , propriam voluntatem deferere , pro sui voluntate , Prælati (e) obedientiam in omnibus voluntariam observare : quomodo ubicumque & in omnibus se habere debeant , ipsos debet instruere ; & quod locum ubi positi fuerint , ubique teneant . Quomodo sibi danti aliquid vel auferenti , malè , vel benè dicenti inclinare debeant : quomodo se ad cameras contineant , ut oculos sublimes non habeant ; quomodo & quid orent , & quàm silenter , ut aliis rugitum non faciant . Quomodo in Capitulo venia , vel ubicumque reprehensi fuerint à Prælato , sit faciendæ : & quod si quis Fratrem suum aliquo modo scandalizaverit ; tamdiu ante pedes ejus prostratus jaceat , quousque placatus erigat eum .

## I I I.

**I**nstruendi sunt etiam Novitii , ut cum nemine contendere præsumant , & in omnibus Magistro suo obediant . In Processione socium sibi collateralem attendant , nec loquantur locis & temporibus interdictis : neminem penitus judicent ; sed si aliqua ab ullo fieri videant , licet mala videantur , bona suspicentur , vel

bona intentione facta : sæpè enim humanum fallitur judicium : & quod non loquantur de absente , nisi quæ bona sunt . Disciplinas frequenter suscipiant : cum duabus manibus bibant , & sedendo : diligenter libros , & vestes , & res alias Monasterii custodiant . Et quod si quid petitum fuerit ab uno Priore , non petatur ab alio , nisi causâ expositâ : sed nec si à majore petierint , vadant ad minorem .

(b) *Frequenter , pure , & discretè doceat eos confiteri .* ) Declaramus , quod Magister Novitiorum debet esse vir prudens , discretus , zelator Religionis , & cæremoniarum valdè peritus : qui Novitios de his instruat , quæ professi facere tenentur ; præter ea , quæ hic in Constitutione expresse habentur , & doceat eos servare illa , quæ sunt substantialia Religionis : ut paupertatem , castitatem , & obedientiam : & quod habitum Religionis , dum in publico apparent , ubique deferant . Similiter debet eos docere de jejuniis certis temporibus servandis , de abstinentia ab esu carnum : de lineis non portandis ad carnem , de culcitrīs non tenendis ; de dormiendo cum tunicella , cingulo , & caligis , de silentio certis locis & temporibus servando . Qualiter in Oratorio se debent habere maturè : & præsertim juxta Altare reverenter , juxta Reliquias timorate , in mensa & in Capitulo compositæ . In comestione religiose : & quod super eicam se non effundant , munde comedant , ne abominationem aliis faciant , & quod non sint verbosi , sed linguam restringant ; oculos sublimes non habeant , neque circumvolvant . In dormitorio quiete se habeant , & nec otiose discurrant : & ubicumque fuerint , non otiosa , sed utilia dicant . Debet etiam eos docere de cæremoniis , maxime circa ministerium Altaris : videlicet de inclinationibus & prostrationibus faciendis , & de aliis ad Religionem pertinentibus : ut simul mores discant & scientiam . Et quia ex sancta ac probata Novitiorum educatione , magni fructus in Religione proveniunt , & regularis disciplina mirifice propagatur : multa in Capitulis Generalibus circa eorum eruditionem ordinata sunt , videlicet : instruendi sunt in cantu , & in Divino Officio , & quod nisi prius sciant Divinum Officium recitare , ad professionem non recipiantur . Caracassonæ 1312 . Item ut in loco ab aliis separato educantur . Venetiis 1592 . Et præter Magistrum , & Pædagogum , nemo nec etiam ipsi Lectores habeant clavem domus Novitiorum , quocumque usu , vel potius corruptela in contrarium non obstante . Romæ 1608 . Et Lectores Novitiorum , nullo pacto eorum negotiis , aut gubernationibus se immisceant , aut ipsos contra suos Magistros defendant , aut pœnitentias illis impositas impedire conentur : neque ullo prætextu , nec alia quacumque causa , vel occasione etiam repetendi lectiones , aut dubia explicandi , domos Novitiorum ingrediantur ; nec cum eis extra scholam , etiam de rebus ad studium pertinentibus , sine licentia Magistri Novitiorum loquantur . Qui autem contra fecerint , & officio Lectoratus , & voce activa passivæque priventur . Vallisoleti 1605 . In anno autem probationis , Novitii in studiis Artium ( præterquam linguarum ) non occupentur , sed tantum in spiritali profectu , in humilitate spiritus & mortificatione carnis : & in summa in his , quæ ad summam perfectionis ( præsertim ex lectione vitæ Sanctorum nostri Ordinis , & opusculis spiritalibus ,

qua .

quales sunt Divi Bernardi, S. Vincentii Ferrerii, Magistri Humberti super Regulam, & Ludovici Granaten. pertulere cognoverint, instruantur. Post emissam autem professionem, ad litterarum studia poterunt admitti Romæ 1608 & Parisiis 1611. Item Romæ 1601. ordinatum, & Vallisoleri 1695 confirmatum, atque utrobique præceptum fuit: ut Prælati omnem adhibeant curam, sub pœna absolutionis ab officio, ne ulla de causa Novitios, aut Professos, per domum Novitiorum, vel per Monasterium vagari permittant, præterquam in evidenti urgentique necessitate.

Item Novitii usque ad Sacerdotium indispensabilem sint sub cura Magistri Novitiorum: sub pœna absolutionis ab officiis, Prælati quibuscumque in contrarium agentibus, vel permittentibus. Barcinonæ 1574. Quod Romæ 1608. declaratum fuit, id esse observandum in universo Ordine nostro, nulla excepta Provincia: ita tamen, ut Novitii qui annum probationis nondum expleverint, in Novitiorum domo, seu loco à societate & consuetudine Professorum separato, detineantur. Ad Ecclesiam, Oratorium, Chorum, & Refectorium, & alia publica loca, cum opus fuerit, tum puri Novitii, tum Professi simul incedant, & conveniant. Porro Novitiis ad remotiores Conventus mittendis, aliquis Pater bonæ atque integræ famæ, comes itineris adjungatur. Barcinonæ 1574. Nullus autem purus Novitius ante Professionem à Provinciali, vel Priore Conventuali, vel Magistro Novitiorum sine consilio Patrum, causâ mature discussâ, habitu Ordinis exuatur. Romæ 1589. & Venetiis 1592.

(e) *Docent eos confiteri.*) Declaramus, quod Fratres nostri non possunt sua peccata, ulli Sacerdoti etiam Fratri Ordinis nostri, absque suorum Prælatorum licentia confiteri: ut supra in Prologo, præsertim ex Apostolica Constitutione Clementis VIII. dictum est. Quilibet tamen Prior in suo Conventu, cum habeat jurisdictionem quasi Episcopalem, potest quemcumque Fratrem Ordinis nostri, etiam hospitem ad suum Conventum venientem, à quocumque peccato, & ab omni sententia juris, & iudicis generaliter, & non in particulari prolata absolvere: nisi forte talis esset excessus, ut merito Sedes Apostolica esset consulenda. Potest etiam Sacramenta Eucharistiæ, & Extremæ Unctionis Fratribus ad suum Conventum venientibus ministrare; sicut dictum est in Prologo; atque declaratum Perpiniæ 1327 Tolosæ 1328. & Valencenis 1337. Potest autem prædicta omnia Prior facere per privilegium, quod dicitur *Mare magnum*. Nec potest quoad hoc Priorum autoritas à Priore Provinciali diminui, atque arctari: quia quod à Superiore conceditur, revocari ab inferiore non potest. Præterea Prior Fratri suo subdito concedere potest, ut confiteatur Priori, vel Fratri alterius Conventus (aliàs legitimè ad Confessiones audiendas exposito) sed non Sacerdoti alterius Religionis. Tolosæ 1328. Cum vero Magister Ordinis curam animarum omnium Fratrum nostri Ordinis plenè, & liberè habeat, ipsosque Fratres autoritate propria ligare, & absolvere potest, ut patet per Privilegia; omnes Fratres Ordinis ab omnibus excessibus, & censuris, etiam Sedi Apostolicæ reservatis potest absolvere: nisi essent hæretici relapsi, vel schismatici, aut litteras Apostolicas falsificantes, vel ad infideles prohibita attulissent. Potest etiam ex legitima causa Fratribus licentiam dare, ut confiteantur Sacerdoti seculari, vel Regulari

(aliàs legitimè exposito) alterius Ordinis, quando copiam Confessoris Ordinis nostri habere non possunt. Ex privilegio autem Innocentii VI. quod in compendio Privilegiorum nostrorum continetur, potest Frater in itinere positus, aut quomodolibet ex Prælati obedientia extra Conventum missus, sua peccata seculari Sacerdoti, vel etiam Confessori alterius Ordinis confiteri. Quod idem usus ipse confirmat, & concessum insuper est a Leone X. *ut in Compendio Privilegiorum Mendicantium* impresso Neapoli 1595. declaratur. Quæ sane concessio facta est specialiter Fratribus Ordinis nostri: hac tamen conditione, ut talis confessio sine fraude fiat, & Prælato significetur.

Item declaramus Salmanticæ 1551. sic haberi: Denunciamus omnibus Fratribus, renunciâsse non privilegiis omnibus, præsertim Ordinis Minimorum, quoad illud, quod spectat ad Fratrum confessiones audiendas. Romæ quoque 1601. Constitutio Clementis VIII. in materia de Confessionibus acceptata fuit, cujus est dispositio istis verbis concepta: Concessionem S. Cruciatæ, & aliorum indultorum particularium, quantum ad prædictum articulum eligendi Confessorem, & absolvendi à casibus reservatis, cum Fratribus, & Sororibus Ordinis prædicti (scilicet Carmelitarum) ac aliorum quorumcumque Ordinum, & Congregationum cujusvis Instituti Mendicantium, & non Mendicantium, tam Provinciæ Hispaniæ, quam extra eam ubilibet, locum minime habere, neque censeri: sed nostræ intentionis existeret; quod iidem Fratres & Moniales, quantum ad Sacramentum Pœnitentiæ, seu Confessionis administrationem, dispositioni suorum Prælatorum subiecti sint, Apostolica autoritate renore præsentium perpetuo declaramus. Declaramus præterea, quod & Novitii, & alii Fratres debent frequenter confiteri: ac præcipuè non Sacerdotes, saltem semel in Hebdomada, etiam si sacramentalis Communio de quindena in quindenam debeat ab eis fieri, ut supra dictum est. Sacerdotes verò tenentur confiteri, quando celebrare debent, & qui in hoc fuerint negligentes à Superioribus acriter puniantur. Bononiæ 1252. & 1476. Cæterum propter reverentiam pœnitentiæ Sacramenti, Fratres dum sua confitentur peccata, debent ante Confessorem genua flectere. Avenione 1561. & Romæ 1569. ubi ordinatum fuit, ut Sacerdotes celebraturi antequam sacras vestes induant, confiteantur.

(d) *Sine proprio vivere.*) Declaramus, quod tam Novitii, quam alii Fratres debent sine proprio vivere, sicut mandatur in Regula, ubi dicitur: *Nec dicatis aliquid proprium, sed sint vobis omnia communia*. Proprium autem dicitur quidquid celatur Prælato suo, vel tenetur contra ejus voluntatem: & ideo Religiosus aliquod recipiens mobile, vel immobile, sine consensu sui Superioris, aut illud quod ex licentia Prælati recepit, si non est paratus totum ponere in manibus ejus ad placitum, & requisitionem ipsius Prælati; aut aliquid abscondit ne videatur, aut accipiat à Prælato, proprietarius est, & peccat mortaliter, nisi tanta sit parvitas materiæ, ut merito à mortali valeat excusari. Et propterea in diversis Capitulis fuit sub præceptis, censuris, & pœnis prohibitum omnibus & singulis Fratribus, ne aliqua bona temporalia, nisi ad usum tantum, & de licentia suorum Prælatorum teneant: nec ea vendere, donare, pignori, commutare, vel quovis modo alienare; aut pecunias, vel alia bona apud mer-

mercatores, aut campsores, seu apud quamcumque personam extra obedientiam nostri Ordinis constituti tenere, seu mutare, sine licentia Superiorum: aut quod gravius est, negotiationes, seu mercaturas, aut artem Alchimiae exercere praesumant. Fuit etiam demandatum, ut Fratres semel quotannis teneantur omnia bona ipsis ad usum concessa, ad pedes sui Praelati re ipsa exponere, vel saltem omnia integraliter & fideliter, nihil occultando in scripta redigere, & suis Praesidentibus, quasi se ipsos omnium rerum proprietatem abdicantes, praesentare. Papiæ 1423. & in omnibus aliis sequentibus usque ad Capiculum Romæ celebratum 1508. inclusive: & iterum Romæ 1518. Et tandem propter Concilium Tridentinum in Capitulo Bononien. 1564. in virtute Spiritus Sancti, & Sanctæ Obedientiæ, omnibus Conventuum Praesidentibus fuit præceptum: ut infra unum mensem privatas omnium (nullo excepto) cellas visitarent; & si quid statui paupertatis minus conveniens invenissent, auferrent atque communi utilitati applicarent: omnes vero Fratres quotannis sua omnia Praelatis fideliter exponerent.

Item declaramus, quod Religiosus de rebus sibi concessis per Praelatum, ita habet usum, quod non habeat usumfructum: ac ideo Religiosus, cum non debeat esse proprietarius, nec alicujus rei habeat dominium: nihil donare, neque etiam eleemosynam facere potest ex rebus ad usum ei concessis, vel per industriam à se acquisitis, vel quacumque ratione ei datis: quia omnia prædicta sunt Monasterii quantum ad dominium. Et ideo Praelati tenentur laborare quantum eis possibile est, ut Fratres in suo Conventu in communi vivant, & proprietarii non sint: & subditi non debent in hoc suis Praelatis resistere. Si vero resistentiam faciant, quia de suis rebus secundum libitum propriae voluntatis volunt disponere, videntur esse in malo statu.

(e) *Obedientiam in omnibus voluntariam &c.* Declaramus, transgressionem obedientiae peccatum esse mortale: ut habetur 1. Reg. c. 15. ubi dicitur: *Quasi scelus idololatriæ est nolle obedire.* Sed non omnis transgressio ordinationis in Regula, vel in Constitutione positæ, vel à Praelato factæ est proprie inobedientia. Nec est aliqua Religio, in qua quis voveat se servaturum omnia posita & ordinata in Regula, vel in Constitutionibus, sed aliqua ex ipsis, plus vel minus secundum formam professionis, in qua sit votum solemne. Quatuor autem modis agit quis contra votum obedientiae, ac proinde peccat mortaliter transgrediendo ordinationes Regulae, vel Praelatorum. Primo per contemptum: quia quantumcumque illud, quod est ordinatum à Regula, vel à Constitutione: vel à Praelato, de se sit parvum; si per contemptum transgrediatur, committit peccatum mortale, sicut in Prologo dictum est. Secundo agit quis contra votum obedientiae, ac proinde mortaliter peccat, quando facit contra præceptum sui Praelati: factum sub præscripta in Prologo verborum forma, de his, quæ ad Regulam pertinent, vel ad Constitutiones; dummodo intendat Praelatus præceptum facere, & subditi obligare. Ut cum dicit: *Præcipio tibi in virtute Spiritus Sancti, & sanctæ obedientiae: vel, Præcipio sub pœna excommunicationis.* Tertio modo agit quis contra votum obedientiae, ac præcepta contenta in Regula, vel in Constitutionibus, ubi est aliquid sub præcepto

*Regul. Tom. IV.*

mandatum in virtute sanctæ obedientiae, vel sub pœna excommunicationis. Quarto modo Religiosus agit contra votum obedientiae, quando transgreditur essentialia, & substantialia Religionis, ex quibus Religio integratur: sicut est paupertas voluntaria, observantia castitatis, forma & color habitus, quem quilibet Religiosus tenetur patenter deferre quando procedit in publicum. Et ideo Religiosus proprietarius, aut incontinentem vivens, aut habitum suæ Religionis cum procedit in publicum non deferens, vel absque legitima causa occultans, agit contra votum obedientiae, & mortaliter peccat. Transgressionem vero aliarum ordinationum, vel admonitionum, quæ ponuntur in Regula, vel in Constitutionibus, vel quæ à Praelato sunt: sive statuta illa, & ordinationes ponantur affirmativè, sive simpliciter, & negativè; non obligant de se ad peccatum, cum sint tantummodo puræ Constitutiones, nec alias Divina, vel humana lege prohibita; ad pœnam solum, & non ad culpam obligant transgressores. Nisi fortè sit cum eis præceptum conjunctum, vel fiat transgressio ex contemptu, sicut supra dictum est: nam ex his duobus capitibus, transgressio erit peccatum mortale, & si ex negligentia, fiet veniale.

#### IV.

**I**tem confessiones Novitiorum ante professionem recipiantur, & diligenter de modo confessionis, & de aliis instruantur. Item Novitii ante professionem, de debitis se expediant, & (f) omnia ad pedes Prioris ponant, ut se ex toto absolvant. Similiter omnes Fratres singulis annis semel (g) omnia sibi commissa Prioribus suis exponant, pariter & exhibeant, (h) eorum dispositioni relinquendo.

(f) *Omnia ad pedes Prioris ponant, ut se ex toto absolvant.* Declaramus, quod nullus Religiosus professus debet in particulari aliquid proprium possidere, sed omnia in communi ponere, ut in Regula dicitur. Quamobrem Urbanus Pontifex Can. 12. qu. 1. cap. *Scimus*, sic dicit: *Quicumque vestrum vitam communem susceptam habet, & vovit se nihil proprium habere: videat ne sollicitationem suam irritam faciat, sed fideliter custodiat; ne damnationem, sed primum sibi acquirat.* Et extrav. de statu Monach. cap. *Cum ad Monasterium*, dicitur: *Prohibemus districte in virtute obedientiae, sub obtestatione Divini iudicii: ne quis Monachorum propriam aliquo modo possideat.* Et cap. *Monachi* eodem Titulo, dicitur: *Præcipimus universis Religiosis, ne pecuniam, seu proprium habeant.* Et dicitur proprium, quasi à communicato separatum: & importat dominium rei iustis modis acquisitum. Quare Praelatus cum Religioso dispensare non potest, ut proprium habeat: scilicet: ut habeat aliquid simpliciter in suo dominio, ac de eo facere possit propria autoritate, quidquid velit sine scitu, & voluntate Superioris, quod si Praelatus permittat, vel quod pejus est, consentiat ut Frater aliquid proprium habeat, & quæ habuerit, ad placitum distrahat, dissipet, atque etiam in Monasterii detrimentum perdat: non excusatur à gravi peccato, cum ovem suam morti exponat. Si vero Religiosus, ea quæ sunt ipsi ad usum concessa,

F

sine



sine voluntate, & consensu sui Prioris, quasi dominus rerum donat, vel vendit, mortaliter peccat, nisi forè in rathabitatione sui Prælati spem poneret. Quapropter ne Fratres diffident res sibi ad usum concessas, Mediolani 1270. sic decernitur: Volumus, & districtè injungimus, ut quilibet Prior Conventualis, singulis annis, & specialiter initio sui regiminis, à quolibet Fratre diligenter inquirat, quid habeat, quid debeat, quid etiam sibi debeat: atque hæc omnino redigantur in scripta. Deindè cum de rebus Fratris scrutinium fecerint, si quid auctum, vel diminutum fuerit, inquirant, & faciant; ut Fratres, qui pecuniam ad aliquos usus habent, illam expendant, & longo tempore non reservent. Quam si Fratres infra tempus eis assignatum non expenderint, Prælati ab ipsis eam auferant, & dent Conventui. Et Parisiis 1276. statuitur: Ordinamus, & districtè injungimus, ut nullus Frater pecuniam recipiat sine sui Prælati speciali licentia: & si casu aliquo contingente sine licentia pecuniam receperit, teneatur statim suo Prælati eam repræsentare. Quod si facere neglexerit, ex vi præsentis Ordinationis, ipsa pecunia sit privata, & ad Conventum de quo fuerit devoluta: nec talis pecunia possit ei restitui à Priore, vel à quocumque Vicario. Volentes, quòd Constitutionem de rebus Fratrum suis Prioribus quotannis exponendis, & de ratione reddenda pecuniarum, atque aliarum rerum, quæ dispensantur per Fratres, teneantur Priores, & Vicarii observare diligenter, atque ut observentur à Fratribus pariter efficere: & qui facere neglexerint, gravius puniantur. Et in Capitulo Romano 1601. sic habetur: Confirmamus, quòd in duobus præcedentibus Capitulis Romæ & Valentia, aliisque sæpius sanctè statutum fuit: ut qui pecunias undecumque habuerint, teneantur eas sub pœnis proprietarii debitis, infra terminum viginti quatuor horarum suo Prælati præsentare, atque ex ejus licentia in communi deposito ponere. Quod quidem in modica pecuniarum quantitate, ad breve tempus, & ad certum usum, attenta tamen personarum, & occasionum qualitate, permitti poterit, Prælatique gravius puniantur, si permiserint pecunias à Fratribus aliter expendi, quàm eorum religiosa necessitas, vel commoditas postulaverit. Si quis autem Frater (quod Deus avertat) in proprietatis crimine mortuus esse repertus fuerit, talis beneficio Ecclesiasticæ sepulturæ omnino privetur, atque in sterquilino sepeliatur: juxta quod in quendam Monachum se fecisse narrat Beatus Gregorius Magnus in lib. Dialogorum, & ut habetur de statu Monach. cap. Monachi &c. & cap. Cum ad Monasterium.

Item ordinamus, & districtè injungimus, ne Fratres pecuniam teneant, nec habeant in deposito, nisi ad certos usus ex suorum Prælatorum licentia deputatam: quam in alios usus eis non liceat commutare, eamque infra breve tempus, ipsis à suis Prioribus, vel eorum Vicariis assignandum, in prædictos usus expendere teneantur. Alioquin ex vi præsentis ordinationis, ipsa pecunia in omnibus commemoratis casibus sint privati, & ad eorum Conventum sine recuperandi spe, devolvatur. Volentes ut Priores, & eorum Vicarii exequi prædicta studeant diligenter, & si negligentes fuerint acrius puniantur. Priores etiam, & quicumque Vicarii ad eandem ordinationem servandam de pecuniis eis datis similiter obligentur. Quæ ordinatio, ut à Prioribus, & Vicariis diligentissime observetur, Priores Provinciales diligen-

ter curent. Mediolani 1278. Et Carcassonnæ 1312. etiam istud additur. Cum in quocumque Ordine proprietatis vitium execrabile sit, ac summo studio evitandum: ordinamus, ut quicumque Fratres pecuniam aliquam, vel quæcumque jocalia in auro, & argento, seu lapidibus pretiosis, vel quæcumque res alias habentes extra custodiam Ordinis apud quamcumque personam deposita, teneantur infra unum mensem à notitia præsentis ordinationis, illa ad Ordinem reducere, quod si hoc facere neglexerint, ex nunc eos privamus prædictis rebus omnibus, atque Conventibus, ad quos dicti Fratres pertinent applicamus. Sub eadem etiam pœna prohibemus, ne aliquis in futurum quæcumque talia, nisi in communi Fratrum deposito, atque ex suorum Prælatorum speciali, & expressa licentia teneat. Fratres etiam, equirentibus Prioribus Provincialibus, vel Conventualibus, juxta tenorem nostrarum Constitutionum, omnium receptarum, atque expensarum rerum, ac dispensationum, & executionis testamentorum, rationem reddere teneantur. Quæcumque autem gratias, seu exceptiones, quibuscumque à quocumque quoad hoc datas, præsentis ordinatione penitus revocamus. Lugduni 1318. cum hac additione: Et nihilominus volumus, quòd Fratres qui de hoc convicti fuerint, tanquam proprietarii puniantur: in quam pœnam similiter volumus incurrere omnes, qui huiusmodi deposita apud seculares habuerint in futurum. Idem statutum est Tolosæ 1372. Narbonæ 1394. Papiæ 1423. & Bononiæ 1262. ubi additum est pro diuturniore pecuniarum in deposito conservatione: Ordinamus, ut nulli Fratri licentia concedatur de conservanda pro se pecunia, nisi pro libris, seu scriptis: neque sic recepta, & depositata possit in alios usus expendi. Item in Capitulo apud Montem Pefulanum 1265. statutum est: volumus, & ordinamus, ut Fratres, qui ex Magistri Ordinis, vel Prioris Provincialis licentia pecuniam receperint, teneantur suis Prioribus quantum, & à quibus personis receperint, quantocyus exponere. Item in Capitulo apud Pestum 1273. habetur: Volumus, & mandamus, ut nullus Frater habeat vestes Ecclesiasticas, vel ornamenta, seu paramenta aliqua: nec cruces aureas, vel argenteas, vel cum lapidibus pretiosis: nec annulos, vel lapides pretiosos præter Magisterii Insignia. Qui autem habuerint, teneantur infra tres menses de prædictis se expedire: quod si non fecerint, eos prædictis rebus privamus, & suis Conventibus eas applicamus. Item in Capitulo apud Tolosam 1258. volumus, & ordinamus, ut Fratres non emant sibi pannum pro vestibus, sed per manus vestiarum omnibus ematur: sive dentur vestes de communi provisione, sive etiam de Prælati licentia dentur alicui pecuniæ, pro vestibus specialiter.

(g) *Omnia sibi commissa Prioribus suis exponant.* Declaramus, quòd Fratres, qui habent administrationem honorum Conventuum, ut Procuratores, Librarii, Vestiarum, & Sacristæ, debent prædicta cum utilitate, & non cum detrimento Conventus administrare, & res sibi commissas, solemter, & diligenter servare, & necessaria unicuique secundum quod facultas permiserit discretè distribuere, & ministrare, & fideliter ad bonum commune omnia sibi commissa tractare. Nec debent pro huiusmodi Officiis mercedem quærere, cum omnia sua opera, etiam voluntates sint in potestate Prælatorum: nec possunt prædicta vendere, donare, aut quovis modo distrahere. Et si quis Religio-

sus habeat ad superfluitatem aliquas res, ex consensu & licentia sui Prælati, & sit semper paratus totum quod habet resignare in manibus ejus, quamvis talis non possit dici proprietarius, est tamen peccatum: tum in dispensante, tum etiam in dispensato. In dispensante quidem peccatum est infidelitatis, quia abutitur potestate sibi tradita, quæ cum sit ei data in ædificationem, ipse ea utitur in destructionem. In recipiente autem, hujusmodi dispensatio, peccatum est superfluitatis: quia illa retinet ad redundantiam, & contra statum paupertatis, & sine rationabili causa. Item Bononiæ statutum fuit 1252. Cum secundum Constitutiones Fratres non debeant esse dispensatores alienarum pecuniarum, nec executores testamentorum: caveant ne hoc faciant sine licentia suorum Superiorum, nec ullo modo hujusmodi executiones supra se recipiant, & de prædictis rationem suis Prælati reddant. Item Budæ 1254. ordinatum fuit: ut quicumque Frater, sive Prior, sive alius pecuniam in aliquo casu dispensaverit, sive illa pecunia sit Ordinis, sive extraneorum, teneatur reddere rationem. In Capitulo etiam Parisiensi 1279. decretum est, ut nullus Frater pecuniam mutuò det vel accipiat, sine sui Prioris licentia speciali. Priores autem seu eorum Vicarii non sint faciles ad hujusmodi licentias concedendas, nisi illas petentes prius significant, & declarent eis, quomodo habere poterunt unde solvant. Ordinarum etiam Valentia 1596. & Romæ 1601. ac postea Vallisolei 1605. confirmatum fuit, quod si aliqui Fratres reperti fuerint, qui alicui extra Ordinem summam pecuniarum per notabile tempus debeant, vel de quibus debitores conquerantur: activa passivaque voce per Superiores privari debebunt, & nihilominus carceri mancipari iudicio Prælatorum, habita ratione debitorum. In Capitulo etiam apud Insulas 1293. statutum fuit, ut ille qui debitum contraxisset, teneretur in pane & aqua singulis diebus quousque satisfaceret creditori jejuna. Item Cæsaraugust. 1291. istud fuit ordinatum. Volumus, & ordinamus, quod Priores, vel Vicarii, seu socii Priorum ad Capitulum Generale, seu Provinciale, quamvis tamquam Procuratores negotia suorum Conventuum, gerere videantur; non possint, nec liceat eis ex rebus Conventus facere donationes, vel alienationes: sive in Ordine, sive extra Ordinem, sive consensu majoris partis Conventus. In Capitulo etiam apud Insulas 1293. fuit decretum: ne aliquis procurare præsumat, ut alius Frater post mortem sibi in libris, vel aliis rebus succedat: nec hujusmodi gratiæ à Prælati Ordinis ullo modo Fratribus concedantur.

(h) *Eorum dispositioni relinquendo.*) Declaramus, quod sicut in Concil. Trident. decretum est, nemini Regularium tam virorum, quam mulierum licet bona immobilia, vel mobilia cujuscumque qualitatis fuerint etiam quovis modo ab eis acquisita, tamquam propria, aut etiam nomine Conventus possidere, vel tenere; sed statim ea Superiori tradantur, Conventuique corporentur. Nec deinceps liceat Superioribus bona stabilia alicui Regulari concedere: etiam ad usumfructum, vel usum, administrationem, vel commendam. Administratio autem bonorum Monasteriorum, seu Conventuum, ad solos Officiales eorumdem ad nutum Superiorum amovibiles pertineat. Mobilium verò usum ita Superiores permittant, ut eorum suppellex statui paupertatis, quam professi sunt conveniat: nihilque superflui in ea sit, nihil etiam quod sit

necessarium eis denegetur. Quod si quis aliter quidquam tenere deprehensus, aut convictus fuerit, is biennio activa, & passiva voce privatus sit: atque etiam juxta suæ Regulæ, & Ordinis Constitutiones puniatur. Quapropter in Capitulo Romano 1589. admonentur Fratres Ordinis nostri, qualiter Gener. Capitulum celebratum Bononiæ 1564. innixum Decretis Sacri Concilii Tridentini, incorporavit atque applicavit, sive potius incorporata declaravit bona immobilia omnia, & quoscumque annuos redditus, vel proventus quorumcumque Fratrum, & undequaque illis advenientes illis Conventibus Ordinis nostri, quibus debentur secundum jura, ac nostras Constitutiones. Quod si in hoc negotio dubium acciderit, cuinam Conventui debeant applicari, Magister Generalis, vel Superior Prælatus illius Provinciæ, aut Congregationis, quid in hac re faciendum sit de maturo consilio discretorum decernat, quam citius. Et insuper idem Gen. Cap. Romanum præcipit, hujusmodi bona, atque annuos redditus debere à Conventuum Procuratoribus, seu Syndicis, & non à Fratribus particularibus exigi: Prælatis autem pro cuiuscumque indigentia ac necessitate in ipsorum Fratrum Religiosos usus in toto, vel in parte eisdem redditus poterunt convertere. Similiter in eodem Capitulo Romano fuit strictissime præceptum, ut qui apud se habent, vel apud quoscumque quomodolibet retinent, vel quempiam habere, aut retinere sciunt livellaria instrumenta, seu contractus, aut pecuniarum (ut fertur) investituras, sive nomine proprio, aut in propria persona, sive nomine alicujus Conventus quovis modo factas: infra spatium viginti quatuor horarum revelare teneantur, sive respective consignare, & effectualiter tradere Priori, vel Præsidenti Conventus. Ipsi verò Priores, vel Præsidentes, teneantur hujusmodi scripturas eis traditas in Archivio Conventus fideliter collocare. Quamobrem in Capitulo Bononiensi 1564. omnes generales licentiæ suscipiendi, aut expediendi pecunias, sive quæcumque alia absque proprii Prioris requisito contentu: vel retinendi, aut conservandi pecunias extra communem depositum, etiam si à Reverendissimo Generali Magistro sint obtentæ; abrogatæ decernuntur, atque declarantur, neque in posterum hujusmodi generales licentiæ absque rationabili causa alicui concedantur. Qui vero à suis Conventibus absunt, quamprimum ad eos reversi fuerint, propriis Prælati, dati atque accepti rationem reddere teneantur. Quod in Capitulo Romano 1508. aliàs declaratum fuit: videlicet Fratres omnes Ordinis nostri, ac Moniales, nisi habeant animum in veritate paratum ad ponendum omnia, quæ habent ad pedes sui Prælati, & similiter omnes qui mutant, aut quovis modo dominium, vel usum pecuniarum, aut rerum pro sua voluntate tamquam domini illarum rerum transferunt, absque debita licentia, esse in statu damnationis æternæ: & nihilominus contrafacientes privandos fore per Prælatos rebus ipsis, vel pecuniis, Conventibus propriis, juxta Constitutiones applicandis. Et in eodem Capitulo ordinatum fuit, ut in Conventibus vitæ regularis, ubi in communi necessaria, & sanis, & infirmis exhibentur, nullus præter Inquisitores, etiam si Prior Conventualis sit, teneat pecunias: nisi in communi deposito, atque de sui Superioris licentia. Novissime etiam in Capitulo Venetiis 1592. ordinatum fuit, quatenus Frater debeat fideliter sub pœna proprietarii debita, Superioribus suis semper præsentare quancumque pecuniarum summam ad eorum

manus undecumque venientem : sive prætextu Prædicationum , Lectionum , Confessionum , sive Missarum , sive quolibet alio , etiam propriæ personæ intuitu , à consanguineis , vel quibuslibet aliis , quod etiam de qualibet alia re faciendam esse , mandat S. Pater *Augustinus* in Regula , *ne quis furti iudicio condemnatur*. Eorundem porrò Superiorum officium erit , ne dissipatores potius , quam dispensatores fideles inveniantur , ita de præfatis bonis pro uniuscujusque sibi subditi necessitate ministrare , ut alius non egeat , dum alius abundat.

## V.

(i) **Q**uicumque verò Frater pecuniam , vel alia quæcumque receperit , vel habuerit , vel expenderit , vel dispensaverit , vel dispensari fecerit : (k) reddat singulis annis , suis majoribus rationem ; semel , vel pluries , si fuerit requisitus. Videlicet Magister Ordinis Diffinitoribus Capituli Generalis : Prior Provincialis Diffinitoribus Capituli Provincialis , Prior Conventualis Priori Provinciali , vel Visitatori ; cæteri Fratres Priori Conventuali.

(i) *Quicumque vero Frater pecuniam , vel alia quæcumque receperit , vel habuerit .* ) Declaramus , quòd habere aliquid proprium in particulari , repugnat Religioni , sicut superius dictum est : habere autem aliquid in communi , non minuit perfectionem Religionis , sicut probatur 1. 2. qu. 1. cap. *Illi autem* , ubi Prosper sic dicit : Satis ostenditur , & propria debere propter perfectionem contemni , & sine impedimento perfectionis posse bona communia possideri. In Religione vero illa , quæ est ordinata ad tradendum aliis , contemplata per doctrinam & prædicationem , congruit quàm maxime illa paupertas , quæ habet aliquid in communi : moderatè tamen ut possit sufficere ad victum , & vestitum congruo tempore procurandum , sicut docet Sanctus Thomas 2. 2. qu. 188. art. 7. Et hoc neque perfectioni Religionis , neque perfectioni paupertatis derogat. Undè in Capitulo apud Tolosam 1304. sic dicitur : *Districte* iungimus Prioribus , & eorum Vicariis , ut cuilibet Fratri indigenti juxta ejus necessitatem provideant : quòd si non fecerint , per Provinciales in pœnam à sui officiis absolvantur ; & Visitatores anni illius , quos invenerint in hoc delinquentes , studeant Provinciali Capitulo denunciare. Et idem ponitur in Capit. Januensi 1305. ac mandatur præterea Prioribus , eorumque Vicariis , ut provideant infirmis de servitoribus , & de medicinis , & de aliis necessariis , secundum suarum infirmitatum exigentiam : & qui inventi fuerint in hoc negligentes , absolvantur in pœnam à suis officiis , & pro illo anno sint ineligibiles.

(k) *Reddat singulis annis rationem .* ) Declaramus , quòd Inquisitores hæreticæ pravitatis sunt suis Præfidentibus subiecti simpliciter : & Priori suo Conventuali , nec non Prioribus Provincialibus , singulis annis omnium receptorum , expensarumque omnium personalium , veras & certas sub præcepto tenentur reddere rationes. Narbonæ 1354. & apud Montem Pefulanum 1294. & Florentiæ 1321. At vero de pertinen-

tibus ad officium Inquisitionis , servetur Constitutio Pauli III. in iis omnibus , quæ sancita sunt. Prior autem Provincialis tenetur reddere rationem suis Diffinitoribus rerum omnium , quæ pertinent nedùm ad officium , sed etiam ad personam. Florentiæ 1321. Additum fuit Romæ 1608. ut Provinciales Diffinitoribus Capituli Provincialis reddant rationem omnium datorum , & acceptorum , seu expensarum , & receptorum in officio : & ea , quæ supererunt , ut in communi Provinciæ deposito reponantur. Et in hunc usum , & ad alias pecunias in unaquaque Provincia aliquod commune depositum ad necessarios sumptus , & expensas illius Provinciæ constituantur.

## V I.

**N**ullus Fratrum , etiam Prior , recipiat depositum cujuscumque , nisi in communi deposito Conventus. Contrarium autem faciens , incurrat pœnam gravioris culpæ. (l) Item Novitii intra tempus probationis , Psalmodiæ , & Officio Divino studeant diligenter. Item infra annum ad longinquas partes , nisi ob causam necessariam Novitii non mittantur , nec in aliquo officio occupentur : nec vestes eorum ante professionem alienentur , nec ipsi ante professionem ordinentur.

## V I I.

**I**tem Novitii non intersint Capitulo , nec in Dormitorio cum aliis Fratribus jaceant , ubi hoc commodè poterit observari : sed Magister eorum extra Capitulum culpas eorum audiat , & ipsos diligenter quantum potest in moribus instruat , & charitativè corripiat.

(l) *Novitii intra tempus probationis .* ) Declaramus , quòd intra hoc tempus probationis libera est Religio in expellendo Novitio ex Ordine nostro : & ipse quoque liber est in deferendo eundem Ordinem. Completo autem anno probationis , si nulla ei facta sit protestatio , nec ipse egredi ex Religione , nec Religio eum expellere potest. Denunciamus , quòd post fel. record. Sixti V. de domibus Novitiorum , deque eorum separata educatione , in Capitulo Romano 1589. acceptatam Constitutionem : Clemens VIII. hæc observanda circa loci qualitatem statuit. Locus hujusmodi , propria clausura ab ea parte Conventus , in qua degunt professi , segregatus sit : habeatque tot cellas , quot erunt numero Novitii ; vel dormitorium ita capax , ut pro singulis , singuli lectuli commodè sterni possint : in quo etiam sit certus locus pro Magistro , & ejus Socio. In eo etiam præter alias communes commoditates , aptus locus adsit ad spirituales collationes faciendas , ac lectiones , instructiones Magistri audiendas : & in quem hyemis tempore ad calefaciendum se igne communi se recipiant. Oratorium insuper sive Capella , si commodè fieri poterit , adsit , ad Novitios in spiritualibus cæremoniis , & Ecclesiasticis functionibus exercendos. Hortus quoque peculiaris ad honestam recreationem benè conclusis illis assignetur : sin minus hortum cæteris Fratribus



bus communem ingrediantur. Quibus in eum commeanibus, nullus alius illuc ingrediatur. Ad huiusmodi Novitorum domum, nemini Regularium etiam Conventus Officiali, ullo unquam tempore sub quovis prætextu aditus pateat: nisi Magistro, & Socio, ac etiam Conventus Superiorem; quando sibi necessarium putaverit: quo casu aliquem ex senioribus Socium assumat. Huius loci clausuræ clavis, apud Magistrum semper asservetur: illique soli liceat alicui ingressum permittere. Et si quis quempiam Novitorum alloqui voluerit, Magistro præsentem, & non aliter loquatur. *Et infra*: Curam diligentem adhibeant Magistri Novitorum, ut ipsi in Regulari disciplina exerceantur: agnoscant Divinæ vocationis qua digni facti sunt præstantiam, quæ vera sit votorum solemnium, & suarum Constitutionum observantia. Addiscant modum in oratione tum vocali, tum mentali persistendi, illicitas passiones per sensum custodiam, & mortificationem compescendi: austeritates, ieiunia, disciplinas, conscientia puritatem, crebram illius discussionem, Sacramentorum, præcipuè confessionis frequententiam, exercitium humilitatis circa opera vilia, modestiam in omnibus actionibus, & diuturnum silentium.

Declaramus insuper residuum huius Capituli infra ponendum, sub Reverendissimo Magistro Thoma Cajetan. Ianuæ 1513. fuisse inchoatum: Neap. 1515. probatum; & tandem Romæ 1518. sub Reverendissimo Magistro Ordinis Garfia fuisse confirmatum, atque in Constitutionem redactum.

## VIII.

**M**andamus universis Fratribus, quatenus Novitios volentes redire ad seculum, liberè permittant ire: (m) redditis sibi omnibus, quæ secum detulerant. Nec sint eis molesti propter hoc: exemplo illius, qui discipulis aliquibus recedentibus, aliis remanentibus dixit: Nunquid & vos vulitis abire.

Item nullus recipiatur ad professionem ut Clericus; nisi sciat plenè & expeditè dicere & legere Divinum Officium, Nocturnum pariter & Diurnum solus: (n) & sciat, vel sit habilis in proxima dispositione, ut sciat Grammaticam. Et per duos menses ante finem probationis. Examinatores teneantur eum examinare de his & referre Priori & Capitulo: & si inventus fuerit multum deficiens in prædictis; vocetur in Capitulum Novitius, & ibidem ei assignetur certum tempus prolixius probationis. Vel declaretur ei, quòd nunquam veniet probationis terminus, nisi postquam iterum in Capitulum vocato, & pro sufficiente approbato, octo adhuc dies ad minus relinquantur.

(m) *Redditis sibi omnibus.* ) Declaramus, & denunciamus, in Concilio Trident. sess. 25. tit. de Regularibus cap. 16. decretum esse, quòd

abeuntibus ante professionem Novitiis, non solum omnia, quæ sua erant, restituantur; verum etiam quòd nulla renunciatio, aut obligatio antea facta, etiam cum iuramento, vel in favorem cuiuscumque piæ causæ valeat: nisi cum licentia Episcopi, vel ejus Vicarii fiat intra duos menses proximos ante professionem, & non aliàs effectum intelligatur suum sortiri, nisi sequuta professione. Aliter vero facta, etiam si cum huius favoris expressa renunciatione, etiam jurata, sint irrita, & nullius effectus. Et propterea in Capitulo Bononiensi 1564. statutum fuit, ut in recipiendorum, sive Novitorum donationibus, sive renunciationibus omnia ista sollicitè ferventur; & ad quoscumque huius generis contractus faciendos, Ordinarii primum licentia requiratur, & solum intra duos menses ante professionem fiant. Et ante professionem nullum jus acquisitum intelligatur, prætextu cuiusvis donationis, aut renunciationis: cum præcepto sub pœna anathematis ne quidpiam etiam spontè oblatum à Parentibus, vel Curatoribus Novitorum, præter eorum victum, & vestitum Fratres nostri recipiant. Quod si ætatis provectæ Novitii ad Monasterium aliqua detulerint, præcipimus nostrorum Conventuum Prælati, ut ea omnia in communi deposito servanda reponant: & in libro ad hoc deputato conseribi faciant; addita subscriptione ipsius Novitii, & aliorum duorum Fratrum. Neque etiam de ejus licentia ante professionem expendi possint, aut alienari.

(n) *Et sciat, vel sit habilis in proxima dispositione, ut sciat Grammaticam.* ) Declaramus, post hanc editam Constitutionem, Apostolica autoritate mandatum fuisse: Clericum ad habitum, ac professionem recipiendum, debere esse in Grammatica sufficienter eruditum, ut superius in capit. de Recipiendis relatum est.

## IX.

**U**ltrà hoc autem, ne puerili recepti ad habitum inveniant se potius natos sub iugo Religionis, quàm illud elegerint, evitenturque inconvenientia multa: statuimus, ut ei, cui ante quintumdecimum annum Religionis habitus datus est, nunquam elebatur annus probationis: (quantocumque decurrente temporis spatio) nisi vocatus (o) post annum decimum sextum expletum, à Prælato in Capitulo coram Conventu, terminus ad minus trium mensium acceperit ad deliberandum an profiteri velit: ita quòd annus probationis, cum taxato illo termino terminetur; ac per hoc ex tunc incurrat profectio tacita.

## X.

**E**t ut hoc inviolabiliter observetur, præsentis statuto, cuilibet ante decimum quintum annum (pro tempore) recepto ad habitum assignamus annum probationis modo dicto. Mandamus autem sub pœna absolutionis ab officio, & gravioris culpæ Prælato: ut

quando vocatus fuerit Novitius ad terminum professionis suscipiendum, expresse protestetur eidem, quod professio sua eundem obligabit ad tria vota: paupertatis scilicet, castitatis, & obedientiæ: secundum Regulam Beati Augustini, & Institutiones Fratrum Ordinis Prædicatorum; & non secundum quod hodie hic, vel ibi servatur. Et quod statim elapso termino sibi taxato, (nisi contradictum ab ipso, vel à Religione fuerit) incurrer professionem, etiam si aliter non profiteatur.

## X I.

NOvitios quoque recedentes sine licentia cum habitu à Conventu, nisi infra octo dies ad eundem redierint, pro refutatis ab Ordine habemus: & si ad alium Conventum declinaverint, & fuerint in illo acceptati pro Novitiis; volumus annum probationis inchoari ab illo die, quo in ipso alio Conventu fuerint acceptati. Quod si nullibi acceptati pro Novitiis fuerint, post exitum sine licentia, pro refutatis, & non Novitiis tales haberi volumus; quanto tempore sic permanserint.

(o) *Post annum decimum sextum.* ) Declaramus in Concilio Tridentino sess. 25. tit. de Regul. cap. 15. sic haberi: *In quacumque Religione tam virorum, quam mulierum, professio non fiat ante decimum sextum annum expletum: nec qui minori tempore, quam per annum continuatum post susceptum habitum in probatione steterit, ad professionem admittatur. Professio autem antea facta sit nulla: nullamque inducat obligationem ad alicujus Regule, vel Religionis, vel Ordinis observationem, aut ad alios quoscumque effectus.* Quamobrem Bononiæ 1564. Fratribus denunciatum fuit, professionem ante annum decimum sextum expletum, deinceps fieri non posse, & si secus fiat, irritam esse. Et Conventuum Præsidentibus mandatum fuit, quantum fieri potest, ne ad habitum recipiant pueros, ante decimum quintum annum inchoatum. Et cuicumque Novitio, cum recipitur ad habitum, explicetur coram omnibus, professionem non nisi prædicto tempore esse faciendam. Quod si pueri ante decimum quartum annum expletum fuerint aliquando recepti, adhuc nostra Constitutio observetur: ut ultra decimum sextum annum tres alii menses superaddantur, quibus de assumendo statu Religionis, commodius possint deliberare. Denunciamus autem sanctæ mem. Pium Papam V. declarasse, professionem alicujus ad profitendum inepti, ad sextum tantummodo mensem posse differri: si tamen spes aliqua haberi possit, quod talis infra illud tempus sex mensium, habilem se reddat ad profitendum. Quo tempore elapso, si eum inhabilem Prælati repererint, ex Monasterio ejiciant: juxta Decretum Concilii Tridentini sess. 25. cap. 16.

Denunciamus etiam in Capitulo Romæ 1558. pro recipiendis ad professionem ordinatum fuisse: quod instante professione cujuscumque No-

vitii, aliquot ante diebus Prior coram tribus (ad minus) protestetur eidem, quod liber est, & liberè dicat: an timore, coactione, aut violentia parentum, aut consanguineorum, ingressus est Ordinem: & si voluntariè in eo perseverat, & vult profiteri. Et de his omnibus, & ejus confessione fiat annotatio vel in libro consiliorum, vel alio ad hæc ordinato: cui annotationi tam Novitius, quam dicti Patres subscribant. Et hoc ad tollenda subterfugia: ne aliqui cupientes se ab Ordinis disciplina subducere, prætextu, quod vi, vel metu fecerunt professionem, se non teneri ad Religionem præsumant. Propter eandem causam sub pœna absolutionis ab officiis omnibus Prælati præcipimus: ut interrogatoria de impedimentis in cap. superiori expressis circa recipiendos ad habitum, & professionem, eodem modo faciant: & in eodem libro, responsiones recipiendorum ad professionem scribant: quæ à testibus subscribatur, cum protestatione juridica de nullitate professionis, quotiescumque aliquid in posterum compertum fuerit in contrarium.

## CAPUT XV.

*De Professione.*

## I.

(a) **M**odus faciendi professionem talis est. (b) Ego Frater N. facio professionem: (c) & promitto obedientiam Deo, (d) & Beatæ Mariæ, (e) & B. Dominico: (f) & tibi N. Magistro Ordinis Fratrum Prædicatorum, & successoribus tuis: (g) secundum Regulam B. Augustini, (h) & Institutiones (i) Fratrum Prædicatorum; (k) quod ero obediens tibi, tuisque successoribus usque ad mortem. Cum autem fit alii Priori cuicumque, sic facienda est. Ego N. facio professionem: & promitto obedientiam Deo, & Beatæ Mariæ, & Beato Dominico, & tibi nostro Priori talis loci, vice N. Magistri Ordinis Fratrum Prædicatorum, & successorum ejus: secundum Regulam Beati Augustini, & Institutiones Fratrum Prædicatorum; quod ero obediens tibi, tuisque successoribus usque ad mortem.

(a) *Modus faciendi professionem.* ) Declaramus, quod professio est votum solemne, quod facit aliquem esse Religiosum, & ponit eum in statu perfectionis: ad quem adipiscendum, requiritur quædam obligatio absolute facta ad modum homagii: sicut & in cæteris, quæ inter homines obtinent perpetuam firmitatem, quædam solemnitas adhibetur. Et dicitur proprie aliquis esse in statu perfectionis, non ex hoc, quod habet actum dilectionis perfectæ, sed ex hoc, quod obliget se perpetuo cum aliqua solemnitate ad ea, quæ sunt perfectionis: & isto modo sunt in statu perfectionis Episcopi, & Religiosi, quia ad ea, quæ pertinent ad perfectionem, sunt obligati perpetuo, & cum solemnitate consecrationis, & professionis. Assument autem homines statum perfectionis, non quasi profitentes se esse perfectos: sed quasi profitentes se ad perfectionem tendere. Unde Religiosi non

non committunt mendacium, vel simulationem, si statum perfectionis per professionem assumentes, non sint perfecti: mentirentur autem si ab intentione perfectionis animum revocarent. Quamdiu enim manet intentio tendendi ad perfectionem, etiam verè dici potest esse in statu perfectionis, quamvis non sit perfectus. Talis autem professio, quæ facit aliquem esse Religiosum, subditur ordinationi Ecclesiæ, propter solemnitatem, quam habet annexam. Et quamvis per jura antiquiora, ad professionem faciendam tempus pubertatis statutum fuerit 2. 2. qu. 1. cap. 1. tamen post Sacrum Concilium Tridentinum fieri non potest, nisi anno decimosexto expleto. Nec oportet, quod addatur una dies; quia hoc nusquam legitur. Quare probationis annus debet incipere à decimoquinto expleto. Si quis autem aliquem receperit infra annum probationis ad professionem, præterquam quòd professio est nulla, ut supra dictum est, ipse recipiens peccat mortaliter, & suspensus est à receptione cujuscumque alterius, & puniri debet pœna gravioris culpæ. Quamobrem apud Carcaffonam 1312. statutum fuit: quod si fortè aliqui de cætero aliquem infra ætatem à Constitutionibus, & à jure taxatam receperint, aut tali receptioni consenserint cum effectu; sint ipso facto voce privati in receptione Novitiorum, quousque per Magistrum Ordinis, vel Priorem suum Provincialem, vel Diffinitores Capituli Provincialis fuerint restituti. Ille autem, qui sic receptus est, neque illi, neque alteri Religionis per talem professionem manet obligatus; ut Tridentinum Concilium loco superius citato disposuit.

(b) *Ego frater N. facio professionem.* ) Declaramus, quòd quando quis proficitur, nomen profitentis, & ejus cui proficitur, & dies mensis, & annus debent in aliquo libro speciali conscribi. Parisiis 1246. Et Clemens VIII. auctoritate Apostolica ita constituit: ut Superior cujuscumque Conventus, in quo novitiatus fuerint instituti, librum habeat, in quo unicuique Novitii professio registretur, illamque Novitius professus manu propria, ac duo testes qui præsentibus fuerint subscribant. Convertus vero litterarum ignarus, propria manu signum Crucis apponat. Et hic liber cum aliis Monasterii scripturis afferretur. Idem etiam in Novitiorum professione servandum esse censuit, Sacra Regularium Congregatio: addendo præterea, debere profitentem sua manu in eo libro ætatem suam scribere, & sponte se esse professum. Quod sane antea in Capitulo Romano 1558. ordinatum fuit.

Item declaramus, quòd Novitii recepti in aliquo Conventu, non debent pro alienis Conventibus ad professionem recipi: nisi de voluntate illorum Conventuum pro quibus ad Ordinem sunt recepti. Massiliæ 1300. Item Argentiniæ 1358. fuit declaratum, quòd Novitii ad illos Conventus pertinent, pro quibus sunt recepti. Si tamen ad aliquem alium Conventum mitterentur, possunt de licentia Superioris pro illo Conventu profiteri accedente consensu Prioris, & majoris partis Vocalium utriusque Conventus. Nec Priores Provinciales possunt aliquem Fratrem profectum determinare, pertinere ad alium Conventum, quàm ad illum pro quo est ad professionem receptus, nisi per simplicem assignationem in nostro Ordine consuetam.

Item declaramus, quòd duplex est professio: videlicet expressa, quæ fit verbis ad modum ho-

magii cum quadam solemnitate, de qua superius dictum est; alia vero est professio tacita, quæ fit in Ordine nostro, quando quis post annum quintumdecimum completum, portaverit habitum Novitiorum per annum integrum, & continuum. Et hoc idem evenit in quacunque Religione, ubi non est distinctus habitus Novitiorum ab habitu Professorum, distinctione patenti: videlicet in scissura, vel colore; quamvis esset distinctus distinctione occulta, & talis professio tacita obligat profectum illi Religionis in specie & determinate, cujus habitum per annum continuum nulla facta protestatione portavit: sicuti habetur in Clement. *Eos de Regular.*

(c) *Et promitto obedientiam Deo.* ) Declaramus, quòd inter tria vota principalius & essentialius Religionis est obedientia: tum quia per eam majus bonum Deo offertur, quam per alia, (offertur enim per obedientiam Deo propria voluntas, & bona animæ: quæ præferuntur bonis corporalibus, & exterioribus quæ per alia vota Deo offeruntur) tum secundo, quia votum obedientiæ continet in se alia vota & non è converso (qui enim promittit obedientiam, promittit castæ, & sine proprio vivere) tum tertio, quia votum obedientiæ proprie se extendit ad actus proprios propinquos fini Religionis, qui est perfectio charitatis & dilectionis Dei. Quanto autem aliquid est propinquius fini, tanto melius est, & propterea in professione nostra exprimimus solum votum obedientiæ, sub quo continetur observatio castitatis, & voluntaria paupertatis, & præceptorum, quæ in Regula, & Constitutionibus continentur vel quæ à Prælato fiunt: & promissio deferendi habitum patenter, dum in publicum proceditur.

Item declaramus, quòd professio expressa per quam aliquis profectus, & propriè Religiosus efficitur, in diversis Religionibus diversis modis exprimitur: & secundum hoc arctius, vel levius profitentes obligantur. Nam in alia Religione, promittit profitens in sua professione se servare Regulam, ut in Ordine Minorum. In alia vero Religione cautius proficitur, quia promittit profitens vivere secundum Regulam: quod intelligitur juxta S. Thom. 2. 2. qu. 86. ar. 9. ad 4. & quodlibet 1. qu. 9. ar. 4. quod intendat profitens ad hoc, quod mores suos informet secundum quoddam exemplar; & hoc tollitur per contemptum. In alia autem Religione adhuc cautius quis proficitur: quia promittit profitens obedire secundum Regulam, ita quod professioni non contrarietur, nisi id quòd est contra præceptum Regulæ. In aliis autem quæ non habent præceptum annexum, transgressio, vel omissio obligat solum ad veniale. In Religione tamen Fratrum Prædicatorum, talis transgressio, vel omissio, ex suo genere non obligat ad aliquam culpam, sed ad pœnam: quia per hunc modum ad talia observanda obligantur ex sua professione. Qui tamen possent peccare venialiter, si ex negligentia vel libidine: vel etiam mortaliter, si ex contemptu illa transgredierentur.

Item declaramus, quòd professio expressa cum mala intentione, vel cum expressione alicujus illiciti facta, aliquando tenet, & aliquando non. Si enim profitendo quis intendit esse Religiosus, & se obligare ad vota Religionis: sed cum hoc intendit castitatem, paupertatem & obedientiam non servare: immò intendit oppositum, vel idèò proficitur, & intendit esse Religiosus, ut possit fieri



fieri Episcopus, vel ut aliquod malum possit agere; talis professio tenet, quia ex quo intendit esse Religiosus, & se obligare ad vota, licet intendat non solvere quod promittit, tamen consensit promittendo. Solum autem obligatio ad vota, non autem impletio votorum, est de essentia Religionis. Si verò non solum non intendit castitatem, & sine proprio, & sub obedientia vivere, sed nec etiam intendit se ad prædicta obligare: tunc non esset professus; quia hæc intentio repugnat essentia Religionis. Similiter si proficundo exprimat aliquid Religioni repugnans, puta si dicat: non pretendo servare castitatem promissam, quantumcumque illam promittam, non tenet professio: hæc enim expressa nocent, non expressa non nocent. Sicut enim in matrimonio carnali, Ecclesia judicat secundum actus exteriores, & non secundum actus interiores, qui sibi non possunt innotescere: & ob hoc quantumcumque non intendat quis contrahere matrimonium, si tamen exprimat verba contractus matrimonii quæ indicant consensum, judicabit Ecclesia illud esse matrimonium, & coget cum illa habitare; ita & in professione, quantumcumque quis non intendat se obligare ad vota Religionis, ex quo tamen sponte proficitur, & non protestatur aliquid in contrarium, Ecclesia coget illum servare professionem, quia præsumitur solemniter vovisse. Unde sicut excommunicat eum, qui est tacite professus, ad hoc ut remaneat in Claustro, ita & hunc excommunicabit, ut servet, quod per professionem promissit. Si vero in ipsa professione exprimeret aliquid contrarium, ut puta, quod non intendit se obligare ad castitatem, & ad alia vota, vel quod non intendit servare castitatem quam promittit: tunc professio non teneret, & Ecclesia talem professionem non valere judicaret. Si vero in ipsa professione exprimat conditio contrariam particularem austeritatem, ut quod liceat ei comedere carnes, vel uti lineis; sicut hæc contineri in Regula vel in Constitutionibus quas proficitur, tenetur illa servare.

(d) *Et Beata Maria.*) Declaramus, quòd Ordo Prædicatorum inter alios proficitur Beatæ Virgini Mariæ: quia multoties, ac multipliciter compertum est, quod ipsa specialiter Ordinem nostrum protegit & defendit. Ipsa enim impetravit à filio suo irato contra mundum, ut Ordinem nostrum institueret, qui homines à peccatis & ab erroribus suis revocaret, & ad Dei cognitionem, & dilectionem reduceret. Ipsa etiam Beatum Reginaldum corporaliter visitans, ad ingressum Ordinis monuit, & induxit: & habitum, quem nunc deferimus inducendum ostendit dicens: *En iste habitus Ordinis tui*: ipsumque habitum B. Reginaldus à B. Dominico Patre nostro primus tam feliciter, quam perseveranter accepit, & ex nunc tam Beatus Pater Dominicus, quam ceteri Fratres, illo habitu à Beatissima Virgine cælitus ostenso, videlicet tunica, & scapulari albo & tappa nigra uti sunt. Est etiam Regina cæli Beatissima Virgo singularis nostri Ordinis advocata, & piissima parens, & patrona: semper pro nobis apud Deum exoratrix, quæ ipsum pluries à diversis tribulationibus, & angustiis protexit & liberavit; sicut patet in libro de Vita Fratrum.

(e) *Et Beato Dominico.*) Declaramus, quòd ideo profitemur Beato Dominico Patri nostro, quia ipse fuit primus Magister, Institutor, ac Fundator Ordinis Prædicatorum: quem Beatissima Virgo tamquam fidelem, & ducem strenuum ad impugnandos errores, & vitia extir-

panda, filio suo præsentavit: quem Apostoli Petrus, & Paulus ad Prædicationis officium à Domino Deo esse prædestinatum, signis evidentissimis ostenderunt. Cum enim ipse in Ecclesia Sancti Petri Romæ attentius oraret, apparuerunt ei prædicti Apostoli, & Paulus dedit ei librum, Petrus vero baculum, addentes: *Vade & prædica, quia à Domino ad istud officium electus es.* Quem etiam gloriosi Confessores Augustinus, & Benedictus, regularibus disciplinis instruxerunt, & ad prædicationis officium magis idoneum reddiderunt. Sicut enim fuit Canonicus professione, ita fuit & Monachus conversatione: in jeuniis, abstinentiis, in vestitu, in disciplina silentii, atque in cæteris observantiis contentis in Regula Beati Benedicti; quas ferè omnes, & alias etiam speciales observavit, & Filiis suis cum Regula Beati Augustini in suis Constitutionibus observandas tradidit. Fuit etiam Apostolicus officio prædicationis: quem Innocentius III. Divina revelatione edoctus, quod ipse, & fratres sui illuminare debebant, ac defendere Ecclesiam, in sancto proposito de Ordine ad prædicationis officium instituendo, confirmavit, eique locum sancti Xisti in Urbe tradidit, ac piam ejus intentionem de zelo salutis animarum laudavit, commendavit, & approbavit. Quem etiam Honorius III. Innocentii successor benignè suscepit, & Ordinem suum liberaliter confirmavit: & facultatem libertatemque prædicandi, & confessiones audiendi, dato Apostolico Diplomate, sibi & Fratribus suis autoritate Apostolica concessit; ac singulos labores, quos in discurrando ad prædicandum subirent, eis in remissionem omnium suorum peccatorum injunxit. Quem etiam venerabilis Abbas Joachim. Florentis Ordinis institutor (qui B. Dominicum multo tempore præcessit) in habitu, quem non primo Canonicus tulit, sed quem à Beatissima Virgine Fratrem Reginaldum inungente recepit, Fratribus suis ostendit, & in Florenti Monasterio sui Ordinis in Calabria in tali habitu depinxit, dicens eis: *Cito surrecturus est in Ecclesia Dei Ordo novus docentium, & prædicantium cum tali habitu, cui præerit unus major, & cum eo, ac sub eo erunt duodecim Ordinem prædictum regentes. Quia sicut Patriarcha Jacob cum duodecim filiis ingressus est Aegyptum, sic & ipse cum illis duodecim ingredietur, & illuminabit universum mundum. Cum igitur Fratres prædicti Ordinis ad vos venerint, cum omni honore ac reverentia illos recipite.* Quod ut filii obedientes fecerunt: nam quando primo Fratres Ordinis nostri ad illos venerunt, cognoscentes ex habitu eos esse, quos Pater eorum prædixerat; exierunt eis obviam cum crucibus, & canticis spiritualibus, & omnibus locis suis, sicut Fratres proprios benignissimè receperunt, atque humanissimè pertractaverunt.

At vero Pater iste Sanctus Dominicus fuit Jacob prædicando, & Israël contemplando: ut nec Lia actionis, neque Rachel contemplationis in hac vita sibi defuerint. Multiplicavit autem Dominus meritis Beati Dominici Patris nostri Ordinem nostrum, & dedit ei viros excellosos in verbo gloriæ, quorum alii fuerunt Doctores illustres, qui profunda fluviorum, & abdita diversarum scientiarum scrutantes, obscura produxerunt in lucem, & diversos libros, & commentarios ad corroboracionem fidei, & ædificationem Ecclesiæ, & ad Sacræ Scripturæ explanationem, diversis locis, & temporibus ediderunt. Alii verò fuerunt insignes Summi Pontifices, Cardinales, & Episcopi. Alii for-

res summa constantia usque ad sanguinem pro fide decertantes, & pro ea strenuè martyrium sustinentes. Alii Prædicatores celebres, qui ad iustitiam erudientes multos, illuxerunt in firmamento Ecclesiæ, & diversas mundi partes verbis atque exemplis illustraverunt. Dispergente namque Beato Dominico Patre Nostro fratres suos tanquam quosdam radios, immò tanquam quædam luminaria: ubique terrarum cæperunt homines submittere corda, & corpora suavissimo jugo Christi, indueruntque habitum Ordinis nostri Prælati, Decani, Præpositi, Archidiaconi, Abbates, Priores Monachi, Canonici regulares, diversorumque facultatum Doctores; & alii viri illustres ac Principes, vita & scientia eminentes: qui veluti filii Israël germinantes creverunt, & multiplicati sunt ac roborati nimis, & intra breve temporis spatium per totum mundum diffusi Provincias omnes citra, & ultra mare Fratribus Ordinis impleverunt, ac Urbes, Civitates, Oppida, Ecclesiis, Collegiis, & Conventibus ornaverunt. Hunc etiam Sanctissimum virum Gregorius IX. Sanctorum catalogo adscripsit, qui testimonium de ejus sanctitate perhibens, coram Cardinalium Collegio dixisse fertur: *Tantum de hujus viri sanctitate dubito, quantum de sanctitate Apostolorum Petri, & Pauli.* Ideo in litteris Canonizationis illius sic dicit: *Etate crescente crevit & gratia in hoc Sanctissimo viro Dominico; quandoquidem inexplicabile gaudium de zelo concipiens animarum, ad Dei eloquia dedit animum: & per Evangelium Christi multos generans, in conversatione tam strenuæ multitudinis, Evangelicæ dignitatis officium, & Prædicatoris nomen, & opus in terra meruit habere majorum; Pastor & Dux in populo Dei factus, novum Prædicatorum Ordinem instituit, meritis & exemplis ornavit, nec confirmare desuit miraculis evidentibus, & approbatis.* Hæc ille.

(f) *Et tibi N. Magistro Ordinis.* Declaramus, quòd ut habetur in Capitulo apud Castras 1352. quòd in ipsa professionis forma, quæ nostris Constitutionibus est inserta, si tempore quo quis proficitur, Ordo Magistrum habuerit, tunc nomen proprium Magistri exprimat in ipsa forma professionis. Si verò illo tempore Ordo Magistrum non habuerit, talis proficiens obedientiam Præsidenti promittat vice Magistri Ordinis: absque expressione nominis cujuscunque, videlicet dicendo: *Et tibi N. Priori talis Conventus, vice Magistri Ordinis Fratrum Prædicatorum.* Item declaramus, quòd ideò soli Magistro Ordinis, vel alteri nomine ejus sit professio, & promittitur obedientia: ut unitas Ordinis, & professionis servetur, quæ ab unitate unius capituli, cui omnes tenemur obedire dependet: qui est proprius & immediatus Prælatus omnium Fratrum, & Conventuum totius Ordinis. Et potest omnes Prælatos, & Officiales ejusdem Ordinis instituere, & destituere: & eorum officia, & auctoritates limitare. Qui statim postquam est electus, curam omnium animarum Fratrum ipsius Ordinis plenè habet, & libere gerit, ipsosque Fratres auctoritate propria ligare potest, & absolvere: iidemque Fratres sibi tenentur devotè, & humiliter obedire, sicut patet in privilegio, quòd dicitur *Mare magnum* Alexandri IV. Clementis IV. Bonifacii VIII. Benedicti XI. Gregorii XV. Martini V. Eugenii IV. & Sixti IV. ubi omnia prædicta expresse continentur.

(g) *Secundum Regulam Beati Augustini.* Declaramus, quòd inter multas & varias Regul. Regul. Tom. IV.

las, sub quibus diversi Religiosi militant Deo in Ecclesia occidentali: Regula Beati Augustini multum videtur excellere. Primò, ratione sui exemplaris unde fuit assumpta, quæ fuit Regula Apostolica. Unde Ecclesia de ipso cantat: *Cæpit vivere secundum Regulam sub sanctis Apostolis; constitutam.* Et ipse in quodam sermone dicit: *Apostolica vita optamus vivere.* Secundo, ratione antiquitatis, quia non solum modernas Regulas, sed etiam multo tempore Regulam Beati Benedicti præcessit. Nam Sanctus Augustinus obiit anno Domini 425. Beatus Benedictus obiit anno Domini 509. & sic patet, quòd Beatus Augustinus præcessit Beatum Benedictum annis 84. Terrio, ratione conditionis sui Authoris: qui fuit auctoritate Episcopus, vita sanctissimus, scientia doctissimus. Quarto ratione moderationis, & discretionis. Nam Sanctus Augustinus in sua Regula sic servat mediocritatem, quòd nec multitudine, nec paucitate, nec obscuritate, nec gravitate mandatorum cadit in extremum. Quinto, apparet laus Regulæ istius à materia ejus; quia maxime vertatur circa spirituales actiones: sicut est dilectio Dei & proximi, unitas cordium, conformitas morum, castitas corporum, communitas rerum, studium Scripturarum, correctio vitiorum, obedientia Prælatorum, & similia, ut patet per totam Regulam. Sexto, ratione auctoritatis, & antiquitatis, & multitudinis Ordinum, & locorum, in quibus prædicta Regula observatur. Sub hac enim Regula Sancti Augustini militant Deo, Ecclesiæ Cathedralis, Religionesque diversæ. Nam præter illas, quæ communiter Canonicorum appellantur, sub ea militant quamplurimi Sacri Ordines tam Regulares, quam Militares ab Ecclesia approbati.

(h) *Et institutiones Fratrum Prædicatorum.* Declaramus, quòd Constitutiones nostræ continent statuta discreta, & valde conformia fini Religionis, quæ quidem tenentur Fratres servare eo modo, quo in eis continentur: hoc est præcepta, & statuta simplicia, ut statuta; dato quòd Prælatus suus non mandet, nec dicat eis, quòd ea servant, quia quilibet tenetur servare ea, quæ pertinent ad statum suum. Et licet in professione non permittant principaliter servare Constitutiones, sed tantum obedire secundum eas, tamen eo ipso, quòd aliquis proficitur Ordinem Fratrum Prædicatorum, promittit ex consequenti, & implicite servare spectantis ad ipsum Ordinem; licet in tali professione hoc non promittat expresse. Nam ex sua professione, ut dicit Sanctus Thomas, tenetur quilibet Frater Ordinis nostri principaliter, directe, & absolute servare substantialia Religionis, & præcepta in Regula, vel Constitutionibus posita, aut à Prælato facta: ad observandum vero alia statuta non obligatur ex sua professione absolute, sed sub tali conditione, quòd si omitteret, vel transgrederetur illa, non incurreret culpam, sed tantum pœnam. Et ideo transgressio illorum, quæ in sua professione Religiosus absolute vovit, & promissit, obligat eum ad peccatum mortale. Transgressio verò illorum statutorum, quæ non absolute, sed sub illa conditione in sua professione servare promissit, non obligat ad culpam, sed ad pœnam. Prædictæ autem Constitutiones, quia non continent nisi statuta honesta, & rationabilia, sunt per Sedem Apostolicam confirmatæ, sicut patet in privilegio, quòd dicitur *Mare magnum* Alexandri IV. Clementis IV. Nicolai IV. Bonifacii VIII. Benedicti XI. Joannis XXII. Gregorii XI. Martini V. Eugenii IV. & Sixti IV.

(i) *Fratrum Prædicatorum.* ) Declaramus, quòd hoc nomen Prædicatorum fuit impositum Ordini nostro ab Innocentio III. qui dum scriberet Beato Dominico, & Fratribus suis, imposuissetque Scriptori, ut scriberet hoc modo: Fratri Dominico, & Sociis: statim revocavit, & dixit: Scribe hoc modo: Fratri Dominico, & cum eo prædicantibus. Statimque aliquantulum plus considerans: Noli, inquit, sic dicere; sed scribe hoc modo: Magistro Dominico, & Fratribus Prædicatoribus. Et ex tunc ipse Beatus Dominicus Pater noster, & Filii ejus ceperunt se Fratres Prædicatores vocare, ceperuntque in Curia, & ubique ab omnibus sic vocari, juxta illud Isaïæ: *Vocabitur tibi nomen novum, quod os Domini nominavit.* Fuit etiam hoc nomen ab Honorio III. approbatum, & postea à Gregorio IX. in Bulla Canonizationis Beati Dominici confirmatum, & ab eodem Sancto Patre Dominico longè ante ardentissimis desideriis, orationibus, lacrymis, & multiplicibus meritis feliciter obentum. Et vere hic Ordo re, & nomine dicitur Prædicatorum, quia principaliter ad prædicationem, & salutem animarum est institutus. Est autem hic Ordo arctior, quam appareat, & ejus austeritates magis in existentia, quam in apparentia consistunt. Præterea hic Ordo ratione institutionis antiquioris, & approbationis, alios Mendicantium Ordines antecedit. Nam præcedit Ordinem Minorum, ut expresse ponit Glossa in cap. *Quorundam*, in verbo *Prædicatorum* de electione lib. 6. & gloss. 21. cap. tit. *de pace & treuga*: & Joan. Andr. in cap. *Joannes de Testamentis*, dicens: quod Ordo Prædicatorum excedit Ordinem Minorum ratione antiquioris institutionis, sicut litteræ in prædictis juribus dicunt. Et hoc notat Petrus de Angar. assignans tempus institutionis prædictorum Ordinum. Nam Ordo Prædicatorum, quantum ad sui exordium, cæpit sub Beato Dominico in partibus Tolosanensibus anno Domini 1203. ubi Tolosam adveniens, hospitem suum hæreticum convertit ad Fidem. Postea fuit confirmatus ab Honorio, anno Domini 1216. xi. kalendas Januarii apud Sanctam Sabinam, Pontificatus sui anno primo. Obiit autem Beatus Pater Dominicus Bononiæ anno Domini 1221. 8. Idus Augusti. Fuit autem Canonizatus Reata per Gregorium IX. anno Domini 1234. 8. Idus Julii. Ordo autem Minorum, quantum ad sui exordium cæpit sub Beato Francisco in partibus Thuscianis anno Domini 1207. & postea confirmatus fuit ab Honorio III. anno Domini 1223. Pontificatus sui anno octavo. Quæ tempora ponit etiam Joan. Andr. in cap. *Quorundam*; & sequitur eum ibi Dominicus, dicens, quod per illam glossam haberi potest, qualiter Religiosi debeant ordinari in processionibus, & in aliis actibus, quibus interfunt. Secundo, Ordo Prædicatorum inter cæteras Religiones præstantissimus est, propter perfectionem finis; quemadmodum supra dictum est.

Præterea Ordo Prædicatorum præstat inter alios Ordines, ratione majoris arctitudinis, & asperitatis. Est enim arctior omnibus Religionibus mendicantium, propter parvitatem cibi, & longiora jejunia. Non enim comedunt carnes, & jejunant à quartadecima die Septembris usque ad festum Paschæ Resurrectionis, & alia plura in Constitutionibus præscripta jejunia observant. Quapropter Clemens V. interrogatus à quodam Milite, ut sibi consuleret, quem Ordinem deberet intrare, an Prædicatorum, an Minorum, sic respondit: Sciscitaris quem tibi ex Fratrum Prædicatorum, vel

Minorum Ordinibus præeligendum esse declaramus; id præcipue conscientia tua relinquimus. Magis enim tu scire poteris utriusque Ordinis observantias, quæ non sunt pares in omnibus, & in diversis articulis excedentes sunt, & exceduntur. Alterius quidem illorum Ordinum lectus est durior, nuditas gravior, & ut nonnulli judicant paupertas profundior. Et alterius cibus est parcior, longiora jejunia, & ut nonnulli autumant, sanctior disciplina. Neutrum ergo alteri præferimus, sed in una & arctissima paupertate fundatos ad unum tendere finem credimus, salutem videlicet animarum. Et ideo five hunc, five illum elegeris, arctam viam ingredieris, & per portam intrabis angustam ad terram mellisfluam, & præ cæteris speciosam. Sic ergo uni istorum adhæreas, ut amore ab altero non discedas: Frater enim Prædicator reprobatus est, qui Minores non diligit; & Frater Minor est execrabilis, qui Ordinem Prædicatorum odit, vel contemnit. Hæc ille. Ex prædictis omnibus patet dignitas, & excellentia Ordinis Prædicatorum.

(k) *Quod ero obediens tibi, tuisque successoribus.* ) Declaramus, quòd ex voto nostræ professionis, tenemur & obligamur caste, & sine proprio vivere, & Regulam, ac Constitutiones non contemnere, & præcepto in Regula, vel in Constitutionibus contento, vel à Prælato facto, in his quæ sunt secundum Regulam, & Constitutionem, usque ad mortem inclusive obedire.

Item declaramus, quòd Religiosus non tenetur in omnibus obedire Prælato suo, videlicet in his, quæ sunt contra præcepta Dei, & Ecclesiæ, vel contra Regulam, vel quæ dispensationem Prælati non admittunt: in dubiis autem tenentur omnes obedire, ut habetur 33. qu. 1. cap. *Quid culpatur*.

Item declaramus, quòd *Religio*, ut dicit Sanctus Bernardus, *Professores suos similes Angelis facit, dissimiles hominibus, immo imaginem Dei in homine ad instar Baptismi reformat.* Pro constanti enim habetur, quod per professionem tamquam per Crucis assumptionem, consequitur quis remissionem omnium peccatorum, ut Sanctus Thomas docet 2. 2. q. ult. art. 3. ad 3. istis verbis: Si aliquibus elemosynis factis homo potest statim satisfacere pro peccatis suis, secundum illud Danieli 4. *Peccata tua elemosynis redime*, multo magis in satisfactione pro omnibus peccatis, sufficit quod aliquis se totaliter Divinis obsequiis mancipet per Religionis ingressum: quæ excedit omne genus satisfactionis etiam publicæ penitentia, ut habetur in decretis 33. q. 2. cap. *Admonere*. Sicut etiam holocaustum excedit sacrificium, ut Gregorius dicit *super Ezechielem*. Unde dicitur in vitis Patrum, quod eandem gratiam consequuntur Religionem intrantes, quam consequuntur baptizati. Igitur cum per professionem det homo omnia bona exteriora quæ habet, & habere posset, vivendo paupertatem; & omnia bona corporis, vivendo castitatem; & libertatem voluntatis cum omnibus bonis animæ vivendo obedientiam, quæ excedunt quascunque elemosynas: per eandem consequitur remissionem omnium peccatorum suorum. Item professio liberat profitentem ab omni voto simplici, five sit reale, five personale, five mixtum: qui etiam si vivisset arctiorem Religionem, proficundo latius liberatur, ut habetur cap. *penult. de Regularibus* lib. 6. licet male fecerit omitendo perfectam adimplentionem voti simplicis, quod sub-



subditur in eodem Capitulo. Pro voto tamen non completo, erit eidem poenitentia imponenda. Non tamen professio liberat quempiam ab omni debito humano pecuniario, ex delicto, vel quasi ex contractu, vel etiam quocumque modo facto: quia, ut docet Sanctus Thomas 2. 2. quæst. 189. art. 6. ad 3. argumentum: ille, qui est obligatus ad aliquid certum, non potest illud licite prætermittere facultate existente: & ideo si quis sit obligatus, ut alicui rationem ponat, vel ut certum debitum reddat, non potest hoc licite prætermittere, ut vota Religionis profiteatur: quemadmodum superius cap. de *Recipiendis* num. 2. fufius dictum est.

## I I.

(1) **N**ovitorum vestes hoc modo benedicantur in professione.

Ŵ. Ostende nobis Domine misericordiam tuam.

Ŕ. Et salutare tuum da nobis.

Ŵ. Dominus vobiscum &c.

## O R E M U S.

**D**omine JESU Christe, qui tegimen nostræ mortalitatis induere dignatus es, obsecramus immensæ largitatis tuæ abundantiam, ut hoc genus vestimentorum, quod sancti Patres ad innocentiae, & humilitatis indicium ferre sanxerunt, ita benedicere digneris; ut qui hoc usus fuerit, te indueremereatur Christum Dominum nostrum. Amen. Postmodum aspergantur aqua benedicta.

In quolibet Conventu habeatur liber particularis, in quo scribantur omnes, qui faciunt professionem: ibi notando annum, mentem, & diem, & nomen Prælati recipientis ad professionem; & sub quo Magistro Ordinis.

(1) *Novitorum vestes in eorum professione benedicantur.* Declaramus, quodd hæc benedictio vestium sumpta est ex cap. *Statuimus*, Extray. de *Regular.* ubi sic dicitur: Statuimus, quod in Religionibus, ubi non est distinctus parenter habitus Novitorum ab habitu Professorum, in professione vestes eorum, scilicet scapulare, & hujusmodi debeant benedici: ut sic sit distinctus habitus Professorum ab habitu Novitorum per hoc, quod ille est benedictus, habitus vero Novitorum non est benedictus. Et ideo in Ordine Prædicatorum videtur, quod hoc deberet fervari, quod Novitiis quando recipiuntur ad habitum, non detur, si commodè fieri potest, scapulare benedictum. Professi autem quando de novo sibi faciunt scapularia, debent à Prælati suis ea facere benedici; quia scapulare benedictum est habitus Professorum in Ordine Prædicatorum.

## CAPUT XVI.

## De levi Culpa.

## I.

(a) **L**evis culpa est, si quis mox ut signum factum fuerit, non relictis omnibus, cum matura festinatione diffundat. *Cod. Regul. Tom. IV.*

ferat se præparare, ut ad Ecclesiam ordinatè, & compositè quando debuerit veniat; si quis ad Gloria primi Psalmi non adfuerit; si quis in Choro malè legendo, vel cantando offendens, non statim se coram omnibus humiliaverit; si quis Divino non intentus officio, vagis oculis, (b) & motu irreligioso, levitatem mentis ostenderit; si quis in Ecclesia, vel in Dormitorio, vel in Cellis aliquid inquietudinis fecerit; si quis in Choro riserit, vel alios ridere fecerit; si quis lectionem statuto tempore non præviderit; si quis aliud cantare, vel legere præsumperit, quàm quod communis probat usus.

(a) *Levis culpa est.* Declaramus, quodd Capitula de levi, gravi, graviori, & gravissima culpa fuerunt edita ante primum Capitulum Generalissimum, & in ipso, quod fuit celebratum Parisiis 1228. fuerunt confirmata, & ordinata. Et tunc temporis non erat adhuc edita illa Constitutio, quæ declarat, Constitutiones nostras non obligare nos ad culpam, sed ad poenam: sed postmodum ad consulendum paci totius Ordinis, & removendum scrupulum à conscientiis Fratrum, qui timebant ne transgressio Constitutionum obligaret nos ad culpam; fuit postea in secundo Capitulo Generalissimo celebrato Parisiis anno Domini 1236. facta illa Constitutio, & in proœmio posita. Et sic ante præfatam Constitutionem, transgressio Constitutionum, quoad ea, quæ non sunt essentialia, nec habent annexum præceptum, vel contemptum, obligat ad peccatum veniale: sive talis transgressio esset facta ex negligentia, inadvertentia, oblivione, levitate, fragilitate, vel ex aliqua alia consimili causa. Et propter hoc fuit positum Capitulum de levi, & gravi culpa; quia pro illo tempore faciens, vel omitrens aliquid eorum, quæ continentur in prædictis Capitulis, incurrebant culpam levem, vel gravem. Post vero illam Constitutionem editam, transgrediens prædictas Constitutiones, licet ex vi Constitutionum nullam incurrat culpam, potest tamen aliàs illam incurere: ut ex Divo Thoma 2. 2. quæst. 186. art. 9. ad 1. supra dictum est. Ad quod respiciens Constitutio distinguit Capitula de levi, gravi, graviori, & gravissima culpa: & eadem de causa, Capitulum quotidianum, in quo Fratres de hujusmodi transgressionibus se accusant, dicitur Capitulum de culpis.

(b) *Et motu irreligioso levitatem mentis ostenderit.* Declaramus, quodd quamvis motus irreligiosus levitatem mentis ostendens, & risus dissolutus, & vagus, ac vanus oculorum aspectus, & otiosus sermo, & vaniloquus, & alia hujusmodi, sint peccata venialia: non tamen ideo peccata sunt, quia per Constitutiones nostras sunt prohibita, sed quia de se sunt mala. Et ideo ex transgressionibus prædictorum, non solum obligamur ad poenam taxatam, vel taxandam, sed etiam ad venialem culpam.

## I I.

**I**tem levis culpa est, si quis ad prædicationem vadens otiosa locutus fuerit, vel egerit. Si quis dissolutè riserit,

cachinnis vel ludis, dictis vel factis alios ad ridendum concitaverit. Si quis oculos vagos per plateas vel villas eundo, ad vanitates frequenter direxerit. Si in vigilia Annunciationis, & Nativitatis Domini in principio Capituli per negligentiam non adfuerit: ut pronunciatis redemptionis nostræ exordiis (c) corde & corpore gratias agat Redemptori. Si quis de via veniens eadem hora (si fieri potest) benedictionem accipere neglexerit, vel absque ea plus una nocte moraturus exierit. Si quis ad lectiones dormierit. Si quis temporibus statutis, cum aliis lectionem auditurus non adfuerit. (d) Si quis libros interdictos legerit.

(c) *Corde & corpore gratias agat.* ) Declaramus, quod in Vigilia Annunciationis, quando à Lectore pronunciatur *Annunciatio Domini*; & in vigilia Nativitatis Domini, quando dicitur *Jesus Christus &c.* debent Fratres humiliter toto corpore se prosternere, eo modo, quo in Capitulo de Inclinationibus dictum est.

(d) *Si quis libros interdictos legerit.* ) Declaramus, libros interdictos, de quibus hæc loquitur Constitutio, non esse illos, quorum lectio ab Indice, & à Canone omnibus Christi fidelibus prohibetur: tales enim libros legere gravissima culpa est, quandoque sub anathematis pœna ab Ecclesiâ interdicta; sed esse alios libros, qui continent inutiles, ac frivolas, sive narrationes, sive fabulas, sive inventiones, aut vanitates. Horum enim quoque lectio dedecet Religiosum spiritualibus rebus omnino addictum.

## I I I.

**I**tem levis culpa est, si quis Ecclesiæ, vel Altaris ornamenta negligenter tractaverit. Si quis vestes suas, aut libros in loco statuto honestè non deposuerit, vel negligenter tractaverit. (e) Si indumenta, vel alia Fratri data, vel concessa, sine ipsius licentia, per se alius acceperit. Si quis aliquid utensilium fregerit, vel perdidit: Si quis cibi, vel potûs aliquid effuderit. Si liber, in quo legendum est, cujuscumque neglectu defuerit. Si quis aliquid dixerit, vel egerit, unde offendantur Fratres.

(e) *Si indumenta, vel alia Fratri data &c.* ) Declaramus, quod licet nobis sint omnia communia, ut habetur in Regula, non est tamen in potestate cujusque accipere, id quod alteri ad usum concessum est. Immo hæc acceptio furtiva in materia gravi, absque licentia Prælati, propria auctoritate, esset peccatum mortale. Nec de hac loquitur Constitutio, sed de acceptance quarundam rerum manualium, quibus promiscue solent uti Religiosi: etiam absque speciali licentia Prælati, & solum interveniente licentia ejus, qui habet rem ad usum. Sicut in eadem materia gravi non potest Frater, qui habet rem ad usum, concedere alteri Fratri talem rem absque licentia Prælati.

## I V.

**I**tem levis culpa est, si quis cibum, vel potum absque benedictione sumpserit. Si quis in Conventum hora qua debet venire distulerit. Si quis ad Capitulum, vel collationem non venerit, vel communi refectiōi non interfuerit. (f) Si quis commune mandatum dimiserit. Si quis clamans in clamatione sua jurgium fecerit. Si quis eum, à quo proclamatus fuerit, eodem die (g) quasi se vindicando, clamare præsumperit.

(f) *Si quis commune mandatum dimiserit.* ) Declaramus, quod commune mandatum dicitur illud, quod nec habet præceptum, vel excommunicationem annexam, nec materiam gravem; sed in communi injungitur à Prælato, attentis illis, quæ communiter accidunt. Hoc ergo mandatum dimittere, est levis culpa, secus autem in aliis mandatis.

(g) *Quasi se vindicando clamare præsumperit.* ) Declaramus non fieri sermonem in præfenti Constitutione de vera vindicta, hæc enim plus quam levis culpa est: sed de quasi vindicta; quæ scilicet præferret aliquam apparentiam vindictæ, & excusatur à mortali, vel ex obreptione, vel ex parvitate materiæ.

## V.

(b) **I**tem levis culpa est, si quis cum juramento (ut loquendo fieri solet) aliquid negaverit, vel affirmaverit. (i) Si quis turpem sermonem, vel vaniloquium dixerit, vel (quod gravius est) in usu habuerit. Si quis eorum, qui officiis deputati sunt, in aliquo negligens repertus fuerit: ut sunt Piores in Conventu custodiendo, Doctores in docendo, Studentes in studendo, Scriptores in scribendo, Cantores in officiis suis, Procuratores in exterioribus procurandis, Vestiarii in vestibus providendis, custodiendis & reficiendis: infirmorum Custos in infirmis custodiendis, procurandis, & reficiendis; & mortuis necessaria ministrandis; & cæteri in officiis suis, ut injunctum est eis. Clamatis, vel proclamantibus se de supradictis, detur pœnitentia, secundum quod Prælati videbitur expedire.

(h) *Si quis cum juramento (ut loquendo fieri solet &c.)* Declaramus, quod consulto hic interponitur parenthesis, scilicet, ut loquendo fieri solet: ut denotetur juramentum, quod est veniale.

(i) *Si quis turpem sermonem &c.* ) Declaramus id quoque intelligendum esse de turpiloquio, quando non est peccatum mortale: & universaliter de omnibus aliis superius in hoc Capitulo positis. Idem intelligendum est, quod sunt levis culpa tunc, quando non accedunt ad rationem peccati mortalis: tunc enim deberent puniri, pœna gravioris culpæ, ut in cap. de graviore culpa dicitur.

## CAPUT XVII.

*De gravi Culpa.*

## I.

(a) **G**RAVIS culpa est, si quis inhoneste in audientia secularium cum aliquo contenderit. Si Frater cum Fratre intus vel extra lites habuerit. Si quis alicui Fratri opprobrium dixerit. Si quis mendacium de industria dixisse deprehensus fuerit. (b) Si quis silentium non tenere in consuetudinem duxerit. Si quis culpam suam, vel alterius defenderit. Si quis in illum, à quo proclamatus est, vel in quemlibet alium maledicta, seu verba inordinata, & irreligiosa malitiose invexisse deprehensus fuerit. Si quis Fratri præteritam culpam, pro qua satisfecit, improperaverit.

(a) *Gravis culpa est.*) Declaramus, quòd quamvis in hoc Capitulo multa contineantur, quæ de se culpa sunt, sicut dicere opprobrium Fratri, vel mendacium de industria dicere, vel maledicta, & verba inordinata, & irreligiosa malitiose proferre, mala de Patribus, & Fratribus evomere, jejunia ab Ecclesia instituta sine causa, & licentia frangere, & alia hujusmodi; non tamen idè culpa sunt, quia à Constitutionibus sunt prohibita, sed quia de se mala sunt; vel à jure Divino, aut Ecclesiastico prohibita. Unde transgressor in talibus duplicem incurrit pœnam: unam scilicet Sacramentalem, ex eo quod culpam committit, quæ non potest deleri, nisi per contritionem, & confessionem, quando culpa est mortalis; aliam vero pœnam incurrit, ex eo, quod transgreditur Constitutionem.

(b) *Si quis silentium non tenere in consuetudinem duxerit.*) Declaramus, omnem Fratrem assuetum ad quoscumque defectus in isto Capitulo dumtaxat, & præcedenti enumeratos, debere puniri pœna gravis culpæ, sicut vult Constitutio de assuetis ad silentii fractionem, sicut fuit declaratum Venetiis 1357. Nam gravius punitur, qui ex consuetudine, quam qui ex simplici transgressione offendit.

## II.

(c) **T**em gravis culpa est, si quis mala de Patribus, aut Fratribus, vel domibus suis, vel Sororibus malitiosè evomuerit, quæ testimonio Fratrum suorum probare nequiverit. (d) Si quis absque licentia, & magna necessitate equitaverit, (e) vel carnes comederit, vel etiam in via pecuniam portaverit, vel portari procuraverit. Si quis procedens ubi foeminae sunt, oculum fixerit (si tamen hoc in usu habuerit) vel cum foemina solus non de confessionibus, vel honestis locutus fuerit. Si quis jejunia ab Ecclesia instituta fregerit sine causa, & licentia. (f) Si quis litteras alicui miserit, vel sibi missas legerit, quas primitus suo Præsidenti non ostenderit;

Magistris in Theologia, & Inquisitoribus hæreticæ pravitatis, & Prædicatoribus Generalibus dumtaxat exceptis.

(c) *Si quis mala de Patribus, aut Fratribus &c.*) Declaramus, quòd evomere mala de Patribus, aut Fratribus, ex genere suo est grave delictum: & longè gravius, si talia mala testimonio Fratrum probari non possint. Neque clausula illa posita in Constitutione, scilicet, quæ testimonio Fratrum suorum probare nequiverit, habet exceptionis rationem, firmantis regulam in contrarium, quasi sensus sit: tunc non esse gravem culpam, quando illa mala, testimonio Fratrum probare possunt; sed ponitur ad declarandam majorem gravitatem culpæ.

(d) *Si quis absque licentia, & magna necessitate equitaverit.*) Declaramus, quòd cum equitare maximè repugnet statui Mendicantium, qui ex eleemosynis vivunt: nullus Frater Ordinis nostri sine necessitate, & licentia (quando habet Prælatum in promptu) vel sine magna necessitate debet equitare, sed pedes vadat. Et si fecus factum fuerit, graviter puniantur transgressores, sicut fuit ordinatum in Capitulo Parisiis 1264. Et in Capitulo apud Ferrariam 1290. ordinatum fuit, quod Constitutio de nonequitando strictissimè observari debeat, & maximè per territoria, ubi Conventus habemus; & quod transgressores, per Priores Provinciales, & per Visitatores acriter & graviter puniri debeant. Et idem fuit ordinatum Romæ 1569. & innovatum Venetiis 1592. Ubi præsertim fuit ordinatum, ne Conversi equitarent, nisi ex magna necessitate. Quod vero dicitur, de pecuniis in via non portandis, id intelligendum est, si quis sine licentia Superiorum suorum eas portaverit.

(e) *Vel carnes comederit.*) Declaramus, quòd Prælati possunt cum Fratribus suis etiam extra casum infirmitatis ex causa rationabili, quantum ad esum carniū, dispensare. Subditi autem non debent sine licentia, vel magna necessitate carnes comedere, sicut in Capitulo de Jeuniis dictum est.

(f) *Si quis litteras alicui miserit.*) Declaramus, quòd in Capitulo Parisiis celebrato 1234. sic fuit ordinatum: Volumus, & ordinamus, quod nullus Prior in hoc deferat alicui, quin litteras accipiendas, & mittendas legat. Et in alio Capitulo 1243. ibidem celebrato fuit ordinatum, quod Fratres non mittant litteras, etiam non sigillatas, nec recipiant sine licentia sui Prælati. Et in alio Capitulo ibidem celebrato 1264. sic dicitur: Fratres qui miserunt, vel in posterum miserint litteras, vel memorialia non ostensa Prælato suo, vel sibi missas legerint, nisi habita prius licentia, gravius puniantur. Et in Capitulo Treveris 1289. sic dicitur: Inhibemus districte, ne Fratres litteras, vel cedulas, vel alia quæcunque memorialia legant, vel transmittant, vel sibi transmissa aperiant, sine eorum Superiorum inspectione, vel licentia speciali. Et hoc idem fuit in diversis aliis Capitulis ordinatum, præsertim Venetiis 1592. in hunc modum: Nullus Frater nostri Ordinis, præter exceptos in Constitutionibus nostris, audeat litteras aliquas ad aliquem, præterquam ad Superiores mittere, nisi prius à proprio Prælato visæ, & subscriptæ fuerint; nec ad ipsum missas legere, vel aperire, nisi prius easdem Superiori suo legendas præsentaverit, sub pœna carceris per mensem, & aliis, Superioribus arbitariis.



## III.

(g) **PRO** hujusmodi culpis, & his similibus veniam petentibus, & non proclamatis, tres correctiones in Capitulo dentur: & tres dies in pane, & aqua jejunent. Clamatis verò una dies, & una correctio superaddatur. Præter hæc autem, Psalmi, & veniæ secundum quod discretioni Superioris visum fuerit, pro qualitate culparum injungantur. Eadem poena digni sunt, qui postquam missi fuerint, sine licentia reverti præsumpserint, (h) vel ultra terminum sibi assignatum moram fecerint sine rationabili causa: vel si quis pro victu & vestitu, vel qualibet alia re murmuraverit. Caveat autem quilibet frater (i) ne proclamet aliquem in Capitulo de crimine, (etiam de auditu) nisi ipsum crimen possit probare. Quod si accusatus negaverit, & accusans in probatione detecerit, poena accusato debita puniatur. (k) Ne autem vitia occultentur, Prælato suo denunciaret, quod viderit, vel audiverit.

(g) *Pro hujusmodi culpis, & his similibus veniam petentibus, &c.* Declaramus, quod Fratres de his quæ continentur in isto, & in Capitulo de levi Culpa tenentur se in Capitulo de culpis accusare, & poenitentiam sibi injunctam facere: sicut supra in cap. de silentio dictum est; quod fratres debent se de silentio, sicut & de aliis culpis in Capitulo accusare. Et de Capitulo quotidiano dicitur, quod fratres qui se reos intellexerint, humiliter culpas suas confiteantur. Hoc tamen intelligendum est, quando perpetratio culparum gravium, est talis naturæ propter suam notorietatem, quod possit in iudicium deferri. Si vero talis perpetratio sit occulta, non obligat Constitutio perperantem ut se prodatur.

(h) *Ultra terminum sibi assignatum moram fecerint.* Declaramus, quod Fratres exeuntes à Conventu sine licentia, vel cum focio non sibi à Prælato deputato: debent puniri eadem poena, qua puniuntur in Constitutionibus ii, qui ultra terminum sibi assignatum, moram fecerint; vel sine licentia reverti præsumpserint, prout exprimitur in hoc Capitulo: sicut declaratum fuit Romæ 1558. Immo quia gravius est egredi domo sine licentia, quam ultra terminum assignatum extra domum moram facere: illud severius puniendum est, quam istud. Declaramus etiam pro hujusmodi Constitutionis observantia, istud quoque sæpius ordinatum, Romæ 1608. confirmatum esse: ut cuique fratri à domo exeunti, nominatim focus assignetur à Prælato, nec ulli detur licentia exeundi, nisi ei simul focus designetur. Fratres vero cum in domum redierint, quamprimum se sistere debent Præsidenti Conventus, ut accepta ab eo benedictione, ipse sciat quid de eis actum sit. Id verò toties quoties exierint, & redierint, facere debent, Romæ 1601.

(i) *Ne proclamet aliquem in Capitulo de crimine.* Declaramus, quod hujusmodi proclamationes, quæ in Capitulis Religiosorum fieri solent, sunt de quibusdam levibus quæ famæ non derogant: & ideo potius sunt quædam commemorationes obliatarum culparum, quam accu-

sationes, vel denunciationes: ac propterea fieri possunt, nulla, etiam secreta admonitione sive correctione fratrum, præmissa. Si tamen talia essent, ut ob illa frater infamaretur, contra præceptum Domini ageret, qui hoc modo peccatum fratris non præmissa correctione fraterna publicaret: ut docet S. Thom. 2. 2. qu. 33. art. 7. ad 4. Quapropter dictæ proclamationes regulariter loquendo, locum habent in iis, quæ continentur in *Cap. de levi culpa*, non tamen in aliquibus culpis contentis in hoc Capitulo, nisi correctione fraterna præmissa. Et multo minus tenetur seipsum quis accusare publice de eisdem culpis, nisi in casu supraposito notorietatis facti.

(k) *Ne autem vitia occultentur; Prælato suo denunciaret.* Declaramus, hoc quod hic præcepit Constitutio, prudenter esse intelligendum, salvo scilicet ordine correctionis fraternel, quam Dominus præcepit Matth. 18. verbis istis: *Si peccaverit in te frater tuus, corripe eum inter te, & ipsum solum.* Et hunc eundem ordinem hæc nostra Constitutio servandum esse supponit, tum hic, tum in capite sequenti num. 9. initio ipsius numeri, ubi hoc negotium clarius explicatur. Unde si frater qui commisit crimen, non indiget correctione fraterna, quia jam est emendatus: quantumcunque adveniat præceptum Prælati, quod solet in visitationibus communiter poni, non potest quis ipsum denunciare. Secus autem si inquisitio fieret contra aliquem laborantem infamia, etiam si jam sit emendatus, quia in hoc casu providetur bono communi. In duplici tamen casu, non tenemur præceptum private, & secretæ correctionis servare, ut docet S. Thom. loco nuper citato in corpore articuli: quando videlicet peccatum est publicum, vel quando est occultum quidem, sed est in nocuum proximatorum, vel corporale, vel spirituale. Nam in his casibus, qui sic peccat, non solum in se peccat, sed etiam in alios. Et ideo omissa privata correctione, oportet statim procedere ad denunciationem, ut hujusmodi nocuum impediatur, nisi forte aliquis firmiter æstimaret, quod statim per secretam admonitionem posset huiusmodi mala impedire. Si autem peccatum est publicum, non est tantum adhibendum remedium ei qui peccavit, ut melior fiat; sed etiam aliis, in quorum notitiam devenit, ut non scandalizentur. Et ideo talia peccata sunt publice arguenda, secundum illud Apostoli ad Timoth. 5. *Peccantes coram omnibus argue, ut ceteri timorem habeant.* Quod sicut dicit August. lib. de verbis Domini cap. 16. *de peccatis publicis intelligitur.*

## CAPUT XVIII.

*De graviore Culpa.*

## I.

(a) **G**RAVIORE culpa est, si quis per contumaciam, (b) vel manifestam rebellionem inobediens Prælato suo extiterit; vel cum eo intus, vel foris (c) proterve contendere ausus fuerit. (d) Si quis percussor fuerit. (e) Si quis crimen capitale, id est, poena mortis in seculo puniendum commiserit. (f) Si quis procuraverit, quod ipse, vel alius, eximatur via non juridica à potestate sui Prælati. Si quis rem sibi collatam rece-

pe-

perit, de his quæ prohibentur recipi. Si quis rem sibi collatam celaverit, quem B. Augustinus furti iudicio dicit esse condemnandum. (g) Si proclamatus convictus fuerit, sponte surgat, & veniam petens, sceleris sui immanitatem lamentabiliter proferat, & denudatus (ut dignam recipiat suis meritis sententiam) vapulet, quantum placuerit Prælato; & sit omnium novissimus in Conventu. Ut qui culpam perpetrando non erubuit membrum Diaboli fieri, ad tempus (ut resipiscat) sequestretur à consortio ovium Christi.

(a) *Gravior culpa est, si quis per contumaciam.* ) Declaramus, quod transgressoribus scienter præceptorum, & obedientiarum Superiorum potest, & debet imponi pro huiusmodi transgressione per Præsidentem pœna gravioris culpæ: sicut fuit ordinatum apud Castras 1352. hoc tamen intelligendum est si adsit contumacia atque rebellio. Nam ex vi hujus Constitutionis non sufficit ad hoc ut quis incurrat pœnam gravioris culpæ, quod sit transgressor præcepti positi à Prælato, & multo minus simplicis obedientiarum: sed requiritur, quod interveniat contumacia, vel manifesta rebellio, ut dicitur in textu.

(b) *Vel manifestam rebellionem.* ) Declaramus, quod manifesta rebellio est, quando subditus pertinaciter verba sui Prælati contemnit: puta, cum Prælatus juxta præscriptum Constitutionis, dicit: Volo omnino quod faciat hoc, & subditus dicit: Nolo facere. Et sic obedientiam sui Prælati transgrediens, debet pœna gravioris culpæ puniri, sicut declaratum fuit Coloniae 1428. Unde S. Thom. 2. 2. qu. 39. art. 1. ad 2. dicit, quod tunc aliquis dicitur cum rebellionem Prælato suo non obedire, quando pertinaciter ejus mandata contemnit, & iudicium sui Superioris subire recusat.

(c) *Proterve contendere ausus fuerit.* ) Declaramus, quod proterva contentio, est improba & perversa, seu superba disceptatio, vel impugnatio verborum cum tumultu. Unde proterve contendere cum Prælato, nihil aliud est, quam verba ipsius verbis tumultuosis, vel clamorosis improbe, & perversè seu superbè impugnare: & talis debet puniri pœna gravioris culpæ.

Item declaramus, quod nullus sub pœna gravioris culpæ præsumere debet asserere Priorem sui Conventus, non esse Priorem, neque ab ejus obedientia se subtrahere, donec per Superiores, si quid acciderit dubii fuerit declaratum, sicut in Capitulo apud Valentiam 1364. declaratum fuit.

(d) *Si quis percussor fuerit.* ) Declaramus, quod si quis aliquem quocumque instrumento enormiter percusserit, super ejus absolutione Prior Provincialis consulatur, & ipse percussor interim ab aliis sequestretur. Postquam autem fuerit absolutus, pœna gravioris culpæ puniatur: quam saltem per duos menses perfecte, & complete persolvere teneatur, sicut fuit ordinatum in Capitulo Londinis 1314.

(e) *Si quis crimen capitale, id est, pœna mortis in seculo puniendum commiserit.* ) Declaramus in Capitulo Romano 1518. explicatum

fuisse, & in Constitutionem redactum, quod propter crimen pœna mortis in seculo puniendum præter prædictam pœnam gravioris culpæ debet qui illud committit carceri mancipari: sicut etiam propter lapsum carnis. Propter quodcumque autem aliud crimen, quod sit peccatum mortale, & committenti adferat infamiam: sicut est falsum testimonium, ebrietas assidua, & horum similia, ille qui peccat, pœna gravioris culpæ puniri debet.

(f) *Si quis procuraverit quod ipse, vel alius eximatur via non juridica à potestate sui Prælati.* ) Declaramus, quod quicumque procuraverit correctionem (scilicet, de delictis in hoc capitulo contentis) de se vel de alio factam, vel assignationem quamcumque per personas extra obedientiam nostri Ordinis constitutas impedire, pœna gravioris culpæ puniatur: & omnibus gratis Ordinis sit privatus, nec ad ipsas restitui possit, nisi per Magistrum Ordinis, vel Capitulum Generale. Et eandem pœnam volumus incurrere eos, qui per personas extra obedientiam nostri Ordinis constitutas procuraverint, quod frater aliqua de Provincia, vel de Conventu aliquo expellatur: sicut fuit ordinatum in Capitulo apud Cadurcium 1319. & apud Rothomagum 1320.

Item denunciavimus, non tantum acceptatam esse ab Ordine nostro in Capitulo Romæ 1589. Gregorii XIII. Constitutionem, qua prohibetur fratribus, ne per personas extra obedientiam Ordinis constitutas, audeant sibi aliquid in Ordine, sub pœna inhabilitatis ad hæc & similia, (nisi per Sedem Apostolicam dispensati fuerint) obtinenda, procurare: sed etiam sub pœna excommunicationis latæ sententiæ præceptum fuisse, ne quispiam directe, vel indirecte, per se, vel per alium, pro se, vel pro aliis ejusdem Ordinis professoribus, apud personas extra nostrum Ordinem constitutas, & de nostro Ordine non assumptas, gratiam aliquam, vel pœnarum remissionem à Prælatis nostri Ordinis obtinendam, procuret; aut ad hunc effectum munera aliqua secularibus spondeat, vel exhibeat. Quæ Constitutio, una cum ordinatione Capituli supranominati, atque censuris, & pœnis in eo expressis, cum postea à Clemente VIII. & successive à Paulo V. confirmata fuerit, & illa quidem in Capitulo Venetiis 1502. hæc autem Romæ 1608. acceptata fuerit: ideo operæ pretium est, ut omnes Fratres meminerint ejus, quod Clemens VIII. cum prius per gratias, quas per emendicatos favores nolebat concedi, quoscumque gradus, honores, dignitates, officia, administrationes, functiones, Prælaturasque Ordinis intelligi debere significasset, expresse præcepit istis verbis:

Et propterea dilectis Magistro Generali, Provincialibus, & aliis Prælatis, ac Superioribus ejusdem Ordinis, non posthac aliquod præmissorum cuiquam ad instantiam, seu requisitionem, vel contemplationem personarum superius expressarum quarumcumque quovis modo concedere; Religiosis verò ac Fratribus ejusdem Ordinis quibuscumque, non solum in præmissis omnibus secularium favorem minimè procurare; sed nec etiam spontè oblatum, aut ab eis minimè procuratum recipere: & similiter, ne ad hunc effectum munera aliqua secularibus impendere, vel exhibere audeant, vel præsumant: autoritate Apostolica tenore præsentium in virtute sanctæ Obedientiæ, ac sub eisdem pœnis in dictis Gregorii litteris contentis præcipimus, & expresse interdiciamus, & prohibemus. Eadem autoritate statuentes, quod omnes, & singuli in præmissis delinquentes, nulla alia moni-

tione præcedente & absque processu desuper habendo, sententias & pœnas præmissas irremissibiliter eo ipso incurrant: quodque ad illas sententias, & pœnas hujusmodi damnabiliter incurrisse legitime probandum, & omnino convincendum; solæ præmissarum personarum instantiæ, favores, & preces, etiam oretenus porrectæ, plenam, indubiam, & sufficientem in judicio, & extra fidem faciant, ne ad id probationis alterius adminiculum requiratur.

Item declaramus, quod si quis Frater subditus, vel Prælatus inducat (scilicet vi, & metu, vel alio quocumque illicito modo) aliquem Fratrem per se, vel per alium ad electionem cujuscumque Prælati, aut Officialis nostri Ordinis: si in hoc deprehensus fuerit, pœna gravioris culpæ puniatur; & sit per triennium omni voce activa & passiva privatus, sicut fuit ordinatum Parisiis 1286. & Burdigalæ 1287. & novissimè Bononiæ 1285. ad memoriam revocatur illud, quod in Decret. lib. 6. capit. *Sciant cuncti*, habetur illis verbis: Sciant cuncti, qui eos, ad quos spectat electio, pro eo quod rogari, vel inducti, eum pro quo rogabant, vel inducebant eligere noluerunt; spoliant, vel injuste prosequuntur: ipso facto sententiam excommunicationis incurrant.

Item declaramus, Valentiniæ 1596. & Romæ 1601. & 1608. strictissimè sub pœnis in Capitulo gravioris culpæ contentis prohibitum fuisse: ne quis Religionis negotia, siue Fratrum sint, siue Monialium, quoquo modo deferre audeat, directè, vel indirectè, per se, vel per alios ad Tribunalia extra Ordinem; utque id scientes, Superiori infra 12. dies denunciare, Superiores vero præmissis præmittendis, pœnam transgressoribus supra taxatam infligere teneantur. Ordinantes, ut quicumque Prælatus sui judicium recusaverit, severissimè puniatur: super quo conscientiam Prælatorum aggravamus. Qui nec se recusatos judicent, sed reos pœnitentiam sibi injunctam subire cogant, & interim Superiores de omnibus certiores faciant.

(g) *Si proclamatus convictus fuerit.* Declaramus, quod licet secundum jura convictus propriè dicatur, qui per testes in judicio vincitur: tamen convictus etiam dicitur, qui Prælato suo peccatum suum fatetur, coactus per aliquam excommunicationem, siue per inclusionem, siue per disciplinas, & alias pœnitentias, licet talis propriè sit confessus. Unde taliter convictus illas easdem pœnas Constitutionis incurrit, sicut fuit declaratum apud Tolosam 1328. Accusatus autem à pluribus non testibus, ab uno de uno actu, à secundo de alio ejusdem speciei: talis non est convictus, nec potest sententialiter condemnari; sed benè potest ad quæstiones poni. Similiter quando contra aliquem Fratrem habentur testimonia secularium siue dignorum, potest arctari ad dicendam veritatem, & ad quæstiones poni; potissime quando infamia probata contra eum laborat, sicut fuit declaratum Ferrariæ 1362. Quare si infamia præcedente, duo testes seculares deponunt contra aliquem Fratrem, talis potest ab aliis separari, & veritas ab eo extorqueri. Immo infamia, & unus testis, vel infamia, & una vehemens suspicio, sufficiunt ad separationem alicujus Fratris puniendi: & talis sic separatus tenetur Judici veritatem dicere de eo crimine, de quo infamatus est, non solum de se, sed & de alio; si tamen alius similiter fuerit diffamatus, atque ab eo sic separato petatur veritas juxta ordinem juris, quia mentiri in judicio, est peccatum

mortale. Eo autem ipso, quod propter unum crimen Judex in aliquem justè inquirat, & contra eum procedat, ex hoc ipso non potest inquirere, & procedere contra ipsum de aliis criminibus occultis: adeo ut qui de uno crimine infamatus est, non teneatur alia crimina, de quibus non est infamatus, etiam de illis à Judice interrogatus fuerit, confiteri, secundum Caietan. 2. 2. quæst. 69. art. 1. & 2. Ideo caveant Prælati ab hujusmodi inquisitione occultorum criminum, quia peccant ipsi præcipiendo, vel inquirendo, & subditi non tenentur obedire; non tamen potest reus, etiam infamatus per sententiam, ad pœnam ordinariam condemnari, nisi fuerit per duos testes, vel per propriam confessionem convictus.

## I L.

**P**Oena autem sequestrationis tunc tantum locum habeat, quando propter peccatum mortale ad pœnam gravioris culpæ quis est damnatus. In Refectorio quoque ad communem mensam cum cæteris non sedebit: sed in medio Refectorii (b) super nudam terram comedet; & providebitur ei seorsim panis grossior, & potus aquæ. Nec reliquæ prandii sui cum aliis misceantur: ut cognoscat, se ita esse sequestratum à consortio aliorum, quod privetur (nisi per pœnitentiam redeat) consortiis Angelorum: ad Canonicas Horas, & gratias post comestionem, ante ostium Ecclesiæ transeuntibus Fratribus prostratus jaceat, dum intrant & exeunt: nullus autem se audeat conjungere illi, vel aliquid mandare.

(h) *Super nudam terram comedet.* Declaramus, quod in Refectorio pro sedentibus in terra pro graviore culpa, debet haberi asser atque immediate juxta terram, super quem ponantur cibaria, videlicet panis, & aqua: & ipsi debent sedere super nudam terram. Pro aliis vero, qui sedent in terra pro fractione silentii, vel pro aliis defectibus: debent haberi asseres, super quos sedeant; & aliqua menia, vel forma lignea, super quam comedant.

## I I L.

**P**Rælatus tamen (ne in desperationem labi possit) mittat ad eum, qui est in graviore culpa seniores: qui commoneant eum ad pœnitentiam, provocent ad pœnitentiam, foveant per compassionem, hortentur ad satisfactionem, adjuvent per suam intercessionem; si viderint in eo humilitatem cordis. Quibus etiam suffragetur totus Conventus. (i) Nec renuat Prælatus cum eo facere misericordiam: & si videbitur ei, denuo vapulet ad pedes singulorum primo Prælati, deinde utriusque lateris sessorum. Talis quandiu erit in hac pœnitentia, non communicet, nec veniat ad osculum pacis. Si Prædicator est, prædicationis officium non exerceat: non notetur ad aliquod officium in Ecclesia, nec ulla ei comit-



tatur obedientia: nec vocem habeat (nisi in sui accusatione) (k) ante plenariam satisfactionem, (l) vel donec per Magistrum Ordinis, aut Diffinitores Capituli Generalis, vel Provincialis fuerit restitutus. Si fuerit Sacerdos, vel Diaconus, his Officiis non fungatur, nisi postmodum religiose conversatus fuerit.

(i) *Nec renuat cum eo Prælatus facere misericordiam.* ) Declaramus, quòd quando Frater aliquis de gravi aliquo delicto accusatur, ac per testes convincitur, vel ipse in loco iudicii confitetur, Prælatus non potest ei parcere quoad pœnas privativas, quæ in nostris Constitutionibus continentur. Et si dicatur, cum confesso esse mitius agendum, ac proinde tales ei pœnas remittendas esse: respondetur, quod in pœnis positivis, puta, quod maneat in carcere, quod comedat in terra in pane & aqua cum prostrationibus tot diebus, quod dicat tot Psalteria, & accipiat tot disciplinas, si sponte confitetur, cum eo mitius est agendum: & quoad hujusmodi pœnas potest Prælatus ei parcere de consilio discretorum. Sed quoad pœnas privativas, puta, quod sit privatus voce activa, vel passiva, vel gratiis Ordinis, vel Officio prædicationis, & aliis hujusmodi, quæ in nostris Constitutionibus continentur, & quæ sunt Canonis lætæ sententiæ non potest Prælatus, etiam cum sponte confesso dispensare; sed hoc pertinet ad Magistrum Ordinis, vel ad Diffinitores Capituli Generalis, vel Provincialis, sicut fuit declaratum Tolosæ 1328. & Coloniae 1301. & Basilicæ 1473. Ad cujus Constitutionis observationem Valentiniæ 1596. declaratum est: pœnas omnes privativas in nostris Constitutionibus contentas, quando adest clausula (ipso facto) sola facti declaratione incurrere: ita ut non possit Iudex ipsas minuire in sententias ferenda.

(k) *Ante plenariam satisfactionem.* ) Declaramus, quòd cum ad plenariam alicujus debiti satisfactionem alterum duorum requiratur: videlicet, aut debiti solutio ex parte ejus, qui satisfacere tenetur, quando videlicet solvit debitum; vel debiti relaxatio ex parte illius, qui potest debitum relaxare, quando videlicet ille, cui satisfaciendum est, remittit debitum: ita in proposito, si ille, qui est in graviore culpa, sit adjudicatus ad faciendam talem pœnitentiam usque ad annum, mensem, vel ad alium terminum, & pœnitentiam sibi injunctam facit, vel Prælatus qui potest, talem pœnitentiam remittit, vel relaxat; dicitur plenè satisfecisse, sicut fuit declaratum apud Tolosam 1328.

(l) *Vel donec per Magistrum Ordinis &c.* ) Declaramus circa hæc verba, quod licet antiqua Constitutio facta apud Montem Pefulanum 1316. & in duobus Capitulis immediate præcedentibus inchoata, & approbata sic dispo-neret, ut legeretur conjunctive, scilicet: (ac donec per Magistrum Ordinis) postea tamen in Capitulo Romano 1518. nova fuit edita Constitutio per tria Capitula immediate continua, juxta modum inchoationis, & approbationis, ac per eam fuit decretum: ut copulativa mutaretur in disjunctivam, & dicatur: (vel donec per Magistrum &c.) ac propterea ille, qui est in graviore culpa, cum primum satisfecerit, potest illis officiis, quibus privatus fuerat, fungi, & voce activa, vel passiva potiri, absque nova restitutione à Magistro Ordinis, vel Diffinitoribus exspectanda; nisi fortè in sententia pri-

Cod. Regul. Tom. IV.

vationis esset expressum, quod illis non fungatur, donec fuerit restitutus. Illi porro, qui de cætero abjuraverint, tanquam de Hæresi vehementer suspecti, non possint à quocumque etiam Magistro Generali restitui, aut promoveri ad aliquod officium, aut dignitatem toto tempore vitæ eorum: sed permittantur in humilitate deslere peccatum suum; irritum decernentes, quidquid in oppositum factum fuerit. Romæ 1558. & Avenione 1561. & Bononiæ 1564.

## I V.

SI quis autem (quod Deus avertat) (m) in peccatum carnis lapsus fuerit, (n) aut furtum commiserit, quod sit notabile judicio discretorum: (o) vel litteras Magistri Ordinis, vel Priorum Provincialium, vel eorum sigilla falsificaverit, vel falsificatis scienter usus fuerit; aut in Prælatum suum manus injecerit temere violentas, aut quemcumque lethaliter, vel graviter, & atrociter percusserit, aut infra septa Monasterii super se arma invasiva portare præsumpserit, ut aliquod prædictorum fieri fecerit: (p) carcerali custodiæ mancipetur.

## V.

(q) SI quis etiam alteri Fratri Ordinis, vel ipsi Ordini crimen falso imposuerit, propter quod crimen secundum nostrarum seriem Constitutionum Frater aliquis carcerem mereretur: aut crimina quæcumque hujusmodi Fratrum secularibus personis, & extra obedientiam nostri Ordinis constitutis revelaverit, unde Fratri, vel Ordini infamia, vel damna fuerint subsecuta; modo consimili carcerali custodiæ mancipetur. Et volumus, quod hujusmodi Ordinis destructores, possint (nisi per Magistrum Ordinis, vel Generale Capitulum) liberari. Idem dicimus de Fratribus, qui inventi fuerint ad taxillos lusisse, (r) aut in sententiam excommunicationis à quocumque Judice nostri Ordinis rite latam, scienter incidisse: quos etiam pœnæ carceris volumus subjacere.

(m) *In peccatum carnis.* ) Declaramus, in Capitulo Salmanticensi 1551. istud editum fuisse. Item ordinantes, admonemus omnes Priores tam Conventuales, quam Provinciales, ut in pœnitentiis (præsertim in Constitutionibus taxatis) imponendis sint severiores: & in his maximè, quæ ad honestatem pertinent, unde solet ex paucorum erratis tota Religio infamari, & in aliis, quæ in capit. de *Graviore Culpa* continentur.

(n) *An furtum commiserit.* ) Declaramus, in Capitulo Romano 1583. fuisse ordinatum: ut qui semel reperti fuerint furtum grave fecisse de rebus Monasterii, (præter alias pœnas) priventur officio, & inhabiles reddantur ad quamcumque administrationem rerum temporalium.

H

(o)

(o) *Per litteras Magistri Ordinis, vel Priorum Provincialium &c.*) Declaramus, quòd præter pœnas hic contra falsificantes litteras Magistri Ordinis, vel Priorum Provincialium constitutas, aliæ superadduntur in Capitulo de *Apostatis* prope finem.

(p) *Carcerali custodia mancipetur.*) Declaramus, quòd illi proprie carceri mancipati intelliguntur, qui per diffinitivam sententiam sunt ad carcerem condemnati. Qui vero ad inquirendam veritatem sunt in custodia detenti, dicuntur separati, vel arrestati: sicut fuit declaratum apud Rothomagum 1320. Item declaramus, quòd Priores non possunt, nec debent proprio iudicio incarcerare Fratres sine consilio discretorum: qui autem per sententiam fuerint incarcerati, si inventi fuerint culpabiles, non debent inde extrahi, vel liberari sine licentia Provincialis, sicut fuit declaratum Parisiis 1326. & apud Tolosam 1328.

Item declaramus, quòd Joannes XXII. ordinavit, quòd Frater qui fuerit carceri judicialiter mancipatus, semota omni crudelitate, secundum quantitatem, & qualitatem suorum excessuum debet in eodem carcere teneri, & etiam aliis disciplinis, & abstinentiis puniri: ita quòd rigor carceris exterminium non pariat, sed ad meliora provocet delinquentem: Item declaramus, quòd Bonifacius VIII. in Bulla, quæ incipit, *Ad augmentum &c.* statuit, & ordinavit: quòd Prælati Ordinis nostri, ad quos punitiones, & correctiones Fratrum delinquentium spectant, possint liberè punire, & corrigere Fratres delinquentes, secundum consuetudines approbatas, & instituta ipsius Ordinis generaliter facta, & etiam facienda, rimulis, & apicibus juris, ac etiam ordine juris postpositis, dummodò substantialia juris serventur, quæ præcipuè sunt quatuor. Primum, ut contra aliquem non procedatur, nisi accusatum, denunciatum, aut infamatum: juxta tres modos procedendi à jure statutos; per accusationem, denunciationem, & inquisitionem. Secundum, ut testes examinentur per præceptum formale. Tertium, ut absens vocetur, & per duos ad minus testes vel contestes per propriam confessionem convincatur. Quartum, ut indefensus non condemnetur ad pœnam ordinariam, nisi fuerit contumax. Nec licet eisdem fratribus ab Ordinis punitionibus, & correctionibus aliquatenus appellare, nisi appellatio gradatim fiat: ut Capit. Roman. 1589. ex decreto Sac. Congregationis Regularium denunciato, statutum est. Est autem decretum hujusmodi conformiter ad constitutionem Bonifacii IX. de quaz. distinct. cap. 18. his verbis pronuntiatur. Quoniam nonnulli vagandi studiosi, dum imminentes commissorum criminum pœnas ex suis Constitutionibus, aut alias debitas sibi metunt: falsa, & commentitia gravamina causati, non immediate ad sui Ordinis Superiores, scilicet à gravamine Prioris ad Provinciale, à Provinciali, ad Generalem, & à Generali ad Protectorem, prout cujusque Religionis Constitutionibus disponitur, sed ad hanc Romanam Curiam absque licentia fugiunt potius quam recurrunt, ex quo Ordinum disciplina relaxatur, Prælati contemnuntur, & ipsi in dies audaciores evadunt: placuit Sacre Congregationi ex ordine Sanctissimi statuere; ut si quis Regularium inpoterum temere, leviter ex causa hanc almam Urbem, seu Curiam absque sui Superioris licentia, & supradicta forma prætermittit adire præsumperit, ad suos eisdem Superiores severiori pœna plectendus remittatur.

Item declaramus in Capitulo Romano 1558. decretum fuisse contra facinorosos hoc modo. Denunciamus in nostro Diffinitorio fuisse conclusum, & decretum: quòd Reverendi Provinciales cum suo Diffinitorio, vel cum quatuor Patribus Provinciæ, aut qui fuerint aliquando Diffinitores Provincialis Capituli, delictis majoribus, & facinorosis hominibus possint adhibere pœnas extraordinarias (etiam trirremium) in delictis gravioribus apud seculares notis. Qui autem ad triremes etiam ad tempus fuerint condemnati juridice, & sententia fuerit executioni mandata, sunt ipso jure irregulares, & privati perpetuo executione ordinum suorum, cujus privationis mentio inferatur in sententia diffinitiva. Quod etiam si non inferatur, illi tamen sunt ea executione de facto privati.

Item declaramus, quòd Priores Provinciales debent facere, quòd in omnibus Conventibus suæ Provinciæ sint firmi, & fortes carceres, ubi puniantur criminosi, & rebelles: sicut ordinatum fuit Bononiæ 1238. & Lugduni 1274. & apud Argentinam 1296. & iterum Lugduni 1536. Et Romæ 1546. præceptum fuit Prioribus in quorum Conventibus carceres deputati non sunt, ut infra sex menses eos constitui, atque aptari ac muniri faciant: quòd si realiter, & cum effectu non præstiterint, careant in Provinciali Capitulo voce activa, & nullo modo admittantur ad illam. Et postea ibid. 1569. sic habetur: Admonemus omnes Priores Conventuales, ut ordinationes de muniendis carceribus omnino mandent executioni: qui infra sex menses à notitia præsentium id non præstiterint; à Priore Provinciali in visitatione absolvantur. Volentes quòd ordinatio facta apud Carcassonam 1378. quæ est infrascripti tenoris, observetur: Firmiter mandamus observari, ut quicumque frater alium fratrem de carcere extraxerit, vel ad exendum, seu ad frangendum carcerem, instrumentum aliquod alicui incarcerato, vel per se, vel alium ministraverit, carceri realiter, & de facto mancipetur. Et in Capitulo Lucæ 1288. & Tolosæ 1362. sic dicitur: Volumus, & ordinamus, quòd quicumque Frater nostri Ordinis ad liberationem alicujus Fratris incarcerati operam dederit efficacem, ex præsentis statuti ipso facto excommunicationem incurrat, & pœnæ gravioris culpæ subiaceat. Declarantes, quòd fratres incarcerati, non sunt ipso facto bonis, & rebus sibi concessis privati: sed debent conservari ut possint suo tempore eis restitui, si Superiores hoc expedire judicaverint; vel ad Conventus suos, vel ad eos in quibus detinentur deputati, sicut fuit ordinatum apud Perpignanum 1327. & Burgis 1369. Et in Capitulo Januensi 1513. ordinatum fuit, quòd suadens alicui fratri fugam ex carcere, aut quomodolibet coadjuvans ad hoc: sit ipso facto privatus voce activa, & passiva, & pœnæ gravioris culpæ subiaceat, per dies decem intra mensem adimplendæ. Frangens autem seram carceris, per tres menses ad carcerem deputetur: ita quòd elapsis tribus mensibus poterit à Prælato liberari.

Expensas porro, quas fieri contigerit, & pro captura, & pro carceratione Fratrum: à primo die detentionis, usque ad diem educationis eorum; solvant Conventus, quorum sunt filii. Neapol. 1600.

(q) *Si quis etiam alteri Fratri Ordinis, vel ipsi Ordini crimen &c.*) Declaramus, in jure communi statutum esse, ut non probantes objecta, & maxime contra Superiores; etiam si se non obligaverint ad pœnam talionis, eadem sunt puniendi, *extr. de calumn. cap. 2.* In Capitulo au-

autem Romano 1580. istud ex Capitulo Avenionensi. 1561. contra infamatores fratrum confirmatum strictissime fuit: ne de cetero Frater aliquis, cujuscunque gradus, & conditionis existat, scribere præsumat per se, vel per alios litteras criminosas, ad quoscunque intus, vel extra Ordinem, sine proprii nominis subscriptione. Item ibidem est ordinatum, gravissime esse puniendos detractores, etiam si vera dicerent, contra ordinem charitatis: puniendos inquam usque ad penam gravioris culpæ inclusive; si Prælaro de consilio Patrum, pro rei gravitate ita visum fuerit. Si quis autem de Superioribus suis, crimina quæ probari non poterunt evulgare præsumpserit, volumus eos per triennium carcerali custodiæ mancipari. Et Romæ 1601. de mandato Clementis VIII. ordinatum, ac Vallisoleri 1605. confirmatum fuit, ut si qui tam temerarii, & audaces fuerint, nec Deum timentes, nec homines reverentes; ut Sanctissimo aliqua memorialia exhibere attentaverint, in quibus aliquid falsum contra fratres suos, & præcipue contra Prælatos sit contentum, severissime puniantur. Item ut pænæ à Constitutionibus taxatæ, deficienti in accusatione alicujus Fratris, addatur quod hæc pœna omnino, & indispensabilem infligatur, & quod perpetuo inhabilis sit ad quascunque dignitates, & infamis; nec ei in tribunalibus fides aliqua adhibeatur. Quod tamen volumus intelligendum, quando delictum de quo alium accusat, erit grave, & non aliter. Et Neapoli 1600. ordinatum fuit: quod scribentes libellos famosos, non possint super pœnis sibi inflictis dispensari: nisi per Magistrum Ordinis, vel Capitulum Generale.

(r) *In sententiam excommunicationis &c.* ) Declaramus, excommunicationem esse duplicem: altera est juris, & altera Judicis. Judicis ea est, quæ à Judice, vel Superiore potestatem habente, in scriptis, per verba in Prologo præscripta, trina monitione canonica præmissa, profertur. Juris illa est, quæ in lege scripta, per eadem verba, exprimitur. Quarum numerum, pro notitia fratrum, in quantum eos attingere possunt, volumus adjungere.

*Istæ sunt Excommunicationes à Constitutionibus.*

Quicumque apostataverit. *Cap. de Apostat.*  
2. Litteras Magistri Ordinis, vel Provincialium, seu sigilla eorum falsificaverit, vel falsificatis scienter usus fuerit. *ibidem.*

3. Utcumque Monialium, vel quarumcumque mulierum Fratribus Ordinis, sine licentia Magistri Generalis committatur, curaverit. *Cap. de Domib. conced.*

4. His quæ circa electionem Magistri Ordinis statuta sunt contraire præsumpserit. *Cap. de Electione Magistri Ordinis.*

5. Causam depositionis Magistri vel Provincialium, vel eorum excessum, aut correctionem; vel secretum Capituli, dissensiones Diffinitorum vel Fratrum, unde Ordo possit turbari vel infamari, extraneis publicaverit. *Cap. de Capitulo Generali.*

6. Ad divisionem Ordinis, verbo vel facto laboraverit. *ibidem.*

7. Si Provinciales Diffinitoribus vel Diffinitores Provincialibus, per suas diffinitiones præjudicaverit. *ibidem.*

8. Bullas prædicaverit, aut quæstus extraneos, vel personales fecerit, sine licentia Magistri Ordinis. *Cap. de Prædicat.*

9. Ad inferiorem dignitatem Episcopali, extra Ordinem electo licentiam acceptandi dederit.

*Cod. Regul. Tom. IV.*

rit, vel eandem dignitatem acceptaverit. *Cap. de itinerant.*

10. Gradum Magisterii, nisi quatuor annos in aliqua Universitate legisset, acceptaverit. *Cap. de Student.*

11. Ad legendum pro forma, & ad honorem Magisterii, sine approbatione Capituli promotus. *Constitut. Bonif. IX.*

12. Examinatores, si ignarum linguæ Latinæ, & ad habitum vel professionem Capituli propofuerint. *Cap. de Recipiend. ex Constit. Sixti V.*

13. Prælati, qui non probatæ vitæ pro suscipiendis Sacris Ordinibus, vel non in legitima ætate constitutos miserint, *Capit. de Itinerantib.*

14. Prælati, qui non sufficientes, nec per quinque aut ad minus tres examinatores, aliquos ad prædicationis officium, aut confessiones secularium, & Fratrum excipiendas admiserint. *Cap. de Prædicatoribus.*

15. Prælati, qui ædificium notabile, sine assensu majoris partis Patrum à consiliis, & consilio peritorum, ac licentia Provincialis inchoaverint; vel veteri derelicto, novum inceperint. *Cap. de Domib. conced. ex Constit. Sixti V.*

16. Gratias aliquas, vel pœnarum remissionem, per personas extra Ordinem constitutas, non autem ex Ordine assumptas postulaverint. *Cap. de Graviori Culpa.*

*Sequentes Excommunicationes sunt ex jure communi, quæ possunt officere Regulares.*

1. SI quis violentam manum in Clericum injecerit. *Can. Si quis suadente* 17. q. 4.

2. Sacramenta Eucharistiæ & extremæ unctionis secularibus extra cesum necessitatis, sine licentia ministrare, vel matrimonia solemnizare sine licentia Parochorum præsumpserit. *Clem. de Privileg. Religiosi.*

3. Ad votendum, jurandum, vel promittendum ut sepulturam in Ecclesiis Ordinis eligant, seculares induxerit. *Clem. de pœnit. Cap. Cupientes.*

4. Interdictum S. Sedis violaverit. *Cap. Si Dominici, de pœnit. & remiss.*

5. Pro ingressu Religionis aliquid dederit, vel receperit. *Cap. Sanè. de Simonia.*

6. Partem adversam in materia de peccato Originali Beatæ Virginis Mariæ hæresis, aut peccati mortalis damnaverit. *Cap. Grave nimis, extra: de Reliq.*

7. Miracula falsa vel incerta, aut prochetias in Bibliis non contentas, in Sermonibus publice prædicaverit; vel Episcopis, & statui eorum detraxerit. *Concil. Lateranense, sess. 11.*

8. Eos qui rogati vel induciti, ut aliquem in Monasteriis eligerent, noluerunt eligere, spoliaverit, vel persecutus fuerit. *Cap. Sciant cuncti, de elect. in 6.*

9. Decimas ad se non spectantes, appropriare sibi præsumpserit. *Cap. Religiosi, de Decimis.*

10. Ut Leges, vel Physicam audiat, extra claustra exierit. *Cap. Ut periculosa. Ne Clerici in 6.*

11. Nova loca vel domos ad habitandum receperit, vel recepta mutaverit, aut transtulerit sine licentia. *Cap. Unicus, de excessib. in 6.*

12. Ad curias Principum absque licentia, ut Prælati suis vel Monasterio damnum inferat, accesserit. *Clement. Ne in agro. De statu Monach.*

13. Libros interdictos legerit, aut detinuerit. *Bulla Cœna Domini.*

14. Religionis habitum professus, temere dimiserit. *Capit. Ut perniciosa. Ne Clerici in 6.*

15. Matrimonium contraxerit. *6. Clem. de Con-sanguin.*



16. A solutione decimarum auditores suos re-  
traxerit. *Cap. Cupientes, de pœnis.*

17. Interdictum à matrice Ecclesia servatum,  
non servaverit. *Cap. Et frequentibus, de sen-  
tentia excommunicat.*

18. Absque licentia Sedis Apostolicæ ad alium  
Ordinem, excepto Carthusiano, transierit. *Cap.  
Viam ambitiosæ, extra, de Regularibus.*

19. Intra septa Monasterii arma tenuerit. *Cap.  
Ne in agro, de statu Monach.*

20. Libros sine licentia Ordinarii vel Inquisi-  
toris impresserit. *Concil. Lateranen.*

21. Bona Ecclesiastica quoquomodo alienave-  
rit, vel ultra triennium locaverit. *Paulus II. in  
Extrem. Ambitosæ.*

22. A cælibus in Bulla Cœnæ Domini absolve-  
rit. *In eadem Bulla.*

23. Licere Sacerdoti existenti in peccato mor-  
tali, non præmissa confessione, habita tamen co-  
pia Confessoris, celebrare defenderit. *Concil.  
Trident. sess. 13. cap. 11.*

24. Monasteria Monialium sine licentia ingres-  
sus fuerit. *Idem sess. 25. cap. 5. Et absque ne-  
cessitate. Gregor. XIII.*

25. Mulierem ad suscipiendum habitum Reli-  
gionis, vel emittendam professionem coegerit:  
vel alicui ex his actibus consenserit, vel eum sua  
præsentia autorizaverit. *Ibidem cap. 18.*

26. Ne aliqua mulier Religionis habitum su-  
scipiat, vel professionem emittat, sine iusta cau-  
sa impedimentum præbuerit. *Ibidem, cap. 16.*

27. A. Novitiis & Novitiabus, vel curatoribus  
eorum, aliquid præter victum & vestitum, an-  
te professionem si Superior Monasterii receperit.  
*Ibidem, cap. 16.*

28. Lector, si non præmissa professione Fi-  
dei, Theologiam, vel Philosophiam, aut Artes  
liberales legerit. *Pius IV. Cap. In sacrosancta.*

29. In Decreta Concilii Tridentini, sine licen-  
tia Apostolica commentarios, glossas, vel anno-  
tationes edere præsumpserit. *Pius IV. Cap. Bene-  
dictus.*

30. Mulieres intra Conventum introduxerit  
aut admiserit. *Pius IV. Cap. Regularium.*

31. Per litteras, aut internuncios conficere,  
vel absolutionem eodem modo recipere, si quis  
docuerit. *Clem. VIII.*

32. Officiales sancti Officii in personis vel re-  
bus offenderit. *Pius IV. Cap. Si de protegendis.*

33. Inquisitores, & eorum Officiales, qui odii  
vel amoris, lucri aut commodi temporalis cau-  
sa, contra conscientiam omiserint procedere: aut  
falso contra aliquem de hæretica pravitate pro-  
cesserint. *Cap. Multorum, de hæreticis.*

## VI.

(S) SI quis autem tale quid extra Mo-  
nasterium commiserit, Frater qui  
cum eo est studeat ejus excessum Prælati  
quantocius corrigendum intimare. Cor-  
rectus verò ad locum in quo tale quid  
commisit, ulterius non redeat: nisi ita  
religiosè conversatus fuerit, quod per  
Diffinitores Generalis, vel Provincialis  
Capituli illuc reversurus judicetur. Si  
vero hujusmodi peccatum occultum fue-  
rit, disquisitione secreta secundum tem-  
pus, & personam, condignam agat pœ-  
nitentiam.

(t) Si quis autem tale quid extra Monasteri-  
um commiserit. ) Declaramus, quòd licet in Ca-  
pitulo Burdigale 1324. fuerit declaratum, hanc  
culpam ad lapsum carnis juxta Constitutionis se-

riem tantummodo debere referri: tamen etiam  
referenda est ad alia crimina, quæ fuerunt præ-  
missa; scilicet furtum, percussione gravem,  
seu lethalem &c. Hæc enim crimina cum scan-  
dalum generent extra Monasterium commissa,  
indigent remedio in præsentem adhibito.

Item volumus, ut Superiores meminerint  
Decretorum Concilii Tridentini pro delinquen-  
tibus extra claustra. Primum ita habet *sess. 6. cap.  
3. Nemo secularis, Clericus, vel Regularis, ex-  
tra Monasterium degens, etiam sui Ordinis pri-  
vilegii prætextu, tutus censeatur: quominus si  
deliquerit ab Ordinario loci tanquam super hoc  
à Sede Apost. delegato, secundum canonicas san-  
ctiones visitari, puniri & corrigi valeat.* Alte-  
rum est *sess. 25. cap. 14. hujusmodi. Regula-  
ris non subditus Episcopo, qui inter claustra Mo-  
nasterii degit, & extra ea ita notorie delique-  
rit, ut populo scandalo sit: Episcopo instante à  
suo Superiore intra tempus ab Episcopo præfigen-  
dum severe puniatur, ac de punitione Episcopum  
certiorem reddat. Sin minus, à suo Superiore  
officio privetur, & delinquens ab Episcopo puni-  
ri possit.* Pro cujus decreti executione, Clemens  
VIII. hoc addidit. *Ceterum si Superior in delin-  
quentem Fratrem ut supra non animaverit, quin-  
imo si illum impunitum ad alia suorum Ordinum  
loca extra Episcopi Diocesim transmiserit: volumus  
motu proprio, & autoritate Apostolica decer-  
nimus, ut Superior instante Episcopo, infra ter-  
minum ab Episcopo præfigendum, sub penis indi-  
gnationis nostræ, privationis officiorum & digni-  
tatum, ac inhabilitationis ad illa & alia, &  
privationis vocis activæ & passivæ, (ad quæ non  
nisi per Sedem Apostolicam restitui possit) ipso fa-  
cto incurrendis; ipsum Regularem delinquentem  
à loco ad quem transmissus fuit revocare, & in  
quo deliquit constituere teneatur. Quod si hoc fa-  
cere prætermiserit, statuimus, ut Ordinarius loci  
ad quem delinquens transmissus fuerit, super  
præmissis ab Ordinario loci in quo deliquit requi-  
situs, vel alias de illius delicto informatus, tan-  
quam Sedis Apost. delegatus prædictum Concilii  
decretum omnino exequi, & in delinquentem Re-  
gularem severe animadvertere possit & debeat.*

## VII.

(t) SI quis autem de mala familiaritate  
notabiliter suspectus fuerit, & post  
admonitionem à Prælati, de consilio di-  
cretorum Fratrum coram eisdem pluries  
sibi factam se non correxisse deprehensus  
fuerit: præcipiatur ei in virtute sanctæ  
obedientiæ per Prælatum, coram illis, co-  
ram quibus monitus fuerat, si præsen-  
tes fuerint; vel coram aliis decretis de  
consilio eorundem, ut à tali familiaritate  
desistat. Quod si tale præceptum trans-  
gressus fuerit, postquam hoc legitime  
constiterit, tanquam reus & convictus  
de suspecto crimine habeatur.

(t) Si quis de mala familiaritate. ) Declara-  
mus, quòd Religiosi debent evitare consortium  
& familiaritatem mulierum: tum propter pe-  
riculum, quia multi Episcopi & Clerici post  
magnalia & signa miranda sanctitatis naufragari  
noscuntur propter mulierum consortia, ut dicit  
Sanctus Augustinus; tum propter infamiam,  
quam ex tali familiaritate incurrunt, & bonum  
nomen amittunt quod debet magis conservari,  
quam

quam divitiarum: tum tertio propter notam talis exempli; quia cum viri perfecti inhærent prædictis familiaritatibus, dant occasionem minoribus idem faciendi, & cum sint infirmi, de facili in peccatum corruunt. Unde nec propter utilitatem temporalem, nec propter desiderium salutis debent Religiosi cum mulieribus conversationem aut familiaritatem habere, sicut dicit Sanctus Augustinus: præcipue quando mulieres sunt innuptæ, & maxime juvenes, vel quæ continentiam servant, sub specie vel habitu sanctitatis; de quibus Sanctus Hieronymus admonerat: *Feminam, quam videris bene conversantem, mente dilige, scilicet secundum Deum, non corporali conversatione, ut habetur dist. 32. cap. Hospitium.*

Item denunciamus, in Capitulo Romano 1566. & 1571. & Barcinonæ 1574. sub pœna gravioris culpæ per unum mensem pro prima vice, pro aliis vero vicibus ad arbitrium Prælati: ac deinde Romæ 1580. & 1583. sub eadem pœna gravioris culpæ; atque deinde Venetiis 1592. sub pœna privationis omnium graduum, dignitatum, sive officiorum, vocis activæ & passivæ, aut carceris per semestre respective, præceptum, atque etiam à Sacra Congregatione Regularium ex ordine expresso Sixti V. ordinatum fuisse: ne aliquis, exceptis Superioribus, Visitatoribus, & Confessoribus ordinariis, & extraordinariis, in his dumtaxat, sine quibus officium suum exercere non possunt, extra casum necessitatis, sine debita licentia audeat ad Monasteria Monialium cujuscumque Ordinis accedere: nec cum iisdem loqui, aut litteras, nuncios, vel munera illis mittere, vel ab eis accipere; etiam si pro sacro faciendo, conciones habendas, ad præfata Monasteria missus fuerit. Admonentes A. A. R. R. P. P. Provinciales, ut non nisi personas ætate graves, maturas, ac discretas, religiosisque moribus ornatas, in Monialium Confessores præfiant, ut earum saluti spirituali, & profectui in via Dei consulerent possint.

## VIII.

(u) **SI** quis per conjurationem, vel conspiracyonem, vel malitiosam concordiam adversus Priores, vel Prælatos suos manifeste se erexerint, superscripto modo pœniteant: & de cætero in omni vita sua extremum locum sui Ordinis teneant; & vocem in Capitulo non habeant. Neque eis aliqua committatur obedientia, nisi per Magistrum Ordinis, vel Diffinitores Capituli Generalis, vel Provincialis fuerint restituti.

(u) *Si quis per conjurationem &c.* Declaramus, ad tollendas rebelliones, & conspiracyones, ordinatum fuisse in Capitulo Romano 1525. ut nullus ad Superiores recurrat contra Provinciales pro ejus amorione impetrandas, aut pro impetrando Visitatore; nisi habeat commissionem à majori parte Priorum illius Provinciæ: oppositum autem faciens ipso facto pœnæ gravioris culpæ sit subiectus. Et in Capitulo Lugdunensi 1536. & Romano 1539. dicitur: Declarantes, quod subscriptiones litterarum, & consensus Fratrum non possunt fieri à Conventibus, nisi Patres, & Fratres subscribentes, & consentientes sint insimul congregati in aliquo uno loco: & hoc idem dicimus de Patribus Provinciæ subscribentibus se, vel consentienti-

bus in aliquibus litteris. Et quod videantur, & sciantur, quæ in litteris continentur, & scribuntur, & hoc sub pœna gravioris culpæ, declarantes, & determinantes, omnia quæ in contrarium fient, esse irrita, & invalida, & nullius roboris, vel momenti. Admonentur etiam Fratres in Capitulo Romano 1558. ut servant hanc ordinationem, cum jam constitutio facta sit. Item declaramus in Capitulo Valentino 1596. sic haberi: Ordinamus, & inviolabiliter observandum præcipimus, ut Fratres ad pœnam gravioris culpæ condemnati, in Conventibus parvis minimè assignentur, sed in magnis, ubi suas pœnitentias humiliter adimplere, & melius Observantiæ Regulari operam dare possint. Ordinamus etiam, ut in posterum defunctorum Fratrum processus comburantur, dummodo sine præjudicio justitiæ, eorum qui vita superstites sunt, fieri possit. Quod etiam antea Romæ 1596. fuerat ordinatum. Viventium autem processus, nulla ratione permaneant apud Fratres, sub pœnis gravioris culpæ, tam positivis, quam privativis, sed apud R. R. P. P. Provinciales successive tuto servantur. Romæ 1580.

## IX.

(x) **SI** qui tamen Fratres non malitiose, sed in veritate adversus Prælatum suum aliquid habuerint, quod tolerari nec debeat, nec deceat: prius eum inter se cum omni humilitate, & charitate de sua correctione admonent. Quod si frequenter admonitus se corrigere neglexerit, aut contempserit; Priori Provinciali significent, vel Visitatoribus: ut cum ad eandem domum visitandam venerint, causa manifeste judicetur; & Diffinitoribus Capituli Generalis, vel Provincialis significetur. Aliter Prælatos suos subditi infamare non præsumant. Statuimus, quod si quis nefandum crimen concubitus contra naturam, homicidii, vel propinati (etiam effectu non subsecuto) veneni commiserit: perpetuo carceri sit addictus; à quo nec per Capitulum Generale possit ante annos viginti liberari. Et nihilominus pœnis aliis puniatur, secundum Prælati discretionem.

(x) *Si qui tamen Fratres non malitiose &c.* Declaramus, quod cum correctio fraterna sit actus charitatis, quæ se extendit ad æquales, & ad superiores: tenentur subditi ex præcepto charitatis corrigere Prælatum, & admonere, si in eo graves defectus animadverterint; etiam si illi defectus non in damnum boni communis, sed tantum in detrimentum Prælati, tanquam privatæ personæ, cederent. Quod si etiam Communitati, propter illos defectus Prælatus noceret; non tantum ex charitate, verum etiam ex justitia, tenentur singuli, etiam cum periculo admittendæ ejus gratiæ, illum corrigere. Correctione tamen, ut docet Sanctus Thomas 4. sent. dist. 19. humili cum mansuetudine, & reverentia, non autem correctione punitiva, aut increpativa, juxta illud: *Seniorem non increpaveris.* 1. Timoth. 5. Ad hanc correctionem cum humilitate, & charitate factam, si mores inordinatos, & publice scandalosos non emendaverit Prælatus: debent subditi Provinciali significare, quemadmodum Constitutio disponit.

## CAPUT XIX.

## De Gravissima Culpa.

## I.

(a) **G**ravissima culpa est, incorrigibilitas illius, qui nec culpas timet admittere, & poenas recusat ferre: vel ex earum saepius repetita inflictione, iudicio discretorum cognoscitur non proficere. Talis de consilio discretorum, carcerali custodiæ mancipetur, & ibidem secundum exigentiam culparum, juxta discretionem Prælati, jejuniis, & abstinentiis puniatur, vel secundum Regulam Sancti Patris nostri Augustini, si magis expediens judicatur, (b) per Magistrum Ordinis, vel Capitulum Generale aut Provinciale, exutus habitu Ordinis, de Ordine nostro expellatur. Quod tamen mature fiat, ita ut appareant gesta cum toto processu, & sententia in scriptis, & cum debitis subscriptionibus, & sigillis, & hoc si talis sani capitis, & integri sensus usque ad illam horam extitisse cognoscitur: Nullus autem cum habitu Ordinis, ob quamcumque causam criminalem à sua Provincia eiici possit, simpliciter, vel ad tempus: nisi à Magistro Ordinis, vel Generali Capitulo. (c) Si aliqui sunt, qui iudicio discretorum sine gravi periculo, vel scandalo in communi tolerari non possint: in carcerem recludantur.

(a) *Gravissima culpa est.* Declaramus, hoc Capitulum de Gravissima Culpa fuisse antiquitus confirmatum Parisiis 1276. postea vero Avenione 1561. ex duobus Capitulis immediate præcedentibus, per modum inchoationis, & confirmationis, quod aliqua fuisse innovata istis verbis: Confirmamus, quod in distinct. i. cap. 19. de gravissima culpa, ubi dicitur: Gravissima culpa est incorrigibilitas illius, qui nec culpas timet admittere, & poenas recusat ferre, addatur: Vel ex earum saepius repetita inflictione, iudicio discretorum, cognoscitur non proficere. Et infra, ubi dicitur: Si magis expediens judicabitur, addatur: Per Magistrum Ordinis, vel Capitulum Generale, aut Provinciale. Et post verbum, expellatur, hæc addantur. Quod tamen mature fiat, ita ut appareant gesta cum processu, & sententia in scriptis, & cum debitis subscriptionibus, & sigillis. Et hoc si talis sani capitis, & integri sensus, usque ad illam horam extitisse cognoscitur. Et hæc habent tria Capitula.

(b) *Per Magistrum Ordinis, vel Capitulum Generale, aut Provinciale exutus.* Declaramus, in antiquioribus Capitalis Parisiensi 1279. Florentino 280. Parisiensi 1286. Argentini 1307. Cæsar-Augustano 309. & apud Montem Pefulan. 1316. ordinatum, & confirmatum fuisse, quod nullus Prior Conventualis, nec Supprior, nec Vicarius potest aliquem Fratrem in Ordine nostro professum, habitu exuere, & ab eodem Ordine licentiaré, vel alias ex Ordine expellere, sine licentia Generalis Magistri, vel Prioris

Provincialis; sicut etiam per Joannem XXII. in quadam Bulla declaratum fuit, cum hac pœna adjecta: ut illi, qui contra hoc fecerint, sint ipso facto à suis officiis absoluti. Sed postea per hanc Constitutionem Avenione factam, etiam Provinciales prohibentur, soli absque Provinciali Capitulo aliquem habitu exuere, aut ex Ordine expellere: neque hoc est contra prædictam Joannis XXII. determinationem. Nam in ea dicitur, quod Provincialis possit habitu aliquem exuere &c. non tamen dicitur, quod solus, & sine consilio hoc possit facere: nova autem Constitutio hoc decernit, quod faciat id quidem Prior Provincialis, sed non sine Provinciali Capitulo. Itaque Vicarius Provinciæ, non potest aliquem Fratrem habitu exuere, aut ex Ordine expellere.

Quod autem attinet ad licentiam ad alios Ordines transeundi, sic statutum fuit Bononiæ 1615. Quoniam vero interdum ex Ordine nostro ad alios Ordines, non matura inspectione præmissa, ab aliquibus nostris Fratribus facilem transitum fieri comperimus, unde post brevem lapsum temporis eosdem ad Ordinem nostrum redire procurantes, & instantissime petentes, ex fraterna pietate, & charitate recipere compellimur: idcirco decernimus, & declaramus; ut si quis Fratrum nostrorum ex nostro Ordine in alium commigraverit, & denuo eo relicto ad Ordinem nostrum rediens receptus fuerit, à tempore quo revertitur ad nostrum Ordinem, numerus annorum, & antiquitas ratione loci illi computentur.

Item declaramus, quod non est etiam laudabile dimittere habitum unius Religionis, & transire ad aliam Religionem, nisi propter magnam utilitatem, vel necessitatem; tum quia plerumque scandalizantur illi Religiosi, qui relinquuntur; tum etiam quia facilius proficit aliquis in Religione, in qua consuevit, quam in alia, in qua non consuevit, cæteris paribus. Unde in collationibus Patrum Abbas Nestorius dicit: *Unicuique utile est, ut secundum propositum quod elegit, summo studio, ac diligentia ad operis incepti perfectionem pervenire festinet; & nequaquam à sua quam elegit professione discedat.* Et postea rationem assignat, dicens: *Impossibile namque est, unum, eundemque hominem, simul universis fulciri virtutibus; quas si quis voluerit simul attentare, in istud incidere eum necesse est; ut dum omnem sequitur, nullam integre consequatur. Diverse enim Religiones præminent, secundum diversa virtutum opera.*

(c) *Si aliqui sunt, qui iudicio discretorum, sine gravi periculo, vel scandalo in communi tolerari non possint, in carcerem recludantur.* Declaramus, quod cum utilitas communis sit proponenda utilitati unius: quando aliquis est ita scandalosus, & periculosus, quod ejus conversatio nocet Communitati, nec alii possunt ejus mores pravos & perversos ferre: & porius eligerent è Monasterio exire, quam cum tali scandaloso stare, debet talis ab aliis separari, & in carcerem recludi, ut habetur 25. quæst. 4. cap. *Refecanda*. Si vero talis esset incorrigibilis, & non posset aperte corrigi, capi, vel detineri, & recusaret poenitentias pro delictis suis impositas facere: posset modo supradicto exui habitu, & ab Ordine expelli; si tamen esset integri sensus. Ille autem, qui propter culpam suam expellitur à Prælato, adhuc est suus subditus; sicut ovis morbida, licet sit expulsa à grege, adhuc est pastoris. Unde taliter expulsus, non



non est absolutus ab obedientia Prælati, quousque transferit ad aliam Religionem, & in ea fecerit professionem: sicut ponit Magister Humbertus super Regulam. Et est advertendum, quod totum istud Capitulum de *Gravissima Culpa*, fuit confirmatum in Capitulo Parisiensi 1276.

## CAPUT XX.

## De Apostatis.

## I.

(a) **Q**uicumque apostataverit, ipso facto sit excommunicatus; quam sententiam ferimus ex nunc præsentis statuto. (b) Si vero misertus sui redierit, depositis in claustris vestibus, nudus cum virgis in Capitulum veniat, & prostratus culpam suam dicat, & humiliatus veniam petat: (c) & quandiu Prælati placuerit, pœna gravioris culpæ subiacebit, & in Capitulo nudus se præsentabit, semel in singulis septimanis.

(a) *Quicumque apostataverit &c.* Declaramus, quod ille, qui per se Ordinem egreditur, & subito ac statim revertitur, non est iudicandus Apostata, nec incidit in pœnas Constitutionum. Quia tamen actum apostasiæ commisit, debet ab excommunicatione absolvi, & ad cautelam ad gratias Ordinis restitui: sicut fuit declaratum Januæ 1305. & in multis aliis Capitulis. Declarantes, quod quilibet Religiosus tenetur deferre patenter habitum suæ Religionis, cum procedit in publicum: quicumque autem temere habitum suæ Religionis dimiserit, peccat mortaliter, & est excommunicatus de jure. C. *Ut periculosa*, tit. de *Apostat.*

Item declaramus, quod ad refrenandum damnosum Apostatarum discursum, Magister Ordinis de Diffinitorum consilio, & assensu in Capitulo Parisiensi 1269. potestatem concessit Prioribus Conventualibus, & Provincialibus, ac eorum Vicariis: ut apostatas, quos infra terminos suos invenerint undecumque venientes, possint excommunicare, capere, ligare, & aliâs subijcere Ordinis disciplinæ. Insuper concessit, & commisit eisdem, ut si aliquos ceperint, vel incarceraverint, ipsos ab excommunicatione possint absolvere. Et in Capitulo apud Montem Pessulanum 1294. sic dicitur: Admonemus universos Priores Provinciales, & Conventuales, & eorum Vicarios: ut juxta ordinationem Capituli Florentini celebrati anno Dom. 1281. diligentius laborent pro apostatis reducendis; ex quorum præsentia & discursu, Conventibus, & Fratribus scandalum generatur, ubicumque infra suos terminos poterint eos invenire. Quod si facere non poterint, sententia excommunicationis innodatos publicè denunciari procurent; ut sic saltem ab aliis evitentur. Volumus autem, quod expensæ, quæ in ipsorum captione, vel detentione fient, à Provinciis, vel Conventibus, de quibus fuerint, plenè, & promptè ipsis capientibus, vel detinentibus refundantur: quod idem fuit ordinatum Palentiae 1291.

Item declaramus in Capitulo Salmanticæ 1551. ordinatum fuisse Prælati, ut in recipiendis apostatis, & iis qui per Brevia Apostolica plures annos habitum dimiserunt, quam dili-

gentissimè attendant, ne totam massam modico fermento corrumpant: & caveant ne ex nimia erga paucos misericordia, crudeles in Communitatem inveniantur. Ubi etiam declaratur, quod illi, qui ad Civitates suspectas de hæresi acceperunt, vel posthac accedent, nullo modo, nisi tanquam apostatæ recipiantur, & declaramus, in Capitulo Bononiensi 1564. sic haberi: Admonemus RR. Provinciales, ut si quando Fratres apostatas, qui quondam scandalose vixerint, receperint ad ordinem, eos ad illos Conventus mittant, in quorum Terris tam manifesta non sit eorum infamia; etiamsi aliorum Conventuum sint filii, quorum filiationem non intelligantur amisisse. Et postea in Capitulo Romano 1571. sic dicitur: Concedimus omnibus Provincialibus, ac etiam Prioribus Conventualibus, ut juxta tenorem nostrarum Constitutionum possint recipere apostatas ad eos revertentes, etiam post decennium in apostasia elapsum: non obstante quacumque ordinatione, per quam aliter ordinetur.

(b) *Si vero misertus sui redierit.* Declaramus, quod quidam prætereundum possent se non fuisse apostatas, quia de licentia Sedis Apostolicæ habitum dimiserunt, & propterea in Capitulo Romano 1553. pro his, & ibidem 1558. pro his, & aliis ordinatum fuit: quod qui de licentia Sedis Apostolicæ, nostræ Religionis habitum dimiserunt: nullatenus de cætero recipiantur, nisi processu super eorum indulto facto, diligenter examinato. Et si vera & rationabilis causa assignata & probata fuisse inveniat, absque pœnitentia recipiantur: si autem causa rationabilis, & vera non inveniat, & consequenter Breve subreptitium, nonnisi ut apostatæ recipiantur. Ita tamen, quod qui per quatuor annos extra Ordinem, quovis modo sine habitu steterint, non recipiantur, nisi de speciali licentia Magistri Ordinis. Addentes, quod hujusmodi sine habitu ad Ordinem revertentes, etiamsi non ut apostatæ, sed ut legitimè dispensati recipiantur; non tamen possint ante decem annos à sua receptione promoveri ad ullam Ordinis dignitatem. Quod autem attinet ad auctoritatem dispensandi Fratres, ut maneant extra Claustrum, servandum est Decretum Clementis VIII. quo constituit, ne de cætero, nisi in gravissima causa à Sede Apostolica probanda, facultates manendi extra Claustra concedi possint.

(c) *Et quandiu Prælati placuerit &c.* Declaramus, quod hoc intelligitur propter solam apostasiam: pro aliis autem delictis, quæ in ipsa apostasia, vel in Ordine cum habitu inventus fuerit commisisse, secundum rigorem Ordinis & Constitutionum, pœna debita puniatur, sicut declaratum fuit apud Bisuntinum 1353.

Item apud Narbonam 1354. sic dicitur: Declaramus, quod committens crimina, seu peccata in ipsa apostasia: puta, furta, adulteria, & hujusmodi, propter talia sic commissa, pari pœna debet plecti, & puniri, ac si dicta crimina in Ordine existens perpetrasset.

Item in Capitulo apud Lugdunum 1318. sic dicitur: Cum apostasia culpam non minuat, sed potius augeat, & pro quibusdam criminibus à Fratribus commissis, circumscripta omni apostasia, eis debeatur custodia carceralis: volumus, & ordinamus, quod si aliquis Frater ante apostasiam aliquod tale crimen commiserit, de quo non satisfecit, vel etiam in ipsa apostasia: si po-

postea ad Ordinem etiam sponte redierit, carcerali custodiæ mancipetur.

## I I.

**I**nfra hoc tempus pœnitentiæ, ubique in Conventu novissimus erit: & duobus diebus in qualibet septimana per annum in pane, & aqua jejunabit. Et peracta pœnitentia, (d) ad priorem locum non redeat, nisi per Magistrum Ordinis, vel per Diffinitores Capituli Generalis, vel Provincialis cum eo fuerit dispensatum. Quæ dispensatio non fiat per eisdem ante tres annos ad minus; ita tamen, quod anni, quibus fuerit in apostasia, non computentur ei, quoad locum, (e) sed sit sub illis omnibus, qui habent plures annos in Ordine, quam ipse habuerit quando exivit. Quod si secundo fugerit, & iterum redierit: supradicto modo pœniteat, & priori anno secundus annus addatur. Si tertio tertius, si quarto quartus.

(d) *Ad priorem locum non redeat.* ) Declaramus, quod Fratres, qui apostataverint, debent tenere infimum locum infra omnes Fratres Clericos, si sint Clerici; & infra omnes Conversos, si sint Conversi: & postquam compleverint in Conventu pœnitentiam, adhuc tenebunt ultimum locum ubique, & redire seu restitui non possunt ad illum locum, quem prius tenebant, quando recesserunt, sine licentia, & dispensatione Magistri Ordinis, vel Diffinitorum Capituli Generalis, vel Provincialis. Res autem, & bona ipsorum apostatarum debent ad Conventus illos, in quibus erant assignati, tempore quo apostataverunt liberè pertinere: sicut fuit declaratum in Capitulo apud Traiectum 1330. sed postea in Capitulo Florentino 1414. Et apud Argentinam 1417. fuit facta Constitutio, quod huiusmodi bona dividerentur inter Conventum originalem, & inter Conventum in quo erat assignatus.

(e) *Sed sit sub illis omnibus, qui habent plures annos in Ordine, quam ipse habuerit quando exivit.* ) Declaramus, quod ex ista clausula manifestè apparet, quod Fratres debent tenere loca sua in Choro & alibi, secundum quod habent plures, vel pauciores annos in Ordine à professione sua: seu secundum quod post professionem tacitam, vel expressam, diutius habitum nostri Ordinis portaverunt; nisi sint Magistri in Theologia, vel Baccalarei, qui sententias legant, vel legerint in aliqua Universitate. Et ita illi, qui post apostasiam recipiuntur ad Ordinem, & fuerunt dispensati per Magistrum Ordinis, vel per Diffinitores Capituli Generalis, vel Provincialis, quod de infimo loco reducantur ad priorem locum, quem tenebant, quando habitum dimiserunt: nihilominus habebunt seu tenebunt locum infra omnes illos, qui plures annos habent à professione sua, quam haberent ipsi, quando ab Ordine recesserunt: qui videlicet post professionem suam diutius habitum nostræ Religionis portaverunt, quam ipsi apostatæ. Unde non solum non computantur apostatis anni, quibus fuerunt in apostasia quoad locum, sed etiam anni, quibus fuerunt in pœnitentia pro apostasia, quousque restituantur ad pristinum locum.

Item declaramus in Capitulo Romano 1546. ita disponi: Confirmamus, quod Fratribus exemptis, vel eis, qui quomodolibet extra Ordinem (id est extra obedientiam Ordinis) manserunt, non numeretur, nec computetur tempus illud inter alios annos suæ professionis, si eos postea ad Ordinem reverti contingat. Quod prius fuerat declaratum Romæ 1542. Quapropter quando isti postea gratiæ Ordinis restituuntur, non intelligitur propterea tempus illud eis numerari, vel computari, inter alios annos suæ professionis.

## I I I.

**O**mnibus autem Fratribus, pro huiusmodi pœnitentibus, humiliter in Capitulo deprecantibus, Prælatus cum eorum pœnitentiam perspexerit, (f) eis indulgere, vel remittere poterit: secundum quod suæ discretioni visum fuerit, vel placitum. Apostatæ unius Conventus, non recipiantur à Priore alterius Conventus ad Ordinem in eadem Provincia, sine licentia Prioris Provincialis: nec apostatæ aliarum Provinciarum, sine licentia Magistri Ordinis speciali. Si quis in apostasia ordinatus fuerit, vel post excommunicationem Divina celebrare præsumpserit in ea, executione officii perpetuo carebit: nisi fortè postea ita religiose conversatus fuerit, ut cum eo (g) auctoritate Sedis Apostolicæ dispensetur. (h) Qui autem in apostasia, sed tamen sine legitima Ordinis licentia ordinatus fuerit, ipso facto sit addictus carceri, ad minus per quatuor menses; ibidem secundum arbitrium Prælati, pœnis aliis puniendus. Et postmodum non permittatur exequi Ordines ipsos sine licentia Magistri Ordinis.

(f) *Eis indulgere, vel remittere poterit.* ) Declaramus, quod in pœnitentia, quæ debetur apostatis pro apostasia, poterit Prælatus indulgere quoad pœnas positivas gravioris culpæ, & quoad jejunia in qualibet septimana duobus diebus facienda, de quibus supra facta est mentio: non autem quoad pœnas privativas, de quibus infra dicitur: ut etiam supra declaratum est in *Capit. de Graviori Culpa*.

(g) *Auctoritate Sedis Apostolicæ dispensetur* ) Declaramus, quod Magister Ordinis, & Priores Provinciales, à suspensione quam quis Frater incurrit suscipiendo Ordines in apostasia, vel celebrando Divina post excommunicationem, possunt auctoritate Apostolica dispensare: sicut patet in *Bulla aurea Sixti*, & in multis aliis Privilegiis Magistro Ordinis concessis.

(h) *Qui autem in apostasia.* ) Declaramus, Constitutionem hanc fuisse delumptam ex Capitulo Vallisoletano 1523. ex eo, quod (ut in eodem Capitulo dicitur) habuit tria Capitula.

## I V.

(i) **Q**ui verò semel apostataverit, vel de lapsu carnis manifeste convictus fuerit, vel carceri sententialiter, & legi-

legitimè mancipatus: de cætero non prædicet, nec audiat confessiones, nec ad aliquam electionem Ordinis, nec ad aliquem tractatum eorum, quæ mittenda sunt ad Generale, vel Provinciale Capitulum admittatur; nisi per Diffinitores Capituli Generalis, vel Provincialis, vel per Magistrum Ordinis fuerit restitutus. (k) Quæ restitutio non fiat per eosdem, ante tres annos ad minus. Et si fuerit Prædicator Generalis, dicto officio sit privatus: nec possit habere officium Prioratus, vel Supprioratus, vel Vicariatus, vel Lectoratus: nec possit fieri Diffinitor Capituli Generalis, vel Provincialis, nec Prædicator Generalis, nec Magistri Ordinis Elector, sine licentia Magistri Ordinis speciali. (l) Quicumque litteras Magistri Ordinis, vel Prioris Provincialis, seu sigilla eorum falsificaverit, vel eis scienter usus fuerit, sententiam eandem incurrat excommunicationis latam, & privationum dictarum ipso facto.

(i) *Qui vero semel apostataverit, vel de lapsu carnis manifeste convictus fuerit.* Declaramus, quod quicumque judicialiter de lapsu carnis, vel de furto convictus fuerit, aut carceri mancipatus: talis sit in perpetuum omni voce privatus, & officio Prioratus, Supprioratus, Lectoratus, & Prædicationis, & Confessionis,

nec possit ad prædicta restitui. Nisi per Magistrum Ordinis, vel Capitulum Generale. Rothomagi 1320.

Item in Capitulo apud Barcinonam 349. sic dicitur: Quicumque de lapsu carnis manifestè convictus fuerit, de cætero non prædicet, nec audiat confessiones, nec ad aliquam electionem Ordinis admittatur: nec ante triennium ullo modo ad prædicta possit restitui per quemcumque. Et si restituatur, restitutio nullo modo valeat ante triennium.

(k) *Quæ restitutio non fiat per eosdem ante tres annos.* Declaramus, quod in Capitulo apud Argentinam celebrato 1358. prædicta verba sic fuerunt glossata: Non fiat, id est, fieri non possit per Diffinitores Generales, vel Provincialis Capituli ante tres annos: & sic restitutus nullo modo valeat ante triennium.

Item declaramus, in Capitulo Romano 1569. sic haberi: Ordinamus, & omnino observari volumus, ut apostatæ, qui posthac ad Ordinem recipiuntur, etiam si ad omnes Ordinis gratias admittantur, nunquam tamen ante 20. annos ad Prælaturæ officium possint assumi, & si secus factum fuerit, irritum omnino esse decernimus.

(l) *Quicumque litteras Magistri Ordinis &c.* Declaramus, has pœnas additas fuisse illis, quæ in Capitulo de *Graviori Culpa* taxantur, de quibus superius loco citato dictum est.

## SECUNDA DISTINCTIO.

### CAPUT I.

*De Domibus concedendis, & construendis.*

#### CONSTITUTIO I.

(a) **N**ulla Domus concedatur, (b) nisi à Priore Provinciali, & à Diffinitoribus Capituli Provincialis fuerit postulata: nec concessa ponatur, (c) nec posita transferatur; nisi ubi prædicti viderint expedire. (d) Fratres autem novis domibus deputati, Conventibus de quibus assumuntur, & ipsi Conventus eidem quantum ad suffragia, sicut suis Conventualibus mutuo teneantur: quousque Conventus ibidem fuerit assignatus. Quantum vero ad omnia alia, dicti Fratres ad Domos prædictas simpliciter pertinebunt.

(a) *Nulla Domus concedatur.* Declaramus, quod de jure antiquo communi, Religiosi Mendicantes non poterant novas Domos, vel nova loca ad habitandum recipere, nec recepta mutare, alienare, aut relinquere; sine speciali licentia Sedis Apostolicæ, plene atque expresse, de prohibitione hujusmodi mentionem faciente: alias fuissent excommunicati, ut habetur de *excessibus Prælatorum*, cap. unico, lib. 6. & in Clement. *Capientes de penis*. Cæterum post diversa Privilegia hac in parte Ordini nostro concessa, Concilium Tridentinum decrevit sufficere

*Cod. Regul. Tom. 17.*

solius loci Ordinarii licentiam, ad hoc, ut Conventus & loca nova Mendicantes recipiant; dum statuit istud sess. 25. de Regular. cap. 3. De cætero similia loca non erigantur, sine Episcopi in cujus Diocesi erigenda sunt, licentia prius obtenta, & ideo ab omnibus Concilio Tridentino standum est.

Item denunciamus, quod Clemens VIII. in quadam sua Constitutione motu proprio præcepit, ne Episcopus licentiam dare possit, ut novi Conventus cujuscunque Ordinis Mendicantium erigantur nisi vocatis, & auditis aliorum in eisdem Civitatibus, & locis, ubi erigi debent, existentium Conventuum Prioribus, seu Procuratoribus, & aliis interesse habentibus & cognita causa, quod novi, qui erigendi sunt Conventus sine aliorum detrimento commodè sustentari possint. Itaque in erectione, vel acceptance novorum Conventuum, quorum interest, meminerint, ut ab Episcopo licentiam petant: quod si non obtinuerint, Reverendissimum Magistrum Ordinis, vel ejus Procuratorem admoneant.

(b) *Nisi à Priore Provinciali.* Declaramus, quod nullus Frater cujuscunque status, vel conditionis existat, sine licentia Generalis Capituli, vel Magistri Ordinis, ædificandorum Conventuum causa, potest ullo modo loca recipere. Quod si secus factum fuerit, talis receptio, ipso facto sit irrita, & inanis: ac hujusmodi receptores sint penitus omni voce, præterquam in sui accusatione privati; quæ eis à nemine, præterquam à Magistro Ordinis possit restitui.



Et caveant quam diligentissime Priores Provinciales, ne Domus aliqua cum incongruis conditionibus, & gravibus oneribus recipiantur. Mandantes, quod Domus à Generali Capitulo concessa, vel concedenda, non ponantur in locis ita propinquis aliis Domibus, ut oporteat Fratres illarum Domorum occupare terminos Conventuum, æquitate servata studeant limitare, sicut ad pacem Fratrum, & salutem animarum viderint expedire, sicut fuit ordinatum Parisiis 1246. Oxonio 1280. Florentiæ 1281. & Ferrariæ 1290.

Item declaramus, quod Provinciæ, quæ Dominos petunt à Generali Capitulo, debent nominare Civitates, & Oppida, in quibus eas petunt, & exprimere causas, quæ movent eos ad Domos huiusmodi faciendas. Districte prohibentes ne Priores Provinciales, & Definidores Capitulum Provinciale, aliquem locum ullo pacto recipere audeant: nisi prius eis constiterit, eum locum esse idoneum ad Conventum ædificandum, per Fratres idoneos ad hoc inquirendum specialiter destinatos: sicut fuit ordinatum Barcinonæ 1261. & apud Pestum 1273.

In Capitulo autem Vallisoletano. 1605. sic dicitur: Ordinamus, ut nulla unquam Domus, sive Fratrum, sive Monialium (etiam ad petitionem cuiuscunque, etiam Principis) deinceps constituitur, in qua novæ ceremoniæ, leges, ordinationes, pœnæ, pœnitentiæ, modus vivendi, vel vestiendi, vel alia quæcumque, inducenda, & observanda sint; quæ disponant aliquid præter nostras Constitutiones, vel Ordini nostro contraria, & ab eo aliena esse videantur. Quod si secus recipiantur, receptio ipso facto nulla sit, & nullius roboris; sicut de facto ex nunc pro tunc nullam decernimus, & declaramus. In Capitulo etiam Neapol. 1515. ordinatum est: nullus recipiatur Conventus, qui liberæ Superiorum dispositioni non relinquatur, conformiter ad leges, & Constitutiones nostras; & si secus factum fuerit, totum sit irritum, & inane.

(c) *Nec posita transferatur.* Declaramus in Capit. Barcinonen. 1574. R. R. Provincialibus mandatum fuisse: ut si quæ repererint loca, vel Vicariatus, in quibus Religio minus apte foveri possit, quin potius otii, & dissipationis disciplinæ Regularis fomenta, & scandalorum occasiones afferant; consultis gravioribus Patribus, quo melius fieri poterit reddant, & relinquunt omnino, cum ex his graviora mala sequantur, ac maxima patiatur Religio detrimenta. Advertendum tamen est, quod Fratres Prædicatores, cum à pristinis suis locis ad alia loca cum licentia se transferunt, possunt secum deferre omnium ædificiorum materiam (dedicatis Ecclesiæ dumtaxat exceptis) libros, calices, paramenta, atque alia bona: & possunt etiam ipsa ædificia cum solo & aliis ad ea loca pertinentibus, præterquam Ecclesias vendere, & eorum pretium in suam utilitatem convertere: non obitante quorumcumque Prælatorum contradictione; sicut habetur in Bulla, quæ dicitur *Mare Magnum*.

Item declaramus Romæ 1571. ordinatione 11. præceptum fuisse omnibus Prælati Ordinis nostri sub pœna absolutionis ab officio, ne loca Conventuum Fratribus necessaria, vel quæcumque officinas ulla de causa secularibus concedant, nec etiam sub prætextu cuiuscunque Fraternitatis. Si autem aliquid usque modo concessum fuit, auctoritate nostra revocamus: irritam præ-

fenti statuto decernentes huiusmodi concessionem. Et hæc ordinatio confirmata fuit Barcin. 1574. & Romæ 1580.

(d) *Fratres autem novis Domibus deputati.* Declaramus, quod Fratres missi ad loca nova recepta, intelliguntur eisdem locis omnino, & simpliciter assignati: sed quoad suffragia Conventus, ex quibus fuerunt assumpti, & ipsi eisdem Conventibus mutuo tenebuntur; quousque Domus illæ fuerint in Conventus erectæ. Volentes, quod ad nova loca mittantur solum Fratres exemplares, graves, & maturi: sicut fuit ordinatum in Capitulo apud Montem Peulanium 1265. & apud Pestum 1273.

Item declaramus, Romæ 1571. ordinatum, & declaratum fuisse, & Barcinonæ 1574. confirmatum: quod Fratres qui sunt in Vicariis, aut in Conventibus Monialium, cententur quoad suffragia assignati in Conventibus, quorum sunt filii: ita ut ipsi inter se vicissim ad eandem teneantur. Et idem censendum est de Fratribus, qui ex Prælatorum legitima licentia, cum Episcopis, vel alibi extra Ordinem commorantur. Quæ quidem ordinationes procedant de Vicariatus jam per se constitutis, non autem de novis Domibus, quibus Fratres deputantur, juxta id quod disponit Constitutio.

## I I.

(e) *Conventus citra numerum duodenarium Fratrum professorum,* quorum decem (ad minus) sint Clerici, sine licentia Generalis Capituli, & absque Priore, & Doctore non admittatur: nec postquam admissus fuerit, dictus numerus Fratrum minuat. Et si aliquis inde substractus fuerit, loco illius alius assignetur. Ille verò Conventus, qui pro illo tempore prædictum duodenarium numerum non habebit, ab ea quæ tractanda sunt in Capitulo Provinciali, sive in electione Prioris Provincialis, quoad Priorem & socium, & electores Provincialis, nullatenus admittatur. Nisi forte illo anno, per Fratris obitum dictus numerus fuerit diminutus. Quod si oppositum factum fuerit, totum sit irritum, & inane: Provinciis Hierosolymitana & Græciæ dumtaxat exceptis.

(e) *Conventus citra numerum duodenarium &c.* Declaramus, quod cum Ecclesiæ nostræ sint Collegiales, & in ipsis debeat Divinum Officium in Choro persolvi, & Missa Conventualis: numerus Fratrum Clericorum, (sine quo Domus tanquam Conventus recipi non debet,) intelligendus est de Fratribus Clericis, tam vocalibus, quam non vocalibus. Ac debet habere Doctorem id est Lectorem, qui Fratribus legat: alias Conventus ille non admittatur ad ea, quæ in Provinciali Capitulo tractanda sunt; nisi forte illo anno propter obitum Fratrum numerus ille fuerit minutus. Et in tali casu debent Priores Provinciales, & Conventuales operam dare efficacem, ut per Fratrum receptorum multitudinem, numerus ille sufficienter possit reparari: sicut fuit declaratum apud Bisuntium 1353. & apud Januam 1413. Declarantes, quod  
in

Capitulo Romano 1558. sic statutum fuit: Confirmamus declarationem factam in præcedenti Capitulo 1553. videlicet quod Conventus, qui Fratrum vocalium numerum saltem denarium nunquam habuerunt, tanquam non Conventus æstimentur: & quod ab eis subtrahatur titulus Prioratus, quem ex vi præsentis statuti subtrahimus; si tamen sine scandalo fieri poterit. Qui autem aliquando integrum numerum habuerunt, & modo ad hoc redacti sunt, ut quatuor Fratres vocales cum Priore non habeant: titulo Prioratus gaudere interim permittantur; socium vero ad electionem Provincialis, vel ad Provinciale Capitulum nequaquam eligant. Quod si secus factum fuerit, totum sit irritum, & inane. Præterea declaramus Valentini 1596. & Romæ 1601. Vallisoleti 1605. item Romæ 1608. ordinatum fuisse: ut possibilis adhibeatur diligentia, ne in Conventus, & Prioratus erigantur loca, quæ postea taxatum numerum Fratrum iuxta nostras Constitutiones sustentare nequeant. Quare posterum nulla Domus in Prioratum erigatur, aut erecta intelligatur, quantumcumque concessio quælibet facta fuerit, nisi per annum integrum antea duodecim Fratres Religiose aluerit; & pro Religiosis necessitatibus plene providerit, ut in iisdem Capitulis ordinatum est. Quod quidem Indiarum Provincias non astringit: tum quia ex antiquiore Privilegio Clementis VII. poterant earum Conventus esse cum numero septenario: tum etiam quia Salmanticæ 1551. declarat. s. declaratum fuit, in Provinciis Indiarum numerum senarium Fratrum ad Conventum construendum sufficere, prout eis autoritate Apostolica concessum est.

Item denunciavimus confirmatam fuisse in Capitulo Romano 1601. ordinationem Capituli Valentini 1596. qua omnibus Præsidentibus Provinciarum, Congregationum, & Vicariatuum in Provinciis, & Conventibus, ubi commodè fieri poterit, mandatur, ut curent certam notitiam habere de redditibus tam certis, quam incertis, omnium Conventuum, & locorum suæ curæ subditorum; & conformiter ad ipsos de graviorum Patrum consilio, ipsis singulis determinatum numerum Fratrum præfigant: ultra quem ad præfatos Conventus plures Fratres, ipsi Præsidentes non mittant; ut Religiosis necessitatibus eorumdem Fratrum semper provideri possit, & multa vitentur incommoda. Quod idem à Clemente VIII. & Paulo V. constitutum est.

## I I I.

**I**tem nulla Domus transferatur de Provincia ad Provinciam, nisi per tria Capitula fuerit approbatum. (f) *Mediocres Domos, & humiles, Fratres nostri habeant: nec fiant, aut permittantur fieri* (g) *in Domibus nostris curiositates, & superfluitates notabiles in sculpturis, picturis, pavementis, & aliis similibus, quæ paupertatem nostram deformant.* In Ecclesiis tamen permitti poterunt. Si quis verò contra fecerit, pœnæ graviori culpæ debitæ subiacebit. (b) *Item possessiones, seu redditus nullo modo recipiantur; nec Ecclesiæ quibus animarum cura sit annexa.* Item, nullus audeat instare, vel rogare pro beneficiis consanguineis suis obtinendis.

*Cod. Regul. Tom. IV.*

(f) *Mediocres Domos, & humiles &c.*) Declaramus pro huiusmodi Constitutionis observatione: ut si quibus cura ædificandorum, vel reædificandorum Conventuum incumbit, prius exemplar totius ædificationis faciant, secundum quod Constitutio inferius disponit; & illud Provinciali omninò ostendant, abique cujus licentia nihil omninò incipiant.

(g) *In Domibus nostris curiositates &c.*) Declaramus Venetiis 1592. ordinatum fuisse, ut omnes Fratres, cujuscumque gradus, & conditionis sint in communi dormitorio, non in separatis ædiculis, vel cameris habitent, unica tantum paupere cella contenti: Prælato, & graviori aliquo Patre exceptis, quibus duæ ad summum concedi poterunt; si hætenus tot habuere, absque eo, quod noviter accommodentur, maxime cum aliorum incommoditate. Ab his vero superfluitates omnes, ornamenta vana, pretiosa quæque, & omnia tandem quæ religiosam paupertatem non sapiunt, omninò auferantur; super quo Superiores omnes specialiter invigilabunt.

Item ad observationem, ne curiositates sensim introducuntur, & ut introductæ eradicentur: Declaramus Bononiæ 1564. præceptum fuisse: ut omnium subditorum nemine excepto, privatas cellas Prælati visitarent, & eorum suppellectilia considerarent. Quod si aliquid invenerint, quod statui paupertatis non conveniat, auferant, & applicent communi utilitati. In Capitulo etiam Romano 1569. autoritate Apostolica Pii V. sub pœnâ absolutionis ab officiis Prælatis, & amissionis cujuscumque, nec non privationis vocis activæ, & passivæ, mandatum fuit: ut cameræ, & habitationes à communi Religiosarum cellarum forma recedentes auferantur, & vel ad consuetam Regularium formam redigerentur, vel si id fieri commodè non poterit, in communem usum reducantur, & unusquisque tali cella in communi Dormitorio, nullo apparatu ornata contentus sit. In Capitulo etiam Romano 1608. ordinatum est, ut à cellis Fratrum omnes imagines, quæ non sunt sacræ aut piæ, item illæ quæ propriam Fratris, vel alterius non Sancti, aut Pii imaginem exprimunt, amoveantur. In Capitulo quoque Salmanticen. 1551. istud habetur: Reprobamus ab usum quorundam claustralium sive Conventualium de vendendis, aut etiam testandis post mortem cameris; irritantes quacumque concessiones, si quæ sunt super his hætenus factæ, & ordinantes, ut si de cætero usus illarum concessus fuerit viventibus, semper ponatur in literis concedentis, ad beneplacitum nostrum, & nostrorum successorum. Quod ipsum fuit postea Venetiis 1592. ordinatum, cum hac additione: quod valebunt Superiores ipsi, etiam immediati, dum expediens illis videbitur, pro vitio proprietatis à cordibus subditorum eradicando, eosmet ab una cella ad aliam transferre, & mutare.

(h) *Item possessiones, seu redditus nullo modo recipiantur.*) Declaramus, quod quamvis Ordo noster ab Honorio III. confirmatus fuerit cum possessionibus, castris, & redditibus, quos tunc habebat, & in posterum erat habiturus; sicut patet in Bulla superius memorata: postea tamen in primo Capitulo Generali Bononiæ celebrato sub B. Patre Dominico Anno Dom. 1220. totus Ordo prædictis possessionibus, & redditibus non solum præsentibus, sed etiam futuris renunciavit, & per Constitutionem hic positam, &

successivè in Capitulo Generalissimo Parisiis sub B. Jordano Magistro Ord. Anno Dom. 1228. confirmatam, ne Fratres in posterum possessiones, & redditus recipiant, statutum fuit. Cæterum, quia habere possessiones & redditus in communi, non est contra votum paupertatis; quia multæ Religiones Monachorum profitentes paupertatem redditus habent in communi: neque etiam est contra Regulam Sancti Augustini, quam profitemur; neque minuit perfectionem Religionis, cum paupertas non sit ipsa perfectio, sed perfectionis instrumentum. Cum autem instrumentum non propter se appetatur, sed propter finem, non dicitur esse tanto melius, quanto est majus, sed quanto magis fini est accommodatum: sicut medicina non dicitur esse melior quæ est major; sed quæ magis ad expulsionem morbi, & introductionem sanitatis est apta. Et propterea non oportet Religionem, quæ in omnibus par, & æqualis est aliis, esse tanto perfectiorem, quanto majorem habet paupertatem: sed quanto magis paupertas ejus accommodata est ad finem toti Religioni communem, qui est incumbere in Divina obsequia: vel ad finem spirituales ipsius, qui est Divina contemplatio, aut proximorum instructio. Quod sane perficitur per illam paupertatem, quæ modica humanæ vitæ necessaria congruo tempore sine magna sollicitudine procurata, in communi conservat; qualis est paupertas Ordinis nostri. Quamobrem Sixtus IV. per Bullam quæ incipit, *Nuper &c.* cum toto Ordine dispensavit: omnibusque, & singulis Conventibus, ac locis Ordinis nostri, ut possessiones, redditus, & proventus, & alia bona immobilia libere possint in communi, & non aliter habere, emere, & retinere, concessit: Non obstantibus Constitutionibus Apostolicis, atque Institutis Regularibus dicti Ordinis, secundum quas Mendicantes appellantur, & sine proprio ex incerta mendicitate vivere debent: aliis quoque Ordinis atque ejus domorum statutis, & consuetudinibus, quibus omnibus specialiter, & expresse sanctitas derogavit. Denique ad omnem scrupulum tollendum Concil. Trident. Sess. 25. tit. de Reg. capit. 3. sic ordinavit: *Concedit Sancta Synodus, omnibus Monasteriis, & domibus tam virorum, quam mulierum etiam Mendicantium (exceptis domibus Fratrum Sancti Francisci Capuccinorum, & eorum qui Minorum de Observantia vocantur) etiam quibus, aut ex Constitutionibus suis erat prohibitum, aut ex privilegio Apostolico non erat concessum, ut deinceps bona immobilia eis liceat possidere. Quod si aliqua loca ex prædictis, quibus ex autoritate Apostolica permissum erat, eis spoliata sint, eadem omnia illis restituenda esse decernit.* Quapropter cum tam universus Ordo prædictum Privilegium, & Decretum Concilii receperit, denunciamus quod nullus Prælatas potest bona immobilia, possessiones, aut redditus perpetuos Conventus, sub pœna excommunicationis vendere, aut quovis modo alienare: quemadmodum Paulus II. in sua Constitutione his verbis præcepit: *Omnium rerum, & bonorum Ecclesiasticorum alienationem, omneque pactum, per quod ipsorum dominium transfertur, concessionem, hypothecam, locationem, & conductionem ultra biennium fieri prohibemus, hac perpetua valitura Constitutione, nisi in casibus à jure expressis; & tunc in Ecclesiarum evidentem utilitatem.* Si quis autem contra hujus prohibitionis seriem alienare præsumperit, alienatio concessa, hypotheca, locatio, conductio, nullius sit roboris: & qui alienant, & qui recipiunt, sententiam excommunicationis incurrant. Item denunciamus in Capitulo Barcinonensi 1574. ordinatum, & Romæ 1580. nec non Venetiis

1592. confirmatum fuisse ordinationem, quæ præcipitur omnibus Prælatiis nostri Ordinis sub pœna absolutionis ab officiis: ne bona stabilia, aut fundos (quos vocant) alienare, & aliqua pecuniæ summa recepta, rationes, & prætensiones Conventuum extinguere audeant. Cæterum, quia sæpe contingit, propter evidentem utilitatem Conventuum, bona elocare, & vendere, meminerint omnes Præsidentes Conventuum, ut à Magistro Ordinis licentiam prius in scriptis obtineant. Huic enim pro tempore, Leo X. & postea Clemens VII. autoritate Apostolica indulgit: ut possit dare licentiam bona Conventuum, & locorum sibi in toto Ordine subjectorum, ad certum tempus, ac in perpetuum locandi: vel in emphiteusim ad lineam masculinam concedendi, sine commutandi, aut vendendi, vel quocumque alio titulo alienandi bona immobilia, & pretiosa mobilia minus utilia, quæ nunc habent, & in posterum justo titulo habituri sunt; tam pro satisfactione debitorum, aut pro utilitate, aut necessitate Conventuum sine locorum prædictorum contractorum, aut etiam utilitate suggerente contrahendorum, quam alia evidenti utilitate. Provisio tamen, quod pretium bonorum immobilium si vendantur, aut quovis modo alienentur, centum ducatorum auri de Camera, secundum communem æstimationem valorem annum non excedat: & in emptionem, reparationem, aut augmentum aliorum bonorum immobilium, seu præfatorum debitorum realem solutionem, cum effectu convertatur, & accedat assensus majoris partis vocalium Conventus.

## IV.

**I**N virtute sanctæ obedientiæ, & sub Excommunicationis pœna districtè prohibemus: (i) ne aliquis Fratrum nostrorum laboret, vel procuret de cætero, ut cura vel custodia Monialium, seu quarumlibet aliarum mulierum Fratribus nostris committatur, nisi de licentia Magistri Ordinis speciali. Prohibemus districtè, ne aliquis curam recipiat prædictarum, nisi per tria Capitula Generalia continua fuerit approbatum: vel nisi cura per Dom. Papam Ordini committatur; vel per alium qui possit facere commissionem prædictam. Si quis vero contraire præsumperit, pœnæ graviori culpæ debita, subiacebit.

(i) *Ne aliquis procuret ut cura, vel custodia Monialium.* Declaramus, quod Monasteria Sororum curæ Ordinis commissa, & in posterum committenda, juxta Privilegia Apostolica sub cura sunt ac regimine, & Magisterio Magistri Ordinis, & Priorum Provincialium; seu aliorum Fratrum dicti Ordinis, quibus eam curam ipsi commiserint. Atque idem Magister, & Provinciales prædicti, per se, vel per alios debent, & possunt eadem Monasteria juxta Constitutiones prædicti Ordinis regulare, & gubernare, atque ea tum in capitibus, tum in membris visitare, & corrigere, ac reformare: Sorores, Priorissas, Suppriorissas, & Officiales, necnon Conversos, & familiares ibidem instituere, destituere, mutare, transferre, & alia ordinare: atque etiam sub pœnis, quæ eis videbuntur mandare, & statuere, prout secundum Deum viderint expedire: juxta id, quod Bonifacius IX.



in Bulla, quæ incipit : *Sacra Religionis*, quæ infra Capitulo 18. inserta est, atque Alexander IV. in alio Privilegio decreverunt.

Item declaramus, quòd Fratres, qui ad curam Monialium constituti sunt, non possunt ingredi clausuram ipsarum, nisi propter evidentem necessitatem : nec debent permittere, ut alii ingrediantur illuc, nisi ex legitima, & rationabili causa, & in privilegio Bonifacii IX. sic dicitur : *Nulla persona, religiosa vel secularis, sub pœna excommunicationis lata sententia potest ingredi in Monasteria Monialium, quæ sunt sub cura Ordinis Prædicatorum, sine licentia Magistri Ordinis, nisi in casibus in earum Constitutionibus expressis; & a tali excommunicatione non possunt absolvi, nisi per Magistrum prædictum, vel per alios quibus ipse commiserit.* Et in Concilio Tridentino sess. 25. de Regularibus cap. 5. sic statuitur : *Ingredi autem intra septa Monasterii (Monialium scilicet) nemini liceat, cuiuscunque generis, aut conditionis, sexus, aut ætatis fuerit; sine Episcopi, vel Superioris licentia in scriptis obtenta, sub excommunicationis pœna ipso facto incurrenda.* Dare autem licentiam tantum Episcopus, vel Superior debet, in casibus necessariis; neque alias ullo modo possit, etiam vigore cuiuscunque facultatis, vel indulti hactenus concessi, vel in posterum concedendi. Hactenus Concilium Tridentinum decrevit. Cui decreto inhærens Sacra Congregatio Cardinalium Concilii Tridentini interpretum, censuit, licentias ingrediendi intra septa Monialium, ex vera tantum necessitate concedendas, quoad Monasteria Regularibus subiecta, pertinere tantum ad ipsos Superiores Regulares. Quamobrem post Decretum Concilii Trident. Bononiæ 1564. istud habetur : Admonemus Reverendos Provinciales, ut circa ingressum ad Monasteria Monialium, magnam custodiam adhibeant; & quando gravis necessitas pro sui executione officii intrare compulerit; unum tantum aut duos ut plurimum socios, eosque graves secum adducant. Inferioribus autem Monialium Præfectis, ipsi Provinciales leges præscribant, quando eis, & cum quibus sociis ingredi liceat, super quo eorum conscientias oneramus. Cæterum quia multæ etiam personæ illustres, ratione quorundam privilegiorum prætereundæ solent ingressum intra septa Monasterii Monialium : denunciamus, Gregorium XIII. in Bulla, quæ incipit. *Ubi gratia* &c. & Paulum V. in alia, cuius initium est *Monialium statui* &c. in Capitulo Romano 1612. acceptata, omnes licentias, omnibus mulieribus, etiam Marchionali, & Ducali dignitate fulgentibus, hactenus concessas, ingredi Monasteria Monialium revocasse : & sub pœna excommunicationis latæ sententiæ mandasse, ne quæ earum ingredi in ea audeat. Neve eas Priorissa, aut Superiores introducant, sub eadem excommunicationis latæ sententiæ pœna prohibitum est : à qua non nisi à Romano. Pont. pro tempore existente, præterquam in mortis articulo absolvi possint; & sub pœna privationis suorum officiorum quæ obtinent, & inhabilitatis ad illa in posterum obtinenda, ipso facto sine ulla declaratione incurrendis pœnis.

Item declaramus, quòd Fratres in Monasteriis Sororum continue per modum Collegii sub cura sui peculiaris Prioris, vel Vicarii residentes, (sicut quodam in Monasterio Sancti Sixti, & nunc etiam in Cœnobio Prulliano; & præsertim novissime in Monasterio Sancti Sebastiani Neapoli commorantur) non pertinent ad alium Conventum, nisi solum quoad suffragia eorumque

bona, sive libros, sive res alias Prior Provincialis post eorum obitum Conventibus eorum originalibus reddere debet, sicut habetur in *capitulo de Studentibus*. Et idem dicendum est de aliis Fratribus residentibus in aliis Monasteriis, & de ipsorum bonis : quod videlicet ad suos originales Conventus debent pertinere, sicut fuit ordinatum in Capitulo Venetiis 1297. Metis 1298. & iterum Venetiis 1437. Volentes, quòd Priores Provinciales tam Monialibus, quam Tertiariis, constituant peculiares Confessores discretos, & maturos, & statuunt tempus, quo confiteri debent, juxta præscriptum Constitutionum : nec permittant à Fratribus eadem Monasteria frequentari; sicut fuit declaratum apud Londonas 1250. & Metis 1251. Tandem in Concilio Tridentino sess. 25. cap. 10. habetur, quòd præter ordinarium Confessorem, alius extraordinarius ab Episcopo, & aliis Superioribus, bis aut ter in anno offeratur. Quod etiam in Capitulo Romano 1601. præceptum fuit, & additum : Confessores post triennium amovendos esse, sicut etiam fuerat antea ordinatum Romæ 1569. & 1583. Atque iterum Romæ 1589. sub pœna gravioris culpæ mandatum fuit, ut Confessores Monialium, quascunque elemosynas pro Missis sibi datas, ac illarum numerum, infra unius diei terminum ab earum receptione suis Prælati manifestare teneantur. Declarantes, quòd Vicarii Magistri Ordinis, vel Priorum Provincialium, de visitandis, vel ordinandis Monasteriis Sororum nullo modo possunt se ingerere, nisi eorum litteris specialiter sit expressum : sicut fuit ordinatum apud Argentinam 1307.

Item declaramus, quòd Modus eligendi Priorissas juxta tenorem Constit. Bonifacii VIII. talis erat : quòd videlicet Conventus Monialium debeant compromittere in tres Fratres, qui audirent, & conferberent vota Sororum ad eligendam illam, quam major pars ultra medietatem nominasset. Quo facto & auditis vocibus omnium Sororum in secreto, publicarent scrutinium; & facta collatione numeri ad numerum, si majorem partem omnium eligentium in unum convenisse invenissent; debebat ille qui primus erat inter scrutatores, formare electionis decretum hoc modo. Ego Fr. N. vice mea, & Fratrum N. N. Compromissariorum, & Sororum electricum mecum consentientium : eligo Sororem N. talem in Priorissam Monasterii talis. Si vero omnes consensissent dicere debebat, & omnium Sororum electricum mecum consentientium. Priorissa autem sic electa poterat per Magistrum Ordinis, vel Priorem Provinciale, vel per eos quibus ipsi commississent (si eis videbatur) confirmari. Illis tamen non obstantibus, declaramus, propter Concilium Tridentinum debere servari modum, qui in sequenti capitulo de *electione Prioris* positus est ex Capitulo Bononiensi 1564.

## V.

(k) **M**ulieres Clausum, vel Oratorium, vel alias officinas nostras nunquam ingrediantur, nisi in die consecrationis Ecclesiæ : & tunc liceat eis ingredi Chorum, & Clausum. In Parasceve vero tantum Chorum poterunt intrare usque ad officium.

(k) *Mulieres Clausum, vel Oratorium.* Declaramus, quòd in Ecclesiis nostris debent esse intermedia, quæ dividant Chorum à secularibus :

bus, & debent ubique sic esse disposita; ut Fratres ingredientes Chorum non possint videri à secularibus, nec eos videre; poterunt tamen aliqua fenestra aptari, ut tempore elevationis Corporis Dominici possint aperiri, & Sacramentum à Secularibus adorari, ut fuit ordinatum Treveris 1249.

Item declaramus, fel. recor. Pium V. in Constitutione incipiente: *Regularium personarum* &c. revocasse licentias quibuscumque mulieribus concessas ingrediendi Monasteria, & loca quorumcumque Ordinum Regularium: ac præcepisse Prioribus, & aliis Præfidentibus, quocumque nomine vocentur, etiam Mendicantibus, sub penis privationis officiorum quæ obtinent, & inhabilitatis in posterum ad alia omnia, & suspensionis à Divinis ipso facto absque alia declaratione incurrendis; ne quascumque mulieres etiam Comitissas, vel Marchionissas, intra Monasteria, vel Domos, introducere, admittere præsumant: quod idem præcepit Gregorius XIII. in alia sua Constitutione, incipiente: *ubi gratie* &c.

Item declaramus, quod in Capitulo Romano 1571. sic habetur: Denunciamus à S.S. D. N. Pio V. motum proprium emanasse, circa ingressum mulierum in Conventus nostros, quem Sua Sanctitas viva voce declaravit: quod per dictas litteras non præcludetur aditus mulieribus ad Monasteria, & Claustra, quando in eis Missæ celebrantur, ac alia Divina Officia, aut etiam quando processiones fiunt, vel cadavera fidelium in eis sepeliuntur, aut etiam pro eis suffragia fiunt: sed eis concedit, quod quando hæc fiunt, ad ea accedere possint. Similiter, quando verbum Dei in Ecclesia proponitur, vel ob quamcumque aliam causam tantus est concursus populorum, quod commode ingredi, vel egredi per portam communem non possit, concedit idem Pius V. ut mulieres, una cum aliis personis secularibus, ingredi, vel egredi possint per portam Conventus Claustrii, dummodo recto tramite accedant ab Ecclesiæ janua ad dictam Claustrii portam, qua exiit à Monasterio &c non obstantibus &c. Datum 1568. Istud vivæ vocis oraculum fuit factum Illustrissimo, ac Reverendissimo Domino Cardin. Alexandro Cribello anno Domini 1568. cui etiam declaravit sua Sanctitas, in cæteris servandum esse suum Modum proprium in omnibus Conventibus nostri Ordinis, sub penis ibidem expressis.

## VI.

(1) *Statuatur semper aliquis Frater Clericus, vel Conversus discretus, maturus, & securus, qui sit portarius, & diligenter ea, quæ ad officium portarii pertinent exequatur. Poterit autem aliquem Fratrem, vel secularem honestæ conversationis habere in adiutorium, cum necessitas hoc requirit.*

(1) *Statuatur semper aliquis Frater Clericus.* ) Declaramus Vallisoleti 1605. ordinatum istud, & in Capitulo Romano 1608. confirmatum fuisse: ut in omnibus Conventibus, maxime in præcipuis, semper ad ostium Cœnobii Custos assistat aliquis Sacerdos, vel Conversus discretus, & morum probitate insignis: qui seculares adventantes benigne recipiat, & de rebus spiritualibus colloquendo, eos detineat interim, dum Frater

ab eis postulatus, ab alio juniore Ostiario (quem focium tenior ille, & primarius Ostiarius in eo officio semper habebit) vocatus adveniat. Nec permittat seculares per Conventum discurrere, nec ad cellas Fratrum accedere, nisi fuerint personæ graves. Ostium autem ita introrsus semper sit occlusum, ut nulla ratione à foris venientes possint aperire. Ut vero facilius Ostiario innotescat, qui Fratres sint foris, qui vero domi: mandamus sub pœna gravis culpæ, ne quis extra Conventum egredi audeat per portas Ecclesiæ, vel per alias; sed solum per unicum commune ostium domus. Ad ostium vero introrsus, tabula loco apto affigatur, nomina, & cognomina Fratrum Conventus continens: in qua Ostiarius aliquo signo notet Fratrem domo egredientem, vel regredientem; ut sic de quæsitis Fratribus rationem reddere queat. Prælati vero, qui in horum cura fuerint negligentes, à suis officiis absolvantur.

## VII.

(m) *Volumus autem quod fiat cum maturo consilio peritorum in arte, (considerato loco illo) in ligno, vel in alia materia, formula totius Domus construendæ, quam non liceat transgredi pro voluntate varia Præfidentium; sed juxta illam ædificetur. In Domibus autem constructis, mandamus nullam fieri constructionem, aut ædificationem notabilem in fabrica à Priore, vel Procuratore; nisi de licentia Prioris Provincialis, & consilio, atque assensu Patrum. Oppositum autem facere præsumens in pœnam absolvetur: sic quod per triennium nec ibi, nec alibi præsit.*

(m) *Volumus autem, quod fiat cum maturo consilio.* ) Declaramus, in Capitulo Salmanticensi. 1551. sic determinari: Ordinamus ne fiat aliquod ædificium, vel constructio notabilis in aliquo Conventu, nisi de assensu Patrum cum licentia Provincialis, & cum consilio Peritorum: & quod taliter per unum Priorem inceptum est, per subsequenter continuetur, & ne porius nova ædificia inchoentur. Et qui his contravenerint, pœnæ gravioris culpæ subiacere intelligantur. Et inter alia, quæ in Capitulo Romano 1583. ex mandato Sixti V. sub pœna excommunicationis latæ sententiæ ordinata referuntur, istud tertio loco habetur. Sanctitas sua confirmat, & ordinat (si opus est) de novo, id quod alias in supradicto Ordine fuerat ordinatum: videlicet, quod non fiat ædificium aliquod, vel constructio notabilis in aliquo Conventu, (notabilis inquam respective juxta Conventus quantitatem & qualitatem) nisi de assensu majoris partis Patrum à consiliis; & cum consilio peritorum, simul etiam cum licentia Provincialis. Rursus, quod ab uno Prælati inceptum est, subsequens prosequatur: ita quod non possit nova ædificia inchoare, si priora non sint finita. Præcipit etiam, id ipsum servari in Monasteriis Monialium; ita quod non possit Priorissa ædificium notabile inchoare, sine assensu majoris partis Matrum à consiliis; simul cum licentia Provincialis, & cum peritorum consilio; nec ullo modo ædificia nova aggrediantur, quousque jam inchoata sint finita. Prior autem Provincialis, vel Conventualis, vel Priorissa, si contra ordinationem istam agere præsumperit, ipso facto excommunicationem incurrat, & officio privetur. Vi autem hujus prohibitionis non in-

interdicitur, quin possint inchoari illa ædificia, quibus reparatur aliqua pars Conventus collapsa, vel quæ in ruinam tendit: nec etiam ædificia illa, quæ extra Conventus fiunt, quibus annui redditus crescunt, & promoventur; dummodò in istis etiam constructionibus (si sint notabiles) præcedant consensus, & licentia juxta supradicta.

Item declaramus in Capitulo Romano 1569. præceptum fuisse Reverendis Patribus Provincialibus, ut in visitatione Conventuum sequestrent aliquas pecunias annuales, pro reparatione fabricæ Conventuum, qui passim destruantur: & ut etiam provideantur pro loco infirmorum, & hospitum necessaria; adhibitis gravioribus pœnis ne hujusmodi pecuniæ in alios usus distrahantur, super quo Provincialium conscientias in diem Christi oneramus. Et in Capitulo Bononiensi 1564. fuit ordinatum, quod in nostris Conventibus certus aliquis locus statuatur, in quo privilegia, & aliæ scripturæ necessariae, sub tribus clavibus conserventur. Et si quando inde pro necessitate Conventus productæ fuerint, quam citius reponantur, nec in cella Prioris, aut Syndici, nisi pro necessario tempore retineri possint. Et in Capitulo Romano 1605. dicitur: In omni Conventu locus tutus cum armariis (ut vulgo dicitur) sive capsis habeatur, in quibus scripturæ, privilegia, contractus, instrumenta, libri professionum Fratrum, & omnia jura ad Conventum pertinentia cum suo inventario, seu indice aserventur. Similiter inventarium bonorum mobilium, & immobilium tam Conventus, quam Ecclesiæ, conscribatur, duplici authentico exemplari: quorum alterum in Archivio illius Conventus, alterum vero in Archivio primarii Provinciæ, vel nationis Conventus diligenter custodiantur.

Similiter in Capitulo Vallisoleri 1605. magis exactè, confirmando disponitur: Confirmamus, & omnibus Prioribus, Conventuumque Prædientibus districtè injungimus: ut quæ poterunt brevitate faciant memorialia, quæ vocantur inventaria, tum in Deposito de omnibus scripturis, tum annuorum reddituum, quæ censuales vocantur, tum aliorum privilegiorum, & similia in qualibet officina Conventus. Ad quæ inventaria constituatur liber in Deposito in quo ponatur Primo: inventarium privilegiorum, & aliarum scripturarum pertinentium ad fundationem, & statum Conventus. Secundo, ponatur inventarium scripturarum censualium perpetuorum, & postea scripturarum censualium temporalium, per ordinem mensium: cum aliquo signo tam in inventario, quam in ipsa scriptura, ut possint faciliè reperiri. Et in alia parte ponatur inventarium omnium scripturarum pertinentium ad annuos redditus frumenti, vini, & olei. In alio autem libro ponantur sigillatim inventaria omnium bonorum, quæ reperiuntur in qualibet officina Conventus: in quibus quæcumque bona, quæ de novo ponuntur in aliqua officina, addantur inventario illius officinæ: maxime autem in inventario Sacristiæ ponantur omnia localia, & quæ offeruntur: quæ teneantur Sacristæ quantocius acceperint, præsentare Patri Priori, seu Principali Præsidenti Conventus, ut ponantur in inventario. Ex quibus inventariis detur transumptum cuilibet Officiali talis officinæ, subscripti à Patre Priore, seu Principali Præsidente, Depositariis Conventus, & Officiali quocumque cujuscumque officinæ, quæ omnia teneantur adimplere Prælati, sub pœna absolutionis ab officiis eorum. Addente, quod nullo modo extrahantur aliquæ scripturæ à Deposito, nisi in præsentia Prælati: taliter, quod in Deposito moneat aliquod memoriale semper ipsius scripturæ, donec restituantur.

Item in Capitulo Romano 1608. istud habetur: Confirmamus ordinationem illam Capitulì Vallisolerani immediatè præcedentis, de his, quæ pertinent ad comune Depositum Conventus: nimirum ut in quolibet Conventu, vel Domo, deputetur aliquis locus fortis, & securus, qui Depositum commune appelletur; cujus clavem habeat semper Prior, vel principalis Præsides Conventus. In quo constituatur arca fortis, & validè compacta, quæ tribus foris claudatur, quarum claves habeant singuli singulas; Prior, vel principalis Præsides Conventus, & duo Patres Depositarii, moribus, & fidelitate probati, quos major pars Patrum à consiliis ad hoc munus aptiores esse judicantes elegerint. Et in prædicta arca omnes pecuniæ Conventus deponentur & custodiantur.

In administrando autem Deposito hæc leges servabuntur.

Primo. Singulis hebdomadibus, vel mensibus ad prædictum Depositum conveniant Prior, & duo Depositarii: quibus Syndicus, Procurator, Sacrista, & alii, ad quos ratiocinia Conventus quoquo modo spectant, rationem reddant de receptis hebdomadæ, vel mensis præteriti.

Secundo. Sacristæ nihil eorum, quæ recipiunt, expendere audeant, neque etiam sub prætextu adornandæ Ecclesiæ, vel musicæ, vel alia occasione, abique licentia Prioris.

Tertio. Fratres quascumque elemosynarum pecunias, tam ad Missas celebrandas, quam quavis alia ratione pro Conventu eis traditas, infra spatium viginti quatuor horarum, Sacristæ ad Depositum consignent, nec apud se retineant.

Quarto. Et quoniam longa Syndicorum in suo officio perduratio, Conventibus damnofa sæpe esse solet: ordinamus, ut nullus Syndicus possit in Syndicatus officio perdurare, plusquam per biennium; quo completo, ipso facto à prædicto officio sit absolutus, nec ad illud ante biennium eligi possit sine licentia Prioris Provincialis, & præmissa nova electione majoris partis vocalium Conventus consensu accedente.

Quinto. Syndico nunquam concedatur facultas acceptandi pecunias, quæ ad extinctionem censuum erogari solent. Qui etiam teneatur singulis hebdomadibus, vel mensibus ad summum, rationem reddere Priori, & Depositariis, de omnibus receptis, & pecunias omnes deferre ad Depositum; ut ibi in arca deponantur, & custodiantur; unde non poterunt extrahi nisi in præsentia Prioris, & Depositariorum, & statim in libro majori scribatur distinctè, & clare, in quos usus expendantur. Volumus autem, quod Syndicus nullas pecunias expendere possit, nisi prius portatæ fuerint ad Depositum, & inde sibi fuerint consignatæ à Priore, & Depositariis. Quod si aliter fecerit, pœnæ proprietarii ipso facto subiaceat.

Sexto. Liber magnus in arca Depositii custodiatur, à qua non possit extrahi, nisi in præsentia Prioris, & Depositariorum: nec inde alio ullo modo, vel per breve tempus asportetur, præterquam tempore Visitationis Prioris Provincialis: & tunc ad ejus cellam poterit deportari, ut omnia ratiocinia possit intueri. In quo libro ex una parte scribantur omnia recepta tam Syndici, quam Sacristæ, quam aliorum; ita ut nihil in Conventu recipiatur quod in prædicto libro non scribatur. Ex alia autem parte omnes expensæ referantur, ut sic tempore ratiocinii collatio fiat recepti, & expensi, & cognoscatur, an bona Conventus rectè fuerint administrata. Prædictæ autem in administrando Deposito leges, & ordinationes districtè, & inviolabiliter observentur.



Hæc ordinatio fuit etiam confirmata in Capitulo Parisiensi 1611. cum hac additione: ut in quolibet Conventu fiat liber (si jam factus non est) in quo describantur omnes redditus certi, territoria, sylvæ, vineæ, prædia, sive possessiones Conventuum cum suis confinibus, terminis, & limitibus; ad evitandas in posterum lites, & depellendas injurias occupantium bona Ordinis. Idque præcipitur tam Provincialibus, quam Præfidentibus, & Procuratoribus Conventuum, sub pœna absolutionis ab officiis suis, nisi intra annum executioni mandentur. Et quia multa Privilegia nostro Ordini, ejusque Provinciis à Summis Pontificibus conceduntur, & singularia pro iisdem Provinciis, à Magistris Ordinis per necessaria præscribuntur: ut hujusmodi litteræ, vel Apostolicæ, vel Magistrorum Ordinis perpetuo conserventur: ideo in Capitulo Bononiensi 1615. mandatum est omnibus PP. Provincialibus, quatenus de consilio Patrum suarum Provinciarum, prout necessitas exposcet, unum vel duos Conventus primarios, pro hujusmodi litteris conservandis, designent; in quibus Conventibus omnes Provinciales, finem suis officiis imponentes, de scitu Patrum Provinciæ, tales litteras reponere tenebuntur.

Cæterum, quia magis bona spiritualia, quam temporalia in Conventibus nostris conservari debent: declaramus pro reformatione Observantiæ Regularis, istud à Bonifacio Papa IX. & à Beato Raymundo Capuano Generali olim Magistro statutum, & post in Capitulo Salmanticensi 1551. Romæ 1558. Bononiensi 1554. Romæ 1569. & Vallisoleti 1605. strictissime mandatum esse omnibus RR. AA. PP. Provincialibus; ut unusquisque in sua Provincia, unum, vel plures Conventus, juxta qualitatem, & numerum Fratrum deputet, in quibus Regula, & Constitutiones Ordinis nostri cum omni rigore ab omnibus illic degentibus ad unguem observentur; nec cum aliquo ibi commorante in carnibus, vel aliis Regulari vitæ repugnantibus quoquo modo, aut quovis prætextu, vel colore, nisi propter actualem infirmitatem dumtaxat, dispensari possit. In quibus Conventibus, & locis nemo invitatus cogatur manere, nec aliquis nolens à suo retrahatur fervore, nisi quem jam arrepti propositi, & cæptæ observantiæ peniterit. Ne vero contingat, sicut plerumque maligni spiritus suggestionem solet evenire, ut qui spiritu cæperunt, postmodum carne consumantur: & qui ad meliora accendi videbantur, aliquando superba elatione, & aliorum contemptu ad deteriora trahuntur, & unde quærunt meliores fieri, inde inobedientes, & suis Superioribus rebelles efficiuntur: volumus & præfenti statuto in perpetuum ordinamus; quod omnes in præfatis Conventibus commorantes, in omnibus, & per omnia suis Provincialibus censeantur, & sint subditi, qui eos visitare, assignare, & removere possint, sicut antea consueverunt, & omnia alia tam in dictis Conventibus, quam Fratribus facere valeant, quæ dicto vivendi modo, & Regulari Observantiæ non repugnent, Districte etiam mandamus, ne Fratres in talibus Conventibus commorantes, quovis modo possint habitum, vel formam ejus transmutare, sed tali uti, quali in Capit. Romano proxime præterito, & in hoc Capitulo fuit decretum. Nec possessiones, cæteraque immobilia, & pretiosa, absque speciali Reverendissimi licentia alienare audeant. Hortamur nihilominus dictos RR. AA. PP. Provinciales, ut præfatos Patres foveant, & adjuvent, neque illis in suo fervore

sint impedimento: curentque, nè Domini spiritus in aliquo extinguatur, moneantque eos, qui in tali observantiæ architudine morantur, ne cæteros de sua Provincia spernant, nec alii cui detrahant, nec aliis se esse meliores judicent: sed animadvertant, quod quanto quis perfectior est, tanto humilior esse debet, & tanto magis Superioribus obedientior; illius exemplo, qui usque ad mortem factus est obediens, & mortem nostram sua morte destruxit, ut in omnibus humilitatem, & obedientiam nos doceret. Quare Reverendissimum Patrem Generalem obnixè rogamus, ut in Provinciarum visitationibus, omnia quæ hujusmodi vivendi modum adjuvare judicaverit, pro sua singulari providentia, & sollicitudine curet ordinare.

Eam Capituli Vallisoletani sanctissimam ordinationem, Capitulum Romanum 1608. confirmavit, cum denunciatione, quod jam in pluribus Provinciis executioni mandata sit, & cum admonitione, ut in iis Conventibus Fratres non nisi spontanei, & voluntarii assignentur; quibus etiam non liceat alias cærimonias, & observantias, quam in Ordine receptas, & approbatas inducere, aut se ab obedientia Præfidentis Provinciæ subducere ullo pacto.

## CAPUT II.

### *De Electione Prioris Conventualis, & institutione Supprioris.*

#### I.

(a) **P**Riores Conventuales à suis Conventibus secundum formam canonicam eligantur, videlicet (b) à majori parte ultra medietatem omnium eligentium: (c) vel per scrutinium, vel per compromissionem, vel per communem inspirationem; aliis subtilitatibus juris relegatis. Quod similiter in electione Magistri Ordinis, & Priorum Provincialium observetur. Cum autem per disquisitionem, & scrutinium voluntatum procedit electio, vota eligentium recipiantur, & conscribantur (d) per Suppriorem, vel ejus Vicarium in absentia Supprioris: & duos Fratres, (e) qui primitus Habitum nostri Ordinis susceperunt; si tamen post professionem à nostro Ordine nullatenus discesserunt, nisi per Magistrum Ordinis, vel Generale, vel Provinciale Capitulum cum eis fuerit dispensatum.

(a) *Priores Conventuales secundum formam Canonicam eligantur.* Declaramus, quod Fratres nostri, sicut jura volunt, non possunt sibi eligere, vel postulare Priorem, nisi ille qui præest in tali officio, sit penitus amotus. Nec etiam possunt eligere sub conditione, si eum contigerit amovèri, sicut fuit declaratum Parisiis 1239.

Item declaramus, quod ad electionem canonicam infra scripta requiruntur.

Primum est, quod mortuo, vel amoto Priore, Electores abientes vocandi sunt, si nuntius ad eos pedestèr per unam diem commodè possit acce

accedere, ut infra num. 6. amplius declaratur. Item in Capitulo Romano 1601. fuit pro his qui ad Capitulum Provinciale proficiscuntur, ordinatum: quod quando Priores tempus sui Prioratus (in Capitulo Provinciali dumtaxat) expleverint; tenentur Electores præstolari socios eorundem Priorum, qui ad Capitulum Provinciale profecti fuerint, usque ad Sabbatum Pentecostes exclusivè: & tunc procedere poterunt ad electionem Prioris; nisi forte ante talem diem illi, qui ad Capitulum Provinciale accesserant, reversi fuerint.

Secundum est, quod vocatis, & expectatis absentibus, debent vocales ad locum electionis per sonum campanulæ convocari, & præmissis tractatu, saltem in communi (si visum fuerit) de persona idonea eligenda, debet eligi hora, & locus pro electione facienda. Quod si major pars Electorum perierit à Suppriori, vel Vicario (si non adsit Supprior) ut congreget Capitulum ad electionem, & ipse renuerit: tunc antiquior ex omnibus Electoribus, post tertium aut quartum diem a notitia carentiæ Prioris, poterit congregare Capitulum, & ad electionem procedere. Quod si iste noluerit, alius antiquior post ipsum, & sic de cæteris, donec ad electionem procedatur, ut ipsis iisdem verbis fuit declaratum Romæ 1601. declarat. 3. & Parisiis 1611.

Tertium est, quod determinatis jam hora, & loco electionis, præsentibus ad sonum campanæ vocalibus, debet in Capitulo à Præsidente electionis fieri protestatio: quod non intendit admittere aliquem de jure non admittendum, nec excludere non excludendum.

Quartum est, quod ille qui præest, debet ad cautelam generalem absolutionem facere ab omni censura.

Quintum est, quod debet invocari gratia Spiritus Sancti.

Sextum est, quod ille qui præest, debet secum duos Scrutatores assumere, qui habitum nostræ Religionis post professionem diutius portaverunt: & cum eis ad scamnum præparatum ante ostium Capituli debet accedere. Quibus Conventus potest addere quartum, quem electores eligant in Capitulo per schedulas, tribus primis scrutatoribus exhibendas: & qui à pluribus fuerit nominatus (quamquam vota non excesserint medietatem) ille quartus scrutator habendus erit. Quod si duobus æqualia vota collata fuerint, ille qui fuerit antiquior in Ordine, præferendus erit: ita ut ex primo scrutinio, quartus ille scrutator pro ea dumtaxat electione semper habeatur.

Septimum est, quod postquam prædicti tres, vel quatuor scrutatores in mensa coram omnibus federint, debent primo sua, deinde aliorum vota, per involutas schedulas in aliquo vase, vel urna recipere: nihil aliud respicientes, quam quod una tantum ab unoquoque exhibeatur, & in urnam mittatur. Quod ut rectè, & sine aliqua fraude fiat; nullus eligentium manum cum schedula in urnam mittat, sed eam solum ex æere pendentem, ita ut scrutatoribus visibiliter cadens appareat, intromittat. Similiter, ut omnis fraus auferatur, omnibus ac singulis eligentibus in Capitulo Bonon. 1615. strictissime præcipitur: ut in omnibus Canonicis electionibus, nullus electorum audeat schedulas, quibus electiones hujusmodi perturbantur, multiplicare.

Octavum est, quod scrutatores receptis singulorum votis, debent schedulas involutas in mensam effundere, & numerare, atque conferre cum vocalium numero: & si numerus earum

non fuerit æqualis numero eligentium; statim eas non explicando neque legendo, comburant. Si autem æqualis fuerit, eas explicent, legant, diligenter scrutentur, & in scriptis redigant.

Nonum est, quod facto scrutinio votorum, debent scrutatores conferre numerum cum numero eorum qui fuerint electi: & si invenerint, quod aliquis existens extra Collegium, aut extra numerum eligentium fuerit electus à majori parte ultra medietatem omnium eligentium; ejus electio rata, ac legitima habeatur. Si quis vero de numero ipsorum eligentium electus fuerit, ut illius electio rata, & legitima sit, ne fraudi locus adsit, neque possit aliquis seipsum eligere: duo vota ultra medietatem collata esse oportet. Declarantes tamen satisfieri huic statuto de duobus votis, si constet illum esse electum à majori parte, secluso suo voto, si forte illud sibi contulisset. Id autem tunc satis constabit, quando aderit unum votum, & dimidium (quod dicitur) ultra majorem partem: utpote si eligentes sint quinque, major pars sunt tres; requiritur ergo, & sufficit, ut electus, qui est de numero eligentium, habeat quatuor vota, ut ejus electio rata, & legitima habeatur. Ut fuit ordinatum Bonon. 1564.

Item declaramus in Capitulo Barcinonen. 1574. confirm. 14. & postea Romæ 1580. & 1583. istud haberi: Ordinamus quod alias fuerat confirmatum in Capitulo immediate præcedenti: ut si quis propriæ vocis renunciatione medietatem eligentium excesserit, in quacunque electione, tam canonica quam alia irrita, censeatur electio; & hoc habent quatuor capitula, quantum ad electionem canonicam. Adjicientes quod totum hoc ordinatum cadit super electione ipsa, & non super electo, ita quod non possit denuo eligi. Quod in Capitulo Romano 1589. confirm. 5. fuit confirmatum, & additum: quod si quis, nec propriæ voci renunciare, nec suum votum conferre voluerit, sed dixerit, neutraliter se velle habere; tanquam si voci suæ renunciasset censendus erit. Et quod qui contra hujus tenorem quempiam electum confirmaverit: iis poenis subiaceat, quæ contra confirmantes non legitime electos, statuta sunt; ac talis confirmatio nulla sit & invalida. Item in eodem Capitulo Romæ 1589. declarat: 6. fuit ordinatum, quod ille qui est assignatus in aliquo Conventu, & electioni revera adesse potest: sive tali electioni cum aliis in Capitulo inter sit, sive non inter sit: debet necessario habere duo vota ultra eligentium medietatem, ad hoc ut rite, & canonice censeatur electus. Sicuti etiam de illo qui propriæ voci renunciat, jam sepe declaratum est.

Decimum est, quod habito schedularum numero, & collatione facta numeri ad numerum, debent vota in scriptis redigere, deinde schedulas coram eligentibus ante publicationem scrutinii comburere. Tandem in medium Capituli veniendo, scrutatores nomina publicent eorum, qui fuerint electi: atque expriment numerum votorum, quæ unusquisque habuit: quod etiam faciendum est, etiam si nullus fuerit à majori parte ultra medietatem electus, ut ad secundum scrutinium possint dirigi electores. Si autem electio rara fuerit; ille qui primam vocem habuerit inter electores, tenens in manibus librum Constitutionum, debet vice omnium prædictorum eligere, & decretum electionis formare, dicendo: Ego Frater N. vice mea, & omnium eligentium præsentium, eligo Fratrem N. in Priorem talis Conventus. Quod si prius scrutator

tator fuerit electus, secundus scrutator in publicando scrutinio, & formando decreto succedat: & ea solum quæ in Capitulo publicantur, in decreto electionis mittendo ad Confirmatorem, scribenda sunt; subscriptis nominibus scrutatorum. Clausum vero, & sigillo coram omnibus, antequam a loco electionis recedant, munitum, ad Confirmatorem mittatur quantocius. Et idem modus eligendi servetur in electione Prioris Provincialis ac Magistri Ordinis, & Diffinitorum Capituli Generalis, & Provincialis, & Socii Prioris Conventualis, cunctis ad Capitulum Provinciale.

Declaramus præterea, ut in illis Provinciis, in quibus, vel ex Apostolico indulto, vel ex approbata, & jam diu recepta consuetudine, solent præter nomen electi apponi in eadem schedula nomina eorum, qui simul postulantur, ea consuetudo deinceps conservetur. Nomina vero eorum qui postulantur, & numerus eorumdem, similiter in Capitulo publicentur, atque in decreto scribantur, & mittantur, ut in Cap. Bonon. 1564. ordinatum est. Quod autem ad clausuram scrutinii attinet, istud Romæ 1553. declarat. 3. ordinatum est: ut si contingat scrutinium ipsum debere transcribi postquam transcriptum fuerit, scrutatores ipsum coram vocalibus iterum legant, & in oculis eorum sigillo claudant.

(b) *A maiori parte ultra medietatem omnium eligentium.* Declaramus, quod nullus Frater irregularis, & qui non est in Sacris Ordinibus constitutus, vocem habet in quacunque Ordinis nostri electione, sicut fuit declaratum apud Narbonam 1254. Nec sufficit ad hoc quod electio sit canonica, ut electus habeat maiorem partem quam alii, sed oportet ut habeat maiorem partem ultra medietatem omnium eligentium.

(c) *Vel per scrutinium, vel per compromissionem, vel per communem inspirationem.* Declaramus, hanc antiquam eligendi formam per Concil. Tridentin. jam abolitam esse, & in omni canonica nostri Ordinis electione, servandum esse Decretum Sacri Concilii Trident. Sess. 25. de Regularib. ubi ita decernit. *In electione Superiorum quorumcumque, Abbatum temporalium, aliorumque Officialium Generalium, & Abbatissarum, ac aliarum Præpositarum; quo omnia recte, & sine ulla fraude fiant: in primis sancta Synodus districte præcipit, omnes prædictos eligi debere per vota secreta: ita ut eligentium nomina nunquam publicentur. Neque in posterum liceat Abbates Provinciales, Priores, aut alios titulares quoscumque ad effectum electionis faciendi constituere, aut voces, & suffragia absentium supplere. Si vero contra huius Decreti Constitutionem aliquis electus fuerit, electio irrita sit; & is qui adhuc effectum, se in Prælatum creare permiserit; deinceps ad omnia officia in Religione obtinenda inhabilis existat, facultateque super his concessa, eo ipso abrogata censeantur, & si in posterum alia concedantur, tamquam subreptitia censeantur.* Et propterea in Capitulo Generali Bononiensi 1564. sic habetur: In huius ergo decreti videlicet Concilii executionem, præcipimus universis Fratribus nostris: ut in futuris electionibus infrascripta forma deinceps observetur; & si secus factæ fuerint, irritæ prorsus habeantur, Singuli electores in schedula scribant electi nomen, vel scribi faciant; eligentis autem nomen nunquam scribatur, nec scrutatoribus, nec confirmatori

unquam reveletr. Abrogata igitur electione per communem inspirationem, & per compromissum, semper per scrutinium facienda est electio. Quod etiam Romæ 1571. *denunc.* 6. ita dispositum fuit; Denunciamus, in nostro Capitulo Generali diligenter super forma electionis per schedulas faciendæ à patribus esse tractatum, decretumque fuisse eam formam nullatenus esse immutandam: de qua re Sanctissimus Dom. Noster Pius V. etiam consultus in eadem sententia fuit. Quapropter præcipimus omnibus Fratribus Ordinis nostri, tam Prælati quam subditi; ne de cætero ulla ratione eam immutare contendant. Declarantes tamen scrutinia, quæ fiunt super retentione, vel absolutione Priorum, more hætenus consueto faciendæ esse. Socii etiam Prioris Provincialis euntis ad Capitulum Generale, sive Socii Diffinitoris Capituli Generalis, eodem modo à Diffinitoribus Capituli Provincialis eligantur, ac designentur; sicut antea consuevit fieri. In receptione quoque Novitiorum ad habitum, sive ad professionem, & in præstando consensu in contractibus, qui circa temporalia negotia fieri solent nihil innovatum censeatur: ut fuit ordinatum Bonon. 1564. quia ista quatuor, vel quinque relata, per electionem canonicam non fiunt; atque ideo, nec in Decreto Concilii, quod tantum de electione canonica procedit, comprehenduntur.

Item declaramus, in Capitulo Bononiensi 1574. ordinat. 9. ordinatum fuisse: ne quis Patrum eligentium in quavis electione per schedulas, audeat, vel præsumat ipsius schedulis notam aliquam, characterem, vel signum quodlibet, & quovis modo, & cuiusvis rationis, unde possit nomen, vel persona eligentis cognosci, & ad notitiam venire, imprimere, inscribere, vel alias annectere; privatos ex nunc declarantes utraque voce tam inducentem ad hoc, quam facientes, seu consentientes. Ubi item ordinatur, & Romæ confirmatur 1580. quod in omni electione cuiuscumque Prioris, sive Provincialis, sive Conventualis, & Priorissæ, teneantur omnes vocales, præmissa (si opus habuerit) Sacramentali Confessione, Divinissimum Eucharistiæ Sacramentum suscipere ante celebrationem electionis, sub pænâ privationis vocis ipso facto.

(d) *Per Suppriorum, vel ejus Vicarium.* Declaramus, quod mortuo, vel amoto Priore, amoveatur etiam & ejus Vicarius: sicut fuit declaratum Avenione 1367. & Romæ 1501. declarat 3.

Item declaramus, quod quamvis Supprior absente Priore non possit Vicarium instituire, sicut apud Brivam 1247. & in multis aliis Capitulis ordinatum fuit: tamen mortuo, vel amoto Priore cum vices ejus per legem plenarie gerat in omnibus; potest Vicarium instituire, sicut hæc habet Constitutio. Potest etiam Fratres ad Ordinem, & professionem recipere, & confessiones Fratrum audire, aliosque exponere ad audiendas eorumdem Fratrum confessiones. Et hæc eadem facere potest Vicarius electus à Patribus, mortuo vel amoto Priore, & absente Suppriori: quia in tali casu non sunt amplius delegati, sed uterque habet potestatem, & jurisdictionem ordinariam per legem sibi datam, & concessam, ut amplius infra littera S. declarabitur.

Item declaramus, quod per Vicarium Supprioris intelligit Constitutio Vicarium illum, qui in Conventu ab ipso Suppriori institutus est, vel etiam à quocumque alio, eodem Suppriori absente, & mortuo, vel amoto Priore ejusdem Conventus: sicut fuit declaratum Venetiis 1325.

Item



Item declaramus, quod Vicarius electus à duobus, vel tribus antiquioribus à Conventu, absente Supprie, & mortuo, vel amoto Priore, si Domus non habuerit Vicarium Supprioris, vel alterius Superioris; vota eligentium potest recipere sicut fuit declaratum Cadurci 1312.

Item declaramus, quod si in Conventu habente Suppriorem, mortuo, vel amoto Priore, aliquis per Capitulum, vel per Priorem Provinciale datus fuerit Vicarius dicti Conventus super Suppriorem, & omnes Fratres: Vicarius in tali casu debet convocare Fratres ad electionem, Supprior autem cum duobus antiquioribus tenebit scrutinium: & praedictus Vicarius habebit vocem in tali electione, sicut ceteri Fratres, ut fuit declaratum Avenione 1367.

Declaramus praeterea, quod Provinciales, aut Vicarii, non possunt Vicarios pro electione Prioris facienda mittere ad Conventus, nisi in causa magnae dissensionis electorum: sive cum in veritate Conventus adeo est viris midoneis destitutus; ut nullus in eo sit, qui sciat electionem dirigere. Et nihilominus, qui sic missus fuerit, careat voce passiva in eadem electione: quod si secus factum fuerit, totum sit irritum, & inane. Et haec ordinatio facta fuit primum Romae 1553. deinde fuit confirmata ibidem 1558. & Avenione 1561. & Bononiae 1564.

(e) *Qui primitus Habitum nostri ordinis susceperunt.* ) Declaramus, quod illi esse debent servatores, non qui prius Habitum susceperunt, sed qui post professionem diutius susceptum Habitum portaverunt, sicut fuit declaratum apud Carcassonam 1324. Unde illi, qui per apostasiam à nostro ordine recesserunt, cum sint omni voce privati, nec ad aliquam Ordinis electionem possint admitti; non possunt esse scrutatores, nec etiam vocem in electione habere, nisi per Magistrum Ordinis, vel Generale, vel Provinciale Capitulum fuerint dispensati; quod fieri non potest ante tres annos. Ita tamen ut anni quibus fuerint in apostasia, non computentur eis quoad locum, sed sint sub illis omnibus, qui habent plures annos in ordine post professionem, quam ipsi haberent quando exierunt, & ita illi, qui diutius Religionis habitum post professionem portaverunt, dicentur esse antiquiores illis, qui prius professionis Habitum receperunt, sed illum postea per apostasiam dimiserunt.

Declaramus tandem, quod praefati scrutatores non debent esse caeci, neque turdi, sed debent esse tales, ut videre possint eligentium vota, visa scribere, & legere, & lecta in publicatione scrutinii audire.

### I I.

(f) *Publicato autem scrutinio in medio, & (g) expressis nominibus eligentium, & electorum, & (b) facta collatione numeri ad numerum si majorem partem medietate omnium eligentium in unum convenisse invenerint, & minor pars interrogata majori consenserit: (i) ille, qui primam vocem habuit inter electores, surgens dicat: Ego N. vice mea, & omnium electorum praesentium, eligo N. in Priorem talis Conventus, vel talis Provinciae; si Prior Provincialis.* *Cod. Regul. Tom. IV.*

lis eligatur. Si vero non omnes consenserint, sed major pars ultra medietatem: tunc sicut prius, qui primam vocem habuerit dicat: Ego N. pro me, & his qui mecum consentiunt, eligo N. in Priorem, &c. ut prius. (k) Quod sim liter in electione Magistri Ordinis, & Prioris Provincialis observetur.

### I I I.

**P**riores autem Conventuales supradicto modo electi, (l) à Priore Provinciali (si ei visum fuerit) confirmantur. (m) Idem etiam fiat si aliquis à majori parte illorum, ad quos pertinet electio, de alio Conventu fuerit postulatus.

(f) *Publicato scrutinio* ) Declaramus, quod ante publicationem scrutinii, tam ipsi scrutatores, quam ceteri vocales (dummodo omnes consentiant) possunt voces mutare; sed post ejus publicationem illas mutare nullo modo possunt.

(g) *Expressis nominibus eligentium, & electorum.* ) Declaramus, hanc antiquam Constitutionem de expressione nominum eligentium, post Tridentinum Concilium, de quo superius mentio facta est, quemadmodum & illam aliam; Et minor pars interrogata majori consenserit, in consuetudinem abiisse.

(h) *Facta collatione numeri ad numerum.* ) Declaramus, quod cum juxta tenorem nostrarum Constitutionum, electiones nostrae factae à majori parte ultra medietatem eligentium sint canonicae, nec alia collatio, quam numeri ad numerum requiratur: ut gravibus, & periculosis discriminibus obviatur, prohibemus, ut praeter talem electionis formam, seu post decretum talis electionis formatum, nullus praesumat ad aliam electionem procedere, vel aliud electionis decretum formare: sub poena privationis vocis activae, & passivae, quam ipso facto incurrat, & ad eam non possit restitui, nisi per Magistrum Ordinis, ut fuit declaratum apud Londonas 1314. Quando autem concorditer aliquis ab omnibus eligitur, non oportet ut fiat collatio numeri ad numerum; sed sufficit ut ille qui praest, dicat, cum simus tot electores, omnes elegerunt talem.

(i) *Ille qui primam vocem habuit inter electores.* ) Declaramus, quod ille censendus est habere primam vocem inter electores, qui primus est inter scrutatores, & primus schedulam in vas mittit: & talis debet formare decretum electionis, sicut fuit declaratum Perpiniani 1327.

(k) *Quod similiter in electione Magistri Ordinis, & Prioris Provincialis observetur.* ) Declaramus, quod quando eligitur Magister Ordinis, vel Prior Provincialis vel Conventualis, publicato scrutinio debet unus vice omnium eligentium formare electionis decretum, sicut fuit ordinatum Florentiae 1272.

(l) *A Priore Provinciali, si ei visum fuerit, confirmantur.* ) Declaramus, quod in Capitulo apud Verdunum in Provincia Franciae celebrato 1536. sic dicitur: Imponimus universis Provincialibus, eorumque Vicariis, sub poena absolutio-

nis : quatenus electos in Priores quantumcumque unanimiter, non præsumant confirmare, nisi sint sufficientes in scientia, & moribus, & nisi verisimiliter præsumant, quod correctioni, & honestati, & reformationi Ordinis operam dabunt efficacem. Et propter hoc Constitutio dicit: quod Provincialis Priorem electum si ei visum fuerit confirmabit. Quod verbum non designat liberam potestatem, sed discussionem rationis, & arbitrium boni viri, atque ideo non debet Provincialis secundum libitum suæ voluntatis, sed secundum iudicium rationis Priorem electum confirmare. Quamobrem in Capitulo Romano 1580. fuit confirmatum, ut Provinciales in confirmandis Prioribus Conventualibus, Patrum discretorum consilium adhibeant: eorum autem sententias, & vota, quos ad consilium capiendum vocaverint, per suffragia secreta seu fabas suscipiant; quo liberius suam possint ferre sententiam. Quod etiam fuit ordinatum Barcinonæ 1574.

Item declaramus, quod si Prior Provincialis Fratrem aliquem electum, vel postulatam non confirmaverit, sed ex aliqua rationabili causa, electionem cassaverit: non possunt postea Electores cum secundo eligere, vel postulare sine licentia Provincialis. Quod si cassata electione, sine ejus licentia denuo illum eundem elegerint, vel postulaverint, electio illa nulla sit, & potestas providendi de Priore ad ipsum Priorem Provinciale devolvatur, sicut fuit ordinatum apud Montem Pefulanum 1271. & Florentiæ 1272.

Item declaramus, quod Priores Provinciales electionem canonicè factam non debent nisi ex rationabili causa cassare. Quod si electio aliqua, de aliquo canonicè facta, ei fuerit præsentata, & ipse dixerit: Ite & eligite vobis alium, quia hunc nolo confirmare, & non dixerit: Casso istam electionem, non poterunt Electores alium eligere. Si vero electione non cassata elegerint alium, electio illa erit nulla, donec prima cassata fuerit. Item si quis Frater habens litteras Magistri Ordinis, quod non possit cogi ad suscipiendum officium Prioratus, eligatur in Priorem alicujus Conventus, & à Priore Provinciali confirmetur: si talis Frater confirmationi factæ non consenserit, non est absolvendus; sed sufficit electionem cassari, ut Electores libere alium eligere possint, sicut fuit declaratum Januæ 1365.

Item declaramus, quod ille qui est canonicè electus in Priorem alicujus Conventus Ordinis nostri, non potest statim pronunciata electione cedere juri suo. Primo, quia taliter electus in Ordine nostro, ex tali electione nihil juris acquirit. Quod patet, quia quantumcumque ab omnibus eligatur, nullam tamen habet administrationem; & tamen electi in quibusdam Ecclesiis statim habent administrationem, & gerunt quasi vicem Prælati.

Secundo, quia Religiosus quicumque, cum obedientiam sit professus, non habet velle, aut nolle: ac proinde si Prælati aliquid ei præcipiat, oportet eum obedire; nec est in eo dissentire, bene tamen in Prælato præcipiente, à cujus voluntate, subditi voluntas dependet.

Tertio. Quia quantumcumque aliquis à majori parte, vel ab omnibus eligatur, in potestate tamen Superioris est ipsum confirmare, vel non confirmare: quia Constitutio dicit, quod Provincialis poterit talem electum confirmare si ei videbitur expedire. Et quamvis illum non confirmet, non tamen restat tali electo locus appellandi, vel aliqua causa prosequendi, sive aliquid in foro contentioso repetendi. Apparet ergo ex

prædictis: talem non habere jus aliquod in tali electione, ac proinde non posse cedere juri suo, quia ex vi talis electionis nullum jus dignoscitur acquisivisse. Si quis autem à majori parte eligitur, & tamen contradicitur tali electioni; electus non debet confirmari quousque tales contra electiones audiantur, & removeantur, sicut fuit declaratum Valencensis 1337. Declaramus etiam, quod quantumcumque sit aliquis canonicè electus, & confirmatus, eique præceptum de acceptatione factum sit: ipse tamen non consentiat; nunquam est Prior, nec Prælati, neque jus aliquod sibi acquirit.

(m) *Idem etiam fiat, si aliquis à majori parte fuerit postulat.* Declaramus, quod quamvis olim quando quis erat ex alieno Conventu, vel alium Prioratum obtinebat, non eligeretur, sed postularetur: tamen postea in Capit. Placentiæ celebrato 1310. sic fuit declaratum: quod in omni electione canonica Ordinis undecumque, vel in quocumque statu persona eligenda existat, semper in formatione decreti dici debet: Eligo, & nunquam solum, Postulo.

## I V.

(n) **C**onventus autem, qui petit electi confirmationem: numerum, & nomina scribat eligentium; cum formatione decreti, & expressione eorum, quæ in electione facta sunt.

(n) *Conventus autem &c.* Declaramus, quod Conventus qui mittit ad Provinciale pro confirmatione Prioris electi, debet in scriptis narrare totum electionis processum, & scribere numerum eligentium, & quot vota tam electus, quam non electi habuerunt: eique significare, nihil eorum, quæ ad canonicam requiruntur electionem, fuisse omissum.

Item declaramus, propter Decretum Concil. Trident. superius relatum, in electionibus Priorum tum Conventualium, tum etiam Provincialium, servandum esse in toto Ordine statutum Capituli Generalis Bononiensis 1564. similiter etiam Vallisolei 1605. quod quidem est hujusmodi. Quia electionum libertati quam maxime sancta Synodus consultum esse voluit: admonemus in primis RR. Provinciales, & alios Superiores, quibus potestas dirigendi, & confirmandi electiones commissa est; ut ea quam modeste utantur. Quare ubi non fuerit specialis necessitas, nullus Electoribus proponatur. Quod si necessarium esse existimabunt, non pauciores quam tres in singulis electionibus proponant. Cæterum si Electores, alioquin dignum (quamvis non de propositis) elegerint; eam tamen electionem Confirmator, Divini iudicii memor, (nisi iusta sub sit causa) confirmare non differat.

## V.

(o) **S**i verò infra mensem non elegerint, vel postulaverint; Prior Provincialis provideat Conventui de Priore, (p) qui competenter sciat in suo Conventu proponere verbum Dei. Nullus eligatur, aut confirmetur in Priorem, nisi sciat Grammaticè loqui absque falsa latinitate: & sit ita instructus (saltem in moralibus Sacra Scripturæ) ut sciat proponere com-

petenter verbum Dei in suo Conventu. Quod si secus factum fuerit, in Conventibus habentibus integrum numerum Fratrum; Confirmator absolvatur, & per triennium omni officio Ordinis privetur.

(o) *Si verò infra mensem non elegerint.*) Declaramus, quòd si Electores statuerint aliquam diem ad eligendum Priorem infra mensem, & in illa die statuta non elegerint: poterunt alium diem infra ipsum mensem ad electionem faciendam constituere, sicut fuit declaratum Tolosæ 1304. Declaratum etiam fuit in Capitulo Romano 1601. declarat. 2. mensem electionis incipere debere à die, quo de carentia Prioris in Conventu constiterit: infra quem mensem debent Electores canonicè aliquem eligere. Quod si non elegerint, etiamsi actus aliquos electionis, vel ad electionem pertinentes fecerint; statim transacto illo primo mense; devolvitur jus ad Provinciale. Quod si canonicè aliquem elegerint, & contigerit ut cassetur electio; incipiat denuo alter mensis electionis, à die quo canonicè constiterit Conventui prædicta cassatio. Quod sanè intelligendum est habere robur quomodocumque cessatur electio sive propter defectum in ipsa commissum, sive propter aliquam aliam rationem. Et si in illo casu Provincialis Priorem providerit, ille talis non erit Prior. Et quamquam Constitutio Provinciali terminum non præfigat ad providendum de Priore, sed absolute dicat, quod si infra mensem non elegerint, Prior Provincialis Conventui provideat de Priore; non tamen propter hoc intendit derogare juri communi, quo cavetur, ut ille ad quem potestas devolvitur, debeat infra tres menses Ecclesiæ viduatæ providisse; ut habetur in cap. *Ne pro defectu*, extra de electione. Et ideo si Provincialis, vel ejus Vicegerens in prædicto casu infra tres menses Conventui de Priore non providerit; elapsis tribus mensibus non poterit providere, & si providerit, provisio non valebit, sed ad Magistrum Ordinis potestas providendi devolvetur: ut habetur extr. de *supplen. negligent. Prælatorum*, cap. *Licet*. Ubi dicit glossa, quod mora in electionibus non potest purgari.

Item declaramus ex Capitulo Valentino 1596. declarat. 5. quod quando contigerit Priorem aliquem non aliam ob causam à Prioratu, quem tunc habet absolvi, quam ut possit in Priorem alterius Conventus confirmari: si confirmatio quacumque de causa suum non fortiatur effectum, nulla censenda erit absolutio; poteritque in primo suo Prioratus officio perseverare. Item Romæ 1586 admonentur Patres Provinciales, quod si Inquisitores eligi in Priores contigerit, non eos confirmet, nisi consulto Magistro Ordinis, atque sacra Congregatione sancti Officii: ne forte sanctum Officium Inquisitionis impediatur.

(p) *Qui competenter sciat in suo Conventu proponere verbum Dei.*) Declaramus, quòd ille qui nescit competenter proponere verbum Dei, nec eligi potest in Priorem, nec confirmari: quia secundum Constitutiones videtur ineligibilis. Quare in Capitulo Venetiis 1357. fit dicitur: Volumus, & ordinamus, quod nullus de cætero confirmetur in Priorem, nisi sit sufficiens, Provincialis judicio, ad proponendum verbum Dei: mandantes strictissimè Prioribus Provincialibus; quod omnes Priores insufficientes à suis officiis indilate absolvant. Et in Capit. apud Tolosam

1372 sic dicitur: Ordinamus, quod nullus Frater possit eligere in Priorem eum, qui nescit competenter proponere Verbum Dei: nec etiam possit eligi, qui non potest sequi Chorum, Dormitorium, Refectorium, & communia, prout decet; & idem fuit declaratum Cenomanis 1491. declarat. 7. & in multis aliis Capitulis; potissimè autem Romæ 1571. admonit. 3. admonentur PP. Provinciales, & universi Fratres, ad quos pertinet electio: ut in Conventibus, ubi viger Studium Generale, dent operam ut viri graves, & quo magis fieri poterit in litteris periti, in Priores eligantur, ut scientiarum studia, quæ maxime Ordo noster proficitur, in dies augeantur.

Item declaramus, quod electio debet esse digni, & idonei viri: & ideo nullus potest eligi in Priorem, qui non habet conditiones à sacris Canonibus requisitas. Nullus autem debet excludi à quacumque electione, prætextu alicujus criminis, vel delicti, nisi sententialiter sit condemnatus, & per sententiam voce privatus: quamvis ad electionem non debeat admitti ille, de quo manifestum sit incidisse in excommunicationem latæ sententiæ, etiam nulla alia declaratione subtecuta; cum sufficiat aperte constare eum commisisse aliquid, per quod revera ipso facto in excommunicationem latæ sententiæ incidit.

Item non possunt eligi Fratres, qui morantur extra claustra, etiam si Cathedrali Ecclesiæ interserviant: ut declaratum fuit Romæ 1601. declarat. 5. Multo minus eligi possunt, qui extra Ordinem beneficia obtinent, ut inferius in cap. *de Itinerantibus*, dicitur. Et qui Provincialis fuit, non possit infra octo annos immediate ejus absolutionem sequentes, eligi in Provinciale in illa Provincia: & qui fuit Prior infra quadriennium in eodem Conventu, in quo fuit Prior, ut constituit Julius II. Quod quidem intelligitur ubi Provinciales durant per quadriennium. Priores vero per triennium. Duo etiam Fratres germani non possunt sibi immediate succedere in officio Prioratus, aut Provincialatus; quod si secus factum fuerit, electio sit irrita, & nulla; sicut de facto irritam, & nullam decernimus, & declaramus. Romæ 1608. ordinat. 16. & confirmatum Parisiis 1611. confirm. 10. Ineligibiles quoque sunt ii, qui per sententiam condemnati sunt ad pœnas gravioris culpæ, donec dispensentur; quin etiam post dispensationem, vel satisfactionem non adeo facile eligantur; nisi fortè post multos annos mores in melius commutasse ita clare constiterit, ut merito non indigni aliqua gratia censeri possint. Romæ 1589. ordin. ultima. Item Romæ 1569. ordinat. 12. habetur: Apostatas in posterum recipiendos ad Ordinem non posse admitti ad Prælaturas ante viginti annos: & irritum decernitur, si secus factum fuerit, ut etiam superius in cap. *de Apostat.* dictum est. Et Romæ 1558. ordin. 3. definitur, ut qui abjuraverint tanquam de hæresi vehementer suspecti; non possint a quocumque etiam Magistro Ordinis restitui, aut promoveri ad quodcumque officium, sive dignitatem toto tempore vitæ suæ: irritum decernentes quidquid in oppositum factum fuerit. Quod etiam confirmatur Bononiæ 1564. confirm. 2. nulla facta mentione illorum verborum: *Etiam à Magistro Ordinis*. Eligendus etiam in Priorem debet habere 12. annos à professione completos, ut fuit autoritate Apostolica ordinatum Valentiniæ 1596. ordin. 10. & eadem autoritate confirmatum Neapoli 1600. ordin. 13. & Romæ 1601. ordinat. 5.



## VI.

(q) **F**ratres autem post quatuor annos à professione sua, ( si tamen sint in sacris constituti ) ad electionem Prioris Conventualis admittantur. Infra vero idem tempus in Socios Priorum Conventualium ; vel in Electores Priorum Provincialium , vel in Priores nullatenus eligantur. (r) Si vero de aliena Provincia fuerint , postquam per annum continuum in aliquo uno Conventu alienæ Provinciæ assignati morati fuerint , admittantur ad electiones in illa Provincia , sicut alii : & hoc tam si ad tempus , quam si simpliciter ad alienam Provinciam quis assignetur. Infra verò idem tempus non admittantur ad electionem Electorum Prioris Provincialis, nec ad tractatus eorum , quæ ad Generale , vel Provinciale Capitulum sunt mittenda.

(q) *Fratres autem post quatuor annos à professione sua.* ) Declaramus in Capitulo Romano 1608. ordinat. 4. ita fuisse ordinatum : Cum in Capitulo Generali Valentini anno Domini 1596. celebrato, ordinat. 10. autoritate Apostolica statutum fuerit ; ut nullus haberet imposterum vocem tam activam, quam passivam in ulla electione canonica, nisi post expletos duodecim annos à professione sua : quæ ordinatio recepta , & confirmata fuit in duobus immediate sequentibus Capitulis Generalibus, Neapolitano 1600. & Romano 1601. ( ubi declaratum fuit, eadem autoritate Apostolica interveniente, hanc ordinationem extendendam esse ad electionem Sociorum Priorum euntium ad Capitulum Provinciale ) nunc propter iustas, & legitimas causas, habito vivæ vocis oraculo à SS. D. N. Paulo Papa V. de ejusdem Apostolica autoritate, non obstante præfata Capituli Valentini ordinatione, ejusdemque per duo Capitula sequentia confirmatione, statuimus, & ordinamus : ut deinceps Fratres nostri in quacunque electione canonica habeant vocem activam ; dummodo expleverint sex annos integros à sua professione, & fuerint Sacerdotes. Conventu nostro Parisiensi dumtaxat ob certas causas excepto, in quo præfata Capituli Valentini ordinationem volumus, & declaramus, in suo robore permanere. Item eadem autoritate Apostolica cum eadem moderatione confirmatum fuit Parisiis 1611. & declaratum : per hanc moderationem, circa Moniales quidem nihil omnino innovatum ; circa Fratres verò nihil quoad passivam vocem mutatum fuisse.

Quod si contingat aliquem Conversum professum admitti ad Habitum Clericalem, habeat vocem in electionibus Canonicis post duodecim annos à susceptione Habitûs Clericalis, ut Vallesolensi 1605. declaratum est. Declaramus etiam quod cum dicit ista ordinatio : Dummodo expleverit sex annos, hoc esse intelligendum de expressa, vel tacita professione : juxta declarationem factam in Capitulo Barcinon. 1574. ita exponentem Constitutionem, quæ quatuor annos à professione requirebat. Declaramus præterea, quod si in aliquo Conventu non reperiantur, nisi duo legitimi vocales ( Sacerdotes videlicet, & qui habuerint sex annos à professione ) tunc adjungantur usque ad quinarium

numerum ex his, qui habent quatuor annos à professione, suntque in Sacris, incipiendo ab antiquioribus : quod si tot non suppetant, addantur saltem usque ad numerum ternarium, & sic poterunt ad electionem procedere. Si autem tot non reperiantur : tunc devolvitur electio ad Provinciales, qui de consilio quatuor, ad minus, graviorum Patrum, maxima cum consideratione providere debebunt ; eorumdem conscientias super hoc aggravamus : sicut fuit autoritate Apostolica declaratum Romæ 1601. circa explicationem ordinationis quæ 12. annos professionis requirebat.

Item Romæ 1583. ordinat. 6. fuit ordinatum, quod Fratres, qui ordinariè permanent extra Conventum quacunque occasione, & prætextu, ( præterquam pro Officio sanctæ Inquisitionis, ) non censeantur assignati in Conventibus ad vocem habendam in electionibus, quacunque ratione in illis assignentur : sed omnino exclusi intelligantur, quoad electiones faciendas. Quod etiam Romæ 1589. confir. 4. confirmatum fuit, cum declaratione : quod tantummodo vocem activam non habeant in electione, in Conventibus in quibus sunt assignati. Et iterum Romæ 1601. ordinat. 4. ordinatum fuit ; ut Fratres extra Ordinem commorantes, etiam si alicui inferriant Cathedrali Ecclesiæ, vel ibi sint Lectores ; nec passivam, nec activam habeant vocem.

(r) *Si vero de aliena Provincia fuerint, postquam per annum continuum &c.* ) Declaramus, quod Fratres qui sunt de una Provincia, si assignentur in aliquo Conventu alterius Provinciæ, sive pro studio, sive quocunque alio modo, si non sintibi totaliter translati, non habent vocem in illo Conventu : nisi post talem assignationem steterint per unum annum continuum in aliquo Conventu Provinciæ. Et intelligitur, quod fuerit continuatio assignationis, & majoris partis unius anni ; ut declaratum fuit in Capitulo Romano 1532. declarat. ultima. Si vero fuerint totaliter translati, & illi Provinciæ incorporati : tunc postquam fuerint in aliquo Conventu illius Provinciæ assignati, absque aliqua dilatione habebunt in præfato Conventu vocem ad electiones faciendas ; si tamen compleverint sex annos à sua professione, & Sacerdotes fuerint, pro ut supra dictum est. Quia sic translati, sunt de illa Provincia ad quam sunt totaliter translati, & non de alia, sicut fuit declaratum apud Brugas 1336. declarat. 1. & Colonia 1428.

Item declaramus, in Capitulo Romano 1569. sic haberi : Concedimus Fratribus Provinciarum Indiarum, & Congregationum, ut quamprimum Fratres ad illos ex partibus Hispaniarum declinaverint, & ad Conventus suarum assignationum accesserint, habeant vocem etiam in electione Priorum : si alias habiles fuerint, esto quod per integrum annum in aliquo Conventu earundem Provinciarum non steterint, & si quid in hac parte supplendum sit, autoritate Apostolica supplerum est.

## VII.

(s) **E**lectio autem tam Priorum Provincialium, quam Conventualium, ad illos tantum pertineat electores ; qui personaliter præsentés in electione extiterint : sicut fit in electione Magistri Ordinis.

(f)

(f) *Electio autem tam Priorum Provincialium: quem Conventualium.*) Declaramus, quòd licet secundum jura, illi qui sunt absentes, possint instituere Procuratorem ad eligendum, quando electio est facienda: tamen in Ordine nostro in quacunque electione non possunt electores absentes per litteras, aut per Procuratorem eligere; sed oportet quod ipsi personaliter, & præsentialiter in loco electionis existant, nisi in eodem Conventu essent infirmi decumbentes: quia tunc scrutatores debent ad eos accedere. Instante tamen electione Prioris in Conventu, vel tractatu de faciendo: si aliqui ex electoribus extra Conventum infra dietam fuerint: debent Præsidentes Conventuum ad eos nuncium mittere. Quod si noluerint, vel non poterint venire, vel in loco ubi verisimiliter putabatur debere esse, facta diligenti inquisitione inventi non fuerint; poterunt electores præsentes, postquam hoc eis legitime contiterit, in eorum absentia, canonice ad electionem procedere: sicut fuit declaratum in Capitulo apud Bisuntium 1353. Et Romæ 1360. ordinat 28. auctoritate Apostolica statutum fuit, de Provincialibus, & Diffinitoribus: scilicet, ne sint duo Provinciales unius ejusdemque Provinciæ; item dicendum de Diffinitoribus, qui ad electionem Magistri Ordinis conveniunt, per dietam autem intelligitur iter, quod potest facere unus pedester in una die.

Item declaramus, quòd in diversis Conventibus separatis, quorum unus ab alio non dependet, non potest aliquis Frater habere vocem: nec Prior in uno Conventu potest habere vocem in alio, nisi forte ibi institueretur Vicarius ad tempus; ut habetur in cap. *Constitutis de electione* & capit. ultim. *de Relig.* & capit. *Cum singula de Præben. lib. 6.* ut etiam fuit in multis Capitulis ordinatum. Et novissimè Ulyssiponæ 1618. ordinat. ultima ordinatum fuit; quod nullus Frater ratione novæ assignationis potest eodem anno duos eligere Priores, nec socios pro Capitulo Provinciali; exceptis Regentibus, Lectoribus, & Studentium Magistris, qui studiorum promovendorum intuitu aliis Conventibus assignati fuerint, & etiam Supprioribus de novo institutis. Quæ exceptio non intelligitur de Lectoribus Casuum Conscientiæ.

Item declaramus, quòd cum ex inductionibus, & practicis indebitis libertati electionum Ordinis plurimum detrahatur, & turbationes, & scandala plurima consequantur, & sinceritas statûs Ordinis nostri multipliciter lædatur: propter hoc in multis Capitulis fuit strictissimè prohibitum: ne aliquis prece, pretio, promissione, comminatione, ex certa scientia, & ex animi deliberatione præsumeret alium ad eligendum aliquem inducere. Qui vero contrarium fecerit, sit per triennium omni voce privatus, & nihilominus pœnis aliis acriter puniatur. Et eandem pœnam incurrat ille, qui hoc sciverit, nisi statim habita opportunitate debita, Prælati suo ipsum inductorem revelaverit; sicut fuit ordinatum Parisiis 1286. Burdigalæ 1287. Lucæ 1288. Treveris 1289, Placentiæ 1310. Neapoli 1311. Carcassonæ 1312. Similiter propter eandem rationem, ut electiones nostræ liberè fiant, in cap. 16. *infra de Ordinationibus* disponitur: quod infra mensem ante electiones quascunque, novæ assignationes, & mutationes Fratrum non fiant; nisi in casibus ibi exceptis. Et de hoc fuerunt admoniti Provinciales in Capitulo Bononiensi 1564. admonit. 8. per hæc verba: Admonemus RR. Provinciales, ut cum celebrandæ electionis in Conventu aliquo tempus instat,

etiam si Priori mensis unus supersit sui Officii, maxime abtineant à mutationibus Fratrum in dicto Conventu, in quo instat electio: nisi in his casibus, qui in nostris Constitutionibus exprimuntur; ne propter hoc eligentium libertati aliquod præjudicium fieri videatur. Et Romæ 1589. declarat 5. sic habetur: Declaramus, ad tollendam quancunque fraudem, & doli suspicionem, & quatenus opus est decernimus, & statuimus, quod ad hoc ut aliquis in aliqua electione vocem habeat, non sufficit, quod ante electionis men em in Conventu ubi eligere debet, fuerit assignatus; nisi de assignatione ipsa, & Prælati, & Conventui in quo de novo est assignatus, revera ante mensem contiterit. Quod Venetiis 1592 fuit confirmatum, & additum; quod excipiat casus mortis ipsius Prioris; quando jam nulla fraus præsumi potest. Tandem in Capitulo Romæ 160. acceptata fuit Clemen. VIII. Constitutio, ne duobus mensibus ante tempus electionis Prioris, ullæ fiant assignationes, vel revocationes. Quæ etiam fuit acceptata Vallesol. 1605. acceptat. 2. & additum; quod si factæ fuerint, Fratres sic assignati non habeant vocem in quavis electione illius Conventus, donec aliquis fuerit confirmatus.

Item declaramus in Capitulo Romæ 1612. declarat. 2. fuisse ordinatum ita: Declaramus, quod cum in Constitutionibus nostris dicitur, quod infra mensem electionis, numerus eligentium non augeatur; non debet intelligi quando quis intra tempus electionis complet sex annos suæ professionis, si est Sacerdos, vel sacrum Presbyteratus Ordinem suscepit, & explet sex annos à professione: poterit enim in præfatis casibus vocem habere in electione. Et idem dicitur, si contingat Priorem mori; juxta declarationem Venetiis 1592. factam, quia tunc nulla fraus præsumi potest.

Item declaramus ordinatum fuisse Parisiis 1611. ordinat. 10. ad tollenda inconvenientia in electionibus, quod non fiant assignationes dolosæ ac fictitiæ, sed ad illos tantum pertineat electio, qui realiter & bona fide in illo Conventu assignati sunt, & in eodem autem per duos menses realiter & bona fide Conventui inservientes ante electionem Prioris permanerunt. Nec etiam possunt vocales ab eodem Conventu removeri infra idem tempus electionis, antequam Prior electus fuerit, & confirmatus; nisi pro officio Prioratus, vel Lectoratus, vel ratione scandalî. Item Valentis 1596. prohibetur, ne de electione peragenda aliquis tractare audeat (nisi ante diem unam naturalem electionis per se, vel per alios verbo, aut scripto, sub pœna gravioris culpæ; si vocem habeat in electione, si non. Et Prælati talem pœnam transgressoribus infligere tenentur. Et in cap. Sciunt cuncti, *de electione* lib. 6. habetur summarie Decretum hoc: Sciunt cuncti, qui eos ad quos spectat electio, pro eo quod rogati, vel induciti, eum pro quo rogabantur, vel inducebantur eligere noluerunt, spoliant, vel injustè persequuntur; ipso facto sententiam excommunicationis incurrunt. Quod in Capitulo Bonon. 1615. fuit ad memoriam revocatum.

## VIII.

(t) *Prior autem Conventualis, de consilio discretorum Fratrum sui Conventus instituat Suppriorem; cujus officium erit habere diligentiam circa Con-*  
ven

ventum; & corripere delinquentes, & in aliis quantum Prior assignaverit, vel ei permiserit. Idem autem (u) Supprior mortuo Priore, vel amoto, vices ejus in omnibus plenarie obtineat: quousque Prior ejusdem loci fuerit electus, (x) & in Domo præsens extiterit; (y) nisi Prior Provincialis aliter ordinaverit. In quotidianis verò Capitulis non accusetur Supprior: nisi aliquando pro aliquo majori excessu, secundum quod Priori visum fuerit, proclametur.

(t) *Prior autem Conventualis de consilio discretorum.* ) Declaramus, quod Prior Conventualis, non potest instituere Suppriorem, nisi de consilio & assensu specialiter ad hoc congregato, majoris, vel sanioris partis Patrum illius Conventus, qui juxta morem solent ad consilia vocari: & oportet, quod ille Frater, qui debet Supprior institui, sit in eodem Conventu assignatus, sicut fuit declaratum Venetiis 1325. Ad consilia autem vocandi sunt hi, qui designati sunt in *Capit. de Recipiendis*.

Item declaramus, quod Priores Provinciales, in sua Provincia dumtaxat possunt instituere Suppriores: quia in Recloribus essentialiter ordinatis, quod inferiori conceditur, superiori nullatenus denegatur; nisi super hoc specialis fiat exceptio, sicut fuit declaratum Bisuntii 1353.

Item declaramus, quod in quolibet Conventu, Supprior carente, Priores secundum modum in Constitutionibus positum, tenentur infra spatium unius mensis Suppriores instituere, vel instituendos petere: & qui in hoc inventi fuerint negligentes, à suis officiis absolvantur, sicut fuit ordinatum Neapoli 1311. ordinat 14. & Valencenis 1337. Declarantes, quod imminente tractatu eorum, quæ ad Capitulum mittenda sunt, non debent Priores ullo modo Suppriores absolvere: quod si contrarium fecerint, in penam à Prioratus officio absolvantur, sicut fuit ordinatum Avenione 1341. ordinat. 9.

Item declaramus, quod quamvis Prior Conventualis non possit instituere Suppriorem, nisi Fratrem in suo Conventu assignatum, potest tamen instituere Vicarium in Conventu suo, Priorem, vel Fratrem alterius Conventus: licet hoc non debeat facere, nisi in casu necessitatis. Nam secundum jura, unus Ordinarius potest committere vices suas alteri, cujuscumque alterius Diocesis, & propter hoc cum Prior sit Ordinarius in suo Conventu, poterit vices suas Fratri cujuscumque alterius Conventus committere. Item declaramus, quod nec Supprior, nec Vicarius institutus à Priore, potest in absentia Prioris alium Vicarium substituere, nisi sibi specialiter committatur per Priorem, dicendo in tuo recessu: Ego instituo in Vicarium illum, vel illos, quos instituendos duxeris; sicut fuit declaratum Tolotæ 1328. Item cum absentia Supprioris sit Conventui valde damnosa, nullo modo debent Suppriores in socios Priorum eligi: qui autem oppositum fecerint, debent graviter puniri, ac voce privati, sicut fuit ordinatum Bononiæ 1275. & Tolotæ 1304. Si tamen Suppriores Conventuum fuerint Prædicatores Generales, quia habent vocem in Capitulo Provinciali, possunt ire ad Capitulum Provinciale: ut fuit declaratum Romæ 1608. declarat. 1.

Item declaramus, quod Suppriores, & Vicarii Priorum in absentia Prioris, non possunt recipere Fratres ad Ordinem, vel professionem, neque etiam ad sacros Ordines promovere: sicut fuit ordi-

natum apud Montem Pefulanum 1394. possunt tamen absentibus Prioribus, per Privilegium, quod dicitur *Mare magnum*, omnes Fratres suorum Conventuum, vel ad eos declinantes, ab omnibus excessibus, & ceniuris à jure, vel à Judice generaliter promulgatis absolvere, ac Sacramenta Eucharistiæ, & Extremæ unctionis eis administrare. Londini 1335. & Valencenis 1337.

(u) *Supprior mortuo priore, vel amoto, vices ejus in omnibus plenarie obtineat.* ) Declaramus, quod per Constitutiones nostras, mortuo, vel amoto Priore, cum Supprior vices ejus plenarie in omnibus obtineat, poterit in tali casu agere quicquid Prior jure ordinario potest: & ideo poterit Vicarium instituere, Fratres ad probationem, vel ad professionem recipere, Confessorem eligere, & aliorum Fratrum confessiones audire, & alios pro audientia Fratrum exponere. Quia cum sit in tali casu quasi ordinarius, & potestatem, ac jurisdictionem ordinariam habens, poterit præiusta, & quæcumque alia facere, quæ Prior jure ordinario potest. Non poterit autem Fratres præsentare Episcopis pro confessionibus secularium audiendis, vel Ordinibus suscipiendis, vel alia hujusmodi facere, quæ Priori competunt, non de jure, sed ex commissione. Et hæc eadem potest Vicarius electus à Patribus mortuo, vel amoto Priore in absentia Supprioris: quia in tali casu Vicarius non est delegatus, sed habet jurisdictionem ordinariam per legem sibi datam.

(x) *Et in Domo præsens extiterit.* ) Declaramus, quod Prior Conventualis noviter electus, & confirmatus, antequam veniat ad suum Conventum, non potest Suppriorem à suo officio remove: quia per legem, seu per Constitutionem, vices ejus plenarie gerit in omnibus, quousque ipse Prior præsens in Domo extiterit. Postquam verò semel in Conventu præsens fuerit, & postea à Conventu recesserit; poterit etiam existens extra suum Conventum, Suppriorem, vel etiam Vicarium à Patribus electum absolvere: & alia quæ ad suam jurisdictionem pertinent, quoad Fratres sui Conventus exercere. Similiter poterit Prior Conventualis Suppriorem institutum à Priore Provinciali absolvere, ut declaratur in Capitulo Barcinonæ 1574. declarat. 12. Sed hoc de absolutione Supprioris intelligendum est juxta declarationem Capituli Valentini 1596. declarat. 7. quod possit absolvi à Priore, de Patrum tamen consilio per vota secreta.

Item declaramus in Capitulo Barcinonæ 1574. declarat. 11. fuisse declaratum: Suppriores non habere locum extra Conventus, quibus præsunt, neque etiam super Baccalaureos subditos suos, quos solent præcedere in suo Conventu; si contingat Suppriorem, & Baccalaureum ejusdem Conventus, ad alium Conventum simul declinare.

(y) *Nisi Prior Provincialis aliter ordinaverit.* ) Declaramus, quod mortuo, vel amoto Priore, Prior Provincialis potest Suppriorem à suo officio absolvere, vel autoritatem ejus limitare; etiam antequam Prior electus fuerit, vel confirmatus, vel præsens in Domo extiterit. Et poterit in eodem Conventu Vicarium instituere Fratrem alterius Conventus, qui habebit vocem in electione, & aliis negotiis, & tractatibus illius Conventus; sicut fuit declaratum Cadurci 1319. Non potest tamen in illa electione vocem passivam habere in eodem Conventu: quod si factum fuerit, totum sit irritum & inane, ut fuit ordinatum Romæ 1553. ordinat. 2. & 1558. & Avenione 1561. & Bononiæ 1564.



## I X.

(2) **SI** vero mortuo Priore, vel amoto, vel absente, Domus Suppriorum præsentem, (a) vel Vicarium Prioris (in ejus absentia) non habuerit; tres Patres illius Conventus præsentem, & vocem in electionibus habentes, qui primitus Habitum nostri Ordinis susceperunt, si tamen post professionem à nostro Ordine nullatenus discesserunt, nisi per Magistrum Ordinis, vel Provinciale, vel Generale Capitulum cum eis fuerit dispensatum (b) aliquem Fratrem de Conventu illo, in Domo præsentem antequam comedant, & bibant eligere teneantur, renuntiatione qualibet non obstante. Qui vices supradictas Prioris obtineat, quousque Domus ipsa Priorem præsentem habeat, vel Suppriorum, vel Vicarium Prioris in ejus absentia: vel Prior Provincialis, vel Conventualis aliter ordinaverit. Quod si prædictis tres non concordaverint, duorum sententia ad providendum, sive de uno ipsorum trium, sive de aliquo alio Fratre Conventuali præsentem, prævalebit.

(2) *Si vero mortuo Priore, vel amoto &c.*) Declaramus, quòd mortuo, vel amoto Priore, si Domus non habuerit Suppriorum, vel Vicarium ejus, vel alicujus alterius Superioris; tres Patres antiqui, qui diutius Habitum nostræ Religionis post professionem portaverunt, & assignati sunt in præfato Conventu, tenentur eligere unum Vicarium: qui in tali casu poterit in electione cum aliis duobus vota recipere, & omnia facere, quæ potest Supprior mortuo, vel amoto Priore, sicut declaratum est Cadurci 1319.

(a) *Vel Vicarium Prioris.*) Declaramus, quod cum mortuo, vel amoto Priore, Vicarius ab eo institutus etiam removeatur, & non remaneat amplius Vicarius, sicut declaratum fuit Burgis 1396. & Romæ 1601. illud verbum (vel Vicarium Prioris) non debet referri ad illud, mortuo, vel amoto Priore; sed ad illud verbum, vel absente Priore: & in tali casu, videlicet in absentia Prioris, si Domus Suppriorum, vel Vicarium ejus, vel Vicarium Prioris non habuerit: tunc tres Fratres illius Conventus, qui diutius Habitum nostræ Religionis post professionem portaverunt, tenebuntur aliquem Fratrem de illo Conventu in Vicarium eligere: qui vices Prioris in omnibus plenarie obtinebit, quousque Domus ipsa Priorem præsentem habeat, vel Suppriorum, aut Vicarium Prioris; vel Prior Provincialis, vel Conventualis aliter ordinaverit. Ex quo patet, quod verbum illud, vel Vicarium Prioris, refertur ad absentiam, & non ad remotionem Prioris: quia Prior remotus ab aliquo Conventu, non potest de illo aliquid disponere, vel ordinare; quod tamen potest in sua absentia facere. Et propter hoc in Capitulo Barcinon. 1261. cum in prædicta clausula: Si vero mortuo, &c. nulla fieret mentio de absentia Prioris, nec de ejus Vicario; fuit statutum, & confirmatum, ut sic diceretur: Si vero mortuo Priore, vel amoto, addatur, vel absente. Et infra: Et domus Suppriorum præsentem non habuerit: addatur, vel Vicarium Prioris. Et infra, ubi dicitur, vel Prior Provin-

Cod. Regul. Tom. IV.

cialis, addatur, vel Conventualis aliter ordinaverit. Et ita bene apparet, quod prædicta clausula, quæ solum se extendebat ad eligendum Vicarium in casu mortis, vel remotionis Prioris; nunc per illas tres dictiones additas, etiam se extendit in casu absentiae ipsius Prioris. Item declaramus, quod Priores absoluti à suis officiis, ad illos Conventus, de quibus fuerunt assumpti, pertinebunt; nisi per Superiores de illis aliter fuerit ordinatum.

(b) *Aliquem Fratrem de Conventu illo, &c.*) Declaramus, quod aliquis Frater proprie dicitur esse de aliquo Conventu, qui est in illo assignatus per Priorem Provinciale, vel per Magistrum Ordinis, vel eorum Vicarios, vel per Capitulum Generale, vel Provinciale. Et talis proprie dicitur esse Conventualis illius Conventus, etiam si non fuerit in illo professus. Non possunt ergo illi tres Patres aliquem Fratrem eligere in Vicarium; nisi fuerit in illo Conventu; assignatus sic enim poterit dici esse de illo Conventu, vel Frater Conventualis illius Conventus, sicut fuit alias declaratum Tolosæ 1328.

## X.

**Nulli** autem Præsidenti Ordinis liceat alicui extra obedientiam nostri Ordinis existenti, curam committere super Fratres, vel Conventus Ordinis quomodocumque: nisi Prælatis ex Ordine nostra assumptis supra Socios eis deputatos, & quamdiu sunt eorum Socii; & nisi supra apostatas, & vagos, hoc est sine Ordinis licentia extra Ordinem commorantes, quamdiu sic extra manent. Super quos volumus, quod non solum Magister Ordinis, sed etiam Priores Provinciales, & eorum Vicarii possint potestatem concedere omnibus Ecclesiasticis personis. Quod si secus factum fuerit, sit irritum, & inane. Fratres vero nostros, tam in Episcopatu precise titulari, vel alias infra Episcopatum constitutos, & beneficiatos, vel exemptos ab Ordine, (exceptis Magistro Sacri Palatii, & Pœnitentiariis perpetuis D. Papæ, qui sequuntur Romanam Curiam, eorumque Socii,) nolumus in nostris Conventibus ultra triduum retineri: absque licentia Provincialis cum consensu (ad minus) duarum partium Conventus obtenta. Alioquin suspensionem à suis officiis incurrant Præsidentes, ipso facto contrafacientes.

*Nulli autem Præsidenti Ordinis liceat &c.*) Declaramus, quòd cum Ordo noster sit immediate subiectus Romano Pontifici, & exemptus ab omni potestate, & jurisdictione quorumcumque Prælatorum, qui non sunt de Ordine; & cum etiam nullus Præsident, vel Frater Ordinis possit renunciare cuicumque privilegio nostro Ordini concessio, absque assensu Capituli Generalis, propter hoc hic prohibetur, ne alicui Præsidenti Ordinis liceat cuicumque extra obedientiam nostri Ordinis existenti committere curam, vel auctoritatem dare super Fratres, vel Conventus Ordinis nostri: quod si secus factum fuerit, irritum sit, & inane, & illi qui talem auctoritatem hujusmodi personis dederint, I. vel

vel alicui privilegio Ordinis renunciaverint, debent pœna gravioris culpæ puniri, à qua non possunt, nisi per Magistrum Ordinis, vel Priorem Provinciale, vel per Generale, vel per Provinciale Capitulum dispensari.

Item declaramus Vallisoleti 1605. ordin. 12. ordinatum fuisse, ut in Provinciis, in quibus hactenus parentes litteræ confirmationis Priorum in Capitulo legi non consueverunt, deinceps legantur coram Fratribus in Refectorio, vel Capitulo: notando in eisdem litteris diem, & horam, quibus fuerint intimatæ.

### CAPUT III.

#### *De Electione Prioris Provincialis.*

##### I.

(a) **S**Tatuimus, & ordinamus, ut mortuo vel amoto Priore Provinciali, vel ipso, & eo cui vices suas commiserit, extra Provinciam existente; Prior Conventualis illius loci, in quo primum Capitulum Provinciale fuerit celebrandum, vices ejus obtineat; quousque Prior Provincialis illius Provinciæ sit electus, & confirmatus; & ipse, vel ille, cui vices suas commiserit, præsens in Provincia extiterit. Quod si Capitulum Provinciale ex aliqua causa, ad Conventum alium transferatur, (quæ translatio fiat per Priorem Provinciale, vel ejus Vicarium, de consilio discretorum) post translationem, Prioris Vicarii potestas expiret, & Prior loci illius, ad quem Capitulum fuerit translatum, vices Prioris Provincialis, in omnibus obtinebit.

##### II.

**I**dem dicimus, si Capitulum Generale contigerit ad aliam Provinciam transferri: videlicet, quod autoritas Vicariæ ad Provinciale illius Provinciæ cum Capitulo transferatur. Si autem Conventus ille, cui Capitulum assignatum fuerat, vel translatum, Priorem non habuerit, vel, vel cum infra tempus Vicariæ suæ mori, vel amoveri contigerit, vel extra Provinciam esse: durante ejus absentia Prior illius Domus, ubi Provinciale Capitulum antecessens fuerat celebratum, & vices Prioris Provincialis in omnibus obtinebit; & sic deinceps retrocedendo, quousque Conventus ille, in quo Provinciale Capitulum fuerit celebratum, Priorem habuerit: qui vices Prioris Provincialis in omnibus obtinebit, donec Prior illius Provinciæ sit electus, & confirmatus: vel Magister Ordinis, vel Generale Capitulum in prædictis casibus aliter ordinaverit; vel ipse Provincialis, vel cui vices suas commiserit, præsens in Provincia extiterit.

(a) *Statuimus &c. & infra: Pices ejus obtineat.*) Declaramus, quod ille qui amoto, vel mortuo Priore Provinciali ex vi Constitutionum gerunt vices Provinciales in omnibus, nullam habent ex hoc super Sorores nostri Ordinis potestatem: sicut fuit declaratum Victoriæ 1331. & Argentinæ 1307. Veruntamen Julius Papa II. per suas litteras in forma Brevis, Fratri Thomæ de Dio Cajetano tunc Vicario Ordinis, & omnibus Vicariis pro tempore, Ordinis, Provinciarum, Conventuumque ejus, mortuis, vel amotis, Magistro Ordinis, Prioribus Provincialibus, vel Conventualibus omnem potestatem, & facultatem, tum Apostolica autoritate, quam quomodolibet aliter concessam, & in posterum concedendam, Magistro, Prioribus Provincialibus, vel Conventualibus præfati Ordinis (exceptis illis, quæ in Constitutionibus dicti Ordinis specialiter illis inhibentur) respectivè concessit de gratia speciali, die 7. Decembris, anni 1507.

##### III.

**S**I verò Prior illius Conventus, ubi Provinciale Capitulum fuerit celebrandum, in Provincia præsens extiterit, sed aliqua ex causa Capitulo Provinciali non interfuerit; simili modo Prior illius loci, ubi fuerat præcedens Capitulum celebratum, vices Prioris Provincialis (in ipso tantum Capitulo, durante absentia prædicti Prioris) in omnibus obtinebit. Finito vero Capitulo, Prior Domus in qua Capitulum illud fuit noviter celebratum, vices Prioris Provincialis (eo modo quo supra dictum est) in omnibus obtinebit. (b) Si autem Priorem Provinciale in Capitulo Generali, vel medio tempore usque ad Capitulum Provinciale, vel in ipso Capitulo Provinciali mori, vel amoveri, vel quocumque casu infra illud tempus Provinciam aliquam Priore Provinciali carere contigerit, vel carentia ipsa duraverit, ad ipsum Capitulum Provinciale ejus electio pertinebit: qua peracta Capitulum Provinciale celebretur.

##### IV.

(c) **Q**Uod si nec ipse in ipso Capitulo electus, nec alius fuerit confirmatus; vel post Provinciale Capitulum Priorem Provinciale mori, vel amoveri contigerit: qui ejus locum obtinet, teneatur convocare quantocius poterit Electores; & in die ad eligendum assignata Prior Provincialis eligatur, vel postuletur, & Provinciale Capitulum celebretur; nisi prius celebratum fuerit. Quod si in die statuta non elegerint, vel postulaverint, qui debent eligere; ad Magistrum Ordinis potestas providendi transferatur. Quod si Fratres cujuscunque Provinciæ, infra annum postquam eis constiterit, quod Provincia caret suo legitimo Provinciali, non elegerint, vel  
non

non postulaverint Provinciale; ipso facto electio, & provisio de Provinciali, sit ad Magistrum Ordinis devoluta.

(b) *Si autem Priorem Provinciale in Capitulo Generali &c.* Declaramus, quod circa initium Ordinis usque ad annum 1357. ubi fuit ista Constitutio confirmata; singulis annis fiebant Capitula Provincialia post Capitulum Generale. Et si Prior Provincialis, post Provinciale Capitulum moriebatur, vel amovebatur: ante Generale Capitulum convocabantur Electores, & in die statuta eligebatur Prior Provincialis: & tunc non celebrabatur Capitulum Provinciale, quia jam erat celebratum. Si verò amovebatur, vel moriebatur Prior Provincialis in ipso Capitulo Generali, vel post, usque ad diem statutam pro Capitulo Provinciali; convocabantur Electores, & in die statuta eligebatur Provincialis: & postea Capitulum Provinciale celebrabatur, in quo recitabantur acta Capituli Generalis illo anno celebrati. Sed postmodum ad evitandas expensas, & ad tollendam confusionem, quæ sequi videbatur, fuit facta ista Constitutio: per quam statutum fuit: si contingeret Priorem Provinciale in Capitulo Generali, vel medio tempore usque ad Capitulum Provinciale, vel in ipso Capitulo Provinciali mori, vel amoveri, vel quocunque casu contingeret infra illud tempus Provinciam aliquam Priore Provinciali carere, vel ipsam carentiam etiam ante illud tempus inceptam, infra illud tempus durare, tunc electio pertinere deberet ad Capitulum Provinciale, & non ad Electores: hoc est ad Priores cum singulis Sociis, & ad Magistros in Theologia, & Prædicatores Generales. Et facta electione in die statuta, Capitulum Provinciale debet celebrari. Ubi est advertendum, quod si etiam ante Capitulum Generale Provincia inceperit Priore Provinciali carere, sed non potuerunt forte Electores ante Capitulum Generale congregari, nec electionem facere, vel si potuerunt, & electionem fecerunt, electus non fuit confirmatus, & sic carentia duravit usque ad Capitulum Generale: tunc & eo casu electio Prioris Provincialis pertinebit ad Capitulum Provinciale, & non ad Electores, sicut declaratum fuit Valentiniæ 1364. Januæ 1365. & Avenione 1367. Et demum in Constitutiones redactum in Capitulo Romano 1558. quod inchoatum fuerat Salman 1551. & approbatum Romæ 1553.

(c) *Quod si nec ipse in ipso Capitulo electus, nec alius fuerit confirmatus.* Declaramus, quod cum per privilegia sit nobis concessum, quod quando in aliquo Capitulo, vel Conventu nostri Ordinis, de Provinciali, vel Conventuali Priore occurreret electio facienda, si ex aliqua causa electionem factam contingat forsitan non confirmari: Superior ad quem confirmatio talis electionis pertinet, autoritate Apostolica concedere poterit, & in Priorem confirmare, aliquem de illis Fratribus, quos ipsi Electores, vel major pars eorum per litteras suas ab eo petierint, quando ad ipsum pro electi confirmatione transmittunt. Et propter hoc dicit hic Constitutio: quod si nec ipse in Capitulo electus, nec alius (scilicet postulatus) fuerit confirmatus, ille qui locum Provincialis obtinet, teneatur convocare quam citius poterit Electores.

## V.

**V**olumus autem quod electio prædicta (quæ non in ipso Capitulo Provinciali, Cod. Regul. Tom. IV.

sed post Capitulum debet celebrari) tantum spectet ad Priores Conventuales, & ad Prædicatores Generales: & unum Fratrem de quolibet Conventu, ad hoc idem pro qualibet electione de Priore Provinciali fienda (si pluries fieri contingerit) noviter electum; (Romæ 1558.) nisi Confirmator præsens fuerit, vel in tam parva distantia, quod ante dissolutionem Prioris Congregationis, potuerit de cassatione electionis prius factæ (si eam cassari contingat) nuncius pervenire. Tunc enim & secunda, & tertia (si opus fuerit) electio, ad eosdem pertinebit. Qui Elector, à majori parte medietate Conventus, (d) per disquisitionem Supprioris, vel vices ejus gerentis, & duorum Fratrum, qui primitus Habitum nostri Ordinis susceperunt, nec post professionem suam ullatenus à nostro Ordine discesserunt (nisi per Magistrum Ordinis, vel Generale, aut Provinciale Capitulum cum eis fuerit dispensatum) omnibus Fratribus ad Conventum illum pertinentibus convocatis: (si infra unam dietam ad eos possit nuncius pervenire) eligi debet. Et hoc idem in electione Prioris Conventualis, (e) & tractatu eorum quæ mittenda sunt ad Capitulum Provinciale, observetur. Qui secundum formam inferius in electione Magistri positam, electionem hujusmodi celebrabunt: hoc excepto; quod eos includi, sicut in electione Magistri, non oportet.

(d) *Per disquisitionem Supprioris.* Declaramus, quod in electione electorum Priorum Provincialium, Prior Conventualis debet habere primam vocem: non obstante illa Constitutione, quæ dicit: quod in electione prædicta Supprior cum duobus Patribus debet vota Fratrum discutere, sicut fuit declaratum in Capitulo Lucæ 1288. & Argentiniæ 1296.

(e) *Et tractatu eorum quæ mittenda sunt ad Capitulum.* Declaramus, quod ad Priores Conventuales non spectat ordinare, vel se intromittere de tempore, vel die instituendo, si ve de quocunque alio eorum, quæ ad tractatum Provincialis Capituli, vel electionem socii pertinent: sed assignatio diei, in quo tractari debent ea, quæ ad electionem socii Prioris, & ea quæ ad Capitulum Provinciale mittenda sunt, pertinent ad Suppriorum; nec Priores electioni socii interesse debent, sicut declaratum fuit apud Montem Pefulanum 1271. & Lugduni 1274. & Barcinonæ 1223. Et tractatus eorum quæ mittenda sunt ad Capitulum, non possunt ultra unum diem prolongari.

Item declaramus, quod socii Conventuum electi ad Capitulum Provinciale, vocem tantum habeant in Capitulo Provinciali illius anni, pro quo fuerint electi. Si autem ex causa, vel impedimento, à Capitulo Provinciali, illo anno supersedeatur, ad tractatum Capituli Provincialis anni sequentis, ex vi talis electionis non admittantur: sicut fuit declaratum Ferrariæ 1362. In Capitulo etiam Bononiæ 1564. ordinatum fuit, quod qui in uno Conventu fuerit electus semel in socium Prioris Conventualis, euntis ad Capitulum Provinciale, in eodem Conventu non



possit eligi in socium Prioris pro Capitulo Provinciali immediatè sequenti : & si secus fiat, irrita electio censetur. Ubi etiam fuit declaratum, quod Provinciales qui suum officium expleverint, aut etiam fuerint absoluti, ad idem officium in eisdem Provinciis, non possint eligi, nisi post tempus, quo duorum Provincialium officium durare solet : ut etiam superius ex Constitutione Julii II. dictum est. Similiter si ante mortem, vel amotionem Prioris Provincialis, aliquis Conventus de electione socii Prioris tractatum fecerit, & aliquem Fratrem in Socium elegerit : si contingat postea electionem ipsius Provincialis fieri per electores, & non per Capitulum Provinciale, non erit talis Frater sic electus verus socius ; sed oportebit post mortem ipsius Provincialis, vel amotionem, aliquem in socium de novo eligi, sive numerari, sicut declaratum fuit Brivæ 1346.

## VI.

**Q**uod si Magister Ordinis, vel Capitulum Generale, aliquem Fratrem illius Provinciæ Vicarium instituerit in eadem ; volumus ipsum Vicarium in electione prædicta vocem habere. (f) Tres autem Priores Conventuales, qui primitus Habitum nostri Ordinis susceperunt (quum electio per scrutinium facienda est) voluntates singulorum sigillatim, & seorsim aliquantulum in eodem loco coram oculis omnium disquirant, & scribant : deinde scripturam in medium publicent, expressis nominibus eligentium, & electorum. Et facta collatione numeri ad numerum, si omnes, vel major pars ultra medietatem omnium eligentium in unum concordaverint, & minor pars interrogata majori consenserit ; ille, qui primam vocem habuit inter electores, surgens dicat : Ego Frater N. vice mea, & omnium electorum præsentium, eligo Fratrem N. in Priorem Provinciale talis Provinciæ. Si vero non omnes consenserint, & tamen major pars ultra medietatem (ut dictum est) unum elegerit ; tunc (sicut prius) qui primam vocem habuit, dicat : Ego Frater N. pro me, & his qui mecum consentiunt, eligo Fratrem N. in Priorem talis Provinciæ.

## VII.

**I**lle autem supradictus Elector, illo anno sit Socius Prioris Conventualis euntis ad Capitulum Provinciale, si tunc fuerit celebrandum. Quod si eum impediri contingat, antequam iter ad eundem ad electionem arripuerit, Conventus alium possit eligere loco ipsius. Idem dicimus de Socio Prioris Conventualis, euntis ad Capitulum Provinciale, electo. (g) Instante vero Prioris Provincialis electione, Priorum Conventualium absolutionem (nisi ob causam criminis, vel gravis scandali, vel ipso Priore petente,

vel in Capitulo Provinciali à Diffinitorio illius tunc post electionem Prioris Provincialis factam, licet pendentem quoad confirmationem) fieri totaliter prohibemus. Instare autem electionem Prioris Provincialis dicimus, quandocumque Provincia non habet Priorem Provinciale præsentem, vel absentem.

(f) *Tres autem Priores Conventuales &c.*) Declaramus, quòd in electione Prioris Provincialis, tres Priores Conventuales qui diutius post Professionem Habitum nostri Ordinis portaverunt, debent vota electorum recipere : juxta formam in Capit. Bononiæ 1564. traditam, & supra in Cap. 2. de electione Prioris Conventualis positam.

(g) *Instante vero Prioris Provincialis electione.*) Declaramus, & volumus, quod sicuti imminente electione Priorum Conventualium non debent fieri mutationes Fratrum infra duos menses (ut supra dictum est ex Constitutione Clementis VIII.) ante electionem prædictam, nisi in casibus expressis in Constitutionibus : simili modo declaramus, & volumus quod non fiant mutationes Fratrum, privationes vocum, absolutiones Priorum, à tempore notitiæ carentiæ Provincialis in aliqua Provincia, usque ad notitiam confirmationis ejusdem ; nisi in casibus in Constitutionibus contentis ; sicuti fuit declaratum Veneriis 1357. Brugis 1369. & Coloniae 1391.

## VIII.

**P**rior autem Provincialis supradicto modo electus, (b) poterit per Magistrum Ordinis confirmari, vel ejus electio cassari ; si ipsi Magistro videbitur. Quod si Ordo Magistrum non habuerit, ipsum electum confirmandi, vel infirmandi, & ad dicti officii susceptionem compellendi, Vicarius Ord. habeat potestatem. Si vero post confirmationem, per Magistrum Ordinis factam, antequam ad electum ipsa confirmatio perveniat, Magistrum Ordinis mori, vel amoveri contigerit, confirmatio suum sortiatur effectum.

## IX.

(i) **S**tatuimus autem, ut Prior Provincialis in Capitulo Generali à Magistro, & Diffinitoribus Capituli (præmissa diligenti examinatione) confirmetur, vel amoveatur.

(h) *Poterit per Magistrum Ordinis confirmari.*) Declaramus, quòd Magister Ordinis per privilegia Bonifacii VIII. & Clementis VII. potest omnes, & singulos Fratres dicti Ordinis, Inquisitores, ac Priores Provinciales, & Conventuales, & alios quoscumque Officiales dicti Ordinis, ac Priorissas Monasteriorum in dicto Ordine, & per Sedem Apostolicam, vel per quoscumque, & quavis autoritate deputatos, quoties sibi videbitur revocare, & à suis Officiis remove : etiam si eis per Sedem Apostolicam fuisset concessum, quod à suis prælationibus, vel Officiis removeri non possent ; & loco ipsorum alios, vel alias substituere, ac officia ip-

ipsa limitare, ac in Curia Romana Procuratorem instituire, & institutum ab ipso Officio removere quoties sibi, & suis successoribus videbitur expedire. Item declaramus Bonon. 1615. istud ordinatum fuisse: Ad expensas in Provinciis, & alia varia inconvenientia evitanda, electionis Provincialium scrutinia ad Magistrum Ordin. per Tabellarios, aut Fratres Conventos five Tertiarios mittantur. Si vero aliquando per Patres graviores ex causa urgentissima, hujusmodi scrutinia mittere necesse fuerit; hoc arbitrio Magistri Ordin. probandum, vel improbandum relinquitur. Caveant autem Fratres Provinciarum, ne facile sese electionibus Provincialium opponant, aut protestationes de invaliditate earum faciant; alioquin pro suis ausibus temerariis à Magistro Ordinis gravissimè puniantur.

Item declaramus, quòd si Priores Conventuales, in Provinciales electi fuerint, statim ut Provincialatus confirmationem acceperint, ab officio Prioratus censeantur absolvi; etiamsi talis absolutio in literis confirmationis non fuerit expressa. Bononiæ 1564. declarat. 1.

(i) *Statuimus autem, ut Prior Provincialis in Capitul. Generali &c.* ) Declaramus, hoc ita esse intelligendum, si tunc in proximo Generale Capitulum celebrabitur: aliàs per Magistrum Ordinis de consilio Patrum debet confirmari, prout superius dictum est.

Item declaramus, Romæ 1546. fuisse ordinatum, quod si pendente confirmatione Provincialis in aliqua Provincia, & finito Capitulo Provinciali, electum mori contingerit, Vicariatus ejusdem Provinciæ pertineat ad illum Priorem, in cujus Conventu sequens Capitulum fuerit assignatum.

## X.

**P**Rior autem Provincialis eandem habeat potestatem in sua Provincia, quam & Magister Ordinis: (k) & eadem sibi reverentia, & obedientia à Comprovincialibus exhibeatur, quæ Magistro Ordinis, nisi Magister præsens extiterit. Item Prior Provincialis totam suam Provinciam per se (si poterit) vel Vicarios idoneos teneatur singulis annis visitare, quibus auctoritatem suam committat, prout sibi videbitur expedire.

## XI.

**P**Riores autem Provinciales quum fuerint absoluti, ad illos Conventus pertineant, de quibus fuerunt assumpti: nisi per Superiores suos de eis aliter fuerit ordinatum. Si vero in Provincialatu decesserint libri, & alia quæ habuerunt per provisionem Ordinis à Provincia, vel etiam ab aliquo Conventu antequam essent Provinciales, vel in ipso Provincialatus officio; ad Provinciam, vel Conventum, unde habuerunt simpliciter pertinebunt. (l) Ea vero quæ acquisiverunt tempore Provincialatus; ad Provincias quarum erant Priores spectabunt pro medietate, & pro medietate ad Conventus suos quorum sunt filii. Alia vero om-

nia sint Conventuum suorum quorum sunt filii. Et idem dicimus de bonis Procuratoris Ordinis. Relicta autem Magistri Ordinis, quæ acquisivit in Magisterio; pro medietate sint sui Conventus originalis, alia vero medietas ad commune Ordinis bonum pertineat.

## XII.

**S**Tatuimus autem, ut in singulis Provinciis Priores Provinciales, vel eorum Vicarii, & Definidores Capituli Provincialis, Provincias suas per Vicarias distinguant, secundum quod eis videbitur expedire. Quibus singulis, Vicarios præficiant, qui non sint Priores, vel Lectores actu legentes, nisi prius à suis officiis absolvantur; & requisito consilio Fratrum præsentium ad dictas Vicarias pertinentium, qui sint de corpore Capituli Provincialis. Qui Vicarii in Domibus sibi assignatis, Prioris Provincialis plenarie vices gerant: exemptis dumtaxat institutione, & destitutione Priorum, & Lectorum; & ubique loca sua teneant, nisi in Capitulo, dum officium suæ Vicariæ exercent; quorum potestas in die immediatè præcedente electionem Definitorum Capituli Provincialis expiret. Hos autem Vicarios, Prior Provincialis corrigere possit, & ex causa rationabili amovere.

(k) *Et eadem sibi reverentia &c.* ) Declaramus, quòd Priores Provinciales extra suas Provincias debent præcedere Priores Conventuales tam in loco, quam in processibus, & in dicendo *Fiscium*. Similiter in Refectorio habebunt locum nolæ, absente Præsidente Provinciæ: cum ille non sit locus iudicii, sed dignitatis; ut habetur inferius cap. 13. In Capitulo autem, cum extra Provinciam suam nullam habeant iurisdictionem, habebunt locum immediatè à dextris Præsidentis Capituli, sicut fuit declaratum Romæ 1468.

Item declaramus, nonnulla in diversis Capitulis ordinata esse pro officio Provincialium. Imprimis, ne multa à Provincialibus provisa, à memoria elabantur, utque falsificationibus litterarum ostium omnino occludatur, ut librum habeant, Regestum nuncupatum, in quo præcipuæ res, & acta eorum annotari debeant. Vallisole 1605. ordinat. 13. Item nullus omnino Provincialium, inconsulto Magistro Ordinis, contributiones pro sui officii usu, & necessitatibus in Provincia augere valeat. Expensas vero extraordinarias pro communi bono Provinciæ, de consilio Capituli Provincialis, aut Provinciæ, id est, Magistrorum Provinciæ, & eorum qui fuerint Provinciales, constituere poterit. Bononiæ 1615. ordinat. 13.

Item ad tollenda omnia Fratrum subditorum gravamina, vera, vel prætexta: ordinatum est Valentini 1596. ordinat. 23. quod Provinciales quarumcumque Provinciarum, & Vicarii Congregationum, five Vicariarum, expleto officio sui regiminis, debeant subire iudicium suæ administrationis, hunc in modum videlicet. Quatuor Definidores Capituli electionis suæ successo-

ris, vocabunt ad Deffinitorium ex vocalibus illius Capituli, primo Patres qui fuerunt Provinciales ejusdem Provinciae: deinde antiquiores Magistros in Capitulo existentes, ita ut senarius numerus compleatur; cui addito quaternario ipsorum Deffinitorum, resulabit numerus denarius. Hi itaque decem tenebuntur singuli duos Patres de praesentibus in Capitulo, ad id magis aptos, & idoneos, in ipsorum conscientia, secreto, & per schedulas nominare. Hæc autem omnes schedulae in vias aliquot mittentur; inde forte una extrahetur, & in illa nominatus Pater, Judex erit ad querelas audiendas, & examinandas contra Provinciale praeferitum. Extrahentur, & aliae duae, in quibus nominati Patres, praefati Judicis consultores habebuntur, pro sententia dumtaxat ferenda, cum assensu Provincialis noviter electi: & pro discernendo: an ultra tempus Capituli quandoque durare debeat praenominati judicis autoritas, causa capiendi aliquas informationes extra locum Capituli; quæ an necessario sumi debeant nec ne, attentata negotii qualitate, videbunt ipsi una cum Provinciali electo, ut supra: pariterque Judici terminum praefigent, intra quem eas accepisse debeat, & ad sententiam venire. Excipiuntur ab hoc modo judicii, Superiores quilibet absoluta autoritate à Magistro Ordinis, vel ejus Vicario, Apostolico etiam interveniente indulto, dati, & instituti: quibus Magistro Ordinis, aut illius Vicario Judicem praescribere erit potestas, cui rationem reddere teneantur.

Verum hæc ordinatio, fuit postea revocata in capit. Romano 1601. revocatione 4. ubi sic dicitur: Revocamus ordinationem 23. Capituli Valentini 1596. qua praefigitur modus, quo subire judicium tenentur RR. AA. PP. Provinciales, & Vicarii Generales Congregationum. Terminato tamen officio, de datis, & acceptis, seu expensis, & receptis in officio, Deffinitorio Capituli Provincialis reddant rationem: & ea quæ supererunt reponantur in communi Provinciae deposito; sicut fuit ordinatum Romæ 1608. ordinat. 18., & Parisiis confirmatum 1611. confirmat. 10.

#### CAPUT IV.

##### *De electione Magistri Ordinis.*

##### I.

**S**Tatuimus, ut si ante festum Sancti Michaelis, vel in ipso festo, Magistrum Ordinis mori, vel amoveri contingerit; Prior Conventualis, vel Provincialis, qui propinquior illi loco extiterit, ubi Magister decesserit, Parisiensi, vel Bononiensi Conventui (sibi videlicet propinquiori) cum festinatione denunciaret. Alteruter autem istorum duorum Conventuum, cui primo denunciatum fuerit, teneatur similiter reliquis nunciare. Parisiensis Conventus, Provincialibus Hispaniæ, Provinciæ Tolosanæ, Angliæ, Scotiæ, Teutoniæ, Daciæ, Aragoniæ, Provinciæ Provinciæ, Portugalliæ, Bæthiciæ, & Germaniæ inferioris, Sanctæ Crucis, Hiberniæ, S. Joannis Baptistæ, S. Jacobi, S. Vincentii, & S. Antonini. Bononiensis vero Ungariæ, Romanæ Pro-

vinciæ, Regni Siciliae, Poloniæ, Terræ sanctæ, Græciæ, Bohemiæ, Dalmatiæ, Lombardiæ, Saxoniae, Trinacriæ, S. Thomæ, & Calabriæ, teneantur quantocius intimare. Si vero post dictum festum decesserit, vel amotus fuerit, ipsius obitus, vel amotio nihilominus nunciatur, ut supersedeatur illo anno à Capitulo Generali.

##### I I.

**M**ortuo igitur Magistro, vel amoto à Magisterio, Prior Provincialis illius Provinciae, ubi sequens Capitulum fuerit celerandum, vices Magistri Ordinis in omnibus obtineat, quousque Magister Ordinis sit electus; exceptis absolutionibus Priorum Conventualium aliarum Provinciarum, exceptis translationibus Fratrum de Provincia ad aliam, de quibus se nullatenus intromittat; nisi forte aliquis Frater, non Prior Provincialis existens, pro Provincialatus officio petere-tur. Si autem illa Provincia tunc Priorem Provinciale non habuerit, vel infra tempus Vicariæ suæ eum mori, vel amoveri contigerit; Prior Provincialis illius Provinciae, ubi immediate præcedens Generale Capitulum fuerit celebratum, vices obtineat supradictas; & sic deinceps retrocedendo, donec in aliqua Provinciarum, isto modo valeat Vicarius inveniri.

##### I I I.

**P**ostquam vero illa Provincia, in qua fuerit Generale Capitulum celebrandum, Priorem Provinciale habuerit confirmatum, ipse Prior Provincialis vices obtineat supradictas. (a) Priores autem Provinciales triginta unius Provinciarum, (b) singuli cum duobus Fratribus in Capitulo Provinciali electis à pluribus medietate omnium eligentium, ad Capitulum veniant Generale. Si autem in aliqua Provincia, Provinciale Capitulum fuerit celebratum, & in proximo festo Pentecostes electio Magistri fuerit facienda. Definitor Capituli Generalis in anno Deffinitorum, & Socius ejus sint illo anno Magistri Ordinis Electores. (c) In anno autem Priorum Provincialium, vel quando ex alia quacumque causa, Deffinitor, & Socius, vel Electores prædicti, non fuerint electi, neque suppetat tempus, ut eligantur, propter quodcumque (judicio discretorum) legitimum impedimentum: tunc duo de Deffinitoribus immediate præcedentis Capituli Provincialis, qui primitus Habitum nostri Ordinis susceperunt, (d) qui tunc superstites fuerint, ad electionem



nem Magistri Ordinis admittantur; quorum antiquior in Ordine sit illo anno Generalis Capituli Definitor. Qui si ad Capitulum non venerit, aut præcedentis Capituli extiterit Definitor, tunc ad definitionem Elector alius admittatur.

(a) *Priores autem Provinciales triginta unius Provinciarum.* ) Declaramus post factam hanc Constitutionem, autum fuisse numerum Provinciarum. Unde in Capitulo Romæ 1553. sic habetur: Declaramus conformiter ad ea, quæ in actis vetustissimorum Capitulorum Generalium reperta sunt; quod deinceps in Capitulis Generalibus, & ubique, Provinciæ nostri Ordinis fervare debeant infra scriptum ordinem, juxta quem tenebunt loca sua.

- I. Hispaniæ.
- II. Tolosanæ.
- III. Franciæ.
- IV. Utriusque Lombardiæ.
- V. Romanæ.
- VI. Regni.
- VII. Hungariæ.
- VIII. Teutoniæ.
- IX. Angliæ.

- X. Poloniæ.
- XI. Daciæ.
- XII. Græciæ.
- XIII. Terræ sanctæ.
- XIV. Aragoniæ.
- XV. Bohemiæ.
- XVI. Provincia Provinciæ sive Angelorum.
- XVII. Saxonæ.
- XVIII. Dalmatiæ.
- XIX. Trinacriæ.
- XX. Portugalliæ.
- XXI. Scotiæ.
- XXII. Bethiciæ.
- XXIII. Germaniæ inferioris.
- XXIV. Apuliæ S. Thomæ.
- XXV. Calabriæ.
- XXVI. S. Crucis Indiarum.
- XXVII. Hiberniæ.
- XXVIII. S. Jacobi de Mexico.
- XXIX. S. Joannis Baptistæ del Perù.
- XXX. S. Vincentii de Chiappa.
- XXXI. S. Antonini de novo Regno.
- XXXII. Occitana.
- XXXIII. S. Dominici Venetiarum.
- XXXIV. Nexciovanensis in Armenia.
- XXXV. S. Catharinæ Martyris de Quito.
- XXXVI. S. Laurentii de Chile.

Post stabilitum verò hunc Provinciarum ordinem, & in Capitulo Romano 1558. confirmatum, tractu temporis, accessit subsequens numerus (benedicente Domino) diversarum Provinciarum, quæ juxta antiquitatem suæ erectionis, & institutionis hoc ordine disponuntur; videlicet:

- XXXVII. SS. Rosarii Philippinarum, erecta Venetiis 1592.
- XXXVIII. S. Hyppoliti Martyris de Oaxaca, creata Venetiis 1592.
- XXXIX. S. Petri Martyris, instituta Romæ 1601.
- XL. S. Catharinæ Senensis Aprutina, creata ibidem Romæ 1601.
- XLI. S. Hyacinthi in Russia, instituta Romæ 1612.
- XLII. Parisiensis, stabilita, & confirmata Valentis 1647.
- XLIII. Lithuanæ, S. Angeli Custodis, erecta ibidem Valentis 1647.
- XLIV. S. Mariæ de Candelaria aliàs Canariarum, creata Romæ 1650.
- XLV. S. Ludovici, instituta & stabilita Romæ 1670.
- XLVI. S. Rosæ, creata, & stabilita novissimè Romæ 1686.

(b) *Singuli cum duobus Fratribus &c.* ) Declaramus, quòd si in aliqua ex relatis Provinciis, antequam mors, vel amotio Magistri Ordinis ei fuerit nunciata, Provinciale Capitulum fuerit celebratum, & in proximo festo Pentecostes electio Magistri fuerit celebranda; non erit opus aliud Capitulum Provinciale celebrare pro electione Electorum Magistri Ordinis: sed in anno Definitorum si electio Magistri fuerit celebranda, Definitor Capituli Generalis, & Socius ejus in Capitulo Provinciali immediate præcedenti electi, erunt illo anno Magistri Ordinis Electores. In anno autem Priorum Provincialium duo ex Definitoribus immediate præcedentis Capituli Provincialis, qui diutius post professionem, Habitum nostri Ordinis portaverunt, qui tunc superstitis fuerint, ad electionem Magistri Ordinis admittantur; quorum antiquior in Ordine, erit illo anno Capituli Generalis Definitor. Si vero in præfatis Provinciis, ante notitiam mortis, vel amorionis Magistri Ordinis, Capitulum Provinciale non fuerit celebratum: tunc celebrabitur Capitulum Provinciale, & in eo duo Electores eligentur à pluribus ultra medietatem omnium eligentium; quorum unus ad hoc electus, erit Generalis Capituli Definitor.

(c) *In anno autem Priorum Provincialium.* ) Declaramus, quòd mens hujus Constitutionis est; quod in anno Provincialium, si celebrandum sit Capitulum Generale in proximo festo Pentecostes, ubi electio Generalis deberet fieri,

& contingerit mori Generalem post Capitulum Provinciale, nullo modo debent celebrari Capitula Provincialia, ad constituendos novos vocales, cum Definitoribus Capituli Provincialis præcedentis, fuerit jam jus acquisitum; nec illa clausula interposita (vel quando ex alia quacumque causa &c.) huic rei facit negotium, cum tota sit rejicienda in annum Definitorum, nulloque modo pertineat ad annum Provincialium; sicut fuit declaratum Romæ 1583. iisdem ipsis verbis. Ubi etiam sic habetur: Item declaramus, verbum paulo infra in eadem Constitutione, ubi agitur de duobus Definitoribus mittendis ad Capitulum Generale pro electione Generalis quod habet locum in aliis duobus Definitoribus: adeo ut si deficiat primus aut senio, aut infirmitate, aut alio impedimento, substituantur secundus, secundo tertius, tertio quartus. Quod si omnes defecerint, recurrendum est ad Capitulum immediate præcedens; sicque retrocedendo quotusque suis Provincia possit gaudere suffragiis.

(d) *Qui tunc superstitis fuerint.* ) Declaramus, quòd si quis Definitorum in Priorem Provinciale electus, & confirmatus fuerit: talis quantum ad actum Definitorii debitum, cum ratione officii Provincialatus in tali casu electionis Magistri definire habeat, reputatur non superstitis: & ideo ad definitionem alius Elector admittetur, sicut fuit declaratum Lugduni 1348. ordinat. 5. & Barcinonæ 1349.

## I V.

(e) **Q**UI postquam congregati fuerint in Vigilia Pentecostes, à Prioribus Conventualibus illius Provinciæ, & à Fratribus præsentibus in loco, ubi fienda est electio, in uno conclavi firmiter includantur: ita quod inde egredi nullatenus valeant; nec eis ullo modo aliqua alimenta ministrentur, quousque Magister Ordinis secundum formam Canonicam sit electus. Hoc autem tam ab Electoribus, quam à recludentibus præcipimus firmiter observari. Quod si quis contraire præsumpserit, ipso facto sit excommunicatus, & pœnam graviori culpæ debitam sustinebit.

## V.

**F**orma autem electionis hæc est. Electoribus supradicto modo inclusis, cum per disquisitionem, vel scrutinium voluntatum procedet electio, tres de Prioribus Provincialibus, qui inter alios triginta, & unum Provinciales primitus Habitum nostræ Religionis susceperunt, voluntatem singulorum sigillatim, & seorsim aliquantulum in eadem Domo coram oculis omnium disquirant, & conscribant: deinde scripturam publicent in medium expressis nominibus eligentium, & Electorum. Quod si Dei gratia inspirante in unum aliquem omnes unanimiter concordaverint, ille verus Magister Ordinis habeatur. Si autem in partes inæquales se diviserint, ille in quem plures medietate omnium eligentium consenserint, (f) ex vi talis electionis, & hujus Constitutionis sit Ordinis Magister. Quod si aliquem, vel aliquos de Electoribus contigerit non venire: nihilominus tamen per eos, qui advenerint, electio Magistri Ordinis celebretur. Hoc autem ita fiat, ut semper in secunda feria Pentecostes Capitulum habeat Magistrum antiquum, vel novum præsentem, vel absentem; quia tunc incipit solemniter celebrari, ne acephalum judicetur.

(e) *Qui postquam fuerint congregati in Vigilia Pentecostes.* ) Declaramus, quod ante electionem Magistri, debet Vicarius Ordinis congregare Electores in aliquo loco, & cum illis habere tractatum de futuro Magistro eligendo. Et in die electionis debet cantari Missa de Spiritu Sancto, cui ipse cum Provincialibus, & aliis Electoribus debent interesse. Finita autem Missa, debet ad sonum campanulæ cum Electoribus, & aliis Fratribus intrare Capitulum: & ibi fieri sermo exhortatorius ad eligendum in Magistrum Ordinis virum prudentem, discretum, maturum, doctrina, & virtutibus ornatum, zelatorem Religionis, & non ignarum vitæ, & Observantiæ Regularis. Finito vero sermone, debet accedere ad Sacrificium, vel ad alium locum, in quo electio est facienda cum Provincialibus, &

Electoribus, & ibi debent in uno conclavi firmiter includi: ita quod ingredi, & egredi non valeant, nec eis ullo modo aliqua alimenta sunt administranda; quousque Magister Ordinis secundum formam Canonicam sit electus. Prædictus igitur Vicarius, Electoribus congregatis, postquam illi acceptaverint diem, locum, & horam electionis; debet semel, iterum & tertio protestationem facere, quod non intendit excludere ab electione non excludendum, nec admittere non admittendum: & absolutione à censuris ad cautelam facta, & invocata Spiritus Sancti gratia, debet ipse Vicarius duos ex Prioribus Provincialibus assumere, qui inter omnes Provinciales diutius post professionem Habitum nostræ Religionis portaverunt. Postea cum ipsis duobus Scrutatoribus, seorsim aliquantulum in eodem conclavi coram oculis omnium vota singulorum sigillatim, & secreto disquirere; expressis nominibus eorum, qui fuerint electi. Deinde facta sola collatione numeri ad numerum, si omnes, vel major pars ultra medietatem omnium eligentium, in unum concordaverint; tunc ille, qui primam vocem inter Scrutatores habuit, vice omnium eligentium formabit electionis Decretum, dicendo Ego Fr. N. vice mea, & omnium eligentium, mecum consentientium, eligo Fr. N. in Magistrum Ordinis Prædicatorum.

(f) *Ex vi talis electionis, & hujus Constitutionis, sit Ordinis Magister.* ) Declaramus, quod secundum privilegia Apostolica, Magister Ordinis postquam fuerit electus, eo ipso curam animarum Fratrum omnium ipsius Ordinis plenarie habet, & libere gerit: ipsosque Fratres auctoritate propria ligare, & absolvere, necnon in eodem Ordine ea agere potest, quæ ipse, & præfati Ordinis Definidores, juxta Constitutiones ejusdem Ordinis, secundum Deum viderint expedire. Tenenturque omnes Fratres sibi devotè, & humiliter secundum Regulam, & Constitutiones obedire: potestque ipsos ab omnibus officiis remove, & ab omnibus excessibus, & censuris, etiam Sedi Apostolicæ reservatis absolvere, atque in irregularitatibus dispensare. Et potest quascumque utriusque sexus personas, extra Curiam Romanam sibi confiteri volentes, ab eorum peccatis, excessibus, & casibus, in quibus minores Apostolicæ Sedis Pœnitentarii possunt, absolvere, & Missam etiam, antequam dies illucescat, per se, vel per alium Sacerdotem idoneum celebrare.

## VI.

(g) **H**Æc verò omnia, quæ circa electionem Magistri statuta sunt, absque contradictione volumus, & præcipimus firmiter observari. (b) Quicumque autem ausus fuerit contradicere pertinaciter, vel rebellare; tanquam excommunicatus, & schismaticus, & destructor nostri Ordinis habeatur: & (quousque non satisfecerit) à communione omnium sit penitus alienus, & pœnæ gravioris culpæ subiaceat. Præcipimus autem in virtute Spiritus Sancti, ut nullus ante electionem Magistri Ordinis, circa statum Ordinis aliquid audeat immutare.

## VII.

**S**Tatuimus autem, quod nec Magister Ordinis, nec aliquis Prior Provincialis, aut quovis modo Præsidens in nostro Ordine, aliquid accipiat, directè, vel indirectè etiam sponte oblatum, à quacunque persona, sive prælata, sive subdita, prætextu litterarum, sigilli, registri, licentiæ, confirmationis, & universaliter cujuscumque gratiæ, aut justitiæ concessæ, aut concedendæ: sed quilibet sit communibus contributionibus, & visitationibus contentus. Priores autem Provinciales, & alii inferiores contrafacientes, in pœnam à suis officiis absolvantur indispensabiliter. Magister vero Ordinis, si in hoc excefferit, à Deffinitoribus Generalis Capituli corrigantur; & si obstinate resisterit, deponatur.

(g) *Hec verò omnia, quæ circa electionem Magistræ, statuta sunt &c.* ) Declaramus, quòd omnes Fratres, sub præcepto tenentur ea observare, quæ circa electionem Magistræ statuta sunt, & maximè electores.

(h) *Quicumque autem ausus fuerit contradicere pertinaciter.* ) Declaramus, quòd qui his, quæ circa prædictam electionem statuta sunt, pertinaciter contradicere, vel rebellare ausus fuerit; ipso facto est excommunicatus: & tamquam destructor nostri Ordinis carceri est mancipandus; & quousque non satisfecerit, pœna gravioris culpæ puniendus est.

## CAPUT V.

*De Electione Deffinitorum Capituli Generalis, & Provincialis.*

## I.

(a) **S**Tatuimus, quod singulis annis, in singulis Capitulis Provincialibus, Hispaniæ, Tolosanæ, Franciæ, S. Dominici, Romanæ, Provinciæ, Regni Siciliae, Hungariæ, Teutoniæ, Angliæ, Poloniæ, Daciæ, Græciæ, Terræ Sanctæ, Aragoniæ, Bohemiæ, Provinciæ Lombardiæ, Saxonæ, Dalmatiæ, Trinacriæ, Portugalliæ, Scotiæ, Bethicæ, Germaniæ inferioris, S. Thomæ, Calabriæ, S. Crucis, Hiberniæ, S. Jacobi, S. Joannis Baptistæ, S. Vincentii, & S. Antonini &c. quatuor Fratres de discretioribus, & magis idoneis, à Provinciali Capitulo per disquisitionem Prioris Provincialis, vel ejus Vicarii: & Prioris, & Supprioris ejusdem loci, ubi Capitulum celebratur; vel si unus defuerit, per disquisitionem duorum, quod si duo defuerint, loco ipsorum per disquisitionem duorum antiquiorum in ordine præsentium in Capitulo, hoc modo eligantur,

*Cod. Regul. Tom. IV.*

## II.

**P**Rædicti siquidem tres vel duo, si tertius defuerit, voluntates singulorum sigillatim, & seorsim aliquantulum in eadem Domo, coram oculis omnium disquirant, & conscribant fideliter. Deinde in continenti loco eodem, antequam in Fratres discedant, & ad invicem colloquantur, scripturam publicent in medium, expressis nominibus eligentium, & Electorum: & in quibus plures concordaverint, illi pro Deffinitoribus habeant. Si autem partes fuerint æquales, tunc eodem modo per disquisitionem voluntatum unus de Fratribus, qui vocem in prædicta electione non habuerit, eligatur, & cui parti ille consenserit, illi pro Deffinitoribus Capituli recipiantur. Quod si in electione ipsius adhuc discordaverint, alius eligatur per eundem modum: & sic deinceps, donec in parte altera major possit numerus inveniri.

## III.

(b) **P**Rædicti igitur quatuor Deffinitores eligantur in die proximo, præcedente diem assignationis Capituli Provincialis, & ex tunc incipiat autoritas eorumdem. Quod si aliquem de dictis quatuor Deffinitoribus, durante Provinciali Capitulo, mori contigerit, vel alia legitima causa impediri: Electores prædicti, secundum dictam formam possint statim alium Deffinitorem eligere dicti Capituli: qui mox electus, eandem habeat potestatem, quam ceteri Deffinitores habent, & loco mortui, vel impediti, omnia Capituli negotia, cum aliis pariter deffiniet, & tractabit.

(a) *Statuimus &c. & infra. Et in quibus plures concordaverint.* ) Declaramus, quòd ad hoc, ut aliquis sit Deffinitor, non solum oportet, quod habeat plures voces, quam alii; sed oportet, quod habeat plures ultra medietatem, juxta Capit. Bonon. 1564. declarationem; ubi postquam de electione Prioris Provincialis præmissæ, quod fieri deberet per vota secreta, & ultra medietatem omnium eligentium, subdit hæc verba: Et idem modus eligendi servetur in electione Prioris Conventualis, & Magistræ Ordinis & Deffinitorum Capituli Generalis, & Provincialis, & Socii Prioris euntis ad Capitulum Provinciale.

Item ordinamus, ut in omnibus Provinciis, in quibus Deffinitores Capituli Provincialis eliguntur per Nationes, examinatores scrutiniorum Patrum Vocalium Electorum pro Capitulo Provinciali, eligantur etiam per Nationes à PP. Provinciæ tantum: qui scrutatores in Natione Prioris Provincialis proponantur ab eodem Provinciali; in aliis autem Nationibus à PP. Magistris antiquioribus secundum professionem. In Provinciis vero, in quibus Deffinitores non eliguntur per Nationes, præfati examinatores scrutiniorum proponantur à Provinciali, seu Vicario Generali Pro-

M

vin.



vinciæ de consilio PP. Provinciæ : præcipientes omnibus tam Prælatiis, quam subditis, sub pœna privationis vocis activæ, & passivæ; ne quidquam in contrarium attentare audeant, quacumque consuetudine non obstante. Parisiis 1611. ordinat. 11. Porro per Patres Provinciæ tam in Constitutionibus, quam in declarationibus intelliguntur non modo illi, qui fuere ipsius Provinciæ Provinciales; verum etiam Magistri in Theologia rite instituti: qui à Provincia fuere acceptati, & ponuntur gratis, & privilegiis Magistrorum. Valentiniæ 1596. declarat. 3.

Declaramus etiam, quòd ante electionem Definitorum, acta Capituli Generalis, & litteræ Magistri Ordinis debent legi omnibus vocalibus in ipso Provinciali Capitulo congregatis; & ille, qui fuit Definitor præcedentis Capituli Generalis, debet in ipso Capitulo Provinciali, causas Constitutionum inchoatarum, & approbatarum, & admonitionum exponere; sicut fuit declaratum Florentiæ 1257. & Argentiniæ 1260. Item Paris. 1611. concessum fuit, ut si quæ circa acta Capituli Generalis immediate celebrati difficultates, aut dubia suboriantur; Definitores post Capitulum Definitorum, & Provinciales post Capitulum Provincialium, ea explicare, & declarare possint; quorum explicationi, & declarationi standum erit, quousque à Magistro Ordinis aliter fuerit determinatum.

(b) *Prædicti igitur quatuor Definitores eligantur in die proximo præcedente &c.* ) Declaramus, declaratum fuisse in Capitulo Romano 1552. declarat. 4. quòd prædicti Definitores omnes ipsa die simul eligi debent, non autem sigillatim, nisi per Nationes eligantur; Provinciale verò postea in ipso Capitulo eligi debere: ipsos autem Definiores statim post suam electionem habere locum super omnes Fratres, inter se autem secundum ordinem suorum graduum, vel Conventuum dignitatem.

## I V.

**S**Tatuimus etiam, ut per duos annos in dictarum triginta unius Provinciarum Capitulis, aliquis de magis idoneis, (c) à majori parte Capituli eligatur, per disquisitionem Prioris Provincialis, vel ejus Vicarii, & Prioris, & Supprioris illius loci, ubi Capitulum celebratur: & si unus defuerit, per disquisitionem duorum; quod si duo defuerint, loco ipsorum per disquisitionem duorum antiquiorum in Ordine præsentium in Capitulo, qui sit Generalis Capituli Definitor secundum formam supradictam in electione Definitorum Capituli Provincialis. Cui Socius competens à Priore Provinciali, & Definitoribus assignetur; (d) qui Definitor, & Socius, solum de suis Provinciis quarum sunt filii, assumantur. Quod etiam de Electoribus Magistri Ordinis, volumus inviolabiliter observari. Socii etiam Priorum Conventualium ad Provinciale Capitulum, & Electores Prioris Provincialis, tantum de Conventibus, in quibus sunt assignati, eligantur.

## V.

**Q**UOD si supersedeatur in illo anno à Capitulo Generali: qui in sequenti Capitulo Provinciali electus fuerit, habeatur Generalis Capituli Definitor. Valisoleti 1523. Si vero nullus alius legitimus electus fuerit, ille qui in Capitulo præcedenti fuerit electus, legitimus sit Definitor. Et idem dicimus de illius Socio, quod valeat, & sit eodem modo legitimus Socius, & in anno electionis Magistri Ordinis sit Elector, si non est alius Elector electus. Et tam Definitor, quam Socius, habeant litteras testimoniales, non tantum à Priore Provinciali, sed à toto definitorio; alias nullo modo admittantur, neque ad definitionem, nec ad electionem Magistri Ordinis in anno electionis; nisi aliter de jure constiterit.

## V I.

**N**olumus tamen, quod is, qui in præcedenti Capitulo electus fuerit, (e) ad idem officium eligi valeat in anno Definitorum proxime subsequente: si vero medio tempore decesserit, vel in Priorem Provinciale electus fuerit, & confirmatus, vel aliquo modo fuerit impeditus, quod venire non possit ad Capitulum Generale; ipso jure Socius ejus loco ipsius Definitor habeatur, nisi tunc superveniat Definitor, qui non obstante definitione incepta per Socium, ipse illa vice definiat, & Socius illius cedat. Quod si alterum ipsorum supradicto modo impediri contigerit; primus Conventus, ad quem declinaverit, teneatur ei de competente Socio itineris providere. Fratres, qui in uno anno electi sunt in Definitores Capituli Provincialis, sequenti anno ad idem officium non eligantur. Idem dicimus de Definitoribus Capituli Generalis.

(c) *À majori parte Capituli eligatur, per disquisitionem Prioris Provincialis, vel ejus Vicarii, & Prioris, Supprioris &c.* ) Declaramus fuisse prohibitum, ne vocales in Capit. Provinc. committant Priori Provinciali & Definitoribus Provincialis Capituli, electionem Definitoris Capituli Generalis, nec etiam Electorum Magistri Ordinis: sed tam Definitor, quam Electores prædicti, debent eligi, secundum formam in Constitutionibus expressam, à majori videlicet parte ultra medietatem omnium eligentium; sicut fuit declaratum Florentiæ 1257. ordinat. 3. & Argentiniæ 1260. confirm. 8.

(d) *Qui Definitor, & Socius solum de suis Provinciis, quarum sunt filii assumantur* ) Declaramus, quòd Frater de illa Provincia proprie dicitur, pro qua professus est; vel ad quam à Generali Capitulo, vel à Magistro Ordinis, non solum assignatus, sed simpliciter translatus, seu incorporatus est; sicut fuit declaratum Colonæ 1428. Et ideo quamvis Frater, qui est ex aliena Provincia postquam steterit per unum annum continu.

tinuum, assignatus in aliquo Conventu alicujus Provinciae, si habuerit sex annos à professione sua, & fuerit Sacerdos, ad electionem Prioris Provincialis admitti possit: non tamen eligi poterit in Definitorum Gener. Capitul. nec Socius ejus esse, nec Elector Magistri Ordinis; nisi sit illi Provinciae incorporatus, atque ad eam simpliciter translatus, Provinciis Græciæ, & Terræ sanctæ exceptis. Item declaramus ex mandato Clementis VIII. fuisse Romæ 1601. ordinat. 28. ordinatum, & Vallisoleti 1605. accept. 1. acceptatum, ne titulares Provinciales ullo modo creentur (excepto Provinciali Terræ sanctæ) nec vocales Electores. Quod si contrigerit constituere in aliquibus Provinciis, quasi desolatis, habentibus tamen aliquos Conventus, aliquem Provinciale, qui non sit illius Provinciae filius: sic volumus providere in hac parte, ne sint duo Provinciales harum Provinciarum, unius ejusdemque Provinciae. Idem dicimus de Definitoribus, si pro illis Provinciis constitui debeant. Ita denique ut alicujus Provinciae ultra tria vota non possit superaddi ex quacumque causa, nisi tantum unum votum pro Capitulo Generali.

(e) *Ad idem officium eligi valeat.* ) Declaramus, quod Definitor, qui in aliquo Generali Capitulo definivit, non poterit aliquo modo in alio Capitulo immediate sequenti ad idem officium eligi, aut quocumque modo definire: sicut expresse in nostris Constitutionibus continetur, fuitque declaratum apud Castras 1352. Hoc autem ita fuit declaratum Romæ 1546. declarat. 2. ad eum modum, quod qui in Capitulo Provinciali fuerit electus Capituli Generalis Definitor, possit in sequenti Capitulo reeligari, si non definivit.

## CAPUT VI.

*De Capitulo Quotidiano.*

## I.

(a) *Initis Matutinis, teneatur Capitulum, vel aliquando post Primam, vel etiam intermittatur, ne studium impediatur; secundum quod Prælati videbitur.* Ingresso Conventu Capitulum, Lector pronunciet Lunam, & quæ de Calendario pronuncianda sunt: & Sacerdos prosequatur, Pretiosa est &c. Deinde residentibus Fratribus Lector pronunciet lectionem de Institutionibus, vel de Evangelio, pro tempore: præmissis, Jube Domne: & Hebdomadarius subjungat benedictionem: Regularibus disciplinis, vel Divinum auxilium, pro tempore. Et facta absolutione pro Defunctis, dicat, qui tenet Capitulum, Benedicite, & responso, Dominus; inclinent omnes. Deinde recitatis beneficiis, & dicto à Priore: Retribuere dignare &c. dictis etiam à Conventu Psalmis. Ad te levavi &c. & De profundis &c. Kyrie eleison, cum Pater noster: subsecutis etiam tribus versiculis, Oremus pro Domino Papa; Salvos fac servos tuos, & ancillas tuas; Requiescant in pace; Dominus vobiscum, ab Hebdomadario dicent. *God. Regul. Tom. IV.*

dis; cum his tribus Collectis, Omnipotens sempiternus Deus, qui facis &c. Præstende &c. Fidelium Deus &c. refedant Fratres.

## I I.

**T**unc Prælatus poterit dicere breviter, si quid ad honestatem Ordinis, & correctionem Fratrum viderit expedire. Post hæc autem egrediantur Novitii, quibus egressis dicat, qui præest: (b) Faciant venias suas, qui se reos existimant. Continuo, qui se reos intellexerint, prostrati veniam petant. Deinde surgentes, (c) humiliter confiteantur culpas suas: & quorum culpa talis est, quæ digna sit correctione, præparent se ad correctionem; quam Prior faciat vel ille cui injunxerit.

## I I I.

**I**n Capitulo verò Fratres, nisi duabus de causis, non loquantur; scilicet culpas suas, vel aliorum dicendo simpliciter, & Prælati suis tantum ad interrogata respondendo. Uno etiam Fratre loquente, alius non loquatur. Nullus faciat proclamationem super aliquem ex sola suspitione. Item nullus accuset de auditu, nisi dicat, à quo audierit, & ille sit præfens in Domo. Auditis vero culpis dicatur Psalmus, Laudate Dominum omnes Gentes, cum versiculo, Ostende nobis Domine &c. Dominus vobiscum, & Collecta. Actiones &c. In fine dicat Prior, Adjutorium nostrum in nomine Domini, & sic solvitur Capitulum.

(a) *Finitis Matutinis teneatur Capitulum.* ) Declaramus, quod Capitulum de culpis, si non possit teneri quotidie propter studium, vel alias occupationes, debet tamen saltem semel in qualibet septimana, vel ad summum semel intra quindenam haberi: ut beneficia recitentur, & Benefactores Fratrum orationibus commendentur; sicut fuit declaratum Savilian 1439. Romæ 1501. & in multis aliis Capitulis. Et novissime Romæ 1601. confirm. 2. & Vallisoleti 1605. confirm. 1. confirmata fuit ordinatio de Capitulo habendo ad minus de quindenam in quindenam; in quo inter reliqua tenebuntur Præfidentes culpas subditorum audire, unius saltem Chori; & Provinciales, quos in hoc invenerint negligentes, à suis officiis absolvant. Summopere autem Prælati cavendum est, ne ira perciti Fratres corripiant, sed omnem benignitatem, & Religiosam erga eos pietatem ostendant, sicut fuit ordinatum Venetiis 1592.

(b) *Faciant venias suas, qui se reos existimant.* ) Declaramus, quod venia est totius corporis super latus extensio, sicut superius cap. 2. de Inclinationibus dictum est. Hanc igitur veniam Fratres, qui se reos esse intellexerint, debent in Capitulo facere prostrati super terram, significando se veniam petere suarum culparum.

(c) *Humiliter confiteantur culpas suas.* ) Declaramus, quod Capitulum de Culpis, ideo de Culpis appellatur, quia Fratres in eo de

Constitutionum omissione, & transgressione se debent accusare. Quæ quidem omisso, ac transgressio dicitur esse culpa, non essentialiter: sed solum antecedenter, vel consequenter, sicut superius Capit. de *Levi*, & *Gravi Culpa* explicatum est. Debent ergo Fratres se accusare de defectibus manifestis commissis contra Regulam, & Constitutiones. Quod si non se accusaverint, vel pœnitentias taxatas, sive taxandas non fecerint; disponunt se ad aliquam culpam, & eam incurrunt: venialem quidem si ex negligentia, vel levi malitia, mortalem vero, si ex contemptu pœnitentias illas omiserint.

## CAPUT VII.

*De Capitulo Provinciali.*

## I.

(a) **C**apitulum Provinciale post Capitulum Generale (quando, & ubi Prior Provincialis, cum consilio Deffinitorum elegerit) celebretur. Conventuales cum singulis sociis, à pluribus de Capitulo suo ultra medietatem eligentium electis, per disquisitionem Supprioris, vel vices ejus gerentis, & duorum Fratrum, qui primitus Habitum nostri Ordinis susceperunt, & Prædicatores Generales. Si qui tamen, qui non sunt de Capitulo, in Deffinitores eligantur, ad omnia acta ejusdem dumtaxat Capituli admittantur. Prædicatores autem Generales dicimus Magistros in Theologia, (b) & qui per Priorem Provinciale, & Deffinitores Capituli Provincialis fuerint instituti. (c) Quos instituendi nullus Vicarius, (etiam cum Deffinitoribus) habeat potestatem. Dicti autem Prædicatores Generales, dicto officio non fungantur, nisi in Provincia, in qua fuerint instituti.

(a) *Capitulum Provinciale, post Capitulum Generale &c.* ) Declaramus, quod antiquitus, quando singulis annis celebrabatur Generale Capitulum, tunc Capitulum Provinciale celebrabatur post Capitulum Generale: & in illo recitabantur acta Capituli Generalis, ac pro futuro Generali Capitulo, Deffinitor eligebatur; & sic non erat nisi unum Capitulum Provinciale inter duo Capitula Generalia. Sed postea in Capitulo Florentino 1374. ex autoritate Gregorii XI. statutum fuit, ut Generale Capitulum de biennio in biennium, vel de triennio in triennium celebraretur: Capitula autem Provincialia essent biennalia: & ita inter duo Capitula Generalia debent mediare duo Provincialia Capitula. Quorū primum post Generale Capitulum quanto citius fieri potest, celebrandum est; in secundo autem, quod erit post duos annos à primo, debet eligi Deffinitor Generalis Capituli: & scrutinium fieri, super amotione, vel retentione Prioris Provincialis ad Generale Capitulum deferendum, per Deffinitorem Capituli Generalis in anno Deffinitorum, & per Socium Provincialis in anno Provincialium. Et licet tunc statutum illud editum fuerit, tamen non fuit positum in praxi, nisi post annum Domini 1421.

(b) *Et qui per Priorem Provinciale, & Deffinitores Capituli Provincialis fuerint instituti.* ) Declaramus, quod sine Prioris Provincialis assensu, Deffinitores Capituli Provincialis non possunt Prædicatores Generales instituere: sicut fuit declaratum in Capitulo apud Montem Pefulanum 1294. declarat. unica. Prior autem Provincialis, potest cum duobus Deffinitoribus præfatos Prædicatores generales instituere.

(c) *Quos instituendi nullus Vicarius, (etiam cum Deffinitoribus) habeat potestatem.* ) Declaramus, quod quicumque hætenus inter Deffinitores constitutus, seipsum de assensu duorum, aliis dissentientibus, Prædicatorem fecerit generalem; pro non Prædicatore habeatur. Prohibentes districte, ne super hoc de cætero aliquid attentetur; ac sine consensu Prioris Provincialis, nullus Prædicator Generalis instituat, sicut fuit declaratum apud Londonas 1263. ordin. 3. & apud Montem Pefulanum 1265. & apud Perpinianum 1327. Item declaramus, quod Prædicatores Generales, quando instituendi sunt, debent in actis Capituli Provincialis promulgari, non per litteras fieri. Et si qui hætenus per litteras facti sunt, pro non factis habeantur, sicut fuit declaratum Florentiæ 1321. Barcinonæ 1323. declarat. 4. & Pampilonæ 1355.

## II.

**N**ullus Prior Conventualis ducat secum plures Fratres ad Capitulum Generale, vel Provinciale, sine causa legitima. Quod si Priorem Provinciale abesse contigerit, nec vices suas alicui commiserit, vel ille cui commiserit, aliquo casu absens fuerit: Prior illius loci, ubi Capitulum fuerit celebrandum, cum Deffinitoribus Capituli, in celebratione procedat ejusdem. (d) Quilibet autem Vicarius Generalis Provinciæ (per quemcumque modum fuerit legitime institutus) locum Provincialis teneat: Fidelium dicat, licentiam loquendi tribuat, & possit concedere litteras de beneficiis illius Provinciæ, durante Capitulo Provinciali dumtaxat. Vicarii vero particulares, sive Nationum, sive Conventuum, nec Fidelium dicant: nec locum suum mutant: nisi in Capitulo dum ibidem suum officium exercuerint.

## III.

**P**rædicti igitur Deffinitores tractabunt omnia, & definient cum Priore Provinciali. Quod si in suis definitionibus in partes æquales se dividerint, illorum sententia prævalebit, in quorum parte Prior Provincialis concordaverit; alias enim sententia plurium prævalebit. Si autem per adjunctionem, vel absentiam Prioris Provincialis, vel ejus Vicarii, vel casu aliquo contingente, partes fiant æquales; unus ab eisdem de Capitulo eligatur: & in quorum partem declinaverit, illorum sententia prævalebit. Isti autem  
qua-



quatuor Deffinitores, excessum Prioris Provincialis confessi, vel proclamati in Capitulo Provinciali coram Fratribus audiant, & emendent, ei pœnitentiam injungentes. Si autem (quod absit) incorrigibilis extiterit, ipsum usque ad Capitulum Generale suspendant ab officio Prioratus, aliquem idoneum loco ejus substituentes: & ejus excessum referant ad Capitulum Generale, scripto communiter sigillato.

## I V.

**C**apitula Provincialia deinceps fiant biennialia, si, & in quantum Provinciali, & Deffinitoribus in sua Provincia videbitur expedire. In singulis autem Capitulis Provincialibus, auditis culpis fiat secretum scrutinium in conspectu omnium super retentione, vel absolutione Prioris Provincialis; cum expressione nominum, & officiorum Fratrum exprimentium vota sua, per Deffinitores Capituli Provincialis. Et hoc scrutinium non publicetur, nec alicui ostendatur; sed statim sigillis omnium Deffinitorum in conspectu omnium sigilletur, & per Deffinitorem Generalis Capituli, vel ejus socium, vel per socium Prioris Provincialis (in anno Provincialium) ad Generale Capitulum deferatur. Et hæc eadem forma scrutini facienda de Priore Conventuali, per Suppriorum, vel ejus Vicarium, (in absentia Suppriorum) & duos antiquiores in Ordine de Conventu præsentem in Capitulo, in tractatu eorum, quæ mittenda sunt ad Capitulum observetur: & sigillo Conventus sigilletur, & per socium Prioris, ad Provinciale Capitulum transmittatur.

(d) *Quilibet autem Vicarius Generalis Provinciae, &c.* Declaramus, quod licet quilibet Vicarius Generalis Provinciae, per quemcumque modum legitime fuerit institutus, locum Provincialis debeat tenere, *Fidelium* dicere, licentiam loquendi secum commedentibus, in illa Provincia dare, & etiam litteras de beneficiis concedere: Vicarii tamen Magistri Ordinis, vel Priorum Provincialium, non generales, sed particulares, sive Nationum sint, sive Conventuum, sive missi ad aliquam Provinciam visitandam; debent ubique suum locum tenere, nisi in Capitulo, dum officium correctionis exercuerint, sicut fuit declaratum Londonis 1263. ordinat. 9. & apud Montem Pefulanum 1265. Nec debent se de visitandis, & ordinandis Monasteriis Ordinis, quovis modo intromittere, nisi in eorum litteris hoc specialiter expressum fuerit, sicut fuit declaratum Argentinæ 1307. ordinat. 3.

Item declaramus, Vicarios tam generales, quam particulares, ita ex ordine esse collocandos. Primus est Vicarius Generalis Ordinis, qui mortuo, vel amoto Magistro Ordinis, universæ Religionis administrationem habet. Secundus est Vicarius Generalis Magistri Ordinis, ab ipso Magistro Generali institutus. Tertius est Vicarius Generalis alicujus Provinciae, qui scilicet missus est a Generali Magistro, ad aliquam,

vel aliquas Provincias. Quartus est Vicarius Provinciae, videlicet Prior Provincialis, vel præteritus ante confirmationem Provincialis noviter electi; vel novus electus ante sui confirmationem, juxta privilegia, & consuetudines diversarum Provinciarum. Quintus Vicarius Provinciae est, qui mortuo, vel amoto Provinciali, curam de jure gerit illius Provinciae. Sextus Vicarius Provinciae est, qui à Provinciali absente, præficitur toti Provinciae. Post hos Vicarios sunt Vicarii Congregationum. Deinde Vicarii Nationum, ubi Provinciae sunt distinctæ per Nationes. Postea Vicarius, qui quandoque constituitur in capite super Priorem, vel absente Priore. Ultimi sunt Vicarii locorum, seu Domorum.

Item declaramus, quod Vicarii Congregationum, extra suam Congregationem non habent locum super Magistros: Vicarii autem locorum, in Domibus suis præcedunt quidem subditos, & debent habere superiorem locum, non autem super Magistros; ut fuit declaratum Barcinonæ 1574. declarat. 15. Ubi etiam expressum est, quod si contigerit ut Prior Conventualis veniat ad illam Domum, debet Vicarium ejusdem Domus præcedere, & eo præsentem *Fidelium* dicere: quod & Romæ 1589. confirmat. 9. confirmatum fuit.

## V.

**D**istis autem Scrutatoribus voluntatum in virtute sanctæ obedientiæ præcipimus, quod dictum scrutinium alicui per modum aliquem non revelent. (e) Quod si aliquis, vel aliqui de prædictis Scrutatoribus Prioris Conventualis impedimentum haberent, judicio majoris partis, medietate Conventus, ad audiendum, vel videndum, seu scribendum ea, quæ in scrutinio deponuntur, unus de Fratribus ad ipsam electionem pertinentibus, (quem, ut dictum est, major pars Conventus nominaverit,) loco illius, qui impeditus fuerit, ad recipiendum dictum scrutinium admittatur, & tunc ad servandum ipsum scrutini secretum, ex vi præcepti teneatur, ut alii. Et hæc eadem forma circa scrutinium Electorum Prioris Provincialis, & electionis Prioris Conventualis, in omnibus observetur.

## V I.

**A**ccusationi vero, & correctioni, professi post triennium ab ingressu Ordinis potuerunt interesse. (f) Infra vero quinquennium ab ingressu Ordinis, Fratres alii non admittantur ad discussionem eorum, quæ ad Capitulum Generale, vel Provinciale sunt mittenda: nec ad electionem Socii Prioris Conventualis, nec ad electionem Electorum Prioris Provincialis. Priores cum suo Conventu, Capitulo Provinciali singulis annis scribant debita Domus suæ, & causas etiam debitorum. Similiter etiam Provinciales, & eorum Deffinitores, suarum debita Provinciarum, cum suis causis Capitulo scribant Generali. Item nulla petitio

offeratur Capitulo Provinciali, nisi à Conventu, nec Generali, nisi à Capitulo Provinciali fuerit approbata. Nullus vero Religiosus alterius Ordinis, vel professionis, nullusque secularis cuiuscumque conditionis, vel dignitatis, vel vitæ; secretis, vel tractatibus Capituli aliquatenus admittatur. (g) Prior autem Provincialis, & Definitor, in quolibet Capitulo Provinciali determinent tempus, ante quod Fratres ad Capitulum sequens non veniant.

(e) *Quod si aliquis, vel aliqui de prædictis Scrutatoribus Prioris Conventualis, impedimentum haberent.* ) Declaramus, quod si in scrutinio faciendo circa absolutionem, vel retentionem Prioris Conventualis, vel Provincialis, vel circa electionem Electorum Prioris Provincialis, vel electionis Prioris Conventualis, vel Socii eius, aliquis ex prædictis Scrutatoribus impedimentum habuerit, vel surditatis, vel cæcitat, vel alterius infirmitatis: tunc ea occasione ad audiendum, vel videndum, seu scribendum ea, quæ in scrutinio deponuntur, admittendi sunt, non ille, vel illi, qui post eos, qui impedimentum habent, antiquiores sunt; sed ille, vel illi, quem, vel quos major pars ultra mediocritatem omnium Vocalium elegerit, qui tamen sint ex eorum numero, qui pertinent ad prædictam electionem.

(f) *Infra vero quinquennium ab ingressu Ordinis &c.* ) Declaramus, quod quando hæc Constitutio fuit edita, Priores sub pœna absolutionis à suis officiis, non poterant aliquem ad Habitum Religionis, ante quintumdecimum annum recipere: ideo post quinquennium ab ingressu Ordinis habebant quatuor annos à sua professione tacita, vel expresse. Quamobrem ad omnem tollendam ambiguitatem, in Capitulo apud Valencenas 1337. declaratum fuit, illud quinquennium ita esse intelligendum; ut in ipso semper quatuor anni à tempore professionis computandi sint: ita ut omnes anni tempus professionis præcedentes (quod dicitur tempus Novitiatus) etiam si plures anni fuerint, pro uno tantum anno computentur; & post quatuor annos à professione, & non ante, admitti debent ad prædicta omnia, sicut etiam declaratum fuit apud Bisuntium 1353. Verum ut sæpius dictum est superius, nunc requiruntur sex anni à professione, & quod sint Sacerdotes, juxta ordinationem Romæ 1608. ordinat. 4. & Parisiis 1611.

(g) *Prior autem Provincialis, & Definitor in quolibet Capitulo Provinciali determinent tempus &c.* ) Declaramus, quod Priores Provinciales, vel Vicarii Generales Provinciarum, à tempore, quo Definitor Provinciarum iter arripuerint ad Generale Capitulum, non possunt Capitula Provincialia de loco ad locum, vel quoad tempus mutare; neque Priores Conventuales, vel Prædicatores Generales absolvere; quousque de ipso Generali Capitulo certiores facti sint à suis Definitoribus, vel à Sociis eorum jam reversis: sicut fuit declaratum Bononiæ 1380.

Item declaramus in Capitulo Parisiensi 1611. concessum fuisse omnibus Provinciis habentibus Provinciales quadriennales, & non habentibus Capitulum intermedium (si tamen hæc concessio toti Provinciæ in primo Capitulo Provinciali congregatæ proposita placuerit, & ab omnibus fuerit acceptata) ut possint convocare Congregationem ex Prioribus præcipuorum Conventuum, & Magistris antiquioribus, & Patribus, qui fuerunt

Provinciales: in qua fieri possent Definitor ad instar Capituli Provincialis, & haberi scrutinium de retentione, vel amotione Prioris Provincialis; eligi Definitor Capituli Generalis, si in præcedenti Capitulo non fuerit electus: denique tantam habeat hæc Congregatio auctoritatem, quantam haberet Capitulum intermedium formaliter convocatum.

## CAPUT VIII.

### De Capitulo Generali.

#### I.

(a) *Capitulum Generale, una vice ultra montes, altera vice citra montes, alternatim (Avenione 1561.) de triennio in triennium celebretur: nisi Magistro cum Definitoribus, vel cum discretorum maturo consilio, ex legitima, & urgentissima causa illud alibi assignare, aut assignatum transferre, vel per annum prævenire, aut etiam prorogare, necessarium videatur; & nisi obitus Magistri Generalis acciderit. Quo eveniente fiat, sicut Capitulo quarto de Electione Magistri Ordinis est decretum. Prædicti autem triginta unius Provinciarum Definitor in duobus Capitulis, triginta & unus Provinciales in tertio Capitulo cum Magistro Ordinis omnia definient, constituent, & tractabunt. Quod si in partes æquales se dividerint, illorum sententia prævalebit, in quorum partem Magister Ordinis declinaverit. Si autem in partes inæquales; obtineat sententia plurium. Si autem per adjunctionem Magistri partes fiant æquales, unus eligatur à Definitoribus, secundum quod in electione Definitorum Provincialium est statutum. Quod si ad Capitulum aliquo casu præpediti non omnes venerint, illi, quos ex ipsis venire contigerit, cum Magistro Ordinis omnia pertractabunt.*

(a) *Capitulum Generale &c.* ) Declaramus, quod ista Constitutio à principio Ordinis, scilicet ab anno 1220. sic habeat: Uno anno Parisiis, altero anno Bononiæ celebretur. Et servata fuit usque ad 1244 in quo fuit ordinatum, quod etiam alibi posset Capitulum celebrari: celebratumque fuit Colonix, ac singulis annis celebrabatur usque ad annum 1370 in quo celebratum est Capitulum Valentix in Provincia Aragoniæ; ubi assignatum fuit Capitulum Tolosæ post biennium celebratum, & inde Florentiæ etiam post biennium. Florentiæ vero auctoritate Gregorii Papæ XI. in Constitutiones redactum est, & positum infra *Capite decimo septimo de Capitulo Generali, biennali, vel triennali*. Deinde in Capitulo Romano 1553. inchoatum, & Romæ 1558 approbatum, & demum Avenione 1561. in Constitutionem redactum eo modo, quo ponit hic textus: & Capitulum decimumseptimum de biennali, vel triennali Capitulo abrogatum ac deletum est; nec in hoc defuit auctoritas Julii Papæ III. quando inchoatum est, prout infra suo loco clarius dicitur.

#### II.

## I I.

(b) **S**I vero Magistrum aliqua occasione abesse contigerit, unus de Definitoribus ejusdem Capituli, ab ipsis Definitoribus, vel majori parte eorum assumatur in Magistri Ordinis Vicarium: qui durante Capitulo, vices Magistri gerat in omnibus dumtaxat, quæ ad tractatus, & Acta Capituli pertinebunt. Qui etiam locum Magistri ubique teneat, Fidelium dicat, licentiam loquendi tribuat, & possit concedere literas de beneficiis Ordinis, ut Magister; in definitionibus unam tantum habeat vocem. Quod si in ejus assumptione in partes æquales se dividerint, unus de præsentibus Fratribus eligatur ab ipsis: & in quorum sententiam iste declinaverit, ille pro Vicario habeatur; cum quo Vicario, cæteri Definitores in definitione procedant. Quod si in ipsa definitione iterum in partes æquales se dividerint, forma superius posita teneatur.

(b) *Si vero Magistrum aliqua occasione abesse contigerit, unus de Definitoribus ejusdem Capituli assumatur in Vicarium.* Declaramus, quod si Capitulo Generali Magister Ordinis, ex quacunque causa interesse non poterit, poterunt Definitores unum ex ipsis in Vicarium Magistri Ordinis eligere: non autem aliquem extraneum ab ipsis poterunt ad illud officium assumere. Talis autem Vicarius poterit etiam licentiam loquendi fecum comedentibus tribuere.

## I I I.

**I**sti autem Definitores habebunt plenariam potestatem super excessu Magistri Ordinis corrigendo, vel de eo penitus removendo: ipsorum vero sententia tam in his, quam in aliis inviolabiliter observetur; ita quod à nemine ab illorum sententia (c) liceat appellare, & si appellatum fuerit, frivola, & nulla appellatio habeatur. Appellationem enim intra nostrum Ordinem, sub interminatione anathematis fieri inhibemus, (d) cum non venerimus contendere, sed potius delicta corrigere.

## I V.

**I**tem ne delicta maneant impunita, & obedientia in nostro Ordine per appellationes frivolas infringatur: statuimus, quod quicumque Frater nostri Ordinis contra obedientiam appellare præsumserit in futurum; nisi ipsi appellationi infra duos menses renunciaverit, vel etiam infra annum prosequi non inceperit, aut ab incepta prosecutione destiterit, vel in ipsa succubuerit; adjudicatus carceri sit ipso facto: nec possit cum ipso, nisi per Capitulum Generale, ante annos duodecim dispensari.

## V.

**A**ppellans autem ab absolutione facta, vel facienda ab officiis Prioratus Provincialis, vel Conventualis, aut Vicariatus (etiam prætextu gravaminis,) ipso facto sit absolutus ab illo officio. Volentes quod in istis ratio gravaminis tam proprii, quam communis, non habeat locum quoad appellandum. Item ad nullum Judicem extra Ordinem, nisi ad Sedem Apostolicam (cui immediate Ordo subditus est) aliquod membrum Ordinis, illique subditum, pro justitia recurrat: sub pœna absolutionis ipso facto, si est Prælatus; & privationis vocis activæ, & passivæ etiam ipso facto, quoad alios.

(c) *Liceat appellare.* Declaramus, quod licet appellatio sit de jure naturali, nihilominus modus, & ordo utendi hoc jure præscribitur à lege positiva, ne irrepat abusus, pro usu rei licitæ. Unde in Capitulo Carcallonæ 1312. sic dicitur: Volumus, & ordinamus, quod quicumque Frater repertus fuerit iudicio ejus ad quem spectat, sine causa rationabili à quocunque suo Superiori appellasse, carcerali custodia mancipetur. Denunciantes Fratribus universis, quod de jure communi, & ex speciali Ordinis privilegio, nulli Fratrum licitum est à correctione, vel ab officiorum amotione appellare; sicut fuit declaratum Cenomanis 1491.

(d) *Cum non venerimus contendere, sed potius delicta corrigere.* Declaramus, quod Religiosi appellatio à correctore juxta sui Ordinis disciplinam, videlicet secundum Regulam, & Constitutiones, & approbatas consuetudines non valet: ut habetur in capit. Cum speciali. extra de Officio Ordinarii; nisi forte corrigens modum in corrigendo excedat. Et propterea Bonifacius VIII. in suis Constitutionibus sic dicit: *Authoritate Apostolica tenore præsentium ex certa scientia indulgemus, quod prædictus Magister, & alii præses in dicto Ordine, ad quos id pertinerit pro tempore, in correctionibus Fratrum ejusdem Ordinis, juris ordine postposito secundum consuetudines approbatas, & instituta Ordinis antedicti, procedere libere, & licite possint, & valeant. Quodque nullus ex Fratribus, & Sororibus Prædicatorum Ordini subiectis, aliquem ex Fratribus, vel aliquam ex Sororibus hujusmodi, coram quocunque iudice, qui non sit de dicto Ordine, ex quacunque causa convenire; nec à correctione quacunque, seu alia ab aliquo Prælato, vel Fratre dicti Ordinis, quavis occasione appellare, aut contra eos querelam proponere valeat: nisi prius coram Conventuali, seu Provinciali Priore, seu Magistro Ordinis, & successive in Generali Capitulo dicti Ordinis causam, & querelam suam proposuerit verbo, vel scripto.* Hæc autem Constitutio Bonifacii explicata, & ampliata fuit à sacra Episcoporum, & Regularium Congregatione, quemadmodum superius distinet. 1. capit. 18. fol. 136. relatum est.

Item Julius II. concessit Breve Fratri Vincentio Bandello Magistro Ordinis, infra scripti tenoris: *Julius Papa II Dilecte fili salutem, & Apostolicam benedictionem. A fide dignis accepimus, quod nonnulli Fratres Ordinis tui, & nonnullæ Moniales Ordinis sancti Augustini, sub Habitu, & cura Fratrum tue cure subiectorum degentes, ut debitam correctionem, & absolutionem a suis officiis subterfugiant; ad Cancellariam Avenionensem,*



*Et alias curias seculares vel Ecclesiasticas, à tuis, Et aliorum Prælatorum ordinationibus, Et mandatis appellare non erubescunt. Quo circa huiusmodi subterfugiis obviare quantum cum Deo possumus cupientes Fratribus, Et Monialibus antedictis, ne appellationes hæcenus interpositas prosequi, aut in posterum à mandatis huiusmodi appellare, iudicibus vero quarumcunque Curiarum, ne appellationes huiusmodi recipere, aut illas cognoscere quoquo modo præsumant; sub excommunicationis pœna, districtius inhibemus. Irritum quoque Et inanè decernimus, quidquid secus à quocunque quavis auctoritate, scienter, vel ignoranter contigerit attentari Constitutionibus, Et Ordinationibus Apostolicis, ac dicti Ordinis statutis, Et cæteris in contrarium facientibus non obstantibus quibuscunque Et c.*

Item declaramus similem Constitutionem editam fuisse Romæ 1558. contra Fratres, qui ad quodcunque tribunal, aut iudicem extra ordinem recurrerint. Et Barcinonæ 1574. confirmat. 42. confirmantur, & innovantur omnes pœnæ, tum per sacras nostras Constitutiones, tum per acta Capitulorum Generalium inflictæ, contra appellantes ad quodcunque seculare tribunal.

### V I.

**D**effinitores itaque prædicti, postquam fuerint accusati, quando eis videbitur expedire, excessum Magistri Ordinis seorsim corrigant, & emendent. Qui coram ipsis humiliter se prosternens veniam faciat, & stans de suis excessibus se accuset, & Definitores audiant accusantem. Auditis vero accusationibus, secedat, & eo absente Definitores de ejus correctione conferant, & disponant. (e) Quod si prævaricator Ordinis fuerit, aut contemptor, aut adeo negligens, & remissus, quod Ordinis dissolutionem, & destructionem inducat: moneatur à Definitoribus, ut Magistratui cedat, & aliquem locum ad manendum sibi eligat; ut possit honeste conversari. Alioquin amovendi eum ab officio Magistratus, liberam habeant facultatem.

### V I I.

**C**essio autem Magistri à Definitoribus non admittatur, nisi propter aliquod prædictorum; aut defectum, aut impotentiam, quæ ipsum ab executione officii Magisterii perpetuo impediret. Perpetuum autem dicimus, quod Definitores de prudentum consilio perpetuum iudicabunt. Magister vero Ordinis cedens, vel amotus, post Magistrum Ordinis in Definitoriis Capitulorum Generalium, & Provincialium, & in absentia Magistri post Provinciale, in ejus Provincia fuerit; & in absentia Prioris Provincialis, post principalem Prælatus, primam vocem, primumque locum ubique, & in omnibus obtinebit.

(e) *Quod si prævaricator Ordinis fuerit, Et contemptor.* ) Declaramus, quod Definitores Capituli Generalis, non habent potestatem remo-

vendi Magistrum à suo officio, nisi in casibus expressis in Constitutionibus: videlicet si fuerit contemptor, hoc est si ita spernit, & nihil curat de Regula, & Constitutionibus, ut pro nihilo reputet transgredi illas, & ejus voluntas reneat subijci Regulæ, & Constitutionibus; immò nulla subsistente causâ eas continue transgreditur. & habet firmum propositum in huiusmodi transgressionem perseverandi. Vel si fuerit prævaricator, hoc est, si frequenter, & quali ex habitu Regulam, & Constitutiones transgrediatur: nam prævaricator dicitur ille, qui præ aliis plusquam debeat legem transgreditur. Similiter si sit adeo negligens, & remissus, ut Ordinis dissolutionem, & destructionem inducat; quando videlicet non hortatur Fratres verbis, litteris, ordinationibus, & exemplis, ad honestè, religioseque vivendum. Si defectus non corrigeret, & nullo modo puniret: si nunquam celebraret, & neque ad Chorum, neque ad Refectorium accederet. Si autem nihil horum haberet, quamvis quandoque Constitutiones transgrederetur, (non tamen ex contemptu, neque plusquam alii) essetque aliquantulum negligens circa Divina, & ea quæ ad communitatem pertinent: non posset ab ipsis Definitoribus deponi.

### V I I I.

**D**effinitores autem Capituli Generalis, Dominica infra Octavas Ascensionis Domini, vel Sabbato præcedenti, locum Capituli intrare teneantur, & ex tunc in Choro, & alibi ordinate sua loca teneant; quousque tempus suæ diffinitionis expiret (f) Provinciales quoque absoluti, loca in Provinciis, in quibus præfuerunt, super omnes alios ubique habebunt; (Romæ 1558.) & similiter vocem in omnibus electionibus Provincialium, & Definitorum, & electorum Magistri Ordinis; dummodo Magistri in sacra Theologia, non Magistris ex hoc minime postponantur, nec actualium Præsidentium locis minime derogetur. (g) Magistris vero in sacra Theologia, immediate post Priorem, in cujus Conventu fuerint, locum damus. (b) Baccalaureis, qui legitime incorporati in Universitate sententias solemniter legerint, aut legunt, post Supriorem ubique in toto Ordine locum damus.

(f) *Provinciales quoque absoluti, loca in Provinciis, in quibus præfuerunt supra omnes alios ubique habebunt.* ) Declaramus, quod Priores Provinciales, si sint Magistri sacre Theologiæ, postquam fuerint absoluti, habebunt locum super omnes Fratres Magistros, & Priores illius Provinciæ, infra tamen Priorem illius Conventus in quo se repererint. Si vero non fuerint Magistri, habebunt locum immediatè post Magistros, supra tamen omnes Fratres, & Priores non Magistros: & hoc in Provincia cui præfuerunt, non autem in alia Provincia. Hoc autem de illis Magistris Provincialibus intelligendum est, qui antequam eligerentur in Provinciales, erant Magistri Provinciæ. Sed si peracto eorum Provincialatu, vel in Provincialatu promoveantur ad Magisterium, locum non habebunt ratione Provincialatus, super omnes alios Magistros, qui

qui non fuerunt Provinciales: sicut fuit declaratum Neapoli 1600. declarat. 7. & confirmatum Romæ 1601. declarat. ubi etiam dictum fuit, sic esse intelligendam hanc Constitutionem. Item in Capitulo Romano 1553. declarat. 6. sic dicitur: Declaramus conformiter ad ea, quæ jam à duobus Reverendiss. Magistris Ordinis declarata sunt: si in aliqua Provincia contingat, inferiorem Magistrum prius fieri Provinciale, & postea antiquiorem, debere utrumque completo Provincialatu tenere locum inter se secundum ordinem Magisterii eorum. Similiter si duo non Magistri Provinciales fiant, inter se locum suæ professionis tenebunt post Provincialatum, etiam si junior ante antiquiorem Provincialis fuerit.

(g) *Magistris verò in sacra Theologia &c. locum damus.* Declaramus, quod Magistri in Theologia ubique tam in Conventibus, quam in Capitulis, locum habent super omnes Fratres, & Priores Conventuales non Magistros: infra tamen Priorem, dumtaxat illius Conventus in quo reperiuntur. Priores vero Conventuales si non sint Magistri in Theologia, ubique teneant loca sua, secundum antiquitatem Conventuum quibus præsent; infra Priorem illius Conventus in quo se repererint, & infra Magistros in Theologia.

Item circa locum, & vocem Magistrorum, Romæ 1542. sic declaratur: quod graduati aliter quam per viam Ordinis, aut per Breve, aut per saltum, non habeant locum quousque approbentur per Capit. Generale, & ex tunc ratio sui loci incipiat: quod fuit etiam confirmatum Romæ 1546. confirm. 7. & Salmant. 1551. confirmat. 3. Et Romæ 1539. declaratur, quod Magistri, qui primo fuerint laureati via juridica, & sine dolo in Ordine nostro præcedant Priores professos, laureatos tamen postea; ita quod non habeatur respectus ad professionem; sed ad coronam primo iuridice acceptam. Bonon. etiam 1564. declaratur, quod Magistri in Theol. qui in eodem Capitulo acceptati fuerint, aut approbati, inter se locum obtineant secundum antiquitatem, quam in Ordine habuerint, quod fuit confirmatum Romæ 1589. declarat. 10. & 1608. In quorum ultimo sic habetur: Declaramus juxta declarationem 10. factam in Cap. Rom. 1589. quod Magistris in Theol. qui statim in sua Provincia gaudere solent loco, & voce, & aliis privilegiis Magisterii: quamprimum promoventur, antequam etiam acceptentur à sua Provincia; computanda est eis antiquitas loci, & Magisterii, tam in sua Provincia, quam in toto Ordine, à die promotionis eorum. Magistris verò qui in sua Provincia non gaudent loco, & voce, & aliis privilegiis Magisterii, antequam acceptentur à Provincia; (ubi usus est acceptandi Magistros ex privilegio Apost. speciali) etiam si ante fuerint promoti, non est computanda in sua Provincia antiquitas loci, & Magisterii eorum, nisi à die acceptationis in sua Provincia: in aliis verò Provinciis computabitur ipsis à die promotionis eorum. Nec in ordine loci Magistrorum, attendenda est antiquitas professionis, vel Habitus; sed promotionis, vel acceptationis respectivè, uti dictum est, quomodocumque gradum Magisterii cum voce, & loco in Provincia sua obtinuerint: Sive per acceptationem, sive per promotionem ad Regentatum in studio Generali Provinciæ. Sic tamen, ut qui simul promoti, vel simul acceptati fuerint, habeant locum secundum antiquitatem suæ professionis. Idem prorsus fervari volumus in Baccalaureis, sive Præsentatis.

Item in Capitulo Parisien. 1611. sic habetur. Confirmamus, id quod in declaratione 3. Generalis Cap. Romæ 1608. circa præcedentiam

*Cod. Regul. Tom. IV.*

Magistrorum habetur: videlicet quod Magistri in Theologia qui statim in sua Provincia gaudere solent voce, & loco, & aliis privilegiis Magisterii: cum primum promoventur, antequam etiam à sua Provincia acceptentur; computanda est antiquitas ubique à die promotionis eorum. Declarantes prædicta verba (à die promotionis eorum) ita intelligi debere: id est à die, quo subscriptæ sunt litteræ patentes à Reverendissimo Magistro Ordinis, vel à die quo Reverendissimus sua manu aliquem gradu Magisterii solemniter decoravit; si litteræ patentes ejusdem Magisterii non fuerint ante expeditæ. Si autem in eodem Capitulo sint promoti, aut extra Capitulum eodem die subscriptæ litteræ patentes, tunc locum inter se teneant secundum antiquitatem professionis.

Item declaramus, quod si Priores sint Magistri, sua loca teneant inter se juxta Magisterii rationem. Cæteri vero Fratres loca tenebunt secundum antiquitatem suæ professionis: ita ut illi, qui post suam professionem Habitum Ordinis diutius portaverunt, eos, qui non tanto tempore post professionem Habitum prædictum portaverunt præcedere debeant. Declarantes, quod nullus Frater nostri Ordinis, Magister in Theologia existens omisso nomine Fratris, pronuncietur Magister, dicendo, *Magister talis*, sed semper dictio *Frater*, præferatur nomini, & cognomini: & subsequi poterit in nominatione hæc dictio *Magister* dicendo, *Fr. Antonius de Florentia*, Magister: sicut fuit declaratum Florentiæ 1321. & Tolosæ 1371.

(h) *Baccalaureis, qui legitime incorporati &c.* Declaramus, juxta ea quæ in Cap. Romano 1530. & 1532. declarat. 4. declarata sunt: quod nullus Baccalaureus ordinarius incorporatus locum Baccalaurei teneat; nisi actu legat Sententias, vel Bibliam, vel legerit in aliquo Studio ordinario, in quo per annum solemniter lectionem fecerit. In Cap. etiam Romano 1542. dicitur: Confirmamus quod Inquisitores non Magistri, teneant primum locum post Suppriorem, & Baccalaureos in Conventibus.

Postea tamen ex S. Congregationis decreto, supra Supprios illum obtinere. Immo ex nova ejusdem Sac. Congregationis concessione, illum super omnes Magistros: immediate autem sub Prioribus Conventuum, in quibus resident, intra suam jurisdictionem consequuntur.

## IX.

Item in virtute Spiritus S. & sanctæ obedientiæ, percipimus firmiter observari: ne quis causam depositionis Magistri, vel Prioris Provincialis, vel eorum excessum, vel correctionem, (i) vel secretum Capituli, seu dissensiones Definitorum, vel Fratrum, unde Ordo noster possit turbari, vel infamari, audeat scilicet extraneis publicare. Si quis autem ex deliberatione contra fecerit, tanquam excommunicatus, & schismaticus, & destructor nostri Ordinis habeatur: & (quousque satisfecerit) à communione omnium sit penitus alienus; & pœnæ graviori culpæ debitæ subiacebit. Eadem diffinitione præcipimus, (k) ne quis verbo, vel facto ad divisionem nostri Ordinis audeat laborare: quod si fecerit, pœnæ subiaceat supradictæ.

N

(i)

(i) *Vel secretum Capituli.* ) Declaramus, quod secreta Capitulorum Generalium, & Provincialium revelare, nos intelligimus personis extraneis: ex quorum revelatione Ordo noster, vel personæ Ordinis lædi possent, vel infamari.

Unde in Capitulo Bononiensi 1235. admonit. 4. & Placentino 1310. admonit. 9. & apud Carcassonam 1312. ordinat. 8. sic fuit ordinatum: Cum ex revelatione criminum visorum, vel auditorum, indebita, & incauta sequatur Fratrum infamia, contra ordinem charitatis, & nihilominus de tali revelatione multiplex scandali, &urbationis materia ministraretur: volumus, adstrictè injungimus; ut quicumque visum, vel auditum de Ordine, vel de Fratribus Ordinis, exprimendo Fratris personam, vel nomen, scienter & ex proposito cuicumque personæ alias nescienti revelaverit, ad quam prædictorum correptionis non pertinet, vel quæ non credatur probabiliter in illo casu posse prodesse; per Priorem Provinciale, vel ejus Vicarium, vel per Provinciale Capitulum (postquam legitime contiterit) pœna criminosa debita de Definitorum consilio puniatur, si tamen alias de talibus sit notatus.

(k) *Ne quis verbo, vel facto, ad divisionem nostri Ordinis audeat laborare.* ) Declaramus, quod ille dicitur ad divisionem Ordinis laborare, qui verbo, vel facto per personas extra obedientiam nostri Ordinis constitutas, mutationem quærit generalis status nostri Ordinis, & Conventus ab Obedientia Magistri Ordinis subtrahere: cum unitas Ordinis ex unitate unius professionis dependeat; qua ex solemnino voto tenentur omnes Fratres uni Generali Magistro in his, quæ tecundum Regulam, & Constitutiones sunt obedire. Quapropter in Capitulo apud Ferrariam 1290 dicitur: Volumus, ordinamus, ac mandamus, ne quis verbo, vel facto ad divisionem Ordinis nostri audeat laborare, vel ad absolutionem cuicumque Prælati, vel etiam mutationes generalis status nostri Ordinis, verbo, vel scripto, vel quocumque alio modo directe, vel indirecte, mediate, vel immediate, per personas extra ejusdem Ordinis obedientiam constitutas præsumat procurare. Quicumque vero scienter contra hoc fecerit, ipsum ex nunc prout ex tunc omni voce, præterquam in sui accusatione; omni gradu, Prælati, Doctoratu, aliisque omnibus gratiis Ordinis privamus: nec ei possint restitui, nisi à Magistro Ordinis, vel Definitoribus Capituli Generalis; & nihilominus pœnam subeat culpæ debitam graviori.

Item declaramus, quod Provinciæ, vel Conventus, Prioribus Provincialibus, vel Conventualibus satisfacere teneantur, pro impensis factis causa impugnandi appellationes malignorumqueurbationes, & rescandis seditionibus, & scandalis perversorum Fratrum, propter Ordinis tuitionem, & justitiam, & famam defendendam: sicut fuit declaratum Tolosæ 1372. Item Romæ 1383. ordinat. 5. sic dicitur: Ordinamus de communi totius Ordinis consensu: & prohibemus, quod nullus procuret Ordinis divisionem, sub pœna excommunicationis latæ sententiæ, ac aliis pœnis gravioris culpæ: à quibus non possit absolvi, nisi à Magistro Ordinis. Mandamus quoque sub eadem pœna, quod nullus procuret institutionem Vicarii Generalis Indiarum. Quam ordinationem valere volumus, quasi haberet tria Capitula. Quod idem Romæ 1589. confirmat. 7. Venetiis 1592. confirmat. 3. & iterum Romæ 1601. & Parisiis 1611. his verbis confirmatur. confirmamus ordinationem, in quam plurimis Capitulis Generalibus reperiam, quod nullus sub pœnis in Capitulo de *Graviori culpa* contentis, ac etiam

sub pœna excommunicationis latæ sententiæ, ac una pro trina Canonica monitione præmissa (cujus absolutio Magistro Ordinis reservatur) directe, vel indirecte divisionem Ordinis, aut institutionem Vicarii Generalis Indiarum, quovis prætextu audeat, vel præsumat procurare. Quam ordinationem sub eisdem pœnis volumus observari.

## X.

**S**Tatuimus; ut si in anno Definitionis Priorum Provincialium, electio Magistri celebretur, illo anno (1) unus de Fratribus Electoribus de qualibet Provincia, qui in Provinciali Capitulo ad hoc electus fuerit, ad definitionem cum eis pariter admittatur. Quod si ad Capitulum non venerit, tunc ad definitionem Elector alius admittatur. Si vero in anno Definitorum Priores Provinciales conveniant, utrorumque definitio sit communis.

## XI.

**S**Tatuimus autem, & in virtute Spiritus Sancti, & sanctæ obedientiæ, & sub interminatione anathematis prohibemus distictè; ne Priores Provinciales Fratribus, vel Definitoribus, vel Fratres Definitores Prioribus Provincialibus, per suas Definitiones, (m) præjudicium aliquod audeant generare. Quod si facere attentaverint, eadem distictione prohibemus, ne in hoc aliquis præsumat eis obedire. Priori vero Provinciali eunti ad Capitulum Generale, detur Socius à Definitoribus Capit. Provincialis (Romæ 1558.) Qui (si Priorem Provinciale impediri contigerit, quod ad Capitulum Generale in anno Provincialium non accedat) loco ipsius cum Prioribus Provincialibus admittatur ad omnia tractanda, & definienda.

## XII.

**S**Tatuimus insuper, quod omnes Priores Coventuales cum Sociis suis, & Prædicatores Generales illius Provinciæ, in qua Generale Capitulum celebratur, illo anno veniant ad Capitulum Generale: nec eodem anno in illa Provincia ad celebrandum aliud Capitulum Provinciale teneantur; & quod idem faciant Provinciæ propinquæ. (n) Licentiandi, & mandandi Magister Ordinis liberam habeat facultatem.

(1) *Unus de Fratribus Electoribus.* ) Declaramus, quod quando electio Magistri Ordinis in anno Provincialium celebranda est, tunc unus ex duobus Electoribus, qui in Provinciali Capitulo ad hoc electus fuerit, in definitionem una cum eis debet admitti. In anno vero Definitorum, Priores Provinciales cum eis definiunt; & quilibet Definitor, cum alio Electore ad electionem Magistri Ordinis pariter admittitur. Et intelliguntur prædicta, quando movs, vel



vel amorio Magistri Ordinis nunciata fuerit ante Provincialis Capituli celebrationem: quia si post Capitulum Provinciale nunciata fuisset, tunc, & in eo casu, in anno Definitorum, Generalis Capituli Definitor, & ejus Socius ad electionem Magistri Ordinis erunt admittendi. In Anno vero Provincialium, duo ex Definitoribus Provincialis Capituli immediate præcedentis, antiquiores in Ordine, ad electionem ejusdem Magistri admittentur; quorum antiquior in Ordine erit illo anno Generalis Capituli Definitor.

(m) *Præjudicium aliquod audeant generare.* ) Declaramus, quodd tunc solum Definidores Prioribus Provincialibus, & Priores Provinciales Definitoribus per suas definitiones præjudicium generarent: si in suis definitionibus statuerent aliquid, per quod Provincialium autoritas, vel tolleretur, vel minueretur, vel etiam limitaretur, & è contrario. Hoc autem fieri non potest, nec per tria Capitula, nec per unum Generalissimum; sed solum autoritate Papæ. Non autem præjudicium aliquod generatur, si quod ordinatum, vel statutum in uno, vel pluribus Capitulis per Priores Provinciales, postea in alio, vel aliis Capitulis per Definidores ex causa rationabili revocetur: & è contrario, sicut quotidie fieri consuevit.

(n) *Licentiandi, & mandandi Magister Ordinis liberam habeat facultatem.* ) Declaramus, quodd illo anno, quo Generale Capitulum in aliqua Provincia celebratur, debent vocales illius Provinciæ ad Generale Capitulum venire, & ibi suum Provinciale Capitulum celebrare. Atque idem facere debent propinquæ Provinciæ, quæ illo eodem anno aliud celebrare Capitulum non tenentur. Magister tamen Ordinis liberam habebit potestatem mandandi eisdem Provinciis, ut ad Capitulum accedant: & etiam concedendi, ut possint ad idem Capitulum non venire, atque alibi suum Provinciale Capitulum celebrare.

## CAPUT IX.

*De solemni celebratione Capituli.*

## I.

(a) **C**apitulum Generale (quantum ad auctoritatem Definitorum) incipiat celebrari in Vigilia Pentecostes. Cum autem in secunda Feria post Pentecostem, vel in ipso eodem Festo, Fratres in Capitulum venerint; primo omnium devotè invocetur Spiritus Sanctus, à quo filii Dei aguntur, & dicatur *Ps.* Emitte spiritum tuum, &c. cum Collecta de Spiritu Sancto. Deindè residentibus Fratribus, & loca sua tenentibus omnibus (ut verbo Dei cœli firmentur) Verbum Dei in communi fiat. Sermoni autem interesse poterunt, qui ad ædificationem interesse voluerint.

## I I.

**F**inito sermone, quia indigentibus quantocyus subveniendum est, obitus Fratrum post præcedens Capitulum Defunctorum in communi recitentur, & fiat eis communis absolutio: & dicatur pro  
*Cod. Regul. Tom. IV.*

eis Psalmus De profundis, & Kyrie eleison. Pater noster. Cum *Ps.* A porta inferi, &c. cum Oratione Absolve &c. Postmodum, si litteræ legendæ sunt legantur; & eis suo tempore cum consilio respondeatur. Perlectis autem litteris, & facta recommendatione Virorum, dicatur Psalmus: Ad te levavi &c. Kyrie eleison. Pater noster cum *Ps.* Salvos fac servos &c. cum Oratione, Præterde &c. & tunc omnes, qui non sunt de Capitulo, egrediantur. Quibus egressis, qui missi sunt ad excusandum eos, qui non adsunt, ad quid venerint loquantur; deinde culpæ audiantur.

## I I I.

(b) **S**i qui verò sine licentia ad Capitulum Generale, vel Provinciale venerint, primo culpæ eorum audiantur, & recepta pœnitentia à Capitulo excludantur. Ut autem modus in eundo fervetur, nullus exeat sine licentia, & necessitate. Egressus autem non discurrat; sed expleta necessitate, citius revertatur. Qui autem in præsentī anno visitare debuerant, & non sicut oportuit fecerunt; culpam suam dicant, & dignæ vindictæ subiaceant. Tunc etiam absentibus, qui adesse debuerant, & his qui peccaverunt, & non satisfecerunt, pœnitentia scripta mittatur.

(a) *Capitulum Generale.* ) Declaramus, quod licet Generale Capitulum quantum ad auctoritatem Definitorum incipiat in Vigilia Pentecostes celebrari, tamen quoad solemnitatem celebrationis Feria secunda post Festum Pentecostes habeat initium: quia tunc Capitulum dicitur habere Magistrum antiquum, vel novum, præsentem, vel absentem, ne acephalum judicetur. Tunc etiam Fratres locum intrent Capituli, & Spiritus Sancti gratia invocetur: & tunc oretur pro vivis, & defunctis, & verbum Dei per unius sermonem omnibus explicetur.

(b) *Si qui verò sine licentia ad Capitulum Generale &c.* ) Declaramus, quod Fratres sine speciali licentia Magistri Ordinis, vel Prioris Provincialis Capitulum Generale, vel Provinciale adire non possunt. Et solus Magister, & Provincialis ejus Provinciæ in qua Generale Capitulum celebraretur, licentiam ad idem Capitulum veniendi possunt concedere; videlicet Fratribus suæ Provinciæ. Qui autem venerint sine licentia, graviter puniri debent: sicut fuit declaratum apud Treverim 1289. ordinat. 2. & apud Tolosam 1304. & 1504. ordinat. ultima.

## I V.

**C**onventus autem, qui mittit accusationes ad Capitulum Generale, vel Provinciale, (c) scribat numerum, & nomina accusantium; & si accusant de visu, vel auditu. (d) Accusatio autem unius tantum ad Capitulum Generale, vel Provinciale non mittatur: & tractatus eo-  
N 2 rum,

rum, quæ mittenda sunt ad Capitulum, ultra unam diem non prolongetur. Qui autem habent facere proprias quæstiones, vel communes ad Ordinem, vel prædicationem pertinentes; proponant Fratribus à Magistro, & Definitoribus ad hoc statutis, ut pro loco, & tempore solvantur, & terminentur.

(c) *Scribat numerum, & nomina accusantium.* ) Declaramus, quòd illi, qui accusationes mittunt ad Generale, vel Provinciale Capitulum, debent modum exprimere, quo sciunt crimen illud fuisse commissum; utrum scilicet ex visu, vel ex auditu. Et si ex auditu, utrum per aliquem qui illud viderit, sciant: sicut fuit ordinatum Lugduni 1274. Et nullus debet aliquem accusare de re criminosa, quam audivit, nisi probare possit: non solum se illam audivisse, sed etiam veram esse; sicut fuit ordinatum Tolosæ 1258.

Item declaramus, quod quando contra Fratrem habentur secularium testimonia, talis Frater arctari potest ad dicendam veritatem, & ad quæstiones poni potissimum quando ipse laborat infamia, non tamen potest per sententiam condemnari, nisi convictus, aut judicialiter confessus sit, sicut fuit declaratum Tolosæ 1304. Similiter si accusatur à pluribus non contestibus, ab uno quidem de uno actu, ab alio vero de alio actu ejusdem speciei; talis non est convictus, neque sententialiter condemnari potest, sed bene ad quæstiones poni, sicut fuit declaratum Perpiniani 1327. & Ferrariæ 1362.

(d) *Accusatio autem unius tantum &c.* ) Declaramus, quòd ideo accusatio unius non videtur esse mittenda ad Capitulum Generale, quia ea adeo nulla censetur esse, ut ex ea sola sententiam aliquam procedi non possit: nisi præter accusatorem, vel proponentem, duo saltem idonei testes scilicet contestes advocentur, sicut fuit declaratum Bisuntii 1353.

Item declaramus, quod si quis Frater de aliquo occulto crimine accusetur, quod juridice probari non potest, vel quod nescitur, nisi ab accusato, & accusatore, non propterea Prælatus accusato præcipere poterit, ut coram accusante, vel coram aliis, sive in Capitulo, sive extra Capitulum, vel seorsum sibi soli dicat veritatem: & si præcipiat, graviter peccat, quia sibi eam, quam non habet auctoritatem usurpat, non enim est iudex occultorum; quia occulta Divino iudicio relinquuntur; manifesta autem humano. Et in tali casu accusatus non tenetur dicere veritatem, nec seipsum infamare, nec prodere. Si tamen præter accusantem infamia contra accusatum urgeret, posset Prælatus ei præcipere, & illum ad quæstionem ponere; atque ipse tenetur veritatem dicere, de eo tamen solo crimine, cuius ipse laborat infamia.

Item declaramus, quod si accusator deficit à probatione illius criminis, de quo aliquem accusavit; eadem pœna puniri debet, qua puniendus fuisset accusatus ab accusatore convictus, sicut fuit ordinatum Vallisoleti 1605. confirmat. 34. prout jam superius pag. 59. dictum est.

Item declaramus, quod si aliqua sint alicui commissa sub secreto, ex quorum retentione imminet periculum scandali, vel ruinæ, vel grave præjudicium alicujus, vel magnum damnum communis, cui potest obviari per revelationem secreti, Prælato præcipienti in genere: tenetur subditus tale secretum revelare; quia sicut iuramentum non est vinculum iniquitatis; sic secretum commissum, vel promissum, non debet esse

vinculum, aut velamen scandali, ruinæ, & maximi damni proximi, vel communis. Non tamen tenetur de illo crimine sibi sub secreto commissum illum accusare, nisi possit hoc sufficienter probare, quod pertinet ad officium accusatoris: quia nullus tenetur ad id, quod nequit perficere. Negotium autem accusationis non perficitur, nisi accusatus legitime puniatur. Non autem punitur legitime, nisi in iudicio fuerit legitima probatione convictus, vel confessus. Si autem ex observatione secreti non imminet scandalum, vel periculum aliquod prædictorum; nisi præcesserit infamia, non potest Prælatus præcipere, nec subditus tenetur tale secretum Prælato præcipienti revelare. Unde in Capitulo Generali Parisiis 1279. ordinat. 5. sic fuit ordinatum: Quia sic sub secreti palio plerumque vitia occultantur, & per consequens correctio enervatur: monemus, & districtè omnibus Fratribus injungimus, quod nullus eorum suscipiat aliquid sub secreto, quod sit impedimentum correctionis, seu quod quovis modo vergat in præjudicium, vel periculum Ordinis, seu personæ particularis.

## V.

**S**I quæ vero dissensio inter Fratres nostri Ordinis (quod absit) emerferit de libris, vel de aliis: cum præponenda sint spiritualia temporalibus, non inde agatur in Capitulo; sed dicti Fratres extra Capitulum discussa veritate dissensionem dirimant, & inter Fratres pacem restituant. De solutione autem, & terminatione quæstionum, de correctione Fratrum, de modo pœnitentiarum, & de Prædicatoribus ad prædicandum, & studendum mittendis Prælatus major cum aliis qui ad hoc statuti sunt, tractabunt. (e) Et quidquid inde Spiritu Sancto dictante ordinaverit Capitulum; universaliter, unanimiter, ac devote suscipiant: nullus murmuret, nullus reclamet, nullus contradicat. In fine fiat communis confessio, & absolutio, & perseverantibus benedictio. Et hæc eadem forma in Capitulo Provinciali similiter observetur.

## VI.

**P**orro Magister Ordinis, aut Priores Provinciales non mutant Acta Capituli Provincialis, aut Generalis; nisi forte in speciali ex causa necessaria, & utili. Item Generale statutum Ordinis, vel consuetudinem diu obtentam, & communiter approbatam in Ordine, nec Magister Ordinis, nec Priores Provinciales aliquatenus audeant immutare; nisi per tria Capitula fuerit approbatum. Ea vero, quæ de Capitulo Generali dicta sunt, in Vigilia Pentecostes debent inchoari.

## VII.

**C**apitulum autem Generale ultra Sabbatum infra Octavam Pentecostes non prolongetur: nisi ex causa rationabili Magistro, & Definitoribus videatur: quod per

per unum diem, vel duos ad plus debeat prolongari. (g) Capitula etiam Provincialia eodem modo infra taxatum numerum dierum terminentur. Necessitate vero urgente, Magister Ordinis, vel ejus Vicegerens, cum assensu Prioris Provincialis, in cujus Provincia Capitulum Generale celebrandum fuerit, de consilio discretorum ad alium Conventum ejusdem Provinciæ possit illud transferre. Quod si in eadem Provincia commodè celebrari non valeat, eodem anno Magister Ordinis, vel ejus Vicegerens, ipso mortuo, vel amoto, dictum Capitulum ad aliam Provinciam mutare poterit, si expediens judicaverit de Fratrum consilio Discretorum.

(e) *Et quidquid inde, Spiritu Sancto dictante ordinaverit Capitulum; universaliter, unanimiter, & devote suscipiant.* ) Declaramus, quòd in Capitulo Romano 1589. declarat. 12. sic fuit ordinatum: Conformiter ad ea quæ in pluribus Capitulis Generalibus sancita fuerunt, non esse in potestate alicujus Provinciæ prætextu cujusvis privilegii, aut consuetudinis, Generalium Capitulorum statuta, vel acta non acceptare: sed Provincias omnes, & singulas, decretis, & ordinatis factis in ejusdem Capitulis, ita esse subiectas; ut unaquæque illarum eadem acta in Conventibus singulis publicare, acceptare atque inviolabiliter observare teneatur, utpote quæ pro communi Fratrum Conventum, Provinciarumque hono facta sunt. Et quatenus opus esset, auctoritate Apostolica consuetudinem quamcunque aut privilegium quomodolibet prætextum, aut in contrarium existens revocamus, & annullamus: & hoc confirmatum fuit in subsequentibus Capitulis, Parisiis 1611. admonit. 2. Ulyssiponæ 1618. admonit. ultima, & Mediolani 1622. admonit. 5.

(f) *Porro Magister, aut Priores Provinciales non mutant Acta Capituli.* ) Declaramus, quòd Magister Ordinis quamprimum electus fuerit, statim plene, & libere curam gerit animarum Fratrum totius Ordinis; eosque propria auctoritate ligare, & absolvere potest: nec non in ipso Ordine ea agere valet, quæ ipse, & Definitor Generalis Capituli juxta Ordinis Constitutiones, & secundum Deum Fratribus, & Religioni viderint expedire; ac Fratres omnes in iis, quæ secundum Regulam, & Constitutiones sunt, tenentur ei devote, atque humiliter obedire, sicut habetur in *Mari magno*. Et quamvis ordinationes, atque Acta Capitulorum non debeat mutare, illa tamen quoad aliqua in particulari ex utili, vel necessaria causa limitare vel tollere potest. Similiter quamvis Generale statutum Ordinis, vel consuetudinem diù retentam, & communiter in Ordine approbatam non possit auferre; potest tamen ex rationabili, utili, vel necessaria causa in prædictis omnibus dispensare.

Item ex commissione, quæ à Definitorio Provincialis Capituli conceditur Priori Provinciali, ut possit facere omnia, quæ posset & ipsum Definitorium; Prior Provincialis non potest Fratrem aliquem absolvere à pœnis gravioris culpæ, & ab aliis pœnis, quæ alias Provinciali ex vi Constitutionum non conceduntur; sicut fuit declaratum in Capitulo Romano 1518. declarat. 3.

(g) *Capitula etiam Provincialia eodem modo infra taxatum numerum dierum terminentur.* )

Declaramus juxta Bononiensis Capituli 1564. declarationem, quòd Definitores Capituli Provincialis suam auctoritatem ultra duos alios dies prorogare non possunt: ac propterea à die electionis eorum, usque ad diem quo eorundem expirat auctoritas, nunquam sint nisi decem dies; cum in Constitutionibus nostris hic dierum numerus Generalis Capituli Definitoribus assignetur, & habeatur ibidem, quòd Capitula Provincialia infra prætaxatum dierum numerum terminentur.

## CAPUT X.

*De Capitulo Generalissimo.*

## I.

Capitulum Generalissimum non convocetur nisi quando major pars Provinciarum petierit; vel Magistro cum media parte Provinciarum visum fuerit expedire. Provinciæ vero, quæ petunt, scribant causas, quare petunt. De his tamen Capitulum Generale non habebit judicare, utrum sufficientes sint, vel non; sed tamen scribantur, ut Fratres de his ante Capitulum conferre valeant. Priores autem Provinciales singuli cum duobus Sociis à Capitulo suo Provinciali electis à pluribus medietate omnium eligentium, tale Capitulum celebrabunt. Duobus autem annis ante pronuncietur, nisi urgens fuerit necessitas.

## II.

(a) *Anno ab Incarnatione Domini 1228.* convenerunt Parisiis in Domo Sancti Jacobi, Priores Provinciales, una cum Venerabili Patre Fratrem Jordano bonæ memoriæ Magistro Ordinis nostri, singuli cum duobus Definitoribus à Capitulis Provincialibus deputatis: in quos Fratres omnes vota sua unanimiter transtulerunt; eisdem potestatem plenariam concedentes, ut quidquid ab eis fieret, sive in constituendo, sive in destituendo, mutando, addendo, vel minuendo, de cætero firmum, ac stabile permaneret: nec liceret alicui quantæcunque auctoritatis, aliquid eorum immutare, quæ ipsi statuerunt perpetuis temporibus permanens.

## III.

Priores igitur præfati cum suis Definitoribus, gratia Spiritus Sancti invocata, quasdam Constitutiones ad utilitatem, & honestatem, & conservationem Ordinis, (præmissa diligenti examinatione) unanimiter, & concorditer ediderunt; quas in suis locis inter Constitutiones alias inferere procurarunt. (b) Inter alias autem, quasdam voluerunt inviolabiliter, & immutabiliter in perpetuum observari: videlicet de possessionibus,



bus, & redditibus nullatenus habendis, vel recipiendis, de appellationibus removendis; & quod non possit per Fratres Definidores Prioribus Provincialibus, neque per Priores Provinciales Fratribus Definitoribus, in suis Definitionibus in aliquo præjudicium generari.

## I V.

**Q**uasdā vero voluerunt sic immobiles permanere, ut non nisi à Consimilibus Capitulis, novis emergentibus articulis, casibus, vel negotiis, de ipsis possit aliquid pro tempore immutari: videlicet de Constitutionibus non faciendis, nisi per tria Capitula Generalia continua fuerint approbatæ: de non equitando, de expensis non portandis, de carnibus (nisi causa infirmitatis) non comedendis; ita tamen ut in his pro loco, & tempore Prælato liceat dispensare.

(a) *Anno ab Incarnatione Domini 1228.*) Declaramus, post hoc Generalissimum Capitulum, de quo hæc Constitutio sermonem habet, aliud Capitulum Generalissimum Parisiis itidem sub eodem Reverendissimo Magistro Jordano Anno Domini 1236. fuisse celebratum, de quo supra mentio facta est. Nullum autem aliud Generalissimum Capitulum usque ad hæc tempora celebratum fuit, etiam si bis, tempore videlicet Magistri Vincentii Bandelli, & demum tempore Magistri Sixti Fabri Lucensis, nec non tertio, tempore Magistri Nicolai Rodulphi indictum fuerit; neutrum tamen celebratum fuit, sed utrumque factum est Generale Capitulum: & in unoquoque duobus electis Definitoribus pro Generalissimo Capitulo antiquior post longam discussionem, fuit ad definiendum admissus.

(b) *Inter alias autem quasdam voluerunt inviolabiliter, & immutabiliter in perpetuum observari: videlicet de possessionibus, & redditibus nullatenus recipiendis.*) Declaramus, quod propter istam Constitutionem multa dicta, & scripta sunt, à quamplurimis viris doctis, & piis, de quibus mentio supra facta est. At in primis in Trident. Concilio omnis scrupulus remouetur, dum in Sessione 25. titulo de Regularibus capit. 3. *Sancta Synodus concedit omnibus Monasteriis, & Domibus tam virorum quam mulierum, etiam Mendicantium, exceptis Domibus Fratrum Sancti Francisci Capucinorum, & eorum qui Minores de Observantia vocantur, etiam quibus, aut ex Constitutionibus suis erat prohibitum, aut ex privilegio Apostolico non erat concessum; ut deinceps bona immobilia eis possidere liceat. Quod si aliqua loca ex prædictis quibus auctoritate Apostolica similia bona possidere permixtum erat, eis spoliata sint: eadem omnia illis restituenda esse decernit.* De quo supra in hac 2. distinctione dictum est pag. 68. colum. 1.

## CAPUT XI.

*De Visitatoribus.*

## I.

(a) **S**tatuimus, ut quatuor Fratres ad visitandam Provinciam in Capitulo Provinciali, à Priore Provinciali, & De-

finitoribus assignentur; vel plures, secundum quod Capitulo Provinciali videbitur expedire. (b) Qui excessus Priorum Conventualium, & Fratrum audiant, & emendent, absque constitutione, & immutatione status Domus. Loca verò sua ubique tenebunt, nisi in Capitulo, dum ab eis officium suæ correptionis exercetur: (c) quod in tribus diebus continuis terminetur. Si quæ autem gravia, & periculosa invenerint emeruisse à tempore Visitationis ultimò factæ per Visitatorem præcedentem, licet correctæ fuerint, nihilominus cum testimonio majoris partis Capituli studeant denunciare Magistro, & Definitoribus Capituli Generalis, vel Priori Provinciali, & Definitoribus Capituli Provincialis, si ibi Generale Capitulum non fuerit celebrandum.

## I I.

**V**isitatores præsentis verbo, absentes scripto, referre debent Definitoribus Provincialis Capituli, vel Generalis (cùm in sua Provincia celebratur) de his quos visitaverint Fratribus: si in pace continui, in studio assidui, in prædicatione ferventes; quæ de eis fama, quis fructus, si in victu, & vestitu, & aliis secundum tenorem institutionum Ordo servetur. Priores autem, sive Lectores, & Supplices, in Visitatores nullatenus eligantur. Quod si quis Visitator antequam visitet, vel in ipsa visitatione in Priorem fuerit electus, & confirmatus, vel mortuus, vel aliàs impeditus, provideat Prior Provincialis de alio Fratre qui visitet loco ejus.

(a) *Statuimus, ut quatuor Fratres &c.*) Declaramus, quod Constitutio hæc Bononiæ fuit edita 1244. sed postea Bononiæ pariter 1275. facta fuit alia Constitutio, quæ supra de electione Prioris Provincialis habetur: quod videlicet Prior Provincialis totam suam Provinciam per se si poterit; vel per idoneos Vicarios teneatur quotannis visitare &c. Ex qua Constitutione patet, Priorem Provinciale posse per se, sine Definitoribus constituere Visitatores, eisque committere auctoritatem suam, juxta quod judicaverit expedire.

Item declaramus, quod Visitatores instituendi, non debent esse juvenes, sed antiqui in Ordine, graves & maturi, qui moribus, & vita probati sint. Qui in suis visitationibus de juvenum, ac studentium profectu, quomodo in moribus, & scientia se gerant, & an Fratres caste, & sine proprio vivant, & silentium, jejunia, abstinentiam à carnibus & alia regularia instituta observent, debent quam diligentissime inquirere: & omnia Priori Provinciali, vel Definitoribus Provincialis Capituli, fideliter exponere; sicut in pluribus Capitulis Generalibus fuit ordinatum.

Item declaramus in Capitulo Lugdunensi 1536. ordinat. 1. sic fuisse ordinatum: Quoniam per negligentiam Visitorum maxime declinat Regularitas, & reformatio retardatur; ordinantes præcipimus sub pœna absolutionis ab officiis, omnibus

nibus RR. Provincialibus nostri Ordinis; quatenus semel in anno infallibiliter per se ipsos, vel per alios idoneos Patres experientia, & zelo Religionis praevidentes, visitent omnes Conventus, & loca suarum Provinciarum: & quantum possunt observantiam nostrarum Constitutionum inducant. Praesertim vero infra scripta, in quibus, (ut vidimus,) valde Religio infirmatur, volumus toto conatu inviolabiliter, & penitus observari.

In primis, ut dicti Visitatores studeant diligenter reparationi Divini cultus, debitae clausurae, & communitati Conventus; poenis etiam, & praeceptis adhibitis. Diligenter etiam curent ut uniformitas vestimentorum, celebrationis Missarum, Divinorumque officiorum, & cunctarum Ordinis caeremoniarum ubique teneatur. Item faciant, ut cura non desit infirmis, quemadmodum habetur supra, *capite de Infirmis*.

Item inhibeant vagationes inutiles. Et Rom. 1571. ordinat 13. sic dicitur: Ordinamus, & praecipimus omnibus Provincialibus, & Vicariis Generalibus Congregationis, & Vicariatum; ut infra quadriennium teneantur Provinciales quadriennales suas Provincias, seu Congregationes, vel Vicarias, & singulos suos Conventus, saltem bis per se ipsos, nisi legitimum impedimentum habuerint, visitare. Quodnam tamen impedimentum sit legitimum, à discretis Provincialibus judicandum est. Si autem eorum officium fuerit biennale, saltem semel Provinciam, vel Congregationem per se ipsos visitare teneantur. Quod fuit confirmatum Barcinonae 1574. confirm. 26. & in utroque Capitulo nuper relato. Ac Romae 1571, & 1580. ordinatum, & stricte praeceptum est omnibus Praelatis, & Visitoribus Ordinis nostri: ne vel pecuniam, vel pretiosa munera à Fratribus, vel Sororibus accipiant; maxime vero ab iis, qui aut gratiam, aut iustitiam ab eis expectant, sed observetur ab illis constitutio Clementis VIII. *de largitione munerum*. Contra hoc autem facientes auctoritate Ordinis privamus eos largitis muneribus, quae Divino cultui (quaecunque fuerit) harum serie applicamus. Declarantes tales Praelatos in crimen proprietatis incurrisse, & poenis à Sacro Tridentino Concilio, & à nostris Constitutionibus statutis subiectos esse; praeter alias poenas, quae in Constitutione Clementis VIII. continentur.

Item declaramus, quòd Visitatores, & multo magis Provinciales, in visitatione admonere debent, & operam dare, ut ordinatio facta in Capitulo Bononiensi 1564. executioni mandetur: videlicet, quod caeremoniae omnes, quae ad Divinum ministerium, atque ad alia divina officia in nostris Ordinariis notatae sunt, prorsus observentur; & quòd earum executioni juvenes incumbant, ita ut eas optime addiscant. Et quoniam ex Rubricis nostris maxima dubia oriri solent, curet Reverendissimus Generalis, ut à tribus ab ipso designandis, omnia explicentur, quo in sacro illo Altaris ministerio maxime uniformitas inter Fratres nostros ubique appareat. Sacrarum quoque vestium, & corporalium, quoad fieri potest, eadem sit forma, & ea mundities, quae tantum decet sacrificium. Et praesertim in Capitulo Januensi 1513. & Neapolitano 1515. ordinat. 6. mandatum fuit universis Fratribus, ut exhibeant reverentiam debitam in Missis, Sacramento sanguinis Domini nostri Iesu Christi: ut scilicet ante oris absterfionem, digitorumque abluionem, sumant abluionem calicis, faciendam cum vino, & postea digitos abluant &c. Atque ut hoc omnino observetur, Praelati id publicent, & contrafacientes à Visitoribus graviter puniantur.

(b) *Qui excessus Priorum Conventualium, & Fratrum audiant, & emendent.*) Declaramus, quòd Visitatores in sua visitatione possunt omnes Fratres ad suam visitationem pertinentes ligare praecepto, & in eos ferre excommunicationis sententiam, quando praecepto non possunt veritatem extorquere; sicut fuit declaratum Perpiniani 1327.

Item declaramus, quòd omnes Fratres suis Praelatis, & Visitoribus praecipientibus, tenentur etiam secreta sibi commissa quae in periculum communitatis, vel aliarum personarum vergunt, revelare. Quapropter in iuramento fidelitatis continetur, quòd servi debeant huiusmodi secreta Dominis revelare. Praelati ergo praecepto Religiosus obstringatur ad pandendum tale secretum, etiam si promississet se non revelaturum, dicentibus Augustino, & Isidoro: *In male promissis rescinde fidem*. Quare in Capitulo apud Montem Pefulanum 1283. ordinat. 4. sic dicitur: Severissime inhibemus Fratribus nostris, aliquid sub secreto recipere, quòd vel correptionem impediatur, aut vergat in praedudicium, vel periculum Ordinis, vel quarumcunque personarum. Quòd si quis tale secretum receperit, teneatur illud suo Praelato, ipso requirente, fideliter revelare. Et hoc etiam ordinatum fuit Parisiis 1279. ordinat. 5. Si autem secretum illud in confessione Sacramentali audivisset, non tenetur, immo nec potest ex Praecepto Praelati illud ullo modo revelare. Quare in Capitulo Mediolanensi 1278. ordinat. 10. sic dicitur. Stricissime prohibemus, ne Fratres secreta in confessione Sacramentali accepta, directe, vel indirecte, nutu, vel signo, vel quovis alio modo aliis revelent. Hæc ibi. Si vero secretum eis commissum non vergat in praedudicium communitatis, aut alterius personae, & tale sit quòd absque peccato celari possit; nullo modo tenentur, nec debent Praelato percipienti, illud revelare: si enim revelarent, peccarent frangendo fidem; nam lege naturae, & promissione in Baptismo facta obligantur ad servandum ea, quae sunt fidei, & charitatis; qualia sunt illa, quae & nulli nocent, & sub secreto fidei committuntur.

Item declaramus, quòd si Visitatores, vel Praelati praecipiant Fratribus, ut quaecunque crimina à Fratribus commissa revelent, & crimen illud sit omnino occultum, & nullo modo ad multorum notitiam pervenerit, ac tale sit, ut nulli noceat nisi committenti; ille, qui tale peccatum occultum scit, ad hoc solum mentem debet intendere, ut peccantis Fratris saluti prospiciat, servato ordine correctionis fraternae: ut scilicet prius eum secreto corripiat inter se, & ipsum solum, postea adhibeat duos, vel tres Fratres, & tandem si se non correxerit, dicat Ecclesiae, id est Praelato. Et tale crimen occultum ante correctionem fraternam, non tenetur subditus Praelato praecipienti revelare, quia potius Deo, quam homini subditi obedire oportet. Ille tamen qui scit tale crimen, si firmiter credit, quòd ille correptus non se emendet, immò ex adverso in ipsum indignetur, & praeterea existimet correctionem illius multo facilius esse futuram ex admonitione Praelati, qui pius, discretus, & spiritualis sit, non habens indignationem, seu odium contra illum subditum: tunc posset etiam non accedente praecepto, crimen illud occultum ei tanquam Patri denunciare: & tunc non dicit Ecclesiae, quia non dicit ei tanquam Praelato, & iudici; sed sicut personae intendenti ad correctionem, & emendationem proximi, ad quam semper debet voluntatem intendere ille, qui denunciat. Secus de-

denunciando peccabit, quia facit contra præceptum Evangelii: Si autem peccatum Fratris, non ita sit occultum quin aliquibus suspicantibus innotescat multis, ex qua notitia multi scandalum sumant; tale quidem peccatum non solum nocet committenti illud, sed etiam multis. Et quoniam multitudinis bonum præfertur bono unius, debet Prælatus inquirere veritatem, ut vel per poenitentiam peccantis, vel ejus purgationem, & excusationem, scandalum à multitudine auferatur. Et in tali casu subditus, qui scit Fratris crimen, tenetur Prælato præcipienti obedire, peccatum illud ei manifestando; ut docet Sanctus Thomas Quodlibeto primo, articulo 16. & 17.

(c) *Quod in tribus diebus continuis terminetur.* Declaramus, quod Visitatores primum debent Priorum, Fratrumque excessus audire, atque illa, quæ eis manifestantur, si alicujus fuerint momenti, in scriptis redigere. Nec potest eis præfiniri tempus audiendi defectus hujusmodi, sed satis est, ut cum diligentia, & sollicitudine Fratres audiantur ab eis, ut tempus inaniter non conteratur. Ut autem audierint Fratres, eos seorsim, vel in Capitulo debent corrigere, & hoc corrigendi officium post tres dies continuos terminare. Ea autem, quæ in sua visitatione corrigenda invenerint, debent Magistro, Generalis Capituli Definitoribus (si anno illo in eorum Provincia celebratur) verbo, vel scripto denunciare: si vero alibi celebretur, Priori Provinciali, & Definitoribus Provincialis Capituli denuntiabunt.

## CAPUT XII.

*De Prædicatoribus.*

## I.

(a) *Provideant diligentissime Priores, ne committant Prædicationis officium, nisi Fratribus ad hoc idoneis; ac moribus, & scientia approbatis: ne eorum insufficientia, Prædicantium Ordo veniat in contemptum; & vergat in periculum animarum.*

Statuimus autem, quod in qualibet Provincia à Præsidente, & Definitoribus instituantur aliqui viri docti, & zelum Religionis habentes; examinatores, & approbatores omnium eorum Prædicatorum, & Confessorum, quos non constat manifeste esse doctos: ita quod nullus talium (nisi approbatus à duobus eorum in scriptis, vel declaratus à Definitoribus in scriptis, sufficiens, & idoneus ad prædicandum, vel confessiones extraneorum audiendum,) prædicet populo, etiam in villulis; aut audiat confessiones extraneorum sub poena carceris: & nihilominus Præsidentes hoc permittentes ab officiis suis absolvantur.

## II.

**N**ullus assumatur ad Prædicationis officium extra claustrum, & Fratrum consortium, infra viginti quinque annos:

nec prædicet populo, (b) nec confessiones audiat extraneorum sine licentia Prioris in Capitulo de consilio Discretorum sibi data. Illi vero, qui apti sunt, cum in prædicationem exire debuerint, eis Socii dabuntur à Priore, secundum quod moribus eorum & honestati judicaverit expedire. Qui accepta benedictione exeuntes, ubique (tanquam viri qui suam, & aliorum salutem procurare desiderant) religiose, & honeste se habeant, sicut viri Evangelici, sui sequentes vestigia Salvatoris: cum Deo, vel de Deo, secum, vel cum proximis utiliter loquendo, vitabunt suspiciosi comitatus familiaritatem. Placitis, & causis (nisi pro fidei negotiis) non intersint.

## III.

**C**UM Fratres nostri Diocesim alicujus Episcopi ad prædicandum intraverint, primo (si poterunt) visitabunt Episcopum, ut secundum consilium ejus in populo faciant fructum, quem facere intendunt. Et quandiu in ejus Episcopatu fuerint, ipsum devote obedientes erunt. Prædicare vero non audeat aliquis in Diocesi illius Episcopi, qui ne prædicet, interdixerit ex causa rationabili: nisi litteras, & mandatum habeat Summi Pontificis. (c) Caveant etiam Fratres nostri, ne (ponendo os in cælum) in suis prædicationibus Religiosos, & Clericos scandalizent, sed ea, quæ in ipsis emendanda viderint, obsecrando, ut patres, emendare procurent. (d) Socius autem datus Prædicatori, ipsi ut Priori suo obediat.

(a) *Provideant diligentissime Priores.* Declaramus, quod cum prædicationis officium in Ecclesia præcipuum sit, multisque privilegiis dotatum, ut habetur in cap. *Ex injuncto* extra de *Hæreticis*, & cap. primo & secundo, extra. *De Excessibus Prælatorum*: Prædicator in primis, ut digne prædicet, debet habere ardentem dilectionem, atque in omnibus suis studiis, & operibus animarum salutem, & ad eam suas vires, intendere. Deinde foris debet præferre mores Religiosos, vitæque honestate, & Christianæ pietatis exemplo populos ædificare. Tandem scientiâ, atque intelligentia sacrarum scripturarum satis eruditus esse debet, & utilia potius, quam curiosa docere, sicut in multis Capitulis ordinatum fuit.

Item declaramus, quod in Capitulo Bononiensi 1564. ordinatum fuit, ut in exponendis, & examinandis Prædicatoribus, & Confessoribus, magna diligentia adhibeatur: & quod non nisi in matura ætate ad audiendas secularium confessiones aliquis exponatur; & quod juvenes non sacerdotes ad prædicandum etiam in villulis non mittantur. Et Prælati qui contrarium permiserint, gravius puniantur. Et idem fuit confirmatum Romæ 1566. & 1571. & Barcinonæ 1574. Et Romæ 1589. inter alias ordinationes auctoritate Apostolica confirmatas, una est, in qua sic decernitur: Ordinamus & sub formali eodem præcepto, eademque censura (videlicet latæ sententiæ) præcipimus: ut nullus titulo, vel officio Prædica-



dicatoris donetur, seu Prædicator instituatur; nisi saltem per completum triennium sacram Theologiam audiverit, & à quinque deputatis examinadoribus (qui ipsum concionantem audiverint, & nedom de litteris, & moribus, sed de ejusdem ad prædicandum aptitudine judicium facere possint) idoneus fuerit judicatus, & approbatus. Cui ordinationi additum fuit, (quod & confirmatum fuit Romæ 1601. confirmat. 5. & Vallisoleri 1605. confirmat. 3.) ut Prædicatores per vota secreta approbentur. Venetiis vero 1592. ordinat. 12. statutum fuit, ut in qualibet Provincia, Congregatione, sive Vicaria teneantur Præsidentes illarum respective, de graviorum earundem Patrum consilio infra unum mensem ab harum Constitutionum publicatione, deputasse unum, vel plures Conventus, in quo, vel in quibus, à designandis Patribus idoneis erudiantur juvenes de prædicationis officio: præsertim ii, qui ad tale munus exequendum sunt aptiores; qui debito tempore ad Dei gloriam, salutemque animarum prædicantes, juxta sibi nomen Prædicatorum vendicaturi videantur. Et nullus in posterum Prædicatoris titulo donari possit, nisi consecrerit cursum Artium, sacramque Theologiam per triennium audiverit, casibus conscientiarum operam dederit, & in modo concionandi in aliquo Conventu ad id constituendo, judicio examineretur per vota secreta ferenda in Generali studio, non parum profecerit; & morum sit denique religiosorum, ut virum decet Evangelicum. Similiter nullus admittatur ad secularium confessiones audiendas, nisi pariter à quinque examinadoribus (& ubi tot non suppetunt idonei Fratres, saltem à tribus) aptus atque idoneus fuerit judicatus. Præcipientes ipsis, Prædicatorum, sive Confessorum examinadoribus respective, sub eodem formali præcepto, eademque excommunicationis læ sententiæ poena; ut per vota secreta sua dantes suffragia, excluso quolibet particulari affectu, ineptos excludant, & aptos admittant.

(b) *Nec confessiones audiat extraneorum.* ) Declaramus, quòd ad confessionum audientiam nullus exponi debet, nisi sit in vita, & moribus, & scientia approbatus, maturus, discretus, securus, & in casibus Sedi Apostolicæ, & Episcopis reservatis, ac etiam aliis ad salutem pertinentibus animarum, satis eruditus: sicut fuit ordinatum Bononiæ 1235. ordinat. 1. Parisiis 1236. & ibidem 1239. Nec secularium confessiones, maxime mulierum, ante trigessimum annum debent audire; sicut fuit ordinatum Bononiæ 1244. & Neapoli 1600. & nisi habeant specialem licentiam ab Episcopo, & à suo Prælato: sicut fuit ordinatum Budæ 1254. Nec ullo modo debent implicare se negotio casuum de jure Ordinariis reservatorum, vel quos præfati Ordinarii ex rationabili causa duxerint esse reservandos; nisi ex eorum beneplacito, & licentia; sicut fuit ordinatum Viennæ 1282.

Item declaramus felicis memoriæ Gregorium XIII. vivæ vocis oraculo, & etiam de consilio Congregationis super Concilium Tridentinum declarasse, ac statuisse; facultate per *Mare magnum*, & per alia privilegia concessa, non posse Regulares absolvere à casibus Episcopo reservatis. Et Sacra Congregatio Episcoporum, & Regularium de speciali mandato Sanctissimi Domini nostri Clementis VIII. jubet omnibus Confessariis, tam secularibus, quam Regularibus, quorumcumque Ordinum etiam Mendicantium, & Societatis Jesu, ne quis eorum sub prætextu quorumcumque privilegiorum à Sede Apostolica ductorum, quibuscumque, etiam singularibus personis, ab ullo ex casibus dubie, vel clare contentis in Bulla

*Cod. Regul. Tom. IV.*

Cænæ Domini, vel alias Sedi Apostolicæ reservatis, nec etiam à casibus Ordinariis reservatis, vel reservandis quocumque casu, nisi in mortis articulo, sine nova licentia à Sede Apostolica, vel ab Ordinariis respective obrenta, absolutionis beneficium impendere audeat. Quam licentiam à sancta Sede Apostolica obtentam, teneantur Ordinarii ostendere, etiam sub pœna excommunicationis, privationis officiorum, & dignitatum, & inhabilitationis ad audiendas confessiones, & ad quæcumque officia, & Prælaturas, ipso facto incurrenda absque alia declaratione &c. A quibus nonnisi à Romano Pontifice absolutionem obtinere valeant, & quatenus opus sit Sanctitas sua tales facultates nullas esse voluit. Sed postea eadem Congregatio speciali mandato ejusdem Sanctissimi Domini nostri Clementis VIII. similiter vivæ vocis oraculo super ea re habito, ipsum Decretum ita moderatur, & declarat etiam sub eadem prohibitione: eos tantum comprehendere casus, qui in Bulla Cænæ Domini legi consueta continentur; ac præterea violationis immunitatis Ecclesiasticæ, in terminis Constitutionis Gregorii XIII. violationis clausuræ Monialium ad malum finem, provocantium, & pugnantium in duello, juxta Decretum Concilii Tridentini, & Constitutionem Gregorii XIII. injicientium manus violentas in Clericos, juxta Canonem. *Si quis &c.* ac juris dispositionem: Simonie realis scienter contraclæ, ac etiam confidentiæ beneficalis. Item omnes casus, quos sibi Ordinarii locorum reservaverunt, ac in posterum reservabunt. In quibus omnibus enumeratis casibus dumtaxat, & sublata etiam pœna inhabilitationis audiendi confessiones, eadem Sacra Congregatio vult, & mandat dictum Decretum in sua firmitate, & pristino robore permanere. Et præterea declarat eos Sacerdotes, tam seculares, quam Regulares, qui aliquo privilegio in dicto Decreto expresso suffulti fuerint, posse juxta eorum privilegia, indulta, & facultates usu ante idem Decretum receptas, & quæ sub aliis revocationibus non comprehenduntur, tantum, & non aliter absolvere à casibus in præfenti declaratione non comprehensis: aliis vero Sacerdotibus talia privilegia non habentibus, nihil de novo concedit.

Item in Capit. Rom. 1569. admonit. 1. jussu Sanctissimi Domini nostri Pii V. debent omnes Provinciales facere, ut ex eorum mandato publicetur in Conventibus Bulla Cænæ Domini, & omnes Confessarii penes se habeant exemplar illius, ejusque tenorem fideliter observent: & si qui illam non habuerint, confessionum audientia priventur. Et Romæ 1571. confirmat. 13. id confirmatur, & additur, ut bis anno legatur coram toto Conventu, & in Sacristia affixa maneat. Et Barcinonæ 1574. confirmat. 11. & Venetiis 1592. ordinat. 1. statuitur: ut in singulis Sacristiis loco parenti pendeant duæ tabellæ, in quarum una sit Bulla Cænæ Domini; in alia vero sit nota casuum Summo Pontifici, & Episcopis quovis modo reservatorum. Et Romæ 1608. ordinat. 21. statuitur, ut cum in actu confessionis, vel proximo, pœnitens elemosynam dare voluerit, eam non accipiat Confessarius, sed ei significet reponendam esse in communi arca Ecclesiæ: & qui contra hoc fecerit, ipso facto sit privatus officio Confessarii per triennium, & idem confirmatur Parisiis 1611.

Item declaramus in Capit. Bononiensi 1564. ex Trident. Concil. sic fuisse statutum: Prælati Ordinis diligenter attendant omnia, quæ circa Reverendiss. Episcoporum observantiam à Sancta Synodo fuerunt statuta. Et si expositos ad confessiones, aut promovendos ad Ordines velint exami-

minare, humiliter pareant; neque ipsis contradicentibus, etiam in Ecclesiis nostris prædicare præsumant. Et si in aliquo horum durius aliquando cum Fratribus nostris agere videantur, æquo animo sustineant: nec de ea re quæstiones habeant, ut lites intentent. Cæterum si non ferenda gravamina interim occurrant, consulatur Reverendissimus Generalis Magister, vel illius Provinciæ superior Prælati, & secundum eorum consilium de opportuno remedio provideatur. Item declaramus in Capitulo Romæ 1612. admonit. 2. ordinatum fuisse, ut Præsidentes nostrorum locorum non permittant Clericos seculares habere conciones in Ecclesiis nostris tempore tum Adventus, tum etiam Quadragesimæ. Similiter nec permittant Regulares alterius Ordinis, tempore, vel Adventus, vel Quadragesimæ, vel infra annum regulariter habere conciones in Monasteriis Fratrum, & multo minus Monialium.

(c) *Caveant etiam Fratres nostri &c.* Declaramus, quod omnes Fratres nostri, tum Priores, tum Prædicatores, tum etiam alii, erga Dominos, & Prælatos Ecclesiæ, & verbis, & factis debent observantiam habere, & quoad possunt lites in Clericos inferendas vitare: nec quæstiones, aut causas contra eos agere, à quibus scandalum, & perturbatio posset oriri; sicut fuit ordinatum in Capitulo Bononiensi 1252. & Viterbii 1268. ordinat. 2. & Florentiæ 1272. ordinat. 2. & Palentiæ 1291. & Parisiis 1306. ordinat. ultima. Et cum causa servandi, vel non servandi interdictum contingat, ut inter Fratres, & Clericos discordia, & dissensio oriatur: debent Fratres omnes, integris Dei honore, & privilegiis Ordinis, matri Ecclesiæ morem gerere: sicut fuit ordinatum apud Cæsar-Augustam 1309. ordinat. 11.

(d) *Socius autem datus Prædicatori &c.* Declaramus per hanc Constitutionem non dari aliquam jurisdictionem Prædicatori supra Socium, sed solum intelligi Socium debere ei tamquam Superiori servire: atque in his, quæ ad personam, & ad officium pertinent, sponte, ac libenter parere, & obedire, sicut fuit declaratum Victoriæ 1331.

## I V.

**S**Tatuimus etiam, ne Fratres nostri in prædicationibus suis (e) dari, vel colligi pecuniam admoneant pro domo, vel aliqua persona speciali. Nullus Frater audeat quæstus facere; aut Bullas aliquas prædicare, nisi de licentia Magistri Ordinis sub pœna excommunicationis latæ sententiæ, quam sedentes pro tribunali proferimus in his scriptis; & sub pœna privationis omnium bonorum eis ab Ordine concessorum, & communitati applicandorum.

(e) *Dari, vel colligi pecuniam &c.* Declaramus, quod cum Prædicatores debeant se tamquam veros Religiosos, & viros Apostolicos in omnibus exhibere, & nulli materiam scandali præbere, & abstinere se ab omni suspitione criminis: ideo nullo modo debent permittere, ut dum ipsi actu prædicant, pecuniæ, sive pro Domo, sive pro alia quacumque persona colligantur: ne cupiditatis, & avaritiæ crimine notentur, & prædicationis officium con-

temnatur. Idem fuit ordinatum Parisiis 1236. & proinde in multis Capitulis præsertim Saviliani 1439. sub pœna excommunicationis fuit prohibitum omnibus Fratribus, prætextu cuiuscumque extranei quæstus, & indulgentiæ prædicandæ, vagari extra suos Conventus: vel pretium, aut mercedem causa huiusmodi prædicationum accipere; vel ad hoc Fratrem alium inducere. Et nihilominus tales Divini verbi corruptores, qui labe cupiditatis, & quæstuarie illusione splendorem nostræ Religionis offuscant, officio prædicationis, & bonis ad usum eis concessis, statim privati sint: & per annum ad carceres deputentur. Poterunt tamen Prædicatores Conventus, & Fratres Populo commendare, & eis paupertatem, & necessitatem illorum exponere: atque ut tempore opportuno eis eleemosynas largiantur, hortari.

## V.

**S**Tatuimus etiam, ut (f) nullus fiat Prædicator Generalis, antequam Theologiam audierit per tres annos, & nisi sit maturus, & discretus ad negotia Ordinis pertractanda in Capitulis: & nisi in Provincia illa gloriose prædicet; ita quod saltem per tres quadragesimas in aliqua bona Civitate, seu terra, seu aliquibus bonis Civitatibus, seu terris prædicaverit. (g) Idem dicimus de Inquisitoribus hæreticæ pravitatis non instituendis qui sufficienter in locis suæ Inquisitionis nesciunt prædicare. Quod si secus factum fuerit, nullus sit roboris, vel momenti.

(f) *Nullus fiat Prædicator Generalis.* Declaramus in Capitulo Lugdunensi 1536. ordinatum fuisse, ut Provincialis Capituli Definidores per se, vel per alios teneantur examinare eruditionem, tempus, & locum illius; qui petit ut fiat Prædicator Generalis: quantum scilicet, & ubi Theologiam audierit, Quod si tempus à Constitutionibus taxatum non compleverit, & idoneus minus reperiatur; illum præfenti statuto à promotione prohibemus, & promotum de cætero tali privamus officio, & Salmanticæ 1551. dicitur: Ordinamus, ut in creandis Prædicatoribus Generalibus debitæ conditiones contentæ in Constitutionibus observentur; quibus & hanc addimus, quod sit ætatis saltem triginta quinque annorum. Quod si contrarium fiat, vel factum fuerit, totum decernimus esse irritum, & inane. Et Romæ 1589. autoritate Apostolica sub formali præcepto mandatum fuit, ut nullus postuletur Prædicator Generalis, qui actus legitimos non fecerit, ac requisitas conditiones non habuerit, locusque vacaverit: & stantibus æqualibus meritis, & æquali idoneitate, antiquiores junioribus præferantur, in quorum petitionibus exprimi debet quot annis prædicaverint, & an, atque ubi vacet locus; secus petitiones illorum non admittantur. Item declaramus, quod Prædicatores Generales numerum Conventuum non possunt excedere, ut constitutio *infra* cap. 16. disponit, & in Capitulo Venero 1592. declarat. 5. fuit pariter ordinatum: ita sane, ut in numero Conventuum, domus Vicariatuum non comprehendatur, ut habetur in Capitulo Romæ 1589. declarat. 2. Et si qui modo ultra prædictum numerum reperiuntur instituti, decernitur eos non esse Prædicatores Generales, ac eorum gratiis, &

& privilegiis non posse uti. Hi tamen indecedenti-um locum gradatim succedent secundum ordinem suarum institutionum, semper tamen habitis requisitis. Item Romæ 1537. sic habetur: Ordinamus in toto Ordine, ut Lectores, & Baccalarei, vel Præsentati fieri non possint Prædicatores Generales: & qui modo tales existunt, volumus eos tali munere esse privatos: quemadmodum re ipsa, ac de facto privamus.

(g) *Idem dicimus de Inquisitoribus.* Declaramus, quodd Inquisitoris officium non est committendum, nisi Fratribus maturis, Religiosis, discretis, eruditis, cuilibet negotio idoneis, atque ad tam salubre officium exercendum aptis, sicut fuit ordinatum Argentinæ 1358. Inquisitores autem, non exercentes actu Inquisitionis officium, vel non actu occupantes se in illo, subiaceant potestati, & obedientiæ suorum Priorum Conventualium, quorum obedientias tenentur re ipsa adimplere eo modo, quo alii Fratres: atque etiam frequentare Chorum, & alia officia more cæterorum Fratrum exercere; nec debent à Conventu absque licentia Prælatorum exire. Præsidentes etiam Conventuum tenentur ipsis Inquisitoribus dare Socios discretos, providos, honestos, atque idoneos, ad eorum officia exequenda. Et Inquisitores tenentur sicut cæteri Fratres accedere ad Capitula, sicut fuit ordinatum Bononiæ 1275. & 1285. Quod si quis Inquisitor fuerit electus Prior, confirmari non potest, nisi Sacra Congregatio Sancti officii consulatur. Item tenentur de personalibus, singulis annis reddere rationem suo Priori Conventuali, uti jam supra pag. 95. column. 1. dictum est.

## CAPUT XIII.

*De Itinerantibus.*

## I.

(a) **E**untes ad Prædicationis officium exercendum, vel alias itinerantes: aurum, & argentum, pecuniam, aut munera (excepto victu, & necessariis indumentis, & libris) nec accipient, nec portabunt. Si quis autem aliquid acceperit de prædictis, teneatur Prælato suo cum redierit libere præsentare. Fratres autem non recipiant à mulieribus munuscula, nec dent: maxime Confessores. Item (b) Fratres non sint dispensatores alienarum rerum, nec pecuniarum: nec extraneorum deposita recipiant, nisi librorum, aut peramentorum Ecclesiasticorum.

(a) *Euntes ad Prædicationis officium exercendum, vel alias itinerantes, aurum, & argentum &c.* Declaramus, hæc omnia ita esse intelligenda; ut non fiant sine licentia Prælatorum, juxta id quod supra cap. de graviore culpa dictum est: sicut fuit declaratum Romæ 1558. & ibidem 1589. sic fuit dispositum. Admonemus omnes, & singulos Fratres ex Provinciis Indiarum advenientes, ut rationem semper habeant Apostolici Brevis editi à Pio IV. die 12. Augusti Anno 1562. infra scripti tenoris Mandamus sub pœna excommunicationis lata sententia, per contrasacientes eo ipso incurrenda, quod nullus Frater, vel Religiosus cujusvis dignitatis, gradus, vel conditionis existat, ab Indiis, aliisque

Cod. Regul. Tom. IV.

partibus regrediens, pecunias ultra quam viatico suo verisimiliter necessaria fuerint, asportare presumat: omnesque pecunias per eos asportandas, antequam naves ascendant Superiori suo in partibus illis esistenti denunciare, ostendere, literasque taxationis viatici hujusmodi ab eo recipere teneantur.

(b) *Fratres non sint dispensatores alienarum rerum &c.* Declaramus, quodd (sicut jam supra in Prologo Const. pag. 31. insinuatum est) Fratres non possunt suscipere commissiones causarum, arbitria, sive judicia, sive executiones testamentorum, vel dispensationes aliarum rerum, nisi eis autoritate sui Ordinis, vel alicujus Superioris commissa sint, ut dicit Sanctus Thomas quodlibeto 3. quæst. 6. art. 1. cum quo consentit glossa in cap. Non dicatis 10. qu. 1. ubi dicitur. *Religiosos non habere velle, neque nolle, nisi quando eis alius atiquis à lege, vel à Superiore permittitur.* Et de hac re fuerunt expresse prohibiti Fratres nostri in Capitulo Parisiensi 1234. ordinat. 2. & Bononiæ 1252. ordinat. 6. & Colonæ 1301. & in multis aliis Capitulis. Atque hoc ideo, quia ex talibus odia, damna, & scandala Ordini, ac Fratribus oriri solent. Hac etiam re prohibentur de jure communi Religiosi omnes 16. quæst. 1. cap. Monachi, & cap. de præsentium; ubi dicit glossa, *Religiosum, nisi ex Superioris licentia judicem, vel arbitrum, vel Advocatum esse non posse.* Abbas autem, sive Prælatus, bene hæc facere potest sine licentiâ, ut sentit glossa prima in Clementina Religiosus, & Bonifacius VIII. in privilegio concedit, ut Magister Ordinis, & Priores Provinciales, ac etiam dicti Ordinis Fratres inferiores, ex licentia eorum, ultimas voluntates, & testamenta quorumcunque, qui ab eis hæc requisierint, ac eos designaverint, exequi possint, & debitæ executioni mandare. Item cum ex litigiosis, & arduis, ac per se odiosis causis frequenter perturbationes, ac scandala oriantur: volumus, ac districte prohibemus aliquem Fratrem de cætero hujusmodi causas assumere, neque matrimoniis procurandis, seu etiam magnis arduisque negotiis pertractandis ullo modo implicari sine Prioris Provincialis speciali licentia. Contrarium autem facientes à Prioribus Provincialibus acriter, & severius puniantur; sicut fuit ordinatum apud Treverim 1266. Argentinæ 1307. & Metis 1313.

## II.

**P**rædicatores, vel itinerantes, cum in via existunt, officium suum dicant, prout sciunt, & possunt: & sint contenti officio Ecclesiarum, ad quas quandoque declinant. (c) Fratres autem viatores litteras testimoniales secum deferant, & in Conventibus ad quos declinaverint, de excessibus suis corrigantur. (d) In quacumque autem Provincia Fratres itinerantes deliquerint, Prior Provincialis, vel Conventualis, seu eorum Vicarii, Supprior, & Visitator, & cæteri, in quorum terminis inventi fuerint, corrigendi ipsos sicut Fratres suos liberam habeant facultatem. (e) Prior in Ordine, sit Prior in via; nisi fortè Prædicatori adjungatur, vel cum egrediuntur, Prior aliter ordinaverit de eis.



(c) *Fratres autem viatores litteras testimoniales secum deferant.* ) Declaramus, quod cum ex nimio, & inordinato Fratrum discursu, dispendia, & perturbationes, ac distractiones plurimae oriantur, regularisque observantia plurimum relaxetur: Patres nostri huiusmodi discursus inutiles, atque vagos compescendos, & subtrahendos curaverunt; atque id in multis Capitulis voluerunt, statueruntque debere inviolabiliter observari. Et Priores Conventuales, eorumque Vicarii, Fratres eorum Conventibus assignatos, ultra terminos eorundem Conventuum, id est ultra dietam (ut declaratur in Capit. Romano 1569.) licentiae non audeant: nisi causa gravis infirmitatis ipsorum, vel suorum parentum, vel etiam eviandi grave scandalum Ordinis, vel propter evidentem necessitatem, vel utilitatem Conventuum, sive etiam singularium Fratrum; & tunc ex discretorum consilio talis licentia concedatur. Qui vero huiusmodi licentiam obtinent, constitutionem de litteris testimonialibus deferendis, & praesentandis observent; in quibus & causa ipsius licentiae generaliter, vel peculiariter, & terminus itineris exprimantur. Quicumque autem Prior, vel ejus Vicarius praedicta non servasse repertus fuerit, teneatur infra quindenam in pane, & aqua triduo abstinere; ita sane ut talis poenitentia sit Conventui manifesta: quam si (absque causa infirmitatis) non peregerit, à Provinciali, vel ejus Vicario statim, ut ipsi de excessu legitime constabit, à suis officiis absolvatur. Fratres vero, qui ad quoscunque Conventus sine huiusmodi litteris testimonialibus porrexerint, à Prioribus, & Supprioribus eorundem Conventuum, ad quos pervenerint, nostra auctoritate ad unum annum voce priventur, & poena gravioris culpae eis imponatur: & Conventui de quo sunt, quod talis poena eis imposita sit, litteris peculiaribus significare teneantur: & si hoc facere neglexerint, à suis officiis absolvantur, & post absolutionem sint ipso facto ad unum annum voce privati; sicut fuit ordinatum Placentiae 1310. & apud Carcassonam 1312. & apud Montem Pefulanum 1316. ordinat. 2. Et in Capitulo Romano 1558. ordinatum fuit, ut nullus Prior Provincialis, vel Conventualis, nullusque Praedicens sub poena gravioris culpae Fratres recipiat fugitivos, & vagos sine illorum Provincialis licentia: nisi quantum, non quidem species fictae pietatis, sed vera necessitas infirmitatis religiosam exigit charitatem. Item declaramus in Capitulo Lugdunensi 1536. ordinatum fuisse, ut si itinerantibus domos secularium adire, & in eis commorari opus fuerit; nunquam eis nisi cum Religioso socio, & adire liceat, & commorari.

Et in Capit. Romano 1589. ordinatum fuit, ut Fratres exeuntes de terminis suorum Conventuum litteras testimoniales semper deferant, alioquin non recipiantur. Quod & fuit confirmatum Bononiae 1564. ordinat. 3. & additum; quod Praelati litteras testimoniales Fratrum ad eos pervenientium legere teneantur. Similiter, quod nullus sine sui Praelati licentia à suo Conventu recedat, etiam causa eundi ad Superiorem, sub poena gravioris culpae, quam tandiu persolver, quamdiu extra Conventum sine licentia fuerit commoratus. Et in Capitulo Romano 1580. ordinatum fuit, quod nullus Frater Ordinis nostri, è suo Conventu, vel Provincia sine dimissoriis litteris egrediatur; & quod Superiores, ad quos huiusmodi Fratres sine licentia litteris venerint, eos in carceribus includant, & penitus ad suas Provincias, suosque Conventus redire compellant. Quod fuit confirmatum in sequenti Capitulo Romano 1583. hoc insuper addito; quod Praesidentes Conventuum sub poe-

na absolutionis ab officio tales fugitivos retinere non audeant. Et tandem Romae 1589. sic dicitur: Admonemus etiam, qualiter Sanctissimus D. N. Sixtus Papa V. sua constitutione, & declaratione anno superiori edita, prohibuit expresse, ne quis Regularis ex una Provincia ad aliam, sive ex uno ad aliud ejusdem Provinciae Monasterium, Domum, vel locum ad habitandum, vel tanquam hospes recipi, aut ad modicum tempus divertere possit: nisi à Superiore illius loci, ubi residet, expressam licentiam discendendi in scriptis deferat, & exhibeat, vel nisi ita sit cognitus, ut nulla omnino de ejus persona dubitatio, vel suspicio oriri possit. Et illi, qui huiusmodi Regulares sine licentia in scriptis advenientes etiam ob causam pietatis, vel hospitalitatis receperint, eo ipso ab eodem Sanctissimo D. N. privantur, & in perpetuum privati declarantur voce activa, & passiva: necnon officiis, gradibus, honoribus, & dignitatibus quibuscunque per eos obtentis, atque indigni, & inepti sint ad alia in posterum obtinenda: praeter id quod saepius in multis Capitulis ordinatum fuit, ne quis Frater adveniens sine licentia, possit à Praelatis recipi, vel detineri, nisi in carceribus, ut punitus ad suum Conventum, & Provinciam remittatur. Quod quidem omnibus Praelatis, & Conventuum Praesidentibus sub poena absolutionis ab officio mandatum fuit. Ordinamus praeterea mandantes omnibus Fratribus Ordinis nostri sub poena gravioris culpae, ne quis extra terminos suae Provinciae, vel Conventuum praedicet, aut in nostris, aut in Ecclesiis alienis, & ne etiam quaestum faciat, sine licentia Magistri Ordinis, aut Patris Provincialis, aut Prioris locorum, in quorum terminis praedicare, aut quaestum facere voluerit. Quae ordinatio alias facta in Capitulo Avenionensi 1561. & Bononienfi 1564. confirmata fuerat.

(d) *In quacunque autem Provincia Fratres itinerantes deliquerint &c.* ) Declaramus, quod Fratres viatores, & hospites, Praesidentibus Ordinis, ad quos perveniunt, ratione jurisdictionis subiciuntur: qui & eorum malefacta non solum ibi, sed etiam alibi commissa castigare, & punire possunt, & debent, quia in suo crimine plebitur quis, ubi invenitur. Can. *Ubi de crimine agi oportet*, lib. 1. ubi glossa allegat illud: *Ubi te invenero, ibi te judicabo*. Et de hoc habetur glossa 3. quaest. 6. cap. 1. sicut fuit declaratum, & in Capitulo Romano 1336. quod existentes in poena gravioris culpae in una Provincia non possunt in alia absolvi, etiam si in illa fuerint assignati.

(e) *Prior in Ordine sit prior in via.* ) Declaramus, quod per hanc Constitutionem Priori in Ordine, (nisi Praelatus sit) nulla datur in via supra suum socium jurisdictio, sicut fuit declaratum Victoriae 1331.

### III.

(f) *Nullus Frater vadat ad Curiam, nisi de licentia Magistri Ordinis, vel Capituli Generalis: sed mittatur nuntius ad Fratres; qui sunt ibi, vel per aliquem alium (prout melius fieri poterit) negotium procuretur.* (g) *Prior Priorem supervenientem honoret: sed & hospes per Civitatem sine consilio ejus non discurrat, nec moram faciat.*

(f) *Nullus Frater vadat ad Curiam.*) Declaramus, in Capitulo Parisiensi 1245. sic fuisse ordinatum: Caveant diligentissime Fratres nostri, ne quis eorum accedat ad Curiam sine licentia Generalis Magistri: qui vero ex licentia ipsius iverint, vadant pedestres, secundum statuta Ordinis: & litteras secum deferant, causas, & negotia, propter quæ vadunt plene continentes. Et in Capitulo Placentino 1310. sic dicitur: Præcipit Magister Ordinis in virtute sanctæ obedientiæ ex Definitorum consilio, & assensu: ut nullus Fratrum ad Curiam Romanam vadat, vel e suo Conventu cum intentione eundi ad Curiam iter capiat, etiam causa procurandi negotia Ordinis, absque ipsius Generalis Magistri peculiari licentia. Quod ordinatum fuit in Capitulo Romano 1601. & ibidem 1608. denunc. 9. fuit denunciatum: felicitis recordationis Clementem VIII. amplo Decreto Superioribus mandasse, ne permittant Fratrem quempiam Romanam venire; nisi prius à Generali duntaxat licentiam in scriptis impetraverit. Si quis autem sine huiusmodi facultate Romam venire præsumpserit, voce activa, & passiva ad biennium privatus exeat; subituro etiam alias, arbitrato Superiorum infligendas pœnas. Quæ item omnia adversus eos, qui supradictos admiserint, & receperint, sine ulla exceptione locum habeant. Inter pœnas autem arbitrarias hanc idem Sanctissimus expressit, ut huiusmodi Fratres in carceribus per sex menses detineantur; prohibetque huiusmodi pœnam posse ab eorum Superioribus remitti; cum earum dispensationem & relaxationem Sua Sanctitas sibi reservaverit. Similiter in Capitulo Placentino 1310. ordinat. 12. præcepit Magister Ordinis in virtute sanctæ obedientiæ ex Definitorum consilio; ut nullus Frater accedat ad Curias Regum, seu Dominorum, Legatorum, seu secularium Principum, Potestatum, vel Baronum ob causas litigiosas, & propter negotia quæcumque procuranda, quæ per se secularibus odiosa sint; qui autem contra hoc fecisse comprehensus fuerit, privetur omni voce; & præterea pœnis aliis gravioribus puniatur: & hoc idem fuit ordinatum Carcaffonæ 1312. ordinat. 13. & Bononiæ 1285.

Item Perpiniani 1327. & apud Claromontem 1332. declaratum fuit: quod quilibet Frater ad suum Provinciale sine licentia sui Prioris, vel ad Magistrum Ordinis sine licentia sui Provincialis accedens; nisi recto tramite, sed ex adverso solus vagando, & hinc & inde cursitando iter habeat, tanquam apostata iudicandus, & in carcerem includendus est.

(g) *Prior Priorem supervenientem honoret, &c.*) Declaramus, quod tum Prior, tum alii Fratres, qui hospites sunt, & peregrini, sub jurisdictione, & obedientia illius Prioris sunt, à quo in suo Conventu hospites recipiuntur; atque adeo ejus ordinationibus, & mandatis sunt subiecti; nec debent absque illius licentia e Conventu exire, seu per villam, vel Civitatem pergere; ut Valentia 1596. confirmat. 5. ordinatum fuit, & Romæ 1601. confirmat. 3. confirmatum, ut hospites legi Depositi ita subiecti sint; ut si post sextum diem in Conventu aliquo morantur, teneantur quamlibet summam pecuniarum in communi Deposito illius Conventus reponere, nec sine licentia Prælati illius, pro negotiis quibuslibet expendere. Debet etiam advenientem Priorem humane benigneque recipere, cumque præ cæteris honorifice tractare; quia qui bene præsunt, duplici honore digni sunt. Sed & si contingeret alienæ Provinciæ Priorem

Provincialem in Refectorio comedere, absente Præsidente Provinciæ, Prior Conventus debet illi dare locum nolæ: cum ille non sit locus iudicii, sed dignitatis, unde & Abbatibus, & Episcopis datur, sicut fuit declaratum in Capitulo Januensi 1513.

Item in Capitulo Viennensi 1282. sic fuit ordinatum. Cum ex insinuatione terminorum, & limitum aliorum Conventuum, & Provinciarum perturbationes, & scandala oriri soleant: Magister Ordinis ex consensu Definitorum Prioribus Provincialibus, & Conventualibus, cæterisque Fratribus strictè injungi; ut limitationes factas inter unam Provinciam, & aliam, & inter Conventum & Conventum summa, & exacta diligentia observari studeant: & Fratres quoties oppositum fecerint, toties pœnæ gravioris culpæ subiciantur; & quidquid infra limites alterius Provinciæ, vel alterius Conventus acquisierint, teneantur statim Conventibus, in quorum præjudicium quæstum fecerint, absque ulla dilatione restituere. Et Treveris 1249. sic dicitur: Strictè prohibemus Fratres unius Provinciæ audere infra terminos alterius Provinciæ quæstum facere, vel ibidem (nisi forte transeundo, vel iter agendo) prædicare, absque licentia Prioris Provincialis, vel Conventualis, ad quos spectant prædicti termini: quod si contrarium fecerint, gravius puniantur. Et hoc idem fuit confirmatum Romæ 1605. ordinat. 23.

## I V.

(b) *Fratres Minores, sicut & nostri charitative, & hilariter recipiantur; & secundum facultatem Domus pie, & honeste procurentur.* Quicumque autem Prior Provincialis sine licentia Magistri Ordinis, vel Frater alius quicumque, sine licentia Prioris Provincialis (2) Archiepiscopatum, vel Episcopatum receperit; (nisi per talem obedientiam cogatur, quam transgrediendo peccaret mortaliter) ipsum præsentī statuto suffragiis, societate, ac omnibus beneficiis Ordinis, tam in morte, quam in vita privamus.

(h) *Fratres Minores, sicut & nostri charitative, & hilariter recipiantur.*) Declaramus, quod Priores, & Fratres nostri omnes diligentissime curare debent, ut amorem maximum erga Fratres Minores semper, & ubique habeant, & corde conservent, ore eos laudent, opere benignissimeque recipiant, humanissimeque tractent; & de pace cum eis habenda quantum possunt solliciti sint, qui autem contrarium ausi fuerint, graviter puniantur. Et caveant Fratres, ut neque inter se, neque cum aliis quantumcumque familiaribus, de ipsis minus bene loquantur. Si qui vero amicitia, & familiaritatis specimen præferentes, mala de prædictis Fratribus retulerint, Fratres nostri non sint faciles ad credendum: quin potius eos quantum possunt excusare conentur. Quod si forte ipsi Fratres Minores de nobis male loquendo, nos quandoque provocaverint; tamen nullo modo publice cum eis contendamus, sicut fuit ordinatum Parisiis 1236. & 1256. & Valentia 1647. ordinat. 18.

Item in Capitulo Mediolanensi 1255. & Parisiensi 1256. ordinat. 16. sic fuit ordinatum: Fratres solliciti sint, ut humaniter excipiant hospites, & charitative tractent, præsertim venientes ex Provinciis extraneis, quibus omnia, quæ eis opus fuerint, ut necessitates itineris postulabunt, provideant, & administrent; eisque consulant, & ferant auxilium, quod ad alios Conventus transire possint, maxime ex his locis, in quibus sit transeundi difficultas.

(i) *Archiepiscopatum, vel Episcopatum receperit.* Declaramus, quod solus Magister Ordinis, & Prior Provincialis, non autem eorum Vicarii licentiam dare possunt recipiendi Episcopatum, non obstante ordinat. Capit. Generalis Treverensis 1289. declarat. 2. ubi etiam Vicarii Magistri Ordinis, & Priorum Provincialium tribuitur, quod possint dare licentiam recipiendi Episcopatum. Tamen hæc facultas, ex auctoritate Apostolica solis Magistris Ordinis, & Prioribus Provincialibus fuit reservata: prout Innocentius IV. Clemens IV. & Nicolaus IV. in privilegio concessio Ordini nostro sic dicunt: *Prohibemus, ne quis Frater Ordinis vestri, sine speciali licentia Magistri Ordinis, aut Provincialis, aut mandato Sedis Apostolicæ, electioni, aut postulationi ad quamcumque dignitatem extra Ordinem de se factæ audeat consentire; decernentes irritum, & inane quidquid secus contigerit attentari.*

## V.

(k) **F**RATRES, nostri Ordinis Episcopis, vel aliis quibuscumque personis extra Ordinem assignatos, qui in jejuniis, & abstinentiis, victu, & vestitu statuta Ordinis non servant; suffragiis, & beneficiis Ordinis tam in morte, quam in vita privamus: quousque super hujusmodi excessu adeo digne satisfecerint, quod per Magistrum Ordinis, vel Provincialem suum ad hujusmodi suffragia restitui mereantur.

(k) *Fratres, nostri Ordinis Episcopis &c.* Declaramus, quod Piores Provinciales in suis Provinciis debent Episcopos ex Ordine nostro assumptos admonere, ut secundum Ordinis institutionem, vestibus, calceamentis, jejuniis, & abstinentiis aliisque rebus utantur, quæ Episcopali officio non inferunt impedimentum, alioquin eis non concedant Fratres in munus Socii, & concessos revocent; sicut fuit ordinatum in Capitulo apud Montem Pefulanum 1247. ordinat. 2. Et in Capitulo Metis 1313. sicut fuit ordinatum: Cum ex Fratrum Ordinis nostri promotione ad incertos, & vagos titulos Episcopatum, idem noster Ordo in contemptum adducatur; diligenter caveant Piores Provinciales, ne propter cuiusvis preces, & petitionem, alicui Fratri licentiam dare præsumant; Magistro Ordinis, vel Provinciali Capitulo inconsulto. Nec talibus Episcopis, vel aliis quibuscumque, ullos ex Ordine nostro Socios nisi discretos, & maturos, moribusque probatos concedant. Si qui autem Episcopi Ordinis nostri inventi fuerint, qui minus honeste in detrimentum, & præjudicium Ordinis vivant; Socios eis assignatos studeant, quamprimum ad Ordinem revocare.

Item Bisuntii 1353. sic habetur. Declaramus, & denunciamus universis Fratribus nostri

Ordinis, Dominum Papam nostrum publice, & manifeste denunciassse, quod Capellani honoris Domini Papæ, aliorumque Prælatorum nullam exemptionem habent a Superioribus suis: sed Magister Ordinis alique Prælatus possunt contra tales Capellanos procedere, illos corrigere, ad claustrum reducere, & si opus fuerit, arrestare. Item dicimus de Fratribus, qui Regibus, Prælatibus, Domicellis, atque aliis Ecclesiasticis personis assignati sunt; qui cum deliquerint, ac minus honeste se gesserint, à suis Prælatibus pœna plectantur, & reducantur ad Ordinis disciplinam: & in eorum locum eisdem Ecclesiasticis personis alii maturi, atque honesti Fratres tribuantur. Et Bonifacius IX. in privilegio Ordini concessio, sic dicit: *Statuimus, & ordinamus ut omnes, & singuli Fratres Ordinis Prædicatorum Apostolicæ Sedis Capellani præsentibus, & futuris, perinde suis Superioribus, eorumque correctioni in omnibus, & per omnia subiecti sint; ac si prædictæ Sedis Capellani non essent; non obstantibus exemptionibus, aliisque quibuscumque privilegiis, indulgentiis, gratiis, & litteris Apostolicis Capellanis dictæ Sedis conjunctim, vel divisim sub quavis forma, vel expressione verborum a dicta Sede concessis, vel in posterum concedendis.* Hæc ille. Et in Capitulo Bononiensi propter Concilium Tridentinum, sic statutum fuit: Nullus Fratrum nostrorum alicujus Principis, vel Episcopi, vel Communitatis, sive etiam cuiusvis alterius personæ obsequio se subiciat, vel legendi sive prædicandi officio, sine sui Prælatus licentia suas operas locet; secus tanquam inobediens, & proprietarius pœna plectatur. Neque cuiquam liceat absque licentia Præsidentis recedere à Conventibus suis, etiam causa adeundi Superiorem, nisi cum ab illo fuerit evocatus. Quod si quis contra hoc fecerit tamdiu pœnæ gravioris culpæ subiaceat, quamdiu sine licentia extra Conventum fuerit commoratus. Illi vero, qui studiorum causa ad Universitates mittuntur in quibus sint Conventus Ordinis nostri, in ipsis dumtaxat habitent, secus omni gradu acquirendo habeantur indigni, & in super Prælato ejusdem Conventus causa iuste cognita, pœna plectantur.

## VI.

**F**RATRES vero nostri Ordinis, cum fuerint ad aliquam Ecclesiam, vel dignitatem extra Ordinem ad sui instantiam à Sede Apostolica pronunciati, (l) ipso facto sint ab omni præsentia, & officio intra nostrum Ordinem sibi commissio absoluti: à quibus eisdem tenore præsentium, absolutos esse decernimus. Alii vero, qui sine sui instantia, sunt similiter pronunciati, nisi infra quatuor dies à notitia dictæ pronuntiationis sibi factæ, ipsi publice renunciaverint, & per publicum instrumentum; simili modo, ut præfertur absoluti existant. Præcipientes omnibus, & singulis Fratribus præsentibus, & futuris, quatenus nulli prædictorum obedire præsumant, vel audeant quoquo modo. Fratres nostros beneficiatos, vel etiam habilitatos solummodo ad beneficia, inhabiles reddimus ad prælationem, seu superioritatem in Ordine nostro. Nec aliquis eorum passivam, vel activam vocem quomodolibet in Ordine



dine habere possit, nisi ante beneficio, & habilitationi renunciaverit: ita quod renunciatio sit legitima acceptata instrumento testante. Renunciatio autem cum regressu, aut quacumque reservatione fructuum, nisi hujusmodi fructus mere & integraliter proveniant ad nostrorum utilitatem Conventuum, & non tantum alicujus particularis personæ; non acceptetur, nec alicujus momenti habeatur.

(1) *ipso facto sint ab omni præsidentia, & officio intra nostrum Ordinem sibi commissio, absoluti.* Declaramus, quod non solum illi, qui sive ad sui, sive ad aliorum instantiam pronunciantur designati ad aliquam dignitatem extra Ordinem, sunt ipso facto ab omni præsidentia & officio Ordinis absoluti; verum etiam illi, qui per litteras Apostolicas, quodcumque Ecclesiasticum beneficium, vel Capellaniam aliquam obtinuerint; nec activam, vel passivam vocem habere, nec in Conventibus residere, nec in eis cameras obtinere possunt sine licentia Magistri Ordinis. Et idem dicimus de aliis proveclis ad Ecclesias titulares, vel ad quascumque Ecclesiasticas dignitates: sicut Sixtus Papa Quartus in *Bulla aurea* declaravit. Item in alio Brevis ejusdem Papæ Sixti recepto in Cap. Perusino 1478. sic habetur: *Nos, qui & scandala amputare, & quietem dicti Ordinis Prædicatorum præservare desideramus: declaramus, quod Patres prædicti Ordinis ad beneficia habilitati, donec beneficia sint consecuti, activam tantum vocem in dicto Ordine habent: quamprimum vero aliquod beneficium obtinuerint, etiam activam vocem amittant, & neutra in dicto Ordine, uti possint, non obstantibus quibuscumque contrariis.* Hæc ille. Et in prædicto Capitulo sic dicitur: Statuimus, & ordinamus, quod Fratres, qui licentiam habent exercendi Divina officia extra Ordinem, quamdiu extra Ordinem sic exercuerint, nec cellam, nec activam, vel passivam vocem in Conventibus ejusdem Ordinis habere possint. Nec Conventus sit eis in aliqua re obligatus, nisi suffragiis in morte: & hoc idem fuit antea ordinatum Venetiis 1357.

Item in Capitulo Romano 1525. sic statutum fuit: Ordinamus, ut Fratres manentes extra Ordinem sine Superiorum licentia, si postea ad eundem Ordinem, etiam ex Superiorum licentia redierint; non possint habere infra decennium aliquod prælationis, vel Vicariatus officium, sine expressa licentia Reverendissimi Magistri Ordinis in scriptis obtenta. Et in Capitulo Romano 1508. sic habetur: Fratres aliarum Provinciarum nisi per triennium fuerint in Provincia; aut alias habeantur cogniti, Conventibus, aut locis non præficiantur nec Magistri Novitiorum, nec Sacristæ fiant, nec similes administrationes eis committantur. Et Romæ 1553. sic dicitur: Admonemus omnes, & singulos Fratres Ordinis nostri, præsertim Prælatos, eisque in virtute sanctæ obedientiæ præcipimus: ne eos, qui curata, aut non curata beneficia acceperint, retineant ad manendum in Domibus Ordinis: nec ad vocem activam, vel passivam absque Magistri Ordinis dispensatione admittant, nisi prius re ipsa eisdem beneficiis renunciaverint. Et iterum Romæ 1585. sic habetur: Ordinamus, ut Fratres, qui quacumque de causa, & quomodocumque extra Conventum permanent, (præterquam si officio sanctæ Inquisitionis inserviant) non censeantur in Conventibus assignati ad vocem quacumque ratione habendam: sed omnino ab electionibus faciendis, sicut dictum est, intelligantur exclusi; quod Romæ 1589. pariter confirmatum fuit.

## VII.

PRæcipimus autem in virtute Spiritus Sancti, & sanctæ obedientiæ Prioribus Provincialibus, & Conventualibus, ac eorum Vicariis: quod nulli Fratri electo, seu postulato extra Ordinem ad quamcumque dignitatem, personatum, vel gradum infra dignitatem Episcopalem, licentiam concedant hujusmodi electiones, seu postulationes acceptandi, vel alio quomodolibet prosequendi. Eodem præcepto prohibentes, ne Fratres aliqui propter licentiam sibi datam contra prohibitionem hujusmodi, præmissas electiones, seu postulationes aliquatenus, vel per se, vel per alium prosequantur. Si quis autem in præmissis secus fecerit, incurrat excommunicationis sententiam ipso facto; quam sententiam ferimus præsentis statuto: & nihilominus (m) omnibus gratiis Ordinis sit privatus; ad quas restitui non valeat, nisi per Magistrum Ordinis, vel Capitulum Generale.

## VIII.

(n) SI quis Frater nostri Ordinis per se, vel per alium pro se, vel pro alio ordinationem de se, vel de alio factam, vel obedientiam sibi, vel alii Fratri injunctam per quamcumque personam extra obedientiam nostri Ordinis constitutam quocumque modo procuraverit revocari: vel in aliqua Provincia, aut Conventu, aut officio, sive etiam studio generali poni, vel remanere, vel inde amoveri: ipso facto ex vi præsentis statuti in poenam incidat gravioris culpæ; in qua, vel à qua cum tali dispensari non possit, nisi per Magistrum Ordinis, vel Capitulum Generale.

(m) *Omnibus gratiis Ordinis sit privatus.* Declaramus, quod privare Fratrem omnibus gratiis Ordinis, est ipsum privare Prioratu, Suprioratu, Lectura, Prædicatione generali, omnique gradu, & promotione, quæ in Ordine nostro acquiri potest. Et volumus, atque ordinamus, ut talis Frater omnibus gratiis Ordinis sit privatus, omni etiam voce privatus sit: & bonis omnibus ad proprium usum ei concessis; quæ ad Conventum illius applicanda erunt; sicut fuit declaratum apud Narbonam 1354. & apud Rothomagum 1361. ordinat. 3. Quæ quidem gratiæ non possunt restitui, nisi à Magistro Ordinis, vel à Generali Capitulo.

(n) *Si quis Frater nostri Ordinis per se, vel per alium &c.* Declaramus, quod si quis Frater Ordinis nostri per se, vel per alium, pro se, vel pro alio ordinationem de se, vel de alio factam, vel obedientiam sibi, vel alteri Fratri impositam, quocumque modo per quamlibet personam extra obedientiam nostri Ordinis constitutam revocari consenserit: vel in aliqua Provincia, seu Conventu, sive etiam studio generali poni, aut remanere, aut inde amoveri

vel

vel cum personis extraneis commorari, vel in aliquo officio esse tentaverit; ipso facto ex vi presentis statuti incidat in poenam gravioris culpæ, à qua, vel in qua cum tali dispensari non possit, nisi à Magistro Ordinis, vel à Capitulo Generali. Talis autem quamdiu erit in hac poenitentia, si Prædicator est prædicationis officium non exequatur, neque ad aliquod officium Ecclesiæ admitti debet, neque ei aliqua obedientia committatur, nec vocem habeat, nisi in sui accusatione: & si Sacerdos fuerit, vel Confessarius, his officiis non fungatur, atque adeo celebrare, & confessiones audire non poterit; sed omnia debebit Sacerdotis officia prætermittere, sicut fuit declaratum Ferrariæ 1362. Atque animadvertendum est, prædictam Constitutionem correctam fuisse apud Verdunum 1356. sicut supra conscripta est.

Item in Capitulo Lugdunensi 1318. ordinat. 7. sic dicitur: Cum Fratres aliqui in confusione Ordinis, & damnationem animarum suarum, correctionem de eis, vel aliis factam, sive etiam faciendam impedire, & per personas extra obedientiam Ordinis constitutas aliis Fratribus gravamen facere contendant: volumus, & ordinamus, ut quicumque repertus fuerit esse talis, poenæ gravioris culpæ subiaceat, & omnibus gratiis Ordinis privatus sit: quæ ei non possint restitui nisi à Magistro Ordinis, aut per Definidores Capituli Generalis. Et Romæ 1571. ordin. 9. sic dicitur: Ordinamus ne Fratres Ordinis nostri ad seculares cujuscunque conditionis, aut dignitatis confugiant: vel ad evadendas poenas à suis Prælati impositas, vel ad rejiciendum aliquid quomodolibet ab eis mandatum, vel ad obtinendum quemcumque gradum, vel dignitatem. Declarantes præfati statuto Fratres nostros esse inhabiles ad quascunque Ordinis dignitates, nisi à Magistro Ordinis fuerint restituti. Præcipientes insuper Prælati, ut Fratrem quemlibet hujusmodi, tamquam præcepti transgressorem poenæ gravioris culpæ subjiciant. Quod Bononiæ 1574. & Romæ 1580. confirmatum fuit.

Item declaramus in eodem Romano Capitulo 1580. publicatum fuisse Breve Gregorii XIII. in quo ipse Summus Pontifex Prælati omnibus Ordinis nostri in virtute sanctæ obedientiæ mandabat, ne ad instantiam, & petitionem quarumcumque personarum sive secularium, sive Ecclesiasticarum extra eundem Ordinem constitutarum, etiam Cardinalatus honore, & quamcumque seculari dignitate, & excellentia, etiam Ducali, Regali, & Imperiali fulgentium; cuilibet dicti Ordinis Religioso ullam gratiam concedere, vel poenas aliquas remittere audeant. Quinimmo quoscunque dicti Ordinis Fratres, & Religiosos, qui contra decreta suarum Constitutionum hac via, & his mediis per conquisitos favores, & suffragia aliquid sibi procuraverint, ad talia, & similia, ac etiam majora in eodem Ordine consequenda perpetuo inhabiles declaravit. Quapropter in Capitulo Romano 1589. postquam Breve Gregorii ad verbum relatum est in §. *Quamobrem*, sic habetur: Quamobrem singulos nostri Ordinis Prælatos admonemus, ut scientes se non posse absque peccato mortali quidquam ad secularium, vel personarum extra nostrum Ordinem constitutarum instantiam concedere, abstineant prorsus, neque id unquam faciant. Subditos vero pariter monemus, ut considerantes se inhabiles fieri ad munera omnia, caveant ne aliquid hoc modo procurent. Et quoniam ex hujusmodi mendicatis suffragiis Religionis rui-

na patenter exoritur, ac ejusdem status, atque tranquillitas summopere perturbatur, distributi- vè justitiæ aditus intercluditur, ambitioni via aperitur, & demum indigni (utpote audaces) virtute præditis, ac benemeritis in sua se humilitate, ac modestia continentibus, interdum præferuntur, idcirco ad hujusmodi abusus tollendos, in virtute Spiritus Sancti, & sanctæ obedientiæ sub formali præcepto, nec non sub poena excommunicationis latæ sententiæ, hac una pro trina canonica admonitione præmissa, præcipimus, ne quisquam directe, vel indirecte, per se, vel per alium, pro se, vel pro aliis ejusdem Ordinis Fratribus apud personas extra nostrum Ordinem constitutas, & de nostro Ordine non assumptas, gratiam aliquam, vel poenarum remissionem à Prælati nostri Ordinis obtinendam procuret. Et sub eodem formali præcepto eademque censura prohibemus, quemlibet hac de causa aliqua munera secularibus promittere, vel exhibere.

Item declaramus, quod cum à nonnullis dubitaretur, an sub gratiarum nomine, quo Gregorius XIII. in sua Constitutione usus fuerat, gradus, honores, dignitates, officia, & munia prædicti Ordinis comprehendantur, fel. rec. Clemens VIII. per alias similes litteras datas ad diem 23. Maji priores Gregorii Constitutiones quoad omnia confirmavit: & quoad quoscunque gradus, honores, dignitates, officia, administrationes, functiones, Prælaturas ejusdem Ordinis perpetuo amplificavit, atque ampliandas esse decrevit. Et universis Ordinis Fratribus non solum in prædictis omnibus favorem secularium minime procurare, sed ne quidem sponte oblatum recipere: & similiter ne propter hanc causam munera aliqua secularibus elargiri, vel exhibere audeant, in virtute sanctæ obedientiæ, & sub poenis in dictis Gregorii prædecessoris litteris contentis præcepit, interdixit, & expresse prohibuit. Item quæcumque contenta tum in Gregorii XIII. litteris, tum in illo §. *Quamobrem*, Romani Capituli 1589. his poenæ verbis in perpetuum confirmavit: *Nos Ordinis prædicti quieti, ac Religiosorum illius saluti opportuni- us consulere, aliasque in præmissis providere volentes, ad litterarum præfatarum, necnon Decreti Capituli Generalis ejusdem Ordinis, in executionem earundem litterarum facti quod incipit: Quamobrem*, singulos nostri Ordinis Prælatos admonemus &c. *veriores, & totos tenores præsentibus pro expressis ac ad verbum insertis habentes, motu proprio, ex certa nostra scientia, ac de Apostolica potestatis plenitudine, litteras, ac Decretum hujusmodi, ac in eis contenta Apostolica autoritate tenore præsentium perpetuo confirmamus, & approbamus, & illis perpetua, & inviolabilis firmitatis robur adjicimus, omnesque, ac singulos tam juris, quam facti, & alios defectus, si qui in eis intervenerint, supplemus.* Tandem Sanctissimus D. N. Paulus Papa V. in alia Constitutione ad diem 7. Januarii 1608. motu proprio, & ex certa scientia prædictas Gregorii & Clementis litteras atque etiam in eis contenta in perpetuum confirmavit, & approbavit, & perpetuæ firmitatis robur adjecit. Quam postea Pauli V. Constitutionem, Patres Ordinis nostri in Actis Romani Capituli 1608. insertam esse voluerunt.

## CAPUT XIV.

## De Studentibus.

## I.

(a) Quoniam circa studentes diligens est adhibenda cautela, aliquem specialem Fratrem habeant, sine cujus licentia non scribant quaternos, nec audiant lectiones: & quæ circa eos in studiis corrigenda viderit corrigat; & si vires ejus excedant, Præfato proponat. In libris Gentilium, & Philosophorum non studeant, & si ad horam inspiciant. (b) Sæculares sententias non addiscant, neque artes, quas liberales vocant; nisi aliquando circa aliquos Magister Ordinis, vel Capitulum Generale, vel Prior Provincialis, vel Capitulum Provinciale voluerit aliter dispensare, (c) sed tantum libros Theologicos, tam juvenes, quam alii legant. Ipsi vero in studio taliter sint intenti, ut de die, de nocte, in Domo, in itinere legant aliquid, vel meditentur; & quicquid poterunt retinere cordatenus nitantur.

(a) Quoniam circa studentes diligens est adhibenda cautela &c. ) Declaramus, quodd studium sacrarum scientiarum Religioni nostræ quam maxime congruit. Imprimis, propter illud quod vitæ contemplativæ proprium est: nam contemplatio ordinatur ad rerum Divinarum considerationem, quæ recte studio dirigitur. Etenim studium liberat contemplantem à periculis, quæ sunt errores; in quibus sæpe versantur ii, qui contemplantur, cum tamen Scripturas sacras ignorent. Quapropter Greg. lib. Moralium dicit: Nonnulli dum plus exquirunt contemplando quam capiant, usque ad perversa dogmata erumpunt. Secundo, studium Religioni nostræ necessarium est, quoniam ipsa est instituta ad tradendum aliis contemplata per doctrinam; quæ sane res fieri non potest sine studio scripturarum, earumque contemplatione. Quare Hieronymus ep. 16. quæst. 1. dicit: Multo tempore dicas, quod postea possis docere: ne sis miles antequam tyro, & Magister antequam discipulus. Et Apostolus de Episcopo, ad quem pertinent actus hujusmodi, dicit: Ut potens sit exhortari in doctrina sana, & eos qui contradicunt arguere. Quamobrem distinct. 38. dicitur: Ignorantia quæ mater est cunctorum errorum, à cunctis vitanda est, & maxime ab his qui officium docendi in populo susceperunt. Tercio litterarum studium Religioni nostræ convenit, quoad illud, quod ei cum omnibus Religionibus est commune: valet enim primo ad profligandam carnis lasciviam; quapropter Hieronymus inquit: Ama studia litterarum, & carnis vitia non amabis, de consecratione distinctione 5. cap. Nunquam. Deinde valet ad comprimendam, atque restringendam divitiarum cupiditatem; quia ut dicit Philosophus: Melius est philosophari, quam ditari. Ac proinde Hieronymus: Crates ille Thebanus, cum ad philosophandum pergeret, magnum auri pondus abiecit 12. quæst. 2. capit. Gloria. Tandem valet ad exequendum ea, de quibus erudimur. Quare Aug. dixit: Quæ perversitas est illi lectioni nolle obtemperare, qui vult ei continere.

Cod. Regul. Tom. IV.

nno vacare. A sacra etiam Scriptura docentur homines de modo, atque ordine obediendi, ut habetur 8. quæst. 1. capit. Sciendum.

(b) Sæculares scientias non addiscant. ) Declaramus, quod quamvis liceat Fratribus nostris studere scientiis secularibus, non tamen diu in illis versari debent, & omne ætatis suæ tempus consumere, sed potius scripturarum studia, atque eis quibus consulere possunt salutem animarum, debent se assidue, ac sollicitè exercere; à curiositate, & inani gloria cavendo, atque ex illis non sibi solum, sed etiam aliis ad bene, sancteque vivendum documenta capere, sicut fuit in plurimis Capitulis ordinatum.

Admonemus etiam, ne per speciem bonarum, ut ferunt humanarum artium, & exultioris, atque ornatioris linguæ, libros maxime à Canone prohibitos legant; ex quibus corruptos mores, & dogmata perversa facile possunt imbibere, sicut fuit ordinatum Romæ 1569. & 1571. & confirmatum Barcinonæ 1574. Verum postea quoad Hebraicam, & Græcam linguam, Romæ 1608. ordin. 9. sic justis de causis fuit dispositum. Ordinamus, ut post sex menses à præsentium notitia, Priores Provinciales singuli in suis Provinciis, teneantur studium linguarum, præsertim Hebraicæ, & Græcæ instituere, perquirendo doctissimos harum artium Præceptores: quos si in Ordine habere nequiverint, ex seculo accerant, discipulisque præficiant; decernendo illis annua stipendia, ex communibus sumptibus suorum Conventuum. Et hoc idem postea non solum ordinatum Parisiis 1611. denunc. 3. verum etiam à SS. D. N. Paulo V. Apostolica auctoritate statutum fuit.

(c) Sed tantum libros Theologicos &c. ) Declaramus, in S. Concil. Trident. Sess. 4. editum fuisse Decret. ad hanc spectans Constitutionem, his verbis: SS. Synodus ad coercenda petulantia ingenia, decernit; ut nemo suæ prudentiæ innoxius, in rebus fidei, & morum ad adificationem doctrinæ Christianæ pertinentiam, S. Scripturam ad suos sensus contorquens, contra eam sensum quem tenuit, & tenet S. Mater Ecclesia (cujus est judicare de vero sensu, & interpretatione S. Scripturarum) aut etiam contra unanimum consensum Patrum, ipsam S. Scripturam interpretari audeat: etiam si hujusmodi interpretationes nullo unquam tempore in lucem edenda forent; qui contra fecerint, per Ordinarios declarantur, & pœnis à juribus statutis puniantur. Et Romæ 1569. habetur: Districte præcipimus sub pœna privationis cujuscunque gradus, ultra pœnas à jure statutas: ne quis Magister, aut Regens, aut Lector, aut quivis nostri Ordinis, audeat asserere, vel defendere publice, vel privatim, ullum articulum pugnantem cum Decretis Sacri Concilii Tridentini; cum assertionibus ad dogmata fidei, vel ad bonos mores attinentibus: præsertim vero cum Canone illo de sacramentali Confessione, ante assumptionem Sacratissimi Corporis Christi necessario præmittenda, etiam si aliquem ex nostris Doctoribus insignioribus, nempe Durandum, Cajetanum, seu quamvis alium patrocinantem habuerit. Quod quidem confirmatum fuit Romæ 1571. confirmat. 5. & Barcinonæ 1574. Insuper prohibemus Fratres omnes recitare, aut confirmare singularem aliquam opinionem oppositam communi Doctorum sententiæ, in his quæ ad fidem, aut ad honestos mores pertinere noscuntur; nisi reprobando, ac statim objectionibus respondendo. Qui autem in hoc deliquerint, à Priore Provinciali, vel



vel ab ejus Vicario in pœnam studio atque officio Lectoratus priventur; sicut fuit ordinatum apud Cæsaraugustam 1309. ordinat. 3. & Metis 1313. ordinat. 8. & apud Cistericum 1329. Præterea distincte injungimus Lectoribus omnibus, & Sublectoribus, ut præstantissimam nostri Angelici Doctoris Sancti Thomæ doctrinam semper legant, discant, & doceant: & juxta eam omnia quæ sita, & disputata determinent, & definiant, suosque discipulos in ipsa erudiant, & faciant ut studentes in eam toto animi impetu diligenter incumbant. Est enim excellentissima hæc doctrina, sana præ cæteris, culta à doctioribus viris, Ordini nostro utilis, salutaris universæ Ecclesiæ, & toti terrarum Orbi admirabilis, ac denique Christi Salvatoris nostri judicio comprobata. Lectores ergo atque studentes eam in lectionibus atque disputationibus non prætermittant, sed in ea versentur, eamque explicant & exhibeant: ipsi denique in fine suarum disputationum, rationibus contrariis solutis, & fractis, firmissime adhæreant, stricte prohibentes ne Fratres legendo, determinando, respondendo, asserere audeant ex propria sententia oppositum ejus, quod communi omnium judicio creditur assertum esse à Sanctiss. Præceptore.

Item in Capitulo apud Carcassonam 1342. sic fuit ordinatum: Cum præclarissima Doctoris Angelici S. Thomæ Aquinatis Doctrina, in toto Orbe terrarum tanquam lux solis eluceat, & ut firmissima, ac solidissima doctrinarum omnium, à Sede Apostolica, & à principalibus Ecclesiæ Doctoribus, cum testimonio Episcopi, atque Universitatis Parisiensis honorifice approbata fuerit, & Divinis laudibus ornata: imponimus Lectoribus, & Studentibus, ut spreitis, & postpositis vanis, & curiosis, ac frivolis doctrinis, quarum plurimæ à veritate abducunt, ejusdem sanctissimi Doctoris doctrinæ omnino dent operam, & assidue studeant, juxta quam quæstiones omnes, & dubia determinent. Item in Capitulo Salmanticensi. 1551. ordinatum fuit, in lectionibus Theologicis legatur totus artic. S. Thomæ, & ex eo declaratur, & manifestetur veritas. Quod Parisiis 1611. confirmatum, & ampliatum fuit, ita tamen, ut ordinatum fuerit, articulum Sancti Doctoris legendum esse non compendiose, & confuse, sed distincte, & articulate esse declarandum, & exponendum; rationem habendo non sententiæ solum, sed etiam ordinis, atque connexionis textuum, & curando, ut discipuli hæc eadem omnia faciant, & memoriæ mandent, atque de eis in disputationibus, & collationibus illos informant. Et Romæ 1553. & 1558. & 1569. ordinat. 5. & 1571. confirmat. 6. Avenione 1561. confirmat. 5. & Bononiæ 1564. additum fuit, ut quicumque à solida doctrina S. Thomæ recesserit, & vel verbo, vel scripto aliquid contrarium dixerit, officio Lectoratus, & quocumque alio gradu, & dignitate in perpetuum privatus sit, & eisdem pœnis plectendus est quicumque aliquid contra S. Thomæ doctrinam prædicaverit; sicut fuit ordinatum Valentiniæ 1596. admonit. 1.

## I I.

**C**uret Prior Provincialis, (d) si habuerit aliquos utiles ad studendum, qui possunt in brevi apti esse ad regendum, mittere ad studendum ad loca ubi viget studium, (e) extra suas Provincias, de Definitorum Capituli Provincialis, vel majoris partis eorum consilio, & assensu. Si ve-

ro aliquem missorum studentium infra sex menses à tempore celebrati Capituli mori contigerit, vel alias legitime impediri, Prior Provincialis loco illius possit alium subrogare. Et in aliis, illi, ad quos mittuntur, non audeant eos occupare, neque ad Provinciam suam remittere, nisi fuerint revocati. (f) Postquam autem in aliquo studio per tres annos, ad plus, fuerint commorati, ipso facto sint ab ipso studio absoluti: nisi de Magistri Ordinis licentia speciali. Et hoc idem circa studentes ejusdem Provinciæ observetur.

## (d) Si habuerit aliquos utiles ad studendum.)

Declaramus, quod Priores Provinciales debent diligenter exquirere juvenes ad studium aptos, qui brevi tempore possint proficere; & eos Conventibus, in quibus vigent studia, assignare. Et Fratres non mittantur ad studia Generalia, nisi qui bonis moribus præditi, atque ad proficiendum apti sint: & juvenibus ad studium aptis non permittantur inanes vagationes extra Domum, & aliæ vagationes, quæ eis in studio impedimentum inferunt. Nec concedatur illis licentia exeundi à Monasterio, nisi ob maximam necessitatem: quæ si contingat detur eis Socius cum quo pergant, sicut fuit ordinatum Vallisoleti 1605. Nequaquam autem molesti, atque inepti Fratres mittantur ad studia: & si quos tales miserint, sine dilatione studeant revocare. Nec imperiti Fratres, ut studentes in aliquo Conventu assignentur: ne studii locum aliis eripiant, sicut fuit ordinatum Metis 1251. ordinat. 7. Valentiniæ 1259. & apud Pestum 1273. ordinat. 1. & Lugduni 1274. ordinat. 5. ac demum Parisiis 1279. ordinat. 2.

## (e) Extra suas Provincias.)

Declaramus, quod Fratres missi ad studia Generalia extra suas Provincias, ex illis Conventibus sunt, ex quibus erant, antequam recederent. Fratres vero qui constituuntur comites peregrinorum, ad eos Conventus, & ad illas Provincias pertinent, ex quibus Superiorum jussu profecti sunt, atque ibi vocem habent, sicut fuit declaratum Ferrariæ 1362. & Januæ 1513. & Neapoli. 1515.

## (f) Postquam autem in aliquo studio per tres annos &amp;c.)

Declaramus, quod ille studens, qui ex ea Provincia est, in qua est studium, post triennii spatium, præscriptum ei à Constitutionibus nostris, remanet Conventualis in ipso Conventu in quo fuit studens: at vero studens ex alia Provincia post elapsum suum triennium, remanet Conventualis illius Conventus, in quo manebat tunc, cum in studio fuit assignatus; sicut Perpiniani 1427. & Perusii 1478. declaratum fuit. Item declaramus in Capitulo Romano 1571. fuisse Lectoribus præfinitum tempus Dialecticæ, Philosophiæ, ac Metaphysicæ legendæ. Et Vallisoleti 1605. sic fuit statutum: Confirmamus, quod studii tempus formalium studentium sit triennium expletum: quo elapso non possint amplius in eodem studio permanere; ut detur locus aliis, sicut ista Constitutio postulare videtur. Sin autem sine legitima causa extra Conventum, cui ad studendum fuit assignatus, ultra quatuor menses fuerit commoratus; ad Conventum suum remittatur omnino; sicut fuit ordinatum Romæ 1530.

## III.

**T**Res Fratres tantum mittantur Parisios ad studendum de Provincia : exceptis Provinciis , Hispaniæ , Tolosanæ , Provincia S. Dominici , Teutoniæ , Lombardiæ , Saxonie , Dalmaciæ , Daciæ , Poloniæ , Græciæ , Terræ Sanctæ , Aragoniæ , Bohemiæ , Provinciæ : de quarum qualibet duo tantum mittantur. Quilibet autem Provincia ( exceptis Græciæ , Daciæ , Terræ sanctæ ) provideat , ut semper in Conventu aliquo idoneo sit Generale Studium : & ad illum locum quilibet Prior Provincialis potestatem habeat mittendi duos Fratres idoneos ad studendum. (g) Quod si in aliqua dictarum Provinciarum Lector sufficiens pro tali studio non fuerit, Magister Ordinis de Lectore provideat competenti.

## IV.

**S**tatuimus autem, ut quilibet Provincia Fratribus suis missis ad studium ad minus in tribus libris Theologiæ teneatur providere : videlicet in Biblia , Historiis , & Sententiis , & ipsi in his tam in textu , quam in glossis , præcipue studeant diligenter , & intendant. Item nullus faciat scribi libros de rebus Domus , nisi ad communem utilitatem. Nulli etiam certus usus librorum concedatur , nec dedigneretur à quocumque auferantur , nec in cujus custodia dimittantur. In diebus Dominicis , & in Festis præcipuis , à quaternis scribendis se contineant.

(g) *Quod si in aliqua dictarum Provinciarum Lector sufficiens pro tali studio non fuerit.* Declaramus, quod cum ex studiorum profectu dignitas Ordinis, & animarum utilitas propagetur. Priores Provinciales, & Conventuales debent dare operam quantum possunt, ut studium semper vigeat, & studentes diligentissimi sint in lectionibus audiendis, nec à Gymnasio absint, nisi ex rationabili causa, & ex peculiari licentia. Et Lectores legant textum S. Thomæ, disputent assidue, & continuent lectiones : qui vero in his reperti fuerint negligentes, merita pena plestantur. Furent autem inprimis Prælati, ne Fratres propter studium artium, sacræ Theologiæ studium omittant : & si in aliqua Provincia non sit copia Lectorum, Fratres, & præcipue juvenes, bonis moribus ornati, & ad studium apti, mittantur ad loca in quibus Lectorum copia suppetat. Nec Lectores iis officiis, & negotiis occupentur, quibus impediuntur. Et si non invenerint Lectores, qui sint idonei ad lectiones publice habendas, saltem inveniant qui vel sacræ Scripturæ, vel Summæ Casuum, vel alicujus hujusmodi rei privatas lectiones habeant, ne Fratres marcescant otio, & tempus inaniter perdant. Volumus autem, ut in Studiis tam Generalibus quam particularibus, aliqui Lectores, qui sint præ cæteris ad legendum magis idonei, nequaquam in officio regiminis occupentur : donec per aliquot annos Lectoratus officium exercuerint. Lectores autem actu legentes nullam habeant libertatem rece-

*Cod. Regul. Tom. IV.*

dendi à Refectorio, sed volumus, ut Priores pro ipsorum laboribus, possint aliquando cum eis in abstinentiis dispensare. Et hæc omnia supradicta ordinata fuerunt in nostris Capitulis, Bonon. 1240. Valencen. 1259. apud Montem Pefulanum 1265. Mediolani 1278. Parisiis 1279. & Londonis 1314. Tandem Romæ 1553. & 1558. fuit ordinatum, & Avenione 1561. Bononiæ 1564. & iterum Romæ 1569. fuit confirmatum : ut si Lectores quarumcumque facultatum, etiam Casuum Conscientiæ, lectiones ipsas, quacumque de causa prætermittant, aut à doctrina Sancti Thomæ recedant, munere legendi omnino priventur.

Item declaramus, in Capitulo Bononiensi 1564. ordinatum fuisse, ut in Conventibus, in quibus studia majora non videntur, habeatur Lectio de Casibus Conscientiæ. Ubi autem non videntur studia Theologiæ, habenda est lectio de Casibus ex Summa Cajetani, vel similis huic ; sicut fuit ordinatum Romæ 1671. & Barcinonæ 1574. Ad quam sanè lectionem convenire debent Sacerdotes omnes, & Confessarii, præterquam Graduati, & Lectores ; sicut fuit ordinatum Romæ 1580. & hujusmodi lectiones ternæ per singulas hebdomadas esse debent, ubi hoc commode fieri poterit. Ubi vero ob Fratrum paucitatem fieri non poterit, curent Superiores, ut pro lectione Fratres simul comminorantes aliquem Conscientiæ Casum inter se conferant, ut fuit ordinatum Romæ 1569. & confirmatum 1571. & Barcinonæ 1574., & iterum Romæ 1601.

Item declaramus, in Capitulo Romano 1569. declarat. 6. sic fuisse ordinatum : Quoniam sapissime, ea quæ ad studium pertinent, vocantur in controversiam inter Prælatos, & ejus officiales studii, necessarium esse duximus declarare, quid ad Regentis, quid ad Baccalaurei, quid ad Magistri Studentium spectet officia : eo præcipue quod de nullis istis officiis quidquam ordinaverint Constitutiones nostræ, neque in Ordinario Religionis ulla fiat mentio de eis.

Et primo declaramus, quod in omnibus Universitatibus nostri Ordinis, Regens est caput Studii : & non modo studentes cujuscumque facultatis, sed etiam omnes alii officiales studii, & Lectores, subditi sunt ei in omnibus illis rebus, quæ ad studium pertinent, cujusmodi sunt lectiones, disputationes publicæ, circuli quotidiani, Casus Conscientiæ, & quicunque alii actus literarii.

Item declaramus, maxime pertinere ad eum terminare, resolvere, & definire quaslibet quæstiones in disputationibus propositas, silentium imponendo omnibus : hac lege ut post datam ab eo resolutionem, nulli omnino, exceptis RR. Provincialibus, liceat quidquam in medium adducere. Item declaramus Regentes habere præcipuam Theologiæ lectionem, aliisque Lectoribus præscribere debere quid legere debeant : ipse vero legat hora, qua maluerit, cuiusque lectioni teneantur interesse non solum studentes formales, sed etiam dantes operam Metaphysicæ. Alii autem Lectores legant horas ab ipso Regente constitutis. Declaramus etiam, ad ipsum primario pertinere illa omnia, quæ de Magistro Studentium, tum in Constitutionibus, tum in Ordinario Religionis, Capite de Officio Magistri Studentium, scripta sunt. Cum autem ei in Generali, vel Provinciali Capitulo disputandum est, in ejus libertate omnino sit positum, hunc, vel alium sibi eligere in respondentem.

Deinde declaramus, secundum locum in studiis ( quantum attinet ad litteraria exercitia ) Baccalaureum, sive secundum Lectorem Theologiæ tenere; præterquam in illis Universitatibus, in quibus sunt duo, vel plures Regentes: volumus enim in ipsis ita se Regentes habere, ut alter alterum juxta suum ordinem, & omnes Baccalaureum, sive secundum Lectorem Theologiæ antecedant. Et proinde absentibus tum primario, tum aliis omnibus Regentibus, ad Baccalaureum spectat, omnia Regentis munia modo jam dicto obire. Præterea declaramus tertium locum pertinere ad Magistrum Studentium, quoad prædictas litterarias exercitationes. Præter illa vero, quæ de ipso in locis commemoratis dicta sunt, declaramus, ad eum peculiariter spectare conclusiones in quotidianis circulis disputandas proponere, & respondentibus assistere; Casus Conscientiæ opportunis temporibus, ac dubia super Epistolas, & Evangelia proponere, ac rationes adducere pro utraque parte, ipsi Regenti ultima determinatione relicta. Debet etiam ex Regentis consilio scribere litteras dimissorias Studentibus, postquam suum studium expleverint; curando, ut illis Regens, & Baccalaureus una secum subscribant. Insuper declaramus eundem Magistrum Studentium exemptum esse à sequela Chori, sicut alii Regentes, tamen nulla lectio legenda ad ipsum pertineat. Debet etiam habere librum Registri, in quo præscribat continue seriem Officialium, atque studentium omnium, eorumque receptiones & remissiones: nec non ordinationes editas, circa studium. Et hæc omnia confirmata fuerunt Romæ 1571. Barcinonæ 1574. & iterum Romæ 1580. ubi fuit additum: quod quamvis præcipuo Prælati Conventus, primus locus in sedendo conveniat, in proponendis tamen, examinandis, & nominandis Studentibus convenit ipsi Regenti, cui etiam à Definitorio commemorati Capituli hoc fuit concessum, & tributum.

Item declaramus Romæ 1571. ordinatum fuisse, ut Regentes, Baccalaurei, Magistri Studentium, alique Lectores, illi fiant, non qui sunt majores natu, sed qui ad discipulos edocendos sunt aptiores: nec pro his officiis ad determinatum tempus sunt assignandi, ita ut illi in primis, qui in hoc docendi munere fuerint egregii, etiam Prælaturæ causa, à studio non removeantur. Et hoc fuit confirmatum Barcinonæ 1574. Romæ 1580. & iterum Romæ 1589. In quo ultimo Capitulo sub pœna excommunicationis præceptum fuit, ut omni peculiari affectu deposito, non nisi idonei ad hæc exercenda litterarum officia eligantur. Item declaramus Neapoli 1600. fuisse ordinatum, ut nullus fiat Magister Studentium, qui non legerit cursum Artium, & ad legendam Theologiam idoneus per examinationem præviam non fuerit judicatus. Ad legendum autem Logicam, Philosophiam, & Metaphysicam, nullus admittatur, nisi per tres annos easdem disciplinas audierit, & per tres alios cursum Theologiæ confecerit, atque insuper à Theologiæ Lectoribus, & Magistro Studentium aptus ad tale officium fuerit judicatus.

Item declaramus Barcinonæ 1564. fuisse ordinatum, ut nullus admittatur ad legendam Theologiam, nisi prius artibus studuerit, cursu non interpolato sed continuato, ab ipsa Dialectica ducto exordio. Item declaramus, quod tempus habendarum lectionum, Romæ 1571. sic fuit statutum: Ordinamus, quod saltem decem menses quotannis ad lectiones habendas constituan-

tur: & neque studentes, neque Lectores ad prædicandum mittantur; sed in studiis omne tempus consumant, nisi quandoque aliter ipse Prior Provincialis judicaverit. Quod etiam fuit confirmatum Barcinonæ 1574. Et Vallisoleti 1605. fuit ordinatum, ut nulla ratione intermittantur lectiones, & litterariæ exercitationes, à Festo Sanctæ Crucis, usque ad Festum Sanctæ Mariæ Magdalene, exceptis hebdomada ante Adventum, & duabus hebdomadibus ante Quadragesimam: dummodo eo etiam tempore singulis diebus una lectio habeatur. A Dominica autem in Ramis Palmarum, usque ad Dominicam in Albis, cessare poterunt omnia. Et Romæ 1601. & Vallisoleti 1605. fuit ordinatum, ut Lectores Artium tempore Quadragesimæ non possint concionari: ita ut ob conciones habendas consuetæ lectiones omittantur; & quod ambo Theologiæ Lectores eodem tempore concionibus non dent operam, sed semper alter eorum, sit qui in legendi munus incumbat. Item in utroque Capitulo ordinatum fuit, ut quotidie lectionum omnium quæ habentur, conclusiones fiant, ( quæ Circuli vulgari nomine appellari solent ) nisi actus magis principalis impedimentum afferat.

## V.

**B**ona Fratris defuncti, quod ad illa, quæ ab aliqua Provincia, vel Conventu habuit, sint illius: quæ vero aliter acquisivit, sint Conventus, cujus est filius; si in alio Conventu non est assignatus in perpetuum, sed ad tempus propter studium, vel officium aliquod. Quæ vero hæreditario jure obtinuerit, vel ei obvenerunt, erunt Conventus sui originalis; (b) etiam si alterius Conventus factus sit filius. (i) Si vero est assignatus in aliquo Conventu simpliciter, ac pro tali ibidem præsentialiter receptus: & Conventus ille consuevit ( prout tenetur ) providere talibus de toto victu, vestitu, & aliis hujusmodi, tam tempore sanitatis, quam infirmitatis: dividunt hæc taliter acquisita mobilia, æquis portionibus, inter Conventum in quo est assignatus, & Conventum cujus est filius. Alioquin quarta pars tantum erit Conventus, in quo simpliciter est assignatus; immobilia vero non hæreditario jure obvenientia, semper erunt Conventus, cujus est filius.

## VI.

**I**N utroque autem casu ( sive assignetur simpliciter, sive ad tempus ) Conventus cui assignatus fuerit, & ipse eidem Conventui ad suffragia teneatur. Si autem ex quo alii Provinciæ assignatus fuerit, ipsum mori contingat, (k) antequam certo Conventui deputetur; Prior ejusdem Provinciæ provideat eidem de Conventu, qui sibi ad suffragia teneatur, ne consuetis defunctorum subsidiis defraudetur.



(h) *Etiam si alterius Conventus factus sit filius.*) Declaramus, in Capitulo Romano 1542. ordinatum fuisse, ne filiationes intra eandem Provinciam ex uno Conventu in alium transferantur; nisi præcedente consensu Provincialis, & majoris partis Capituli ejusdem Conventus. Et in Capitulo Romæ 1553. ordinatum fuit, ut non fiant nisi ex consensu majoris partis omnium in Conventu præsentium Fratrum nativorum utriusque Conventus respectivè, congregatorum simul in Capitulo: & si secus factum fuerit, totum sit irritum, & inane, præterquam in Provinciis Græciæ, Terræ Sanctæ, & cæteris desolatis. Et hoc fuit confirmatum Romæ 1558. & fuit additum: quod hujusmodi translationes filiationum non fiant nisi ex consensu Provincialis. Idem habetur Avenione 1561. Bononiæ 1564. Et postea Romæ 1580. sic dicitur: Ordinamus, quod in posterum non fiant in Ordine nostro translationes filiationum ex uno Conventu in alium, nisi per vota secreta. Nolumus autem Prælatos posse recipi tamquam filios in illis Conventibus, quorum sunt Prælati, quamdiu funguntur prælationis officio etiam si habuerint omnia vota. Quod Venetiis 1592. fuit confirmatum, declarando, hanc ordinationem vim suam habere etiam apud Vicarios Domorum. Tandem Romæ 1601. ordinat. 29. ex Clementis VIII. Decrero, hujusmodi filiationum translationes fuerunt omnino prohibitæ.

(i) *Si vero est assignatus.*) Declaramus, quod hæc recens Constitutio in hoc usu versatur; quod si quis Frater in aliquo Conventu simpliciter assignatus sit, bona omnia post ejus mortem apud ipsum inventa, quæ vivens ab alio Conventu non habuit, in duas partes dividantur: quarum altera datur Conventui originali illius, altera vero Conventui, in quo moritur assignatus. Et Barcinonæ 1574. sic statutum fuit: Declaramus, & declarando omnino præcipimus, ut in distributione bonorum defuncti Fratris, fervetur Constitutio: videlicet, si contingat, ut aliquis non simpliciter, sed ad tempus tantum causa studii, vel alicujus officii assignatus moriatur; ex vi Constitutionum Distinctione 2. Cap. 14. bona ejus sint illius Conventus, ejus erat filius: ut sæpe contingit de Fratribus, qui ex suo originali Conventu, vel ex alio, in quo sunt simpliciter assignati, ad Prioratus assumuntur. Declarantes, quod si quis professus Conventus, fiat postea ex concessione Magistri Ordinis filius alterius Conventus; bona immobilia ad Ordinem spectantia per talem Fratrem, debent ad primum Conventum pertinere. Bona vero mobilia erunt secundi Conventus, ad quem aggregatus est, si in eo assignatus moriatur; sicut fuit ordinatum Perusii 1478. ordinat. 11. Si quis autem Frater unitus Provinciæ moriatur in alia Provincia, dimidia pars bonorum, quæ ibi acquisivit, pertinebunt ad eam Provinciam, in qua moritur: dimidia vero ad suum Conventum originalem, nisi Magister Ordinis aliter ordinaverit; sicut fuit declaratum Venetiis 1387. Et in Capitulo Romano 1530. facta fuit infra-scripta declaratio circa acquisitionem bonorum à Fratribus defunctis relictorum: quod ferventur Constitutiones in his, de quibus ipsæ plane, & aperte loquuntur; quemadmodum de his qui sunt assignati in Conventibus, & Provinciis. De his autem qui commorantur extra Conventum, nullam habentes assignationem à Provinciali, aut sunt extra Ordinem; omnino declaramus, dimidiam partem suorum post eorum mortem ad Magistrum Ordinis, dimidiam vero ad Provinciale pertinere.

(k) *Antequam certo Conventui deputetur.*) Declaramus, quod si quis Frater, vel verbo, vel scripto, alicui Conventui assignetur dicendo: Ex nunc, prout ex tunc, sive præsentem, sive absentem, assigno tali Conventui; statim valet assignatio, & Frater ille ad hunc modum assignatus, & ejus bona ad illum Conventum pertinent, cui sic assignatus est; non autem ad illum cui prius assignatus fuerat: sive ipse antequam recedat à priore illo Conventu, sive in itinere, sive intra Provinciam, sive extra illam moriatur. Si vero assignetur alicui Conventui juxta communem formam, dicendo videlicet: Tenore præsentium depono, atque etiam assigno tali Conventui: tunc non valet assignatio, donec literæ exhibitæ fuerint assignato. Et propterea si mors ei contingat antequam in ejus manus pervenerint, spectabunt bona illius ad Conventum, in quo prius erat Conventualis: non ad alium, cui fuit postea assignatus; sicut fuit declaratum apud Tolosam anno Domini 1328.

## VII.

(l) *Circa eos autem, qui student, taliter dispensetur à Prælato: ne propter officium, vel aliud, de facili à studio retrahantur, vel impediuntur.* (m) Locus vero proprius secundum quod Magistro Studentium videbitur, statuatur; in quo post disputationem, aut Vesperas, vel etiam alio tempore, prout vacaverit, ad dubitationes, vel quæstiones proponendas, vel collationes faciendas, ipso præsentem convenient. Et uno quærente, sive proponente, alii taceant: ne loquentem impediunt. Si quis autem inhoneste, vel confuse, vel clamose, vel proterve quærens, vel proponens, vel respondens, offenderit; statim ab eo, qui tunc inter eos præest, corripitur. Cellæ, quibus Magistro Studentium expedire videbitur, assignentur. (n) Quod si quis infructuosus in Studio inveniatur, cella ejus detur alteri, & ipse in aliis officiis occupetur. In cellis vero scribere, legere, orare, dormire, & etiam de nocte vigilare ad lumen possunt, qui volunt propter Studium.

(1) *Circa eos autem, qui student, taliter dispensetur à Prælato.*) Declaramus, quod Præfidentes eorum Conventuum, in quibus est studium, studentes omnes, qui ad eos mittuntur, debent benigne recipere, & liberaliter, humaniterque eos tractare; & gratias omnes, immunitates, & privilegia à Constitutionibus, vel à Magistris Ordinis, sive à Generalibus, vel à Provincialibus Capitulis eis concessa, vel in posterum concedenda; eisdem cum omni integritate servare: alioquin à Provincialibus, vel Visitatoribus debita pœna plectantur; sicut fuit ordinatum Romæ 1292. & Viennæ 1282. & CasarAugustæ 1309. & Menis 1313. Declaramus, quod etiam Studentes Generalium Studiorum, diebus Dominicis, & Festis solemnioribus, sub officio Toro Duplici celebratis, tenentur ad Chorum accedere: atque ibi Horas Canonicas persolvere, & Missam Conventualem decantare; nisi tamen ipsi iisdem diebus in actibus scholasticis exerceantur. Ad Completorum vero, & ad Missam quotidie debent accedere.

Item etiam semel in Anno ad hebdomadariam, & ad lectionem mensæ notandi sunt. Et ut Studentes non distrabantur à studio, non possunt Præsidentes Conventuum Fratibus studio assignatis, dare licentiam egrediendi extra terminos suorum Conventuum, sine Prioris Provincialis, vel ejus Vicarii peculiari licentia; sicut fuit declaratum Argentinæ 1307. Paduæ 1308. & Casaraugustæ 1309.

(m) *Locus vero proprius, secundum quod Magistro Studentium videbitur statuatur.* ) Declaramus, quodd Magister Studentium, frequenter Studentes præcipue juniores, convocare debet, eosque examinare saltem semel in hebdomada circa quæstiones, & lectiones illas, quæ eis per hebdomadam fuerint explicatæ. Studentes autem cujuscumque facultatis, teneantur assidue sequi scholas, & disputationes, collationes, tum publicas, tum privatas: repetitiones, aliasque studiorum exercitationes non omittere; sed in his omnibus diligentissime versari. Qui in aliquo fuerint negligentes, à Magistro Studentium accusentur, & à Prælati æqua pœna plectantur. Debent etiam Visitatores in suis Visitationibus diligenter inquirere, quid, & quas lectiones in anno legerint, & quoties disputaverint, & an Priores studium propagaverint, & quomodo in studia Fratres incubuerint; & hæc omnia nunciare debent Priori Provinciali, ut eos, qui negligenter se gesserint, graviter puniat; sicut fuit ordinatum apud Montem Pefulanum 1265. Januæ 1305. & Metis 1313.

(n) *Quod si aliquis infructuosus in studio invenitur.* ) Declaramus, quodd Priores Provinciales non debent ad studium mittere Fratres insolentes, & molestos; sed modestos potius, & Religiosos. Eos autem, quos invenerint in prædictis errasse, atque in studiis non profecisse; teneantur à studio revocare, sicut fuit ordinatum Parisiis 1256. apud Pestum 1273. ordinat. 1. Cadurci 1319. & Carcassonæ 1342.

## VIII.

(o) **N**ullus fiat publicus Doctor, nec disputet, nisi de licentia Prioris Provincialis, & Definitorum Capituli Provincialis. Nec aliquis habilitetur, seu assignetur in aliqua Universitate ad legendum pro forma, & gradu Magisterii in Theologia; nisi sit sufficiens ad Lecturam hujusmodi solemniter perficiendam. Nec aliquis fiat Magister in Theologia (Romæ 1542.) qui non sit ætatis ad minus triginta annorum, & nisi sit sufficiens ad hoc, ut sit Regens in aliquo studio Generali, ubi viget in veritate studium Theologiæ. (p) *Judicetur autem sufficientia hæc (nisi sit manifesta) per examinatores, qui absolute referant: est vel non est iudicio nostro sufficiens ad legendum solemniter sententias; vel ut sit Regens in studio, ubi in veritate viget studium Theologiæ. Et nihilominus (q) per suæ Provinciæ Provinciale Capitulum, vel illius Definitorium sit expositus:* (r) & à Magistro Ordinis, vel Capitulo Generali tantummodo assignari, vel licentiarum possit.

## IX.

**S**i quis autem absque dictæ sufficientiæ iudicio Baccalaureatus, vel Magisterii in Theologia gradum, etiam cum licentia Magistri Ordinis, vel Capituli Generalis assecutus fuerit, pro non Baccalaureo, vel Magistro habeatur in nostro Ordine in omnibus, & per omnia. Dantes facultatem cuilibet Definitorio, conscio notorie de insufficientia promoti sibi subditi, absque iudicio, vel examine suæ sufficientiæ hic statuto; quod declarent ipsum pro non promotum in nostro Ordine habendum. Poterit tamen Magister Ordinis; si aliquem talem assignatum impediri contigerit, loco ejus illum deputare, cujus actus valeant pro forma, & gradus Magisterii: dummodo per sequens Capitulum Generale fuerint approbati.

(o) *Nullus fiat publicus Doctor, nec disputet, nisi de licentia Prioris Provincialis.* ) Declaramus, quodd Constitutio publicum Doctorem statuit esse illum, qui est principalis Lector: hujusmodi autem principales Lectores non debent Lectoratum cujuscumque facultatis obtinere; nisi à Priore Provinciali, & à Definitoribus idonei ad tale officium fuerint judicati. Et debent quotidie, vel saltem quaternas in singulis hebdomadibus lectiones habere, nisi forte legitime fuerint impediti: alias omnibus gratis Lectorum sint eo ipso privati, sicut fuit ordinatum Narbonæ 1394. ordinat. 3.

(p) *Judicetur autem sufficientia hæc, (nisi sit manifesta,) per examinatores.* ) Declaramus, quodd in qualibet Provincia, & Congregatione seu Vicaria Ordinis nostri, debent à Provinciali, vel à Vicario ex consilio Prætorum (quorum omnium conscientias oneramus) institui iudices docti, & Dei timore affecti; qui promovendos ad gradus examinare debeant, sicut fuit declaratum Romæ 1546.

Item declaramus, quodd nullus promoveri potest ad aliquem gradum, vel officium, utpote Prædicaturæ, Lectoratus, Magisterii Studentium, Baccalaureatus, Magisterii sacræ Theologiæ, nisi prius genuflectens coram Provinciali, vel Præsidente Conventus fidei Professionem fecerit: juxta Bullam Pii Papæ IV., & Capitulum Vallisoleti 1605. ordinat. 4. De cujus fidei professione fidem per litteras authenticas debet recipere: & si secus factum fuerit, collatio illius gradus vel officii nulla erit, sicut fuit ordinatum Neapoli 1600. ordinat. 2.

(q) *Per suam Provinciæ Provinciale Capitulum, vel illius Definitorium sit expositus.* ) Declaramus, in Capitulo Romano 1580. fuisse ordinatum, ut nullus promoveatur deinceps ad Magisterium sacræ Theologiæ, vel ad Baccalaureatum, nisi suæ Provinciæ petitionem habeat: qua etiam habita, non nisi rigorosa examinatione per quinque examinatores, & per vota secreta, ad gradum hujusmodi admittatur. Quod fuit confirmatum Romæ 1583. & 1589. & fuit additum; quod si secus ex quacumque causa fiat, tanquam non factum habeatur. Et quod qui falso petendo Provinciæ nomine gradum quemcumque obtinuerint, cum vere Provincia non petierit: inhabiles fiant ad nunquam hujusmodi gradum obti-

obtinendum. Petitio autem non solum à Provinciali, sed etiam à Definitorio fieri debet. Et in eodem Capitulo Romano 1589. fuit ordinatum, ut in Graduorum, vel Prædicatorum Generalium petitionibus, semper exprimat, quibus in locis, & quor annos illi qui petuntur, lectioni, aut prædicationi operam dedeant. Et declaratum fuit, ut quotiescumque litteræ patentes pro Magisterio conceduntur, semper clausula illa generalis (salvis suæ Provinciæ juribus) intelligenda est, etiam si in ipsis litteris non exprimat: ita ut generales clausulæ, quæ videntur facere in oppositum, nulli suffragari debeant: nisi fiat peculiaris mentio de privilegio derogatione pro illa vice. Et Romæ 1601. ordinatum fuit, ut si concessæ fuerint alicui litteræ patentes, subreptitiæ, testificantes eum legisse, vel egisse alia hujusmodi, & earum vigore litterarum gradum aliquem fuerit consecutus, talis gradus à Provinciali Capitulo non admittatur. Et hoc idem fuerit etiam ordinatum de Prædicatoribus Generalibus, atque amplificatum etiam ad eos, qui falsam informationem Generali Capitulo, vel Magistro Ordinis exhibuerint; quos suis officiis privari, & ad ea inhabiles declarari debere decretum est. Quæ sane ordinatio fuit confirmata Vallisoleti 1605., & Romæ 1608. Et Valentini 1569. fuit confirmatum, id quod de promovendis ad gradus dictum est: sed Vallisoleti 1605. explicatum est, non esse intelligendum de Baccalaureis, & Magistris, qui sua legendi munera exercuerint, ad tempus præscriptum à Constitutionibus nostris. Item declaramus Romæ 1571. ordinatum fuisse, ut in quolibet Conventu, ubi viget Studium Generale, Magistri omnes, etiam actu non legentes, votum habeant in receptione studentium formalium, vel quorumcumque aliorum Fratrum, qui in studia admittuntur: tum & in remissione eorumdem studentium, quando eos ad suos Conventus reverti oportuerit; quod fuit confirmatum Barcinonæ 1574. cum hac tamen conditione, quod eorum examinationi, disputationique interfint.

(r) Et à Magistro Ordinis, vel Capitulo Generali tantummodo assignari, vel licentiarum possit.) Declaramus, quod licet Prior Provincialis, vel Provinciale Capitulum possit Fratres omnes assignare, & aliquos ad legendam Theologiam constituere; etiam tanquam Lectores principales nostrorum Conventuum, in quibus non viget Studium Generale, (dummodo non ut Magistri legant, vel doceant;) non tamen possunt Fratrem aliquem reddere habilem ad gradum Baccalaureatus, aut ad legendam Theologiam pro gradu, & forma Magisterii: quoniam hujus rei potestas in Definitoribus Generalibus constituta est. Neque habilitas hujusmodi debet concedi alicui, qui saltem per tres annos Theologiæ in aliqua Universitate non studuerit, & per quatuor annos artes non legerit: sicut fuit declaratum Romæ 1546. & 1583. Avenione 1561. & Bononiæ 1564. & tandem à Provinciali Capitulo non fuerit expositus Capitulo Generali. Postquam autem legerit, & actus Baccalaureatus pro gradu, & forma Magisterii perfecit; non poterit fieri habilis ad Magisterii gradum, ipsumque Magisterium suscipere, nisi ejus Lecturam, ac scholasticos actus, quos per quatuor annos exercuit, Generale Capitulum, vel Magister Ordinis approbaverit. Oppositum vero faciens eo ipso est excommunicatus, atque officiis & gratiis Ordinis, & cunctis exemptionibus in perpetuum privatus. Neque cum eo potest dispensari, nisi per Generale Capitulum: non obstantibus privilegiis, gratiis, & Consti-

tutionibus Apostolicis in genere, vel in specie quibuscumque Fratribus, Provinciis seu locis, concessis, aut concedendis sub quavis forma, & expressione verborum: quemadmodum Bonifacius IX. decernit in Bulla. Et sicut pariter ordinatum fuit Londoniæ 1263. Coloniae 1428. Venetiis 1437. Saviliani 1439. apud Montem Pefulanum 1456. Perusii 1478. Romæ 1481. & Cenomani 1491. in quibus locis sic dicitur: Ordinamus, quod nullus Frater promoveatur, vel fiat habilis ad Baccalaureatum, sive ad legendum pro forma, & gradu Magisterii: nisi prius à Definitoribus Capituli Provincialis suæ Provinciæ tanquam idoneus, Generali Capitulo fuerit exhibitus. Et postquam Lecturam suam, alioque actus supra jam positos perfecit, non possit suscipere Magisterium, nisi de licentia Magistri Ordinis, qui Lecturam ejus approbaverit. Declarantes esse irritum, & inane quicquid in contrarium fuerit attentatum.

## X.

Neque aliquis Magistretur in Theologia, (s) nisi prius actus exercuerit pro forma, & gradu prædicti Magisterii, per quatuor annos ad minus (t) in aliqua Universitate: oppositum autem faciens eo ipso sit excommunicatus, atque omnibus gratiis, & officiis Ordinis, & exemptionibus perpetuo sit privatus: nec secum dispensari valeat, nisi per Capitulum Generale. Nullus Frater nostrorum legat in Prophetis, vel in Psalmis alium sensum litteralem, nisi quem Sancti PP. approbant, & confirmant. (u) libri Ordinis, vel Fratrum non vendantur, nisi pretium eorum in alios libros, vel scripta convertatur.

(s) Nisi prius actus exercuerit.) Declaramus, in Capitulo Romano 1546. ordinat. 9. ordinatum fuisse, ut nullus promoveatur ad Magisterium, nisi per quatuor annos Sententias legerit, & in Generali, aut Provinciali Capitulo Theologicas conclusiones publice defenderit; exceptis his, qui sua scholastica munera exercent in Studio Parisiensi. Quod fuit confirmatum Romæ 1558. confirmat 13. & fuit additum, quod Sententias per illos quatuor annos debet legere in aliqua ex designatis Universitatibus, Studio Lovaniensi excepto: in quo, sicut & in Parisiensi, promovendi ad gradus consueverunt ab Universitate statuta servare debebunt.

(t) In aliqua Universitate.) Declaramus, quod in Capit. Salmaticensi 1551. & subinde Romæ 1553. & 1558. & Avenione 1561. determinatæ fuerunt Universitates, in quibus actus Scholastici modo explicari exercendi sunt; & extra quas in eisdem actibus se exercentes, ad gradus non sunt admittendi. Sunt autem infra-scriptæ.

In primis Conventus noster Parisiensis.

In Provincia Hispaniæ Conventus Salmantinus, Vallisoletanus, Segovienfis, & de Tajanos. Item Collegium sancti Gregorii Vallisoleti, & Complutense, & Collegium Toletanum Sancti Petri Martyris erectum in Universitatem, Romæ 1583.

In Provincia Tolosana Conventus Burdigalensis.

In Provincia Franciæ, Conventus Bituricensis, & Rhemensis.



In Provincia utriusque Lombardiæ, Conventus Bononiensis.

In Provincia Romana, Conventus Perusinus, & Collegium Romanum.

In Provincia Regni, Conventus Neapolitanus Sancti Dominici.

In Provincia Theutoniæ, Conventus Coloniensis, Romæ 1553.

In Provincia Provinciæ, Conventus Aquisgranensis.

In Provincia Aragoniæ, Conventus Barcinonensis, Valentinus, Cæsaraugustanus, Luchentinus, & Illerdensis, & Conventus Sancti Dominici in Insula Majoricarum, (dummodo in eo sint Lectiones, una Artium, & duæ Sacræ Theologiæ, Romæ 1571.) & Conventus Calatajubbii Sancti Petri Martyris, Romæ 1580. Collegia Dertufenſe, Oriolæ, & Sancti Vincentii Cæsaraugustanum.

In Provincia Dalmatiæ, Conventus Jadrensis.

In Provincia Trinacriæ, Conventus Sancti Dominici de Panormo, & Conventus Sancti Dominici de Messana.

In Provincia Portugalliæ, Conventus Ulyssiponenſis, & de Bello, & Eborenſis, & Coimbraensis.

In Provincia Bethicæ, Conventus Cordubensis, Hispalensis & Giennensis.

In Provincia inferioris Germaniæ, Conventus Lovaniensis & Duacensis.

In Provincia Sancti Thomæ, Conventus Andriensis.

In Provincia utriusque Calabriæ, Conventus Consentinus.

In Provincia Sanctæ Crucis Indiarum, Conventus Civitatis Sancti Dominici.

In Provincia Sancti Jacobi de Mexico, Conventus Civitatis Angelorum.

In Provincia Sancti Joannis Baptiste de Perù, Conventus Civitatis Regum, & Conventus de Cuzco, Neapoli 1600. & Conventus Sancti Dominici Civitatis de la Plata, Romæ 1608.

In Provincia Sancti Dominici Veneriarum, Conventus Patavinus.

In Provincia S. Petri Martyris, Conventus S. Eustorgii de Mediolano.

In Provincia Sancti Antonini de Novo Regno, Conventus Sanctæ Mariæ de Rosario, Civitatis de Sancta Fe, Romæ 1580. & Conventus S. Dominici de Junia.

In Provincia Sancti Laurentii de Chile, Conventus Sanctæ Mariæ de Rosario Civitatis sancti Jacobi.

In Provincia Sancti Petri Martyris de Guaxaca, Conventus Sancti Dominici de Oaxaca.

In Provincia Aprutina, Conventus Aquilanus.

In Provincia Occitana, Conventus Tolosanus, & Avenionensis.

In Provincia Russiæ, Conventus Leopoliensis.

In Congregatione Callicana, Conventus Nannerensis.

Denunciamus autem scholasticos actus sive lectiones extra hos Conventus, nequaquam in posterum alicui suffragari ad gradum Magisterii consequendum; salva tamen Apostolica concessione, facta aliis Universitatibus quibuscumque.

Et quia post præallegata Capitula, plures aliæ fuerunt erectæ Universitates per subsequencia alia Capitula Generalia; contigitque, quod aliquæ ex iis Provinciis noviter institutis, & erectis fuerunt incorporatæ, & unitæ; proinde unaquæque Provincia gaudeat in qualibet Universitate designata, juribus, & privilegiis, juxta consuetudinem, & praxim cujuscumque Provinciæ respective.

(u) *Libri Ordinis, vel Fratrum non vendantur, nisi pretium eorum in alios libros, vel scripta convertatur.*) Declaramus, quod cum Ordo noster propter prædicationis officium, & propter salutem animarum fuerit ab initio principaliter institutus; illa nos diligenter, ac sollicitè procurare debemus, quæ noscuntur ad propagationem studiorum, & profectum sacræ scientiæ pertinere. Quoniam vero librorum copia, & ad hoc plurimum confert, & ad profectum incitat studiosos: ideo Frater Aymericus Generalis quondam Magister Ordinis, in Capitulo Generali Patavii celebrato 1308. ordinat. 15. ex Definitorum consilio, atque decreto, præcepit omnibus Prioribus, Supprioribus, Vicariis, & Fratribus universis: ut libros, qui per mortem Fratrum, vel titulo donationis, aut legati; sive quocumque alio modo ad Conventum pervenerint, vendere, distrahere, alienare, pignorare, dare, vel concedere alicui simpliciter ad vitam nequaquam præsumant: sed ad communem pertineant Bibliothecam: nisi forte Conventus tales libros duplicatos haberet, vel judicio Prioris, Supprioris, aut eorum Vicarii, ac Lectoris, & Bibliothecarii, communi Fratrum commodo, minus utiles viderentur. In quibus casibus vendi quidem poterunt: sed eadem obligatione præcepti teneantur illorum pretium commutare libris utilioribus, ac melioribus, vel ad celebrationem Divinorum officiorum, vel ad similia Bibliothecæ commoda. Verum si quidam libelli, vel quaterni, sive commentarii essent non magni pretii, & parvæ æstimationis: poterunt à Priore ex dictorum consilio, aliquibus Fratribus magis indigentibus, ad usum concedi. Et eodem præcepto prohibuit Fratribus omnibus, ne vendant Theologicos libros personis extra Ordinem constitutis, sine rationabili causa, & Prioris Provincialis expressa licentia: qui autem contrarium fecerint à Superioribus acriter plebentur pœna, donec totum prædictorum librorum pretium, sine fraude reddiderint Conventibus, ad quos prædicti Fratres, & libri pertinent.

Item declaramus, quod libri ex communi Bibliotheca non possunt extrahi sine Superioris licentia, sub pœna excommunicationis lætæ sententiæ: sicut fuit ordinatum Vallisoleri 1605. confirmat. 10. Et in Capitulo Romano 1608. confirmat. 5. statutum fuit, ut in posterum nullus liber typis excudi possit, nisi prius examinatus, atque approbatus fuerit à duobus, vel tribus Patribus in unaquaque Provincia à Provinciali, & Definitoribus Capituli Provincialis constituendis: quibus sub formali præcepto mandatur, ut totum librum diligenter perlegant, & examinent, atque perquirant, gravine, an abjecta scriptio- nis forma, & an de magni, an parvi momenti re, ipse liber compositus sit. Declarantes non sufficere, ut nihil contra fidem, aut bonos mores in ipso contineatur, sed talis esse debet, qui decori, atque honori Religionis nostræ esse possit. Nec liber sic quilibet examinatus, & approbatus imprimi possit in Italia, antequam Romam mittatur ad Magistrum Ordinis, vel ejus Vicarium, ut ab eorum altero pariter approbetur: mandando sub formali præcepto, ne in libro, postquam examinatus, correctus, & approbatus fuerit eo modo quo supradictum est possit addi quidquam, vel detrahi, nisi illud iterum examinatoribus, & Superiori, quod ab eis approbetur, vel reprobetur, iterum ostendatur. Et in Concilio Trident session. 4. de editione, & usu sacrorum librorum, sic dicitur: *Nulli liceat imprimere seu imprimi facere quovis libros, de rebus sacris sine nomine auctoris; neque illos in futurum vendere, aut etiam apud*

*se retinere, nisi primum examinati probatique fuerint ab Ordinario sub pœna anathematis, & pœnis in Canone Concilii novissimi Lateranensis, appositis. Et si regulares fuerint, ultra examinationem, & approbationem huiusmodi, licentiam quoque à suis Superioribus impetrare teneantur, recognitis per eos libris, juxta formam suarum ordinationum. Qui autem scripto eos communicant, vel evulgant, nisi antea examinati, probatique fuerint, eisdem pœnis subjaceant, quibus impressores: & qui eos habuerint, vel elegerint, nisi prodiderint authores, pro authoribus habeantur. Ipsa vero huiusmodi librorum probatio in scriptis detur, atque adeo in fronte libri, vel scripti, vel impressi authenticè appareat: idque totum, hoc est, & probatio, & examen gratis fiat, ut probanda probentur, & reproben- tur improbanda.*

## XI.

(x) *Nulla scripta facta vel compilata à Fratribus aliquatenus publicentur:* nisi per Fratres peritos, quibus Magister Ordinis, vel Prior Provincialis commiserit, diligenter fuerint examinata. Fratres extra Conventus, quorum sunt filii assignati ad tempus, (id est ad exercitium, seu officium certo tempore durans, & determinato) completo illo certo tempore, (ex quo sunt absoluti ab assignatione) intelligantur assignati in Conventibus, quorum sunt filii, nisi Superior eos aliter assignaverit. Assignati autem simpliciter, nunquam intelligantur assignati in Conventibus, quorum sunt filii, nisi reassignentur. (y) *Nullus ordinetur in Subdiaconum, nisi sciat Grammaticam, ita quod sciat latine loqui, & scribere absque falsalatinitate: & si est Subdiaconus, non fiat Diaconus, si est Diaconus, non fiat Sacerdos. Prælati autem quilibet exponens aliter aliquem, absolvatur in pœnam ab officio, & per triennium omni officio Ordinis privetur.*

(x) *Nulla scripta facta, vel compilata à Fratribus aliquatenus publicentur &c.* Declaramus, quod in Capitulo Metis 1313. ordinat 9. sic fuit declaratum: Inhibemus Fratribus strictissime, ne tractatus, compilationes, seu commentarios editos, vel edendos, quovis modo extra Ordinem publicentur: quovis ab eis, quibus Magister Ordinis id commiserit, diligenter examinata fuerint, & correctæ. Qui autem contrarium fecerint, debita pœna plebentur; juxta id, quod etiam apud Treverim fuit ordinatum 1266. ordin. 6.

(y) *Nullus ordinetur in Subdiaconum &c.* Declaramus in Capitulo Lugdunensi 1536. innovatum fuisse: quod nullus Frater promoveatur ad sacros Ordines juxta seriem Constitutionum nostrarum, nisi ex consensu R. P. Provincialis: qui nullum debet promovere, nisi omnia certa habeat de ætate, moribus, & eruditione Grammaticæ, & nisi à Priore, & Patrum consilio exponatur, & præsentetur. In Capitulo quoque Januensi 1513. ordinat. 3. statutum fuit, ut quilibet promotus ad sacros Ordines, litteras habeat testimoniales, sive ab ordinario Episcopo, sive à Præsidente loci, ubi est ordinatus, ac-

*Cod. Regul. Tom. IV.*

ceptas, cum subscriptionibus testium, qui ordinationi interfuerint; quas si non habuerit, non permittatur exequi susceptos Ordines. Et in Capitulo Bononiensi 1564. præceptum fuit, omnia decreta communia Concilii Tridentini de ætate, vita, & moribus ordinandorum firmiter observari: & fuit additum; ut nemo post suspensionem Minorum Ordinum, ante elapsum annum ad majores promoveatur. Nec Subdiaconus intra spatium alterius anni ad Diaconatum ascendat, nisi sit Ministrorum necessitas, quæ Patrum consilio judicetur sufficiens causa ut aliter fiat: & ordinaturo Episcopo etiam referatur, & renuncietur: Item Barcinonæ 1574. ordinat. 18. fuit ordinatum, & Romæ 1580. confirmatum, quod Priores non possint mittere juvenes ad sacros Ordines, nisi cantandi facultatem juxta Religionis formam calluerint. Et Romæ 1589. ordinat. 2. autoritate Apostolica Prælati omnibus sub formali præcepto, & sub pœna excommunicationis latæ sententiæ præceptum fuit: ne quempiam mittant ad Ordines nisi probatæ vitæ, & bonorum morum, & litteris satis eruditus sit, & præsertim, nisi clarè, & distinctè legere sciat, & ea, quæ legit benè intelligat. Quicumque verò alias sacros Ordines susceperunt, & distinctè legere nesciunt; decreto illo interduntur, & prohibentur in ipsis Ordinibus ministrare, quousque didicerint: Prælatique sub pœna absolutionis ab officio eo ipso incurrenda, mandatur, ne eos interim ministrare permittant. Verum postea in Capitulo Veneto 1592. eadem Apostolica Autoritate sic statuitur: Declaramus, ab illa secunda ordinatione facta in Capitulo Romano 1589. ablatam esse excommunicationem: oneramus tamen conscientias Prælatorum, ut nonnisi Fratres eruditos, & bonis moribus præditos dimittant ad sacros Ordines suscipiendos. Item in eodem Capitulo Romano 1589. sub eodem formali præcepto, eademque censura Prælati præcipitur; ut nullum dimittant ad Ordines, nisi prius per litteras fidem facientes, legitimè illis constiterit, eum legitimam esse ætate: juxta decreta sacri Concilii Tridentini. Si autem post publicationem Constitutionis SS. D. N. Sixti V. contrà male promotos, aliquos ante legitimam ætatem ad Ordines accessisse repererint, eos in censuras, & pœnas in eadem Constitutione statutas incidisse declarent.

## CAPUT XV.

*De Conversis.*

## I.

(a) *Eodem tempore surgant Conversi, quo & alii Fratres, & eodem modo inclinent.* Cum surrexerint ad Matutinas dicant Pater noster, & Credo in Deum: quod faciendum est ante primam; & post Completorium. In Matutinis dicto Pater noster, & Credo in Deum, erigant se dicendo: Domine labia mea aperies &c. Pro Matutinis in profectis diebus, dicant viginti octo Pater noster, & in fine tantummodo dicant Kyrie eleison. Pater noster &c. quo dicto dicant: Per Dominum nostrum &c. dicendo: Benedicamus Domino &c. In Vesperis vero quatuordecim Pater noster, in aliis horis septem Pater noster dicant.

Q

II. In

## I I.

**I**N festis autem novem lectionum, in Matutinis (b) quadraginta Pater noster dicant: & hoc sub silentio in Ecclesia, vel ubicumque fuerint. Loco Preteriosa, tria Pater noster dicant. Pro benedictione mensæ, Pater noster. Gloria Patri, &c. Post mensam pro gratiis, tria Pater noster, Gloria Patri, &c. vel Miserere mei Deus, qui sciunt. (c) Indumenta tot habeant, quot cæteri Fratres, præter cappas: loco quarum habeant scapularia longa, & lata usque ad juncturam inter pugnum, & brachium; quæ etiam non sint alba sicut & tunicæ, sed similis coloris cappis Clericorum.

## III.

**P**ossunt & brevia grisei coloris habere scapularia, ad mensuram scapulariorum nostrorum. De jejuniis, cibis, abstinentiis, culpis, & aliis omnibus, sic se habeant sicut & Clerici: in labore tamen cum eis Prælati poterit dispensare. Soli non vadant, sed cum Socio Clerico, vel Converso; Psalteria non habeant, nec etiam aliquos alios libellos.

(a) *Eodem tempore surgant Conversi, quo & alii Fratres.* Declaramus, quod Fratres Conversi, quoties recitant *Pater noster* perfolvendo etiam in suo modo Canonicas Horas, toties *Ave Maria* recitare tenentur; sicut fuit declaratum apud Treverim 1266. non tamen tenentur Fratres Conversi perfolvere Horas Canonicas, quamvis professi sint, & ex cleemosynis vivant: quia ad temporales, & corporales exercitationes recipiuntur, ut in sudore vultus sui vescantur pane suo. Quapropter sufficit eis recitare *Pater noster*, & Missam audire: ad Completorium tamen vel saltem ad salutationem Beatissimæ Virginis, nisi magna eos necessitas excuserit, quotidie debent accedere. Corrighendi etiam sunt quando propter suas privatas devotiones opera communia & publicas exercitationes prætermittunt. Quare in Capitulo Florentino 1284. ordinat. 7. & Parisiis 1286. ordinat. 6. sic fuit ordinatum: Ne Conversi torpescant otio, monemus Priores, eorumque Vicarios, ut curam adhibeant, quod in coquina, & ubique in omnibus externis occupationibus teneantur occupati: & cogantur addiscere artem aliquam factivam Conventibus utilem; sicut fuit ordinatum apud Tolosam 1372.

(b) *Quadraginta Pater noster dicant.* Declaramus, in Capitulo Salmanticensi. 1551. auctoritate Apostolica sic fuisse statutum: Ut à tanta obligatione recitandi *Pater noster*, subleventur Conversi, tum Fratres, tum Sorores, qui potius ad corporalia munia pro communi utilitate sustinenda, quam ad alia officia exequenda recipiuntur; statuimus; ut ad Matutinas loco viginti octo, vel quadraginta *Pater noster*, singulis diebus five trium five novem lectionum sufficiant viginti quatuor: pro Vesperis duodecim, ad cæteras Horas septem *Pater noster* sicut

usque modo servatum est. Pro Psalterio vero propter suffragia mortuorum, pro quingentis *Pater noster*, recitentur centum quinquaginta: & pro Psalmis Penitentialibus ubi centum habeant, sufficiant viginti quinque. Et ad hunc modum Constitutiones in Cap. *de Suffragiis mortuorum*, & *de Conversis* reformetur. Atque hæc ab omnibus observanda sunt, ac si haberent tria Capitula Generalia: nam ex auctoritate Apostolica habent vim, & robur perpetuæ Constitutionis. Curent autem quam diligentissime Priores, & Præsidentes, ut gravem aliquem, & optimum Clericum statuunt Conversorum Magistrum: qui eos religiosa pietate, inprimis vero humilitate, ac obedientia imbuat; quod confirmatum fuit Vallisoleri 1605. confirm. 42.

(c) *Indumenta tot habeant, quot cæteri Fratres.* Declaramus, quod Fratres Conversi tunicas albas, & scapularia nigra nequaquam vero alba, habere debent: sicut in multis Capitulis ordinatum fuit, & præcipue apud Montem Pesulanum 1294. ordinat. 8. Debent etiam Fratres Conversi recipi in Capitulo Clericorum, ubi sine cantu recitandus est Hymnus; *Veni Creator Spiritus*: nec possunt fieri Clerici sine licentia Magistri Ordinis. Quod si quis eorum Clericus fiat, debet suum tenere locum infra omnes, qui priusquam ipse Clericalem Habitum susceperunt; ut fuit ordinatum Bisuntii 1303. ordinat. 10. Siquis autem esset nobilis Laicus, litterarum ignarus, qui propter suam claritatem reciperetur ad Habitum Clericalem: iste, non ad perfolvendas horas Canonicas, sed ad recitanda *Pater noster* teneretur; nec posset eligere, neque eligi, neque frui gratiis Clericorum, præsertim si ei prænunciarum sit non obligari officiis Clericorum. Quomodo autem Conversi admittendi non sint ad Habitum Clericorum; & quomodo etiam si admittantur fieri non debeant Sacerdotes: & tamen fiant, à quo tempore vocem in electionibus possint habere, dictum est supra Cap. *de Recipiendis* pag. 74. & 196. Si quis autem Frater Clericus esset facinorosus, & ad Clericorum officia ineptus; posset à suo Prælati (culpa id postulante) Habitu privari, & gratiis Clericorum, & fieri Conversus; dummodo ad sacros Ordines non esset jam promotus; sicut fuit ordinatum Bisuntii 1303. & Narbonæ 1394.

*Ordinationes, & Admonitiones factæ in Capitulo Generali ad Perpinianum celebrato, Anno Domini 1327.*

## CAPUT XVI.

*De certis detractionibus, & singulavitatibus vitandis.*

## I.

(a) **Q**Uicumque in publica prædicatione, vel in communi coram secularium multitudine, ullo tempore summum Pontificem diffamaverit, vel ipsius processus & facta, vel irreverentiam notabilem fecerit, carcerali custodiæ mancipetur; nec inde liberetur, nisi per Capitulum Generale, & cogatur (si commode fieri poterit) in publico revocare. Qui autem in privato postquam per testes legi-



legitimos confiterit, vel judicialiter confessus fuerit; pœna gravioris culpæ puniatur: & nisi per Provinciale Capitulum, vel per Priorem Provinciale, de maturo consilio discretorum cum eo minime dispensetur.

## II.

**E**Andem pœnam incurrat, quicumque Præsident vel Frater Conventus, vel Provinciæ, qui renunciaverit alicui privilegio nostro Ordini concessio, absque Generalis Capituli assensu; Sine cujus assensu omnem hujus modi renunciacionem qualitercumque factam nullius volumus esse roboris, vel momenti. In quo similiter casu similem pœnam incurrant, quicumque Præsidentes aut Fratres, sive Conventus, qui sine causa legitima, & urgente litigaverint, aut appellaverint, contra Dicocefanos quoscunque. Idem fiat de falso accusatore, vel teste legitime convicto, vel judicialiter confessio, in materia prædicta. Prælati vero, qui in corrigendo hujusmodi transgressores, inventi fuerint negligentes, per Generale, vel Provinciale Capitulum à suis officiis absolvantur in pœnam; & præter hoc pœnis aliis gravius puniantur.

(a) *Quicumque in publica prædicatione &c.*) Declaramus, quod cum ex favore, & gratia Prælatorum Ordo noster summopere suam augeat & dignitatem, & utilitatem; valde illos venerari, colere, & officiose observare debemus, & nequaquam eis unquam detrudere, aut lites, vel controversias illis inferre; sed è contra ut eorum famam custodiamus, ac tueamur diligentissime curandum est. Populum etiam in eorum obedientiam, ac reverentiam debemus inducere, & nequaquam Laicos ab Ecclesiarum suarum frequentia, vel accessu avertere, sicut in pluribus Capitulis ordinatum fuit. Qui autem oppositum fecerint, pœna gravioris culpæ debent puniri. Et si summo Pontifici publice detraxerint, debent carceri mancipari.

## III.

**I**tem quicumque in nostro Ordine inventi fuerint, (b) singularem vitam quocumque modo vitiosam ducentes, & contra communem modum vivendi diu ab Ordine approbatum; primo moneantur, & si admoniti correcti non fuerint, separentur, & in diversis Conventibus ponantur. Et si in eadem persistant, per Priorem Provinciale, vel Provinciale Capitulum carcerali custodia mancipentur. Item quicumque crimen comiserit, pro quo in seculo pœna mortis deberet plecti, in carcerem retrudatur; pœnis aliis macerandus ibidem, plus, & minus secundum delicti, & personæ qualitatem, & circumstantias alias alleviantes, vel etiam aggravantes: & nisi per Generale

*Cod. Regul. Tom. IV.*

Capitulum non possit ab ipso carcere liberari. Quod si secundo recidiverit, carceri perpetuo mancipetur.

(b) *Singularem vitam quocumque modo vitiosam ducentes.*) Declaramus, quod illi dicuntur singularem, & vitiosam vitam ducere, qui mercaturas exercent; qui arti Alchimie student, & dant operam; qui aleis, & taxillis ludunt; qui concubinas tenent; qui Monasteria sine licentia intrant; Habitum Religionis nostræ dimittunt, vel occultant; qui venationibus, & aliis exercitiis hujusmodi frequenter incumbunt, quæ Religiosis sunt prohibita; tales enim sunt carceri mancipandi; sicut in multis Capitulis ordinatum fuit.

## IV.

**I**tem volumus, quod ordinatio Capituli Burdigalensis 1342. de mutationibus Fratrum servetur, quæ est infra scripti tenoris: Cum electiones nostræ maxime liberæ esse debeant, & omni nota coactionis carere: districte injungimus Prioribus Provincialibus, & quibuscunque Vicariis: quod (c) infra mensem ante electiones quascunque, novas assignationes, & mutationes Fratrum non faciant in Conventibus, in quibus electiones hujusmodi fuerint celebrandæ, nisi pro officio Lectoratus, vel Prioratus, vel gravi scandalo evitando; (d) vel nisi in Provinciali Capitulo, vel in loco ipsius Provincialis Capituli, sicut in aliquibus Provinciis est consuetum. Quod si contrarium factum fuerit, hujusmodi assignationes, vel mutationes (quoad privationes vocis in Conventu; de quo fiunt ipsæ mutationes, & quoad ipsam vocem in Conventu, ubi fiunt assignationes) suum non fortiantur effectum. Priores autem Provinciales, qui in hoc inventi fuerint excessisse, per Magistrum Ordinis, vel Definidores Generalis Capituli (cum legitime constiterit) à suis officiis in pœnam absolvantur. Vicarii vero omni officio Ordinis usque ad tres annos sint privati. Nec Fratres possint privari vocibus eodem tempore, nisi ob causas in Capitulo de graviore culpa contentas.

(c) *Infra mensem ante electiones quascunque, novas assignationes, vel mutationes non faciant.*) Declaramus, quod ut supra dictum est Cap. 2. de Electione Prioris Conventualis pag. 199. ex Constitutione Clementis VIII. duobus mensibus ante tempus electionis, novæ assignationes, ac mutationes fieri non possunt. Cum autem tempus electionis sit mensis, qui incipit à die, quo nota fuit carentia Prioris, sequitur, ut per duos alios menses, antequam iste mensis electionis incipiat, tales mutationes, & assignationes fieri non possunt. Viennæ etiam 1282. & Burdigalæ 1287. & Bononiæ 1315. ordinatum fuit, ne à die quo fuit nota carentia Prioris Provincialis, usque ad completum mensem, quod est tempus constitutum ad eandem electionem, assignationes & mutationes Fratrum non possint fieri.

Q 2

Item

Item declaramus, quod ab anno 1504. quo per Bullam Julii Papæ II. Priores tum Provinciales, tum Conventuales, redacti sunt ad determinatum tempus, & jam in toto fere Ordine, hæc Bulla recepta est: ac proinde cum certo sciri possit tempus vocationis, seu absolutionis cujuscunque Prioris, fieri non possunt novæ Fratrum assignationes infra duos menses eandem absolutionem, seu vocationem antecedentes, ut supra dictum est. Et de hoc admoniti fuerunt RR. Provinciales in Capitulo Romano 1601. ex Clementis VIII. Constitutione.

(d) *Vel nisi in Provinciali Capitulo &c.*) Declaramus, prædictam clausulam ita intelligi, quod infra decem dies à Constitutione concessos propter Capituli celebrationem, tales Fratrum mutationes, & assignationes possunt fieri. Ante principium vero Capituli, vel post ejus finem, mutationes hujusmodi fieri non possunt. Quare si Provincialis, vel ejus Vicarius Generalis ultra illos dies post actorum publicationem quamlibet faciat mutationem, ipsa nullam habebit vim, neque ullum consequetur effectum, ut fuit declaratum Brugis 1369. & Venetiis 1357.

## V.

**I**tem ordinamus, & districte prohibemus, ne fiat aliquis Prædicator Generalis, nisi maturus, & discretus; & sufficientis litteraturæ; & qui convenienter sciat proponere verbum Dei, & qui sit idoneus ad negotia Ordinis pertractanda: (e) nec numerum Conventuum Provinciarum excedant. Et non fiat aliquis in aliqua Provincia habente numerum excessivum, donec ad dictum numerum sint redacti, Magistris in Theologia, & illius dumtaxat exceptis, quæ ratione antiquitatis, vel infirmitatis ad Capitula Provincialia venire non possunt. Quod si secus factum fuerit, totum sit irritum, & inane.

(c) *Nec numerum Conventuum Provinciarum excedant.*) Declaramus, quod hæc Constitutio cum dicit Prædicatores Generales non debere excedere numerum Conventuum: nomine Conventuum, Vicariatus, & loca Ordinis non comprehenduntur; sicut fuit declaratum Romæ 1589. declaratum. 3. & confirmatum Venetiis 1592. declaratum. 5. & Romæ 1612. confirmatum. 3.

## VI.

**I**tem, quod arceantur Priores, qui male afficiant Fratres: debet enim saltem alter illorum esse claræ famæ, & sufficientis ætatis, & de lingua patriæ, ubi hoc commodè poterit observari. Item, quod (f) Fratres quando recedunt de Capitulis, per Superiores combinentur; ne vagando discurrant, sed directe ad suos vadant Conventus. Sciant omnes Fratres Ordinis nostri, quod omnes Constitutiones prædictæ vim Constitutionum nostrarum habent auctoritate Summi Pontificis, non obstante quod non habeant, nisi præsens Capitulum Generale, & om-

nes in fine Constitutionum nostrarum integre conscribantur.

(f) *Fratres quando recedunt de Capitulis, per Superiores combinentur: ne vagando discurrant.*) Declaramus, quod cum inutilis vagatio Fratrum perturbationes Ordini, scandala proximis affert; & ex mala Fratrum consocietate dissolutiones, & insolentia oriuntur, & crescant: decernimus, quod nemo omnium Fratrum, sine licentia Magistri Ordinis ad Generale Capitulum, & sine licentia Prioris Provincialis ad Capitulum Provinciale potest accedere; sub pena privationis activæ, & passivæ vocis per unum annum. Quando vero è Capitulis, vel è Conventibus redeunt, debent Superiores prudenter, & discrete alterum cum altero consociare; & Fratres ad hunc modum consociati, non se separent, ita ut mutuo se videre non possint, sed contra simul ambulantes, ut sibi dare possint mutuam testimonium in quocunque loco, vel de quocunque negotio. Et si quos transgressores invenerint, debent acius, & severius corrigere, & punire. Debent etiam ipsi viatores litteras testimoniales deferre, & Præfidentibus Conventuum ad quos declinaverint, exhibere: vel Præsidentes ipsi ab illis exigere, legere, & diligenter inspicere. Si autem eas non habuerint, viatores acri pœna plectantur: & voce per unum annum priventur: sicut fuit ordinatum apud Montem Pefulanum 1294. Treverim 1289. Placentiam 1310. & iterum apud Montem Pefulanum anno Domini 1316.

## CAPUT XVII.

*De Capitulo Biennali, vel Triennali.*

**C**onstitutio nova facta est, in Capit. Generali Florentino, celebrato 1274. de Capitulo biennali, vel triennali, auctoritate Gregorii Papæ XI. vim Constitutionis habens, licet non fuerit, nisi unum Capitulum Generale. Ideoque in Constitutionibus nostris, cura Reverendiss. P. Fr. Vincentii Bandelli Generalis Magistri editis, hoc Capit. 17. fuit insertum: at quia in Capitulo Generali Avenione celebrato 1561. confirmat. 2. hoc Capit. deleri posse declaratum fuerat; in editione Constitutionum nostrarum, Barcinonæ facta 1620. fuit omnino suppressum. Cæterum Patres nostri in Capitulo Generali Romæ celebrato 1629. declarat. 2. sanciverunt, ut hoc Capit. quod in Constitutionibus nostris Barcinonæ impressis omisum fuerat, in iisdem Constitutionibus restitueretur: hacque declaratione fulti, illud in hac Romana editione restitimus.

## I.

(a) **S**tatuimus, seu præsentis statuto decernimus; quod Magister Ordinis, seu vices ejus gerens, & Definitor Capituli Generalis, sicut possunt ex causa legitima quoad locum mutare Capitulum; ita etiam quoad tempus prolongando, vel accelerando illud: ita dumtaxat: quod neque acceleratio fieri possit infra annum prius assignati Capituli, neque prolongatio ejusdem ultra triennium, nisi Magistri vocatio contingeret in Festo, vel post Festum Beati Michaelis in tertio anno triennalis Capituli, prout inferius explicatur.

Au-

Authoritatem autem accelerandi, vel prolongandi Capitulum, cuicumque Vicario concedi posse simpliciter prohibemus: adjicientes, quod quodcumque imminente biennali Capitulo, Ordinem Magistro carere contigerit; nulla mutatio quoad tempus fieri possit nisi Magistri vocatio contingat in Festo, vel post Festum B. Michaelis, in secundo anno: quia tunc supersederi debet illo anno à Capitulo Generali. Si vero anno primo imminenti triennali Capituli, Ordo Magistro caruerit: tunc accelerabitur Capitulum; ita quod inter vocationem Magistri, & Capitulum electioni, nisi unum Pentecostes intervenire non possit. Alias si post unum annum computandum à Vigilia Pentecostes exclusive, Magistri vocatio contingat, nulla mutatio Capituli quoad tempus fiat: nisi contingeret ultimo anno in Festo, vel post Festum Beati Michaelis; quia tunc supersederi etiam debet à Cap. Gener. ut expressum est de Capitulo biennali.

(a) *Statuimus, seu presenti Statuto decernimus &c.*) Declaramus, quod ante istud Statutum celebrabatur Capitulum Generale quolibet anno, ne poterat ultra annum prolongari: nisi contigisset post Festum S. Michaelis, Magistrum Ordinis mori, vel amoveri. Post vero istud Statutum, usque ad Annum 1396. perseveravit prima consuetudo, & ex tunc ceperunt Capitula Generalia esse biennalia, vel triennalia, eo modo, quo hic fuit statutum & ordinatum

## II.

**I**mminente autem biennali, vel triennali Capitulo, (b) non eligatur Definitor Generalis Capituli, nec ei Socius assignetur: nisi in anno ultimo quo scilicet celebrandum est Capitulum Generale. Et (c) qui una vice electus fuerit ad prædictam Definitionem, ad eandem eligi immediate sequenti vice non possit. (d) Singulis annis nihilominus post Festum Pentecostes, fiant Capitula Provincialia, nisi per Magistrum ordinis in aliquibus Provinciis ex causa ad biennium fuerint prolongata. In quibus etiam fiant scrutinia de Provincialibus, deferenda per Definidores, vel Socios eorum, aut per Socium Provincialis in anno Provincialium ad Capitulum Generale; qui Definidores duabus vicibus, & Provinciales tertia vice definient, constituent, & tractabunt. Recitabuntur insuper obitus Fratrum, post præcedens Capitulum Defunctorum, & fiet pro eis communis absolutio, ut moris est.

(b) *Non eligatur Definitor Capituli Generalis, nisi in anno ultimo.*) Declaramus, quod si aliquis Frater eligatur in Definitorum Capituli Generalis in aliquo Capitulo Provinciali, & postea per mortem, vel amotionem Magistri Or-

dinis, vel ex alia causa Generale Capitulum prolongetur; non poterit virtute talis electionis in Capitulo Generali definire: sed oportebit aliam electionem in ultimo anno Generalis Capituli celebrandi facere.

(c) *Qui una vice ad prædictam Definitionem electus fuerit, ad eandem eligi immediate sequenti vice non possit.*) Declaramus, quod cum per tria Capitula Generalia continua, in quibus Priores Provinciales una vice, & Definidores duabus vicibus habent definire, possit fieri Constitutio; non potest unus, & idem Frater in illis tribus Capitulis continuis, plus, quam una vice definire: & propter hoc in hoc Statuto dicitur: quod ille, qui una vice ad prædictam Definitionem electus fuerit, ad eandem eligi immediate sequenti vice non possit. Et dato, quod inter primam electionem Definitoris, & secundam electionem medietur Definitio Provincialium; adhuc ille, qui in prima electione fuit electus, non poterit in secunda eligi. Et poterit secunda electio dici immediate sequens ad primam; quia inter ipsam, & primam nulla alia electio Definitoris mediat: cum Definitio Provincialium non fit per electionem. Sive ergo inter duas electiones Definitorum, nulla alia Definitio media cadat, sive cadat media Definitio Provincialium: non poterit ille, qui est electus in prima, postea eligi in secunda.

(d) *Singulis annis nihilominus post Festum Pentecostes fiant Capitula Provincialia.*) Declaramus, quod quando in initio Ordinis fiebant Capitula Generalia singulis annis, tunc etiam quolibet anno celebrabatur Capitulum Provinciale; de quo plura declarata fuere supra Capit. 7. hujus dist. 2. quæque ad declarationem hujus Textus sufficiunt.

## CAPUT XVIII.

## Constitutiones D. Bonifacii Papæ IX

## I.

**D**Enunciamus D. Bonifacium Papam IX. Anno 1402. quinto Kalend. Maij, Pontificatus sui Anno XIII. Constitutione edidisse, quæ per nostrum Ordinem nequeunt immutari, tenoris infrascripti. (a) *Authoritate Apostolica, tenore præsentium, perpetua, & irrefragabili Constitutione sancimus, statuimus, & ordinamus: quod de cætero perpetuis futuris temporibus, nullus ex Fratribus Ordinis Prædicatorum, absque licentia, seu assignatione Capituli Generalis, secundum morem ejusdem Ordinis ad legendum pro forma, seu ad honorem Magisterii in Theologia promoveri, vel gradu hujusmodi Magisterii fungi possit, aut debeat, nisi per dictum Capitulum fuerit approbatus vel promotus.*

## II.

**C**ontrarium vero faciens eo ipso excommunicationis sententiam incurrat. Et si per Capitulum prædictum reprobatus



tus extiterit, pro non Magistro habeatur: Constitutionibus Apostolicis, ac statutis, consuetudinibusque Provinciarum, & locorum dicti Ordinis, nec non privilegiis, & concessionibus Apostolicis in genere, vel in specie, quibusvis Fratribus, Provinciis, seu locis, concessis, seu factis; aut concedendis, vel faciendis; sub quavis forma, & expressione verborum (etiam si de eis de verbo ad verbum habenda esset in presentibus mentio specialis, & alii contrariis non obstantibus quibuscumque; Nos enim ex nunc irritum decernimus, & inane, si secus super his à quoquam quavis autoritate scienter, vel ignoranter contigerit attentari.

(a) *Auctoritate Apostolica tenore presentium perpetua, & irrefragabili Constitutione sancimus &c.* ) Declaramus, à Sede Apostolica statutum, atque ordinatum fuisse, ut nullus Frater Ordinis nostri Baccalaureus gradum possit assumere, nisi à Generali Capitulo ad illum assumendum fuerit promotus, & expositus, nec pariter gradum Magisterii assumere possit, nisi ejus lectura ab eodem Capitulo fuerit approbata, & ipse ad Magisterium assumendum fuerit expositus, & promotus. Et si secus factum fuerit, talium assumptio graduum sit irrita, & inanis, atque assumptio eo ipso sententiam excommunicationis incurrant. Et hæc constitutio à nostris Capitulis Generalibus approbata fuit, & renovata etiam Venetiis 1437. Perusii 1478. Romæ 1481. & Cenomanis 1491.

## III.

Item statuimus, & ordinamus, quod (b) quorumcumque Mendicantium Ordinum Fratres, hujusmodi Prædicatorum Ordinis Fratres, aut Sorores subiectas eisdem, in ipsorum, aut dictorum aliorum Ordinum Fratres, aut Sorores (etiam vigore quarumcumque litterarum Apostolicarum super hoc hæctenus forsan concessarum, vel in posterum concedendarum, etiam quod ad parem, vel arctiorem transire possint Ordinem continentium, nisi in eisdem de Ordinibus, ex quibus recedunt, & ad quos accedunt, & ad quos transferendi se licentiam obtinuerint, necnon de præsentibus, & earum toto tenore, specialis, & expressa mentio habeatur) recipere non possint, aut debeant.

## IV.

Quodque nullus ex Fratribus, & Sororibus Prædicatorum Ordini subiectis, aliquem, vel aliquam ex Fratribus, ac Sororibus hujusmodi coram quocumque iudice, qui non sit de dicto Ordine, ex quacumque causa convenire, seu facere conveniri: nec à correctione quacumque, seu alias ab aliquo Prælato, seu Fratre dicti Ordinis,

quavis occasione appellare, aut contra eos querelam proponere (nisi prius coram Conventuali, seu Provinciali Priore, seu Magistro, & successive in Generali Capitulo dicti ordinis, causam, vel querelam suam proposuerit verbo, vel in scriptis) possit, aut debeat.

## V.

Quodque Ordinis Prædicatorum contra ordinis Minorum, nec ejusdem ordinis Minorum Fratres, Inquisitores hæreticæ pravitatis pro tempore existentes, contra hujusmodi ordinis Prædicatorum Fratres, aut etiam dicti ordinis Prædicatorum Fratres Inquisitores, sine licentia Magistri, aut Provincialium Priorum contra ipsorum Confratres ejusdem Ordinis inquirere nequaquam possint, aut debeant. Sed si quid Prædicatores contra Minorum, & Minores Fratres Inquisitores contra Prædicatorum Ordinis Fratres prædictos de pravitatis hujusmodi persenserint, id ad Sedem Apostolicam, vel præfatorum Fratrum Superiores deferre teneatur. Item, quod prædictus Magister, & alii Præsidentes in dicto Ordine, ad quos pertinerint pro tempore in correctionibus Fratrum ejusdem Ordinis, juris Ordine postposito secundum consuetudines approbatas, & instituta Ordinis antedicti procedere libere possint, & valeant; eis autoritate Apostolica tenore presentium ex certa scientia indulgemus.

(b) *Quorumcumque Mendicantium Ordinem Fratres.* ) Declaramus, in hac Constitutione Mendicantes esse intelligendos illos Religiosos, qui etsi possessiones habent in communi, non tamen possunt sine mendicitate acquirere necessaria ad victum & vestitum; aliaque necessaria ad vitam sufficienter procurare. Quare in Capitulo Valencenis 1337. sic dicitur: declaramus, quod nostra Constitutio Religiosos Mendicantes intelligit, non solum illos, qui possessiones non habent: sed etiam eos, qui etsi possessiones habeant, tamen propter earum exiguitatem consueverunt communiter mendicare.

## VI.

Item nullus secularis, vel Regularis, aliquod Monasterium Sororum Prædicatorum Ordini subiectarum (nisi in quantum earum Constitutiones, & Statuta id patiantur, vel de Sedis Apostolicæ, aut Magistri dicti Ordinis licentia speciali) intrare; aut aliquæ Sorores hujusmodi exire inde quoquomodo præsumant. Contrarium vero facientes excommunicationis sententiæ (à qua præterquam per Sedem, vel Magistrum memoratos aut aliquem ex dicti Ordinis Fratribus, cui Magister prædictus id commiserit, (c) absolvi non possint) volumus subiacere.

Item

**I**tem statuimus, volumus, atque ordinamus quod omnes, & singuli Religiosi quorumcumque etiam Mendicantium Ordinum dictæ Sedis Capellani, qui sunt, & erunt, perinde eorum Superioribus & correctioni ipsorum in omnibus, & per omnia sint subiecti, ac si prædictæ sedis Capellani non essent. Non obstantibus exemptionibus, ac aliis quibuscumque Privilegiis, Indulgentiis, gratiis, & litteris Apostolicis Capellanis dictæ sedis, vel aliis conjunctim, vel divisim sub quavis forma, vel expressione verborum à dicta sede concessis, vel in posterum concedendis: etiamsi de illis de verbo ad verbum, & de ipsorum Capellanorum nominibus, & cognominibus propriis, plena, & expressa mentio præsentibus sit habenda, quæ (quoad hoc) ipsis in nullo volumus suffragari.

(c) *Absolvi non possint.* ) Declaramus, quod quicumque habent per Sedem Apostolicam generalem licentiam absolvendi quoscumque, à quibuscumque casibus, ex vi talis facultatis Fratres Ordinis nostri nequaquam possunt absolvere; sicut idem Bonifacius declaravit in Bulla, & si quis intra clausuram Monasterii alicujus, curæ, & regimini Ordinis commissi repertus fuerit; poterit per dicti Ordinis Præsidentes, seu ex eorum mandato capi, & carcerari, & pœna plecti, secundum eorum arbitrium, & qualitatem delicti: sicut idem Bonifacius in commemorata Bulla declaravit. Et si quis secularis, vel Regularis in aliquod prædictorum suorum Monasteriorum intrare, vel Sorores aliquæ inde exire sine licentia Magistri Ordinis ausi fuerint; ipso facto sententiam excommunicationis incurrunt: à qua non nisi per Papam, vel Magistrum Ordinis, vel ab aliquo Fratre, cui prædictus Magister facultatem concesserit, absolvi possint.

*Constitutio D. Alexandri Papæ VI. de Electione Magistri Ordinis.*

## I.

(a) **D**enunciamus, quod Dominus Alexander Papa VI. in Capitulo Generali Romæ celebrato Anno Domini 1501. Statutum, & Constitutionem fecit infra scripti tenoris, quæ tunc acceptata, & servata fuit. Volumus, & autoritate Apostolica per præsentis perpetuis futuris temporibus statuimus, & ordinamus: quod modernus Vicarius vestri Ordinis per nos institutus, & quilibet alius in simili casu futuris temporibus per Sedem Apostolicam instituendus, sicut primum locum in ipso Capitulo, & ubique tenet, ita & in electione ipsius Generalis Magistri primam vocem habeat: & cum duobus Provincialibus in dicto Capitulo existentibus, qui diutius post expressam professionem Habitum vestri Ordinis portaverunt; ad inquirendum, & conscribendum vota electorum ad bancum scrutinii electionis prædictæ, federe debeat. Et hoc idem in quolibet Vicario Generali vestri Ordinis, quem futuris temporibus continget secundum Constitutiones vestri Ordinis institui, volumus, & ordinamus debere observari; non obstantibus Constitutionibus prædicti Ordinis, & Ordinationibus Apostolicis, & quibuscumque aliis in contrarium facientibus.

(a) *Denunciamus, quod Dominus Alexander Papa VI.* ) Declaramus, hanc Domini Alexandri Constitutionem in Generali Capitulo Romæ 1539. autoritate Domini Pauli III. nullum apud Ordinem nostrum obtinuisse locum: & ab eo tempore, & deinceps in Magistri Ordinis electione, neque fuisse receptam, neque servatam; quamquam de hoc nullæ authenticæ litteræ Apostolicæ extant.

*Finis Constitutionum Fratrum Ordinis Prædicatorum, cum Declarationibus suis jam olim ordinatis, ac emendatis per bo. me. P. F. Vincentium Bandellum, & Fr. Vincentium Justinianum ejusdem Ord. Magistros Generales: nunc vero plurimis accessionibus locupletarum, autoritate Reverendiss. P. F. Seraphini Sicci Papiensis S. T. Profess. & ejusdem Ord. Gener. Magistri, etiam accedente Decreto, & approbatione Capituli Gen. Ulyssiponæ celebrati, An. 1618. in quo RR. PP. Definitorum omnes subscripserunt in hunc modum.*

Approbamus has Constitutiones, & Glossas, Nos

Fr. Petrus de Herrera, Magister & Definitor Hispaniæ.  
Fr. Joannes Tourne, Magister & Definitor Tolosanæ.  
Fr. Guillelmus Dudouyt, Magister & Definitor Franciæ.  
Fr. Joannes Michael de Bononia, Magister & Definitor Lombardiæ.  
Fr. Michael Arrigus, Magister & Definitor Provinciæ Romanæ.  
Fr. Ambrosius de Cardova, Magister & Definitor Regni.  
Fr. Jo. Baptista de Capriata, Magister Provincialis, & Definitor Angliæ.  
Fr. Jo. Bertram, Præsentatus & Definitor Aragoniæ.  
Fr. Franciscus Papa, Magister & Definitor Trinacriæ.  
Fr. Vincentius Pereyra, Magister & Definitor Portugalliæ.

Fr. Jo.

*Fr. Joannes de los Angelos , Magister & Definitor Bethicæ.*  
*Fr. Jacobus de Rocourt , Magister & Definitor Germaniæ inferioris.*  
*Fr. Franciscus Sproverius à Monte alto , Magister & Definitor Calabria.*  
*Fr. Ludovicus Barroso , Magister & Definitor Mexicanus.*  
*Fr. Raynaldus Poisson , Magister & Definitor Occitaniæ.*  
*Fr. Balthasar Verdugo , Prædicator Generalis & Definitor de Chile.*  
*Fr. Archangelus de Dominicis , Lector , Prædicator Generalis , & Definitor Provincia S. Catharinæ Senensis.*  
*Fr. Gabriel Drohobicensis , Magister & Definitor Russiæ.*

## I N C I P I U N T CONSTITUTIONES SORORUM ORD. PRÆDICATORUM.

### P R O L O G U S.

**Q**Uoniam ex præcepto regulæ jubentur Sorores habere cor unum , & animam unam in Domino : iustum est , ut quæ sub una Regula , & unius professionis voto vivunt , uniformes in observantia canonici Religionis inveniantur : quatenus unitatem quæ interius servanda est in cordibus , foveat , & repræsentet uniformitas exterius servata in moribus. Quod profectò eò competentiùs , & plenius poterit observari , si ea quæ agenda sunt , scripto fuerint commendata : si omnibus qualiter sit vivendum scriptura teste innotescat ; si mutare , vel addere , vel minuere nulli quidquam propriâ voluntate liceat : ne si minima negligent , paulatim defluant. Ad hoc tamen in Conventu suo quæ præest , dispensandi cum Sororibus habeat potestatem , cum sibi aliquando videbitur expedire : nisi in his in quibus Magister Ordinis , vel Prior Provincialis , vel eorum Vicarii ex causa aliter ordinarent. Priorissa etiam utatur dispensationibus , sicut & aliæ Sorores. Ut igitur unitati , & paci Sororum provideremus , librum istum quem Constitutionum appellamus , diligenter conscripsimus , per certa Capitula infra scripta distinctum , ut quod quæretur , facilius inveniat. Declaramus autem , quod Constitutiones non obligent Sorores ad culpam , sed ad pœnam tantum , nisi propter præceptum , vel contemptum.

### S E R I E S   C A P I T U L O R U M.

- |   |                                       |
|---|---------------------------------------|
| I. De Officio Ecclesiæ.                                 | XVI. De Modo faciendi Professionem.   |
| II. De Inclinationibus.                                 | XVII. De levi Culpa.                  |
| III. De Suffragiis mortuorum.                           | XVIII. De media Culpa.                |
| IV. De Jeuniis.   | XIX. De gravi Culpa.                  |
| V. De Cibo.   | XX. De graviori Culpa.                |
| VI. De Collatione.                                      | XXI. De gravissima Culpa.             |
| VII. De Infirmis.                                       | XXII. De Apostatis.                   |
| VIII. De Minutione.                                     | XXIII. De Electione Priorissæ.        |
| IX. De Lectis.  | XXIV. De Modo eligendi.               |
| X. De Vestitu.  | XXV. De Institutione Suppriorissæ.    |
| XI. De Communitate rerum.                               | XXVI. De Cicatricibus.                |
| XII. De Communione , & lavatura capitis ,<br>& tonsura. | XXVII. De Cellaria.                   |
| XIII. De Silentio.                                      | XXVIII. De Labore.                    |
| XIV. De Recipiendis.                                    | XXIX. De Aedificiis.                  |
| XV. De Novitiabus , & earum instructione.               | XXX. De Ingressu , & egressu domorum. |
|   | XXXI. De Capitulo.                    |
|   | XXXII. De Concessione domorum.        |





## CAPUT I.

*De Officio Ecclesiæ.*

**A**udito primo signo surgant Sorores cum matura festinatione, religiosè, & honestè se præparando: & stando dicant in Dormitorio Officium de Beata Virgine, quando pro tempore est dicendum; una incipiente, & dicente unum versum, aliis vero respondentibus, & dicentibus alium versum. Matutinas autem, & omnes Horas Canonicas simul audiant Sorores, nisi cum aliquibus ex causa legitima fuerit dispensatum. Horæ Canonicæ omnes in Ecclesia tractim, & distinctè taliter dicantur, ne Sorores devotionem amittant, & alia quæ facere habent minime impediuntur. Quod ita dicimus esse faciendum, ut in medio versus metrum cum pausa servetur, non protrahendo vocem in pausa, vel in fine versus. Hoc tamen magis, & minus pro tempore observetur. Horæ verò de Beata Virgine, ante Horas Canonicas dicantur in Ecclesia, excepto duntaxat Completorio, quod nonnisi post officium de tempore, vel de festo quocumque minoris solemnitatis, juxta dispositionem Calendarii, dicitur. Tempore quo bis reficiuntur Sorores legatur ante Completorium in Ecclesia: *Sorores sobrie* &c. Postea dicto ab ea, quæ præest *Adjutorium nostrum in nomine Domini*, & facta confessione, dictoque Completorio, Hebdomadaria aquam aspergat benedictam: postea dicatur *Pater noster*, & *Credo in Deum*. Post Completorium autem (receptis pro tempore disciplinis), concedatur Sororibus spatium mediæ horæ ad clepsidram, ut sacris meditationibus, & orationi mentali vacare possint: similiter, & post Matutinas dum de nocte dicuntur. Si verò Matutinum in sero dicatur, prædicta mentalis oratio medietati horæ commensuranda, fiat de manè ante Horas Canonicas. Facto autem signo omnes egrediantur ab Ecclesia, & intrent locum dormitionis. Aliquis autem locus statuatur, in quo ad prævidendum officium divinum Sorores conveniant tempore opportuno, præsentem Priorissam, vel alia cui commiserit.

## CAPUT II.

*De Inclinationibus.*

**F**initis Matutinis de Beata Virgine, cum Sorores in Chorum venerint, inclinent ante Altare profundè; & cum ad sedes suas venerint, facto signo ab ea quæ præest, flexis genibus, vel inclinatæ profundè pro tempore dicant *Pater noster*, & *Credo in*  
*Cod. Regul. Tom. IV.*

*Deum*: & iterum facto signo ab ea quæ præest, surgant. Horâ itaque devotè inceptâ, versæ ad Altare, muniant se signo Crucis, & ad *Gloria Patri*, inclinet Chorus contra Chorum profundè, vel prosternant se pro tempore, usque ad *sicut erat*. Hoc etiam faciendum est quoties *Pater noster*, & *Credo in Deum* dicuntur: nisi Missa, & ante lectiones, & gratiarum actiones, in quibus inclinandum est solum ad *ater noster*, & ad orationem *Retribuere*.

Idem etiam faciendum est ad primam collectam in Missa, & ad *Postcommunio* & similiter ad *Orationem*, pro Ecclesia, & in singulis horis ad Collectam, & ad *Gloria Patri*, quotiescumque in inchoatione horæ dicitur. Ad omnia autem alia *Gloria Patri*, & ad extremos versus hymnorum, & ad penultimum versum Cantici *Benedicite*, inclinent usque ad genua: & quando cantatur *Gloria in excelsis*, ad *Suscipe deprecationem nostram*, & item in benedictione lectionis, & in capitulo ad orationem, *Sancta Maria*.

Item quando nomen *Jesu* in Collecta, & in Præfatione, vel in Antiphona *Salve*, vel in *Gloria in excelsis* nominatur. Quando autem nomen *Jesu* alias nominatur in Choro, Sorores eidem reverentiam faciunt, capite cum devotione inclinato.

Item in omni Oratione, quando nomen Domini nostri *JESU Christi*, & *Beata Virginis*, & *Beati Dominici*, nominatur, & etiam quando nomen *Beata Virginis* nominatur ad Antiphonam *Salve Regina*, & in Missa in Præfatione, & ad *Gratias agamus* &c. Sorores in Choro inclinent profundè usque ad genua. Horâ itaque prædicto modo devotè inceptâ, postquam ad *Gloria*, post *Venite* inclinaverint usque ad genua; stet Chorus contra Chorum: deinde ad primum Psalmum sedeat unus Chorus, & ad secundum similiter stet, & sedeat alter Chorus, & sic alternent usque ad *Laudate Dominum de cælis*, & sic faciant ad omnes Horas. Finitis autem lectionibus in Matutinis, (dum in verbis dicuntur) illa quæ legit, inter pulpitem quod est in medio Chori, & gradus Altaris inclinationem faciat, vel prosternat se pro tempore. Si verò Matutinæ in Cantu persolvuntur, quælibet ex Sororibus, finitâ Lectione quam cantavit, faciat inclinationem, vel prostrationem, modo quo supra dictum est. Porro ad *Salve sancta parens*, & ad *Salve* post Completorium ad illa verba nimirum *Eja ergo advocata nostra* usque ad *post hoc exilium ostende*, maneant Sorores genuflexæ, verso vultu ad Altare. Idem faciant ad illa verba invitatorii, *Venite adoremus*, & *prosidamus ante Deum*: post expletum verò hunc versum, illæ quæ cantant, vel reci-

citant Invitatorium, reverenter inclinent. Similiter ad *Veni Sancte Spiritus*, ad *Veni Creator Spiritus* in die Pentecostes, & per totam hebdomadam, ad *Ex Maria Virgine*, & *Homo factus est*, ad illa verba Hymni de Passione, *O Crux ave* &c. ad verba Evangelii: *Verbum Caro factum est*, & in die Epiphaniæ ad *Et procidentes adoraverunt eum*: ad Versum Hymni Corporis Christi *Tantum ergo Sacramentum*; ad *Te ergo quæsumus* in Canticum *Te Deum*: in processione Dominicæ Ramis Palmarum, ad verba *Ave Rex* &c. in die Parasceves ad *Sanctus Deus*, ad *Sub tuum præsidium*, ad *Ave Maris stella*, ad *Veni Creator Spiritus* in Missa de Spiritu Sancto, ac demum in Hymno Festi Sanctissimæ Trinitatis ad illa verba: *Adsumus & nos cernui* &c. Similiter in Hymno, *Christe qui lux es*, ad versum *quos sanguine mercatus es* genua flectant.

In ferialibus quoque diebus jaceant prostratæ à *Sanctus*, usque ad *Agnus*.

In Festis verò Trium, vel Novem Lectionum, jaceant prostratæ ab elevatione Corporis Christi, usque ad *Pater noster*. Non tamen faciant iisdem Festis similes prostrationes ad Horas Canonicas, quas faciunt ferialibus diebus. Quando Prælatus vel illa quæ præest injunxerit aliquam communem orationem, inclinent omnes. Similiter omnes faciant, quibus aliquid facere, vel dicere injunxerit. Si autem aliquam obedientiam, vel officium, vel ministerium aliquod cuiusvis injunxerit, humiliter se prosternens, suscipiat quod ei injunctum fuerit. Quando etiam Sororibus quidpiam vestimenti tribuitur, inclinantes *Benedictus Deus in donis suis*, dicant.

### CAPUT III.

#### *De Suffragiis mortuorum.*

**A** Festo S. Dionysii usque ad Adventum, pro Anniversario Fratrum, & Sororum, familiarium, & receptorum per litteras ad beneficia Ordinis, litteratæ Sorores Psalterium, non litteratæ quingenta *Pater noster*, dicant.

Idem faciat quælibet Soror pro Sorore defuncta sui Conventus. Et idem fiat pro Magistro Ordinis, & pro Priore Provinciali defunctis.

Idem etiam pro Visitatore earum, si dum intendit visitationi Monasterii, eum mori contigerit.

Idem etiam fiat pro Procuratore Ordinis, si in Curia Romana in procurationis officio decedat. Quælibet litterata pro Fratribus, & Sororibus nostris defunctis, triginta vicibus septem Psalmos Pœnitentiales dicat in anno. Non litterata triginta vicibus centum *Pater noster*. In

Anno quatuor Anniversaria fiant. Anniversarium Patrum, & Matrum, tertia die post Purificationem Beatæ Mariæ. Anniversarium benefactorum, & familiarum die crastina post Octavam Beati Augustini. Anniversarium verò Fratrum, & Sororum, in crastino Beati Dionysii. Anniversarium demum omnium sepultorum in cœmeteriis nostris, ubique fiat prima die vacante post octavam Visitationis Beatæ Mariæ. Porro circa hæc Anniversaria servetur illa Rubrica, quæ in Breviariis, & Diurnis noviter impressis, ad diem 10. Novembris adscripta est.

### CAPUT IV.

#### *De Jejuniis.*

**A** Paschate usque ad festum sanctæ Crucis, reficiuntur bis Sorores, exceptis diebus Rogationum, & sextis feriis, & vigiliâ Pentecostes, & jejuniis Quatuor Temporum, vigiliâ sancti Joannis Baptistæ, Petri, & Pauli, Jacobi, & Beati Dominici Patris Nostri, Laurentii, Assumptionis Beatæ Mariæ, & Bartholomæi, ac Nativitatis Beatæ Virginis. A festo autem sanctæ Crucis usque ad Pascha continuum teneant jejunium, & Nona dicta comedant: exceptis diebus Dominicis (nisi dispensatio fiat interdictum, & ex causa.) In toto autem Adventu, & Quadragesima, & jejuniis Quatuor temporum, & in vigilia Ascensionis, & Pentecostes, sancti Joannis Baptistæ, Petri, & Pauli, Jacobi, & Beati Dominici Patris nostri, in vigilia sancti Laurentii, Assumptionis Beatæ Mariæ, Bartholomæi, & Nativitatis Beatæ Virginis, Matthæi, Simonis & Judæ, & Omnium Sanctorum, Andreæ Apostoli, & omnibus sextis feriis, Quadragesimali utantur cibo: nisi in locis in quibus in dictis sextis feriis aliter comederetur, vel nisi præcipuum festum fuerit, vel nisi cum aliqua ex causa dispensetur. Quando autem festum habens vigiliam, in qua secundum Ordinem jejunandum est evenerit in secunda feria; ejus vigilia præcedenti sabbato jejunetur, contraria consuetudine non obstante. Feria II. & III. post Quinquagesimam, Quadragesimali utantur cibo, & jejunent. In Parasceve verò per totum diem in pane, & aqua abstinebunt.

### CAPUT V.

#### *De Cibo.*

**H**ora competenti ante prandium, vel cœnam, à Sacristissa paucis ictibus campana pulsetur, ut Sorores venire ad refectionem non tardent. Postmodum pul-



setur cimbalum si cibus sit paratus, aliò-quin non pulsetur donec paratus sit. Congregatis Sororibus in atrium Refectorii, illa quæ præest, incipiat Psal. *De profundis* illa dicente unum versum, aliis verò omnibus respondentibus, & dicentibus aliam Versum; in fine tandem subjungatur Oratio *Absolve*. Ablutis verò manibus nolum Refectorii quæ præest pulset, & tunc Sorores ingrediantur; quibus ingressis dicat *Benedicite* quæ dicit versiculos: & Conventus prosequatur benedictionem. Servitricibus autem in deportandis pictantiis incipiant ab inferioribus usque ad mensam Priorissæ ascendentes. Nulla Soror à prima mensa remaneat nisi servitricibus, & nisi de licentia, & ex causa. Quotquot autem remanserint comedant in secunda, ita quod tertiam facere non oporteat. Nulla fiat pictantia servitricibus, vel ministris, quæ non sit Conventui: nisi sint infirmæ vel minutæ. Soror non mittat Sorori pictantiam, excepta Priorissa; sed sibi datam dare potest à dextris, vel à sinistris tantum. Priorissa comedat in Refectorio, & cibariis conventus sit contenta: similiter, & Infirmaria, & aliæ quæ ministrant in officio quocumque, nisi cum aliquibus Priorissa dispensaverit ob aliquam causam. Pulmenta sint in Conventu sine carnibus, præterquam in infirmariis. Singulis diebus si fieri potest & expedierit, duo cocta pulmenta habeant Sorores. Poterit autem Priorissa superaddere prout opus esse judicaverit, & facultas permiserit. Si quæ juxta se sedenti viderit aliquid deesse de communi, requirat à ministra. Si quæ aliquam de Sororibus serviendo, vel comedendo in aliquo offenderit, surgentibus Sororibus veniam petat; & facto signo ab ea quæ præest, redeat ad locum suum.

## CAPUT VI.

*De Collatione.*

**T**Empore jejunii hora competenti Sacristissa ad collationem signum faciat: postea Refectoraria cimbalum pulset. Deinde Sororibus venientibus in Refectorium, ad signum illius quæ præest, legat lectrix præmisso *Jube Domne benedicere*, & sequatur benedictio: *Noctem quietam &c.* facto rursus signo ab ea quæ præest, & dicto *Benedicite* à lectrice, datâque benedictione ab hebdomadaria, *Largitor omnium &c.* infra lectionem poterunt bibere quæ voluerint. Finita lectione dicat quæ præest, *Adjutorium &c.* Et tunc cum silentio intrent Sorores Ecclesiam. Quæcumque extra horam bibere voluerit, licentiam petat, & unam sociam accipiat.

*God. Regul. Tom. IV.*

Cum tamen intrare Ecclesiam facta Collatione non sit amplius in usu, satius est ut Sorores servant illam consuetudinem quoad hæc, quæ pro nunc in Monasteriis observari solet.

## CAPUT VII.

*De Infirmis.*

**C**irca Infirmas caveat ne sit negligens Priorissa: sic enim procurandæ sunt Infirmæ, ut citius releventur, sicut dicit in Regula Beatus Augustinus. Poterunt autem quædam vesci carnibus, prout earum gravior exigit infirmitas vel debilitas; secundum quod Priorissæ visum fuerit. Si quæ verò talem infirmitatem habuerit, quæ nec eam debilitet multum, nec comedendi turbet appetitum; talis nec supra culcitram jaceat, nec consuetudinaria frangat jejunia, nec cibos Refectorii mutet. In domo non sint nisi duo loca, in quibus comedant debiles & infirmæ, unus carniæ, & alius aliorum ciborum: nisi sit evidens necessitas vel urgens infirmitas. Si autem Priorissam infirmari contigerit, in infirmaria cum aliis procuretur.

## CAPUT VIII.

*De Minutione.*

**M**inutio quater in anno fiat. Prima in mense Septembri: secunda post Natale: tertia post Pascha: quarta circa festum Beati Joannis Baptistæ. Præter has minutiones nulla sibi minuat, nisi discretio Priorissæ propter aliquam causam (prævio Medici consilio, & exploratâ necessitatis veritate) judicaverit alicui aliter esse faciendum. Minutæ verò extra Refectorium comedant cum silentio: & secundum quod facultas permiserit commodius procurentur. Causâ verò minutionis non comedant carnes.

## CAPUT IX.

*De Lectis.*

**S**uper culcitra non dormiant Sorores, nisi in infirmaria: super stramina, & laneos saccones dormire licebit. Quæ autem culcitra petierint, jejunent una die in pane & aqua. Cum tunica, & velo, & capitegio, & cinctæ dormiant: & etiam cum caligis in regionibus in quibus mulieres portare caligas consueverunt. Nulla quæ in communi tolerari possit, habeat specialem locum ad jacendum; nisi fortè propter rerum custodiam, cum necessitas hoc requirat. In quo casu non minus quam tres jaceant in loco prædicto.

R 2

CAP. X.

## CAPUT X.

*De Vestitu.*

**V**Estes laneas honestas, & non notabiliter præciosas deferant Sorores: & in mantellis vilitas potius observetur. Lineis non utantur ad carnes. Pelliceum verò inter duas tunicas habere possunt, quod aliquantulum brevius sit tunicis. Linteamina autem non habeantur, nisi forte Priorissa in infirmaria cum aliqua propter gravem infirmitatem judicaverit dispensandum. Pelliceis, & coopertoriis silvestribus Sorores non utantur. Tunicae usque ad talos, scapularia verò sine quibus non vadant, sint tunicis breviora. Soccas, pepa, & capitegia, & vela habeant ut necesse fuerit, & facultas permiserit: chirothecas autem non habeant.

## CAPUT XI.

*De Communitate rerum.*

**O**Mnes Sorores singulis annis, vel pluries si eis dictum fuerit, omnia sibi commissa Priorissae suae exponant pariter & exhibeant; ejus dispositioni omnia relinquendo. Nulla etiam scyphum, vel vas aliquod, vel aliquid hujusmodi sibi appropriet. Item nulla habeat arcam vel aliquid quod cum clave firmetur, exceptis illis quæ propter officium suum non possunt non habere. Item nulla mittat vel recipiat sine licentia litteras, vel schedulam scriptam etiam sine sigillo, nec etiam scriptum aliquod in tabulis, vel in cera, nisi Magister Ordinis, vel Priori Provinciali, vel Vicario aut Priorissae ostendat: Priorissa etiam cum duabus Sororibus quas elegerit, cum sibi expedire videbitur, Sororibus absentibus scrutetur singulos lectos Sororum. Et si inveniant ibi aliquid quod Soror sine licentia Priorissae habeat, illud accipiat, & eam condignè puniat. Item sine licentia, & expressione personarum quibuscumque viris nihil dent, nec ab ipsis recipiant. Quæcumque autem contra fecerit, furti judicio condemnatur.

## CAPUT XII.

*De Communione, & lavatura capituli, & tonsura.*

**C**ommunio poterit fieri in anno quindécim vicibus, in terminis, in quibus visum fuerit Fratribus curam Sororum gerentibus: dummodo ad præparandum se possint habere copiam Confessorum. In Capitulo tamen Generali Barcinonen. Anno 1574. ordinatum est, ut Commu-

nio Generalis fiat qualibet Dominicâ Adventus, & Quadragesimæ: aliis autem temporibus de quindena in quindenam fieri poterit. Septem vicibus in anno poterunt lavari capita, & tonderi capilli Sororum. Sit autem tonsura non modica, ut decet religiosas personas.

## CAPUT XIII.

*De Silentio.*

**S**ilentium teneant Sorores in Oratorio, in Claustro, in Dormitorio, in Refectorio. Alibi verò loqui poterunt de licentia speciali, prout, & quando fuerit eis concessum. Si quæ tamen submissè aliquid, & breviter de necessariis protulerit, non teneatur de silentii fractione. Omnes autem Sorores ubique in Mensa silentium teneant, tam Priorissa, quam alia: exceptâ unâ quæ major fuerit inter eas, vel alia cui pro se loqui commiserit, & tunc taceat. Nulla autem aliarum ibidem loquatur, nisi de necessariis mensæ, & hoc per unicam orationem, vel dictionem breviter, & submissè. Si vero hoc silentium fregerit ex proposito, vel licentiam loquendi dederit, in uno prandio aquam tantum bibat, & unam disciplinam in Capitulo accipiat coram omnibus sine dispensatione, exceptis infirmis decumbentibus. Caveat autem Priorissa, ne sit facilis ad dandas licentias loquendi sine causa rationabili. Quatuor de Sororibus magis Religiosis, & discretis assignentur, sine quarum una vel duabus, vel Priorissa, vel Suppriorissa nulla licentietur ire ad fenestram locutorii secularium. Nec aliquid loquatur ibi Soror nisi in auditu Sociæ, vel Sociarum. Ista autem Sociæ, vel Sociæ debent accusare eam cum qua mittuntur, si verbo, vel gestu, vel aliter in aliquo notaverint reprehensibilem. Priorissa autem, & Suppriorissa cum aliquibus in prædicto locutorio non loquantur, nisi in præsentia alicujus quatuor prædictarum, vel alicujus antiquarum Sororum. Nulli detur licentia loquendi in locutorio secularium cum extraneis, aut intrandi locutorium illud; quamdiu horæ, vel Missa dicuntur, vel quando Conventus dormit, vel comedit nisi ex causa valde necessaria. Ad fenestras confessionum nulla loquatur de aliis quam de confessione scienter, & ex proposito, nisi fortè de pertinentibus ad officium Ecclesiæ cum exterioribus, & hoc de licentia, & submissè. Nulla confiteatur alicui seculari, vel alicui cujuscumque alterius Religionis etiam Fratri, nisi de licentia Magistri Ordinis, vel Prioris Provincialis; vel illius cui super hoc secundum certam formam aliquis ho-

rum

rum commiserit potestatem. Item ad rotam nulla loquatur, nisi alia; vel illæ, quæ propter aliquod officium sunt ipsi rotæ deputatæ: & illæ etiam non loquantur ibi, nisi de pertinentibus ad officium prædictum. Pro prima fractione silentii ex deliberatione commissæ extra mensam, dicat Soror Psalmum *Miserere mei Deus*: & pro secunda recipiat in Capitulo disciplinam coram omnibus, pro tertia sedeat semel in terra, & hoc in prandio non in cœna: computatio tamen ista, inter duo capitula fiat. Priorissa tamen potest dare aliquas licentias generales loquendi Cellariæ, coquinariis, sive aliis officialibus, prout ratione officiorum visum fuerit expedire.

## CAPUT XIV.

*De Recipiendis.*

**N**ulla notabiliter juvenis recipiatur in Sororem. Non recipiatur etiam aliqua, nisi cum diligenti examinatione facta seorsim de moribus, & vita, & viribus corporalibus, & industria animi: & utrum sit conjugata, & non per Ecclesiam separata à viro. Examinetur etiam diligentius utrum sit gravida: & si non possit de hoc certitudo haberi expectandum est donec certitudo habeatur. Item inquiratur utrum sit serva, vel ratiociniis obligata, vel alterius professionis, vel occultam habeat infirmitatem, vel alia impedimenta propter quæ non expediat eam recipi. Hæc autem examinatio à Priorissa, & à duabus Sororibus discretis de consensu Capituli ad hoc electis, fieri debet. Cum autem recipienda adducta fuerit in Capitulum, prosternat se in medio. Interrogata verò ab ea quæ præest? *Quid querat*: respondeat: *Misericordiam Dei, & vestram*. Qua ad iussum illius quæ præest erecta, exponat ei austeritatem Ordinis, propositum ejus requirens, Quod si respondeat se proponere cuncta servare, dicat post cætera: *Dominus qui incepit ipse perficiat*, & Conventus respondeat, *Amen*: Tunc depositis secularibus vestibus, & Religiosis indutis, in societatem Sororum in Capitulo recipiatur. Verumtamen antequam stabilitatem, & communem vitam promittat, & obedientiam, ac professionem faciat; tempus probationis assignetur. Probationis verò tempus statuimus unius anni, vel eo amplius; prout illi qui præest, de prudentum consilio videbitur expedire: ut & ipsa austeritates Ordinis, & Sorores mores ipsius experiantur. Magister Ordinis, vel Prior Provincialis, pensatis facultatibus domus, quæ pro tempore fuerint, aliquem certum numerum Sororum sta-

tuat: ultrà quem non recipiatur aliqua in Sororem, nisi talis esset persona, quæ sine gravi damno, vel scandalo recusari non posset. Et tunc non nisi de consilio Magistri Ordinis, vel Prioris Provincialis recipiatur. Nulla etiam fiat promissio de Sorore aliqua recipienda, antequam locus vacaverit. Licebit quoque aliquas recipere intus in Sorores Conversas, ubi hoc expediens videbitur: in numero tamen moderato, prout earum officiis, & adjutoriis aliæ Sorores indigebunt. Hæc autem dicant in professis diebus pro Matutinis 28. *Pater noster*, in Festis autem Novem Lectionum 40. pro Vesperis 14. pro qualibet aliarum horarum septem. Loco *Pretiosa*, tria: pro benedictione mensæ unum: post mensam pro gratiis, tria. In jejuniis, & vigiliis, & aliis quæ earum statui competunt, se aliis conformabunt.

## CAPUT XV.

*De Novitiabus, & earum instructione.*

**P**riorissa Novitiabus Magistram diligentem in ipsarum instructione præponat, quæ eas de Ordine doceat: in Ecclesia, & ubicumque negligenter se habuerint, verbo, signo, quantum poterit studeat emendare; necessaria prout potest debet eis procurare. De apertis negligentibus cum ante eam petierint veniam, pœnitentiam dare, vel eas in Capitulo proclamare. Humilitatem cordis, & corporis doceat eas habere, frequenter, purè, & discretè confiteri, sine proprio vivere, propriam voluntatem deferere: pro voluntate majorum, obedientiam in omnibus voluntariè observare. Quomodo ubique, & in omnibus se habere debeant, ipsas debet instruere; quòd locum ubi fuerint positæ ubique teneant. Qualiter se ad cameras contineant, ut oculos sublimes non habeant. Quomodo, vel quid orent, & quam silenter, ut aliis rugitum non faciant. Quomodo in Capitulo, vel ubicumque reprehensæ fuerint ab ea quæ præest, venia sit facienda: & quod si quæ Sororem suam aliquo modo scandalizaverit, ad pedes ejus prostrata veniam petat. Instruendæ etiam sunt Novitiæ, ut cum nemine contendere præsumant, & quod in omnibus Magistræ suæ obediant. In processione Sociam sibi collateralem attendant; nec loquantur locis, & temporibus interdictis, nec aliàs sine licentia: & quòd neminem penitus judicent: sed si quæ ab aliqua fieri viderint; licet mala, bona suspicentur, vel bona intentione facta, sape enim humanum fallitur iudicium. Et quod non loquantur de absente nisi quæ bona sunt: quod disciplinas



frequenter fulcipiant, & cum duabus manibus bibant, & sedendo: quod libros, vestes, & res alias Monasterii custodiant diligenter. Et quod si quid petitum fuerit ab una earum quæ præest, & negaverit, non petatur ab alia; nisi negatione priore exposita: sed nec si à majore petierint, & negaverit: vadant ad majorem. Item confessiones Novitiarum ante professionem recipiantur, & diligenter de modo confessionis, & in aliis instruantur, & omnia alia ad pedes Priorissæ ponant. Item Novitiæ, & aliæ Sorores quæ aptæ sunt, in Psalmodia, & officio divino studeant diligenter: præter Conversas, quibus sufficiat ut sciant vel addiscant ea, quæ debent pro horis dicere. Omnes verò in aliquo labore addiscendo, vel exercendo occupentur. Item Novitiæ non intersint Capitulo de culpis, sed in principio se acculent: vel Magistra earum, extra Capitulum culpas earum audiat, & ipsas quantum poterit diligenter in moribus instruat, & charitative corripiat.

## CAPUT XVI.

*De modo faciendi professionem.*

**M**odus faciendi professionem talis est. Ego Soror N. facio professionem, & promitto obedientiam Deo, & Beatæ Mariæ, & Beato Dominico, & tibi Sorori N. Priorissæ talis Conventus; vice Fratris N. Magistri Ordinis Fratrum Prædicatorum, & Successorum ejus: secundum Regulam Beati Augustini, & institutiones Sororum quarum cura prædicto Ordini est commissa: quòd ero tibi obediens, aliisque Priorissis meis usque ad mortem. Novitiarum autem vestes in earum Professione benedicantur hoc modo. *℟. Ostende nobis Domine misericordiam tuam. ℞. Et salutare tuum da nobis. ℟. Domine exaudi orationem meam. ℞. Et clamor meus ad te veniat. Oremus. Domine JEsu Ghriste, qui tegimen nostræ mortalitatis induere dignatus es: obsecramus immensæ largitatis tue abundantiam; ut hoc genus vestimentorum, quod sancti Patres ad innocentie, & immortalitatis indicium ferre sanxerunt, ita benedicere digneris; ut quæ hoc usa fuerit, te induere mereatur. Per Christum Dominum nostrum. ℞. Amen.* Postmodum aspergantur aqua benedicta. Ad professionem nulla recipiatur infra 16. annos completos, juxta Concilium Tridentinum sess. 2. de Regular. Cap. 12. Nolumus etiam quòd aliquæ Sorores benedicantur, cum Beatus Pater Dominicus hoc ordinasse dicatur, circa illas quæ fuerunt tempore suo. Et hujusmodi benedictio soleat esse aliquibus occasio, ut super alias se extollant.

## CAPUT XVII.

*De levi Culpa.*

**L**evis culpa est, si quæ mox ut signum factum fuerit, non relictis omnibus cum matura festinatione se præparaverit; ut ad locum pro quo fit signum veniat tempestivè. Si quæ designatum sibi legendi, vel cantandi officium, non attente compleverit; vel Responsorium, vel Antiphonam, vel aliud inceptura Chorum turbaverit. Si quæ malè legendo, vel cantando offendens, non statim secoram omnibus humiliaverit. Si liber in quo legendum est in collatione, vel in Capitulo, vel in Ecclesia, cujusquam negligentia defuerit. Similis culpa est, si quæ ad mensam, vel collationem, vel sermonem, vel Capitulum, vel ad Horas in Ecclesia, vel ad laboratorium commune citò non venerit; vel ad lectionem mensæ notata ad benedictionem se tardè obtulerit. Si quæ in dormitorio, vel alibi in Conventu aliquem tumultum fecerit, vel orantes, vel legentes, vel laborantes in aliquo inquietaverit. Si pannus ad involvendum Calicem, vel Patenam, vel Corporale, vel Stola, vel Manipulus, vel similia, per negligentiam cujusquam in terram ceciderit: vel si vestes suas suo tempore, & loco statuto, honestè, & ordinatè aliqua non reposuerit. Item levis culpa est si quæ cereum, vel aliquod utensilium perdidit, vel fregerit, vel aliquod vestimentorum suorum deterioraverit, vel amiserit. Si quæ in officio, vel sermone, vel laboratorio dormitaverit, vel oculos vagos habens per claustrum, vel domum ad vanitates sæpè direxerit. Si quæ verbis otiosis vacaverit, vel dissolutè riserit, vel alias ad ridendum concitaverit: vel in aliquo gestu, vel motu, vel statu, vel habitu, vel verbo reprehensibilis apparuerit. Pro his unus Psalmus, vel plures secundum quantitatem excessuum, prout videbitur Capitulum tenenti injungatur.

## CAPUT XVIII.

*De media Culpa.*

**M**edia culpa est, si quæ ad Gloria primi Psalmi non adfuerit, & in medio Chori non satisfecerit, vel in vigilia Annunciationis, vel Nativitatis Domini in principio Capituli non adfuerit: ut pronuntiatis exordiis nostræ salutis, & redemptionis gratias agat corde, & corpore Redemptori nostro. Similis culpa est, si quæ in Choro non intenta divino Officio, vagis oculis, & motu irreligioso levitatem mentis ostenderit. Si quæ lectionem tempore statuto non prædixerit: vel aliud lege-

legere, vel cantare præsumperit, quam quod ordinatum est. Si quæ in Choro riserit, vel alias ridere fecerit; vel in Conventu dissolutionem aliquam fecerit. Item media culpa est, si quæ à Capitulo, vel sermone, vel collatione, vel refectiōe communi, vel laboratorio, vel hora aliqua ex causa minùs rationabili remanserit. Si quæ commune mandatum dimiserit. Si quid cibi, potus, absque benedictione aliqua sumperit. Similis culpa est, si quæ eam à qua proclamata est eadem die quasi vindicando se proclamaverit, vel clamans in proclamatione sua jurgium fecerit. Si quæ (ut loquendo fieri solet) cum juramento aliquid affirmaverit, vel negaverit: vel vaniloquium dixerit. Si quæ Sororem proprio nomine, omisso hoc nomine (Soror) vocare in usu habuerit. Pro hujusmodi culpis Psalmi, disciplinæ, & veniæ secundum discretionem tenentis Capitulum imponantur, quantitate culparum pensata.

## CAPUT XIX.

*De gravi Culpa.*

**G**Ravis culpa est, si quæ cum aliqua lites habuerit, vel inhonestè contenderit. Si quæ aliqui opprobrium dixerit, vel culpam pro qua satistecit improperaverit. Si quæ in proclamatione jurgium fecerit, vel in illam à qua proclamata est, vel quamlibet aliam maledicta, seu verba inordinata, vel injuriosa malitiosè invexerit. Similis culpa est, si quæ discordias inter Sorores feminaverit: vel detraxerit, seu suffragatrix inventa fuerit. Si quæ mala de Sororibus, vel domo malitiosè evomuerit: vel culpam suam, aut alterius protervè defenderit. Si quæ mendacium scienter dixerit: si quæ pro victu, vel vestitu, vel qualibet alia re murmuraverit. Si quæ silentium non tenere, in consuetudinem duxerit. Item gravis culpa est, si quæ carnes absque licentia, & necessitate comederit: vel jejunia statuta fregerit. Si quæ in alquem oculum fixerit, vel turpem sermonem protulerit. Si quæ res aliquas alii deputatas, quamvis non animo retinendi, sine licentia acceperit: vel à Capitulo, vel sermone, vel communi dormitione sine causa aliqua, & licentia remanserit. Pro hujusmodi culpis, & similibus injungantur tres dies in pane, & aqua, & tres disciplinæ, vel plures in Capitulo coram omnibus recipiendæ: & Psalmi, & veniæ prout secundum excessus majores, vel minores videbitur esse justum.

## CAPUT XX.

*De graviore Culpa.*

**G**Ravior culpa est, si quæ per contumaciam, vel manifestam rebellionem

suis majoribus inobediens extiterit: vel cum eis proterve contendere ausa fuerit. Si quæ aliam malitiosè percusserit. Si quæ res aliquas aliis concessas, vel de communi (animo celandi) acceperit, vel proprium habuerit. Similis culpa est, si quæ munuscula, vel alias res sine licentia dederit, vel receperit, vel receptas celaverit. Si quæ litte as, vel aliqua in scripto aliquo sine licentia miserit, vel receperit, vel legerit: vel sibi legi fecerit. Si quæ aliquid inhonestum domus, Sororum, vel secretum aliquod extraneo cuiquam revelaverit: vel aliquod quodcumque crimen capitale commiserit. Pro hujusmodi culpis quæ rea fuerit, veniam petens, sceleris sui immanitatem lamentabiliter proferat: & denudata usque ad cingulum vapulet ad pedes singularum, primo Priorissæ, deinde utriusque lateris sedentium, & sit omnium novissima in Conventu. In Refectorio quoque ad communem mensam non comedat cum aliis, sed in medio Refectorii super nudam terram: & provideatur ei grossior panis, & aqua, nisi quæ præest ei per misericordiam aliquid impendat, nec reliquæ prandii sui cum aliis misceantur. Ad Canonicas Horas, & ad gratias post comestionem, ante ostium Ecclesiæ transeuntibus Sororibus prostrata jaceat; dum intrant, & exeunt. Nulla verò audeat se conjungere ei, vel aliquid mandare. Talis quamdiu erit in hac pœnitentia, non communicet, non veniat ad osculum pacis, nec notetur ad aliquod officium in Ecclesia: nec ulla ei committatur obedientia. Priorissa verò ne in desperationem labi possit, mittat ad eam quæ est in tali pœnitentia Sorores: quæ illam moneant ad pœnitentiam, provocent ad patientiam, foveant per compassionem, hortentur ad satisfactionem, adjuvent per suam intercessionem. Quibus & suffragetur totus Conventus, si apparuerit in ea debita humilitas: nec renuat quæ præest cum ea facere misericordiam; & si videbitur ei, denudò vapulet modo supradicto. Eodem modo debet pœnitere, si quæ (quod absit) in peccatum carnis lapsa fuerit: quod gravius cæteris puniri censemus, & plusquam alia abominamur. Poterit autem ei quæ talis fuerit velum nigrum auferri, quamdiu fuerit in hac pœnitentia. Si verò hujusmodi peccatum occultum fuerit, disquisitione secreta secundum tempus, & personam, condignam agat pœnitentiam. Si verò aliquæ per conspirationem vel conjurationem, vel maliciosam concordiam adversus Priorissam, vel Superiores suos manifestè se erexerint, supradicto modo pœniteant: & de cætero in tota vita sua extremum locum sui Ordinis teneant; & vocem in Capitulo nisi in suis

accu-

accusatione non habeant, neque eis aliqua obedientia injungatur. Si quæ tamen non malitiose, sed in veritate adversus Priorissam aliquid habuerit quod tolerari non debeat nec deceat: prius inter se cum omni humilitate, & charitate, de sua correctione eam admoneat. Quod si frequenter admonita corrigere se neglexerit, aut contempserit: Priori Provinciali, vel ejus Vicario significetur.

## CAPUT XXI.

*De gravissima Culpa.*

**G**ravissima culpa est incorrigibilitas illius, quæ nec culpas timet admittere, & pœnam recusat ferre. Si quæ igitur talis inventa fuerit, exuta Habitu Sororum, & earum societate privata, recludatur in loco separato, ac segregato ab aliis: & utatur cibis qui pro graviore culpa superius sunt expressi. Ad correctionem autem talium, habeantur aliqua loca apta: in quibus non solum prædictæ incorrigibiles; sed etiam contagiosæ, & suspectæ probabiliter, de nocumento inferendo in personis, vel rebus, vel de fuga, poterunt recludi. Pro culpis vero aliquibus minoribus istis, poterit interdum injungi aliquibus, ut in eisdem locis morentur ad tempus sequestratæ: secundum quod videbitur expedire.

## CAPUT XXII.

*De Apostatis.*

**S**i quæ in apostasia, vel fuga deprehensa, invita deducta fuerit: pœnam quæ supra determinata est pro incorrigibili, sustinebit. Si quæ verò fugitiva voluntariè redierit petens misericordiam, nullatenus recipiatur in perpetuum, maxime si de lapsu carnis commissio suspecta fuerit: nisi prius Magister Ordinis, vel Prior Provincialis super hoc consulatur; & nisi ab illis, quid in hoc casu faciendum sit plenè resolutum fuerit. Cum autem fuerit recipienda, denudata usque ad cingulum cum virgis in Capitulum veniat, & prostrata veniam petat: & pœnis omnibus supradictis de graviore culpa, vel lapsu carnis, vel conspiratione subjiciatur. Receptura tamen de misericordiis ibi taxatis plùs vel minus, citius vel tardius, secundum exigentiam excessus præcedentis, & signorum pœnitentiæ subsequenti.

## CAPUT XXIII.

*De Electione Priorissæ.*

**P**riorissa eligi debet à Sororibus illis, quæ jam annos duodecim à professione sua expleverunt, juxta ordinationes

Capitulorum Generalium, confirmatas à Gregorio XV. Summo Pontifice per Breve quod incipit: *Expone nobis &c. Datum Romæ apud S. Petrum die 6. Aprilis 1523.* & etiam juxta præscriptum Concilii Tridentini sess. 25. de Regular. Cap. 6. ubi dicitur: ut in Priorissam non eligatur quadragenaria minor, & nisi habuerit à Professione annos duodecim; quorum octo post Professionem expressam, laudabiliter transacti esse debent. Quod si in aliquo Monasterio non inveniatur persona tantæ ætatis: in tali casu, cum consensu Superioris eligatur aliqua alia ex Sororibus ejusdem Monasterii dummodo tamen habeat ætatis annos triginta completos, & à Professione annos 12. pariter completos: in qua annorum duodecim, demonstrari debent saltem quinque honeste, & religiosè exacti.

Porro Conventus qui confirmationem electæ Priorissæ petierit, scribat numerum, & simul nomina illarum Sororum, quæ in electione nominatæ fuerunt: & tunc Magister Ordinis, vel Prior Provincialis, vel quicumque alius, à prænominationis ad hoc specialiter deputatus, legitimè electam confirmabit. Sorores Electrices vacante officio Priorissæ, habent tempus præfixum unius mensis quo ad electionem accedere possunt: si verò infra illud spatium mensis unius electionem non fecerint; devolvitur omnis authoritas ad Magistrum Ordinis, vel Priorem Provinciale, providendi de Priorissa huic, vel illi Monasterio.

## CAPUT XXIV.

*De Modo eligendi Priorissam.*

**M**odus eligendi Canonicè Priorissas, juxta tenorem Constitutionis Bonifacii VIII. hic antiquitus servabatur: ut nimirum, vel per communem inspirationem, vel compromissionem Priorissa eligeretur: jam verò nunc inhærendo Decreto Sacri Concilii Tridentini, electio fieri debet in hac forma, quæ sequitur.

Postquam Suppriorissa cum consensu Vocalium diem faciendæ electionis determinaverit, omnes Sorores vocem in electione habentes Sacra Communionem refici debent: juxta ordinationem Capituli Generalis Romæ 1580. celebrati. Superior verò illarum, cum aliis duobus Patribus, qui & Scrutatorum munus subire debent, ad Crates Locutorii conveniant (absque eo tamen ut Monasterium ingredi audeant) ibique collocati juxta præscriptum Concilii Tridentini & declarationem Sacræ Congregationis Concilii, recipient uniuscujusque Sororum Electricum vota, ab ipsis per involutas sche-



schedulas porrecta, & in aliquo vase seu urna ad hoc præparata recepta: in quibus schedulis exprimi debet nomen Priorissæ quæ eligitur, his verbis præcise: Ego Soror N. eligo talem N. in Priorissam hujus Monasterii: nec ultra hoc apponi debet nomen, vel signum aliquod, per quod possit deveniri in cognitionem eligentis. In reponendis vero hujusmodi schedulis Vocalium, prima debet esse Suppriorissa, & sic deinceps aliæ Sorores consequenter, secundum ordinem professionis illarum. Quod si aliqua ex Vocalibus infirma fuerit, ac proinde ad locum electionis venire nequiverit: tenebitur Suppriorissa cum duabus aliis Sororibus antiquioribus, Cameram decumbentis accedere; ab eaque schedulam involutam (uti supra dictum est) recipere: quæ una cum aliis schedulis Sororum Electricum commisceri, atque per manus Scrutatorum in urna eadem reponi debebit.

Postquam verò omnium Electricum vota in toto fuerint recepta, PP. Scrutatores schedulas illas involutas in mensam effundere, numerare, atque cum numero Vocalium conferre tenebuntur. Quod si numerus earum non fuerit æqualis numero eligentium, statim omnes comburantur, absque eo quod legantur, vel explicentur: adque faciendam denuo electionem procedatur. Idem fieri debet, si nulla ex illis quæ in electione nominatur, habuerit duo vota ultra medietatē: rursus enim nova electio instituenda erit. Vbi vero inventum fuerit, electam quamcumque habere duo vota saltem ultrā medietatem: ille, qui inter Scrutatores major fuerit, scrutinium publicabit; factoque Decreto scrutinium Electionis ad Confirmatorem transmittetur.

## CAPUT XXV.

*De Institutione Suppriorissæ.*

Priorissa de consilio discretarum Sororum, & Prioris Provincialis, vel Vicarii ejus instituat Suppriorissam. Cujus officium erit, habere diligentiam, & curam circa Conventum, & in aliis quantum Priorissa assignaverit ei, vel permiserit. In quotidianis verò Capitulis non proclametur, nisi aliquando pro magno excessu: secundum quod Priorissæ visum fuerit. Eadem autem Suppriorissa, mortuā Priorissā vel amotā, vices ejus plenariē obtineat: quousque Priorissa fuerit electa, & confirmata: & nisi Magister Ordinis, vel Prior Provincialis, vel ejus Vicarius aliter ordinauerit.

*Cod. Regul. Tom. IV.*

## CAPUT XXVI.

*De Cicatricibus.*

Priorissa duas Sorores discretas assignet & ordinet Ordinis zelatrices, quæ sint sollicitæ, & intentæ, circa gestus, & facta Sororum. Post Completorium, & de die etiam interdum, claustrum, & alias officinas circumeant: & si quam minùs religiosè in aliquo se habentem invenerint; eam debebunt in Capitulo proclamare. Visitatorem quoque tempore visitationis, de statu Religionis quomodo servetur, vel non servetur, plene informare tenebuntur.

## CAPUT XXVII.

*De Cellaria.*

Cellariam Sorores habeant unam de majoribus, & discretioribus Domus: quæ per se, & Socias sibi assignatas, ex consilio Priorissæ, & Suppriorissæ, fideliter & devotè bona temporalia procuret: quæ pecunias, pannos, frumentum, vinum, vel aliquid hujusmodi sine licentia generali, vel speciali dare non præsumat. Cellaria coram Priorissa, & Suppriorissa, & tribus de maturioribus Sororibus ad hoc assignatis à Conventu, computationem faciat quolibet mense receptorum, & expensarum. Semel autem in anno, vel amplius si visum fuerit, coram Priori Provinciali, vel ejus Vicario computatio fiat: & status Domus exponatur. Possessiones sine consensu Conventus alienari, vel minui non possunt, sed observanda sunt in hoc passu Decreta Summorum Pontificum; tum & Decretum Sacræ Congregationis Concilii, factum cum consensu Urbani Octavi Summi Pontificis, sub die 7. Septembris 1624.

## CAPUT XXVIII.

*De Labore.*

Quia otiositas inimica est animæ, & mater, ac nutrix vitiorum, nulla Sororum sit otiosa: sed diligenter observetur, ut exceptis illis horis, & temporibus, quibus orationi, vel officio, vel aliæ occupationi necessariæ debent intendere, operibus manuum ad utilitatem communem omnes attentè insistant prout fuerit ordinatum. Cum Sororibus autem quamdiu sunt in labore, Priorissa, vel Suppriorissa, vel aliqua alia ad hoc à Priorissa assignata sit præsens. Laborant autem cum silentio: nec ulla recedat à communi laboratorio, sine licentia, & necessitate. Quæ autem sic exierit, expleta necessitate redeat.

## CAPUT XXIX.

*De Ædificiis.*

Ædificia Sororum sint humilia, curioſitate, vel ſuperfluitate non notanda: & apponatur cura diligens, ut ordinentur officinæ, prout melius fieri poterit pro Religione ſervanda. Ante omnia detur opera, quod clauſura ſit valde alta, & fortis: ita ut egrediendi, vel ingrediendi per clauſuram, oportunitas nulla detur. Non ſit autem in clauſura Sororum, niſi unum oſtium forte, & bonum, quod cum duabus clavis, vel pluribus, quantitate, & forma differentibus claudatur; cum una interius, & cum alia exterius. Interior autem cuſtodiat exterior vel intus, ſecundum diſpoſitionem Prioris Provincialis, vel Vicarii ejus: exterior verò intus ſecundum diſpoſitionem Prioriſſæ, & Monafterii. Aptetur autem in aliquo loco convenienti ipſius clauſuræ, in muro inſeparabiliter ipſi adhærenti, aliquod inſtrumentum rotundum, quod Rotam vocamus: per quod ita poſſint res neceſſariæ dari, & accipi; quod dantes & accipientes nullatenus poſſint ſe videre. In Eccleſia vero in aliquo loco intermedio inter Sorores, & exteriores, aptetur aliqua fenestra ferrata competentis magnitudinis, in qua fient ſermones. Similiter fiant in aliquo loco apto duæ fenestræ parvulæ ferratæ, ad confeſſiones audiendas. Poterit etiam haberi aliquod locutorium ad loquendum cum extraneis in aliquo loco convenienti, ubi aptetur fenestra ferrata ſimili modo, ſicut dictum eſt de fenestra majori in Eccleſia. Vel in ipſa Eccleſia ad prædictam fenestram majorem, fieri poterunt locutiones cum extraneis, ubi hujusmodi locutorium non habetur. Porro omnes ſupradictæ fenestræ, vel fenestrellæ ferratæ, ſic diſponi debent, vel per duplicationem ferraturæ, vel per acutos clavos; quod inter exteriores, & interiores, nullus poſſit intervenire contactus. Item omnes fenestræ, vel fenestrellæ, & etiam rotæ, debent interius habere oſtia lignea bona, cum clavis diligenter firmanda. Præter prædictas fenestras nulla alia habeatur: niſi fortè cauſa loquendi; una alia ſimilis fenestrellæ confeſſionum, in loco competentis, de licentia Magiſtri Ordinis, vel Prioris Provincialis concedatur.

## CAPUT XXX.

*De ingreſſu, & egreſſu Domorum.*

Circa ingreſſum, & egreſſum Domorum Sororum, ſummam adhibere

volentes cautelam: interdiciamus ſub pœna anathematis, ne unquam aliqua Sororum egrediatur clauſuram, niſi propter periculum ignis, vel ruinæ, vel latrocinium, vel malefactorum, aut ſimilium eventuum, qui ſolent vergere in periculum mortis: niſi forte de licentia Magiſtri Ordinis, ex cauſa aliqua transferri contigerit aliquam ad aliam Domum faciendam, vel factam. Jam vero B. Pius V. per Breve quod incipit: *Decori, & honeſtati.* Datum Romæ apud S. Petrum die prima Februarii Anno 1570. in tribus tantummodo caſibus permittit egreſſum Sororibus ex Monafterio. Nimirum propter vehemens incendium ſi fortè exoritur: ſecundo propter lepram, ſi aliquæ ex Sororibus ea afficerentur: ac tertio demum propter morbum contagioſum epidemiæ. Prius tamen hæ infirmitates à viris peritis probe agnoſci, ac teſtimonio in ſcriptis dato ab iſdem confirmari debent, antequam egreſſus extra clauſuram concedatur. Et per hanc Conſtitutionem præallegatam, abrogantur omnes anteriores conceſſiones, factæ à Summis Pontificibus Benedicto XII. Urbano IV. Julio II. tum ab ipſo Concil. Trident. juxta declarationem Sac. Congreg. Episcoporum, & Regularium, factam die 22. Septembris 1617.

Similiter Gregorius XIII. per Breve quod incipit: *Ubi gratia, & indulgentia.* Datum Romæ apud Sanctum Petrum die 13. Junii 1575. revocat, & annihilat omnes licentias datas antehac ad ingrediendum Monasteria Monialium Comitiffis, Marchioniffis, & Principiffis, aliisque omnibus viris & fœminis; ipſisque prohibet ſub pœna Excommunicationis, ne prætextu hujusmodi conceſſionum, ac licentiarum, Monasteria ingredi præſumant.

Licetum nihilominus eſt Magiſtro Ordinis, vel Priori Provinciali ſub tempus Viſitationis ingredi Monasteria Sororum, una vice dumtaxat in anno: ita tamen ut ſi unus ex illis Monasterium viſitando ingrediatur, alter eodem anno ingredi non poſſit; juxta tenorem Bullæ ab Alexandro VII. editæ, quæ incipit: *Fidei Sacrarum Virginum &c.* ubi hoc etiam cavetur: ut Magiſter Ordinis cum duobus Sociis, jam verò Provincialis; nonniſi cum uno Socio Monasteria ingrediantur. Et Gregorius XIII. in quadam Conſtitutione, quæ incipit: *Dubiis quæ emergunt.* Data Romæ apud S. Petrum die 23. Decembris 1581. Superioribus Regularium facultatem concedit ingrediendi Monasteria Monialium, in caſu ſcilicet neceſſitatis: ſi verò aliquis extra omnem neceſſitatem ingrediatur, pœnam Excommunicationis, ac privationem officii ſupra eundem decernit.

Quando

Quando autem aliquis prædictorum ingreditur, Priorissa cum tribus antiquioribus eum semper comitetur: aliæ verò non discurrant, sed sint in Capitulo, vel in Ecclesia, vel in alio loco honesto omnes: præter illas quæ necessariò occupantur in aliquibus officiis, donec regressus fuerit extra domum. Nulla loquatur cum aliquo ingredientium seorsim ab aliis: nisi forsitan occasionaliter cum aliquo prædictorum; qui possunt, & debent intrare, & hoc de licentia: exceptis Priorissa, & tribus Sororibus ad hoc deputatis. Priorissa, cum prædictis tribus Sororibus simul stent, & simul vadant binæ, & binæ. Loquatur autem cum illis, quos ex aliqua causa contigerit ingredi, de expedientibus breviter, & succinctè. Item si oporteat infra terminos Sororum aliqua opera fieri necessaria, poterunt intrare operarii aliqui de licentia Prioris Provincialis, vel Vicarii: & tunc Priorissa, & Suppriorissa, & Procuratrix, vel aliæ tres de Sororibus antiquioribus, & maturis, ad hoc deputatæ, operariis loqui poterunt; ita tamen quòd una ab aliis duabus audiatur, aliæ verò nullo modo loquantur eis, nec etiam ad eos accedant. Item si aliquam ita infirmari contigerit, quod ad locum consuetum Confessionis, ac Communionis venire non possit: si desideret confiteri, tenebitur Confessarius ad Cameram infirmæ venire, associatus à Priorissa, & duabus aliis Sororibus antiquioribus: & intereà dum infirma confitebitur, Socius Confessarii cum eo Monasterium ingressus, manebit penes Priorissam, & illas duas Sorores supradictas, in loco remotiori, dummodo tamen Confessarium infirmæ assistentem commodè videre possit juxta Bullam Alexandri VII. superius relatum. Si verò eam etiam communicare oportuerit, Sacerdos insuperpelliceo cum stola Corpus Christi deferens reverenter, præcedentibus eum duabus Sororibus cum cereis, & una cum aqua benedicta, & alia campanulam deferente: associantibus nihilominus aliquibus de maturioribus Sororibus, ad infirmariam vadat, & infirmam communicet; prout in Ordinario continetur. Si autem aliqua Soror infirmetur in tantum, quòd eam injungi oporteat: tunc Sacerdos indutus, ut supra de communionem dictum est, oleum sacre Unctionis deferat; & una Sorore Crucem portante, præcedentibus duabus cum cereis ad infirmariam vadat, & totus Conventus eum personaliter antecedit. Intrans autem Sacerdos infirmariam dicat: *Pax huic Domui*: & cætera fiant, sicut notatum est in Ordinario: ita tamen quòd abstersiones cum stupis, fiant vel à Priorissa,

*Cod. Regul. Tom. IV.*

vel ab aliqua Sorore cui injunxerit. Cavendum est autem ne de facili multiplicentur ingressus, modo causa Communionis, modo causa Unctionis, sine magna necessitate, sed simul fiat utrumque. Cum autem simul communicari, & injungi aliquam oportuerit: Soror aliqua Crucem portet, & Frater, ac Socius sacram deferant Unctionem, & primò fiat Communio, deindè Unctio, & in isto casu semper remaneant Conventus in infirmaria, usque ad completionem Officii. Porro ubi copia ministrorum supradictorum non habetur in promptu, vel propter aliquam necessitatem festinare oporteat; omissa Ministrorum assistentia, omnique alio apparatu ac solemnitate, fiant omnia eo modo, quo melius perfici poterunt.

### CAPUT XXXI.

#### *De Capitulo quotidiano.*

**F**initis Matutinis teneatur Capitulum, vel post Primam, vel post Tertiam, & Missam, si Missa post Primam dicatur: aliquando etiam poterit intermitteri, si Priorissæ videbitur. Ingresso Conventu Capitulum, Lectrix pronunciet lunam, & quæ de Calendario pronuncianda sunt: & Hebdomadaria prosequatur *Præiosa*, &c. Deinde Sororibus residentibus, Lectrix pronunciet Lektionem de Constitutionibus, vel de Evangelio pro tempore, præmissis *Jube Domne &c.* & Hebdomadaria subjungat benedictionem, *Regularibus disciplinis &c.* vel *Divinum auxilium &c.* pro tempore. Et facta absolutione pro defunctis, dicat quæ tenet Capitulum, *Benedicite*: & responso, *Dominus*, inclinent omnes. Deinde recitatis beneficiis, & recommendatis recommendandis orationibus omnium, ac dicto à Priorissa, *Retribuere dignare &c.* dictis etiam à Conventu Psalmis: *Ad te levavi*, & *De profundis &c.* *Kyrie eleison.* *Pater noster &c.* subsequenter etiam tribus Versiculis: *Oremus pro Domino Papa &c.* *Salvos fac servos tuos, & ancillas tuas. Requiescant in pace*, ab Hebdomadaria dicendis, cum his tribus Collectis: *Omnipotens sempiterne Deus, qui facis mirabilia &c.* *Præstende &c.* *Fidelium Deus &c.* sedeant Sorores. Tunc quæ præest poterit dicere breviter si quid ad honestatem, & correctionem Sororum viderit expedire. Post hæc dicat quæ præest: *Faciant venias suas, quæ se reas existimant.* Continuo quæ se reas intellexerint, prostratæ veniam petant. Deinde auditis primò Novitiabus (si in Capitulo fuerint audiendæ) & egressis, aliæ surgentes humiliter confiteantur culpas suas: & quarum culpa talis est, quæ digna sit correctione, præpara-



rent se ad correctionem, quam tenens Capitulum faciat, vel illa cui injunxerit. In Capitulo verò Sorores nisi duabus de causis non loquantur: scilicet culpam suam, vel aliarum dicendo simpliciter, & Prælati suis tantum ad interrogata respondendo. Unâ etiam stante, & loquente, nulla loquatur. Nulla faciat proclamationem, ex sola suspicione. Item nulla accuset de auditu, nisi personam à qua audierit, dicat. Similiter quælibet caveat ne malum quod audierit de alia, alteri conferat, nisi dicat à quo audierit. Auditis culpis dicatur Psalmus *Laudate Dominum omnes gentes &c.* cum *Ps.* *Ostende nobis Domine &c.* & *Domine exaudi &c.* & Collecta *Actiões nostras &c.* In fine dicat Priorissa: *Adjutorium nostrum &c.* & sic solvitur Capitulum. Cum non tenetur Capitulum de culpis, pronuncianda sunt ea quæ sunt de Calendario, & deinde *Pratiofa*, sive in Choro, sive in Capitulo modo supra-

dicto; exceptis recitationibus beneficiorum, & orationibus annexis.

## CAPUT XXXII.

*De concessione Domorum.*

**I**nhibemus sub pœna excommunicationis, ne aliqua scienter det operam directè, vel indirectè, quod aliqua Domus Sororum construatur, vel constructa Ordini Fratrum Prædicatorum committatur: nisi prius super hoc habeatur consensus Capituli Generalis. Eâdem distributione ordinamus, ne unquam in aliquo casu, Domus aliqua recipiatur sub curam ipsius Ordinis, nisi cum sufficienti provisione in bonis temporalibus pro necessitatibus Sororum. Nulli etiam libellus iste tradatur ad transcribendum, vel videntum, sine licentia Magistri ordinis, vel Prioris Provincialis.

*Hic finiuntur Constitutiones Sororum Ordinis Fratrum Prædicatorum.*

## INCIPIT TRACTATUS

*De initio & fundatione Regulæ, seu formæ vel modi vivendi, Fratrum & Sororum de Militia JESU Christi, de Pœnitentia Beati Dominici.*

**T**ractatum compilare intendo, super informatione, & approbatione Regulæ, seu formæ vel modi vivendi Fratrum, & Sororum de Militia JESU Christi, de pœnitentia Beati Dominici Fundatoris Ordinis Prædicatorum: per diversos Summos Pontifices approbatum, maximè per Papam Gregorium IX. Honorium IV. Joannem XXII. Bonifacium IX. Innocentium VII. & Eugenium IV. sicut habetur diffusè in legenda Beata Catharinæ de Senis cap. 8. quam composuit Reverendissimus Pater Frater Raymundus de Capua, Sacræ Theologiæ Professor, ac totius Ordinis Prædicatorum Magister Generalis 22. & Magister Thomas de Firmo ejusdem Ordinis Magister Generalis 24. transtulit in vulgari Regulam de Militia JESU Christi, de pœnitentia Beati Dominici. Item invenitur quidam liber in quo est Regula secundum quam vivebant tempore Militiæ actualis contra hæreticos, qui liber est in Conventu Ferrariensi, & Veneto Ordinis Prædicatorum, & est talis: *Patet universis fidelibus, qualiter ego Frater Thomas de Senis, una cum Reverendo Patre, & Magistro Fratris Bartholomæo de Senis, ambo de Ordine Prædicatorum, Anno Domini 1422. Venetiis existentes, & quantum valuimus diligentius inquirentes de Regula, sive statu Fratrum & Sororum de Militia JESU Christi, de pœnitentia Beati Dominici: invenimus quantum ad initium ejusdem Regulæ taliter se habere sicut patet in legenda Beata Catharinæ de Senis supradicta, capitulo 8. ubi sic dicitur: Cunctis volentibus legere notum facio: prout legi pariter, & audiui à fide dignis, in diversis Italiæ partibus, gesta quoque Beatissimi Patris Nostri Dominici testantur. Ipse gloriosus fidei Catholicæ pugil, ac Christi athleta Beatus Dominicus, sicut totus zelator boni status Ecclesiæ militantis; per se, ac per suos Fratres, tam in Tolosa, quam in Lombardia, hæreticos triumphaliter debellavit: ita ut sicut fuit tempore suæ Canonizationis coram Summo Pontifice Gregorio IX. probatum legitimè, centum milia hæreticorum, & ultra conversi fuerunt tantum in Lombardia, tam doctrina, quam miraculis ejus. Nam ita venenosa doctrina hæreticorum infecerat mentes hominum, quod ferè omnia jura Ecclesiarum erant per laicos occupata: qui ea possidebant quasi jure hæreditario. Ex quo cogebantur Pontifices mendicare, nec ullam habebant potentiam, per quam possent errori resistere: nec etiam Clericos, aut pauperes valebant secundum sui officii debitum nutriendo juvare. Unde in multis partibus*



## INCIPIT LIBER

*De Instructione Officialium Ordinis Fratrum Prædicatorum,*

A Reverendissimo P. Fr. HUMBERTO Magistro Generali ejusdem Ordinis, editus.

### PROLOGUS.

**R**eligiones approbatæ, sicut in Constitutionibus ferè omnium Religionum diligenter perlectis vidimus, distinxerunt antiquitus, officia tradentes in scriptis quid cuilibet competeret Officiali: ut dum hæc sciret quilibet, nullus alterius occuparet officium, nequè suum negligenter; & sic ordinatius, & completius fierent universa. Porro in Ordine nostro sunt Officialiales quidam, qui habent ordinariè curas pertinentes ad animas, differentes secundum plus, & minus: ut Magister Ordinis, Prior Provincialis, & Prior Conventualis. Alii sunt qui habent hujusmodi curam ex commissione: ut Supprior, Magister Novitiorum, Magister Converforum, & Corrector familiæ. Ex horum quatuor, primus habet universalem in Conventu, alii vero particularem circa determinatas personas. Alii sunt circa cultum Divinum, ut Cantor, Succentor, Sacrista: alii circa studium, ut Lector, Magister studentium, Librarius, Procurator librorum, & scriptorum. Alii sunt circa custodiam diversarum rerum, quæ indigent custodia: ut Examinatores recipiendorum, circa custodiam ingressus Circator, circa custodiam Religionis Zelator, Custos Dormitorii circa Dormitorium, & Portarius circa portam, Depositarius circa res depositas. Alii circa varias necessitates Fratrum: & horum quidam sunt generales, Procurator, Consilarii, Eleemosynarius; quidam particulares, & horum quidam sunt circa necessitates quotidianas, ut circa Conventum Refectorarius, servitor mensæ, lector in mensa, & corrector in mensa, quorum primi deserviunt necessitatibus corporalibus, alii duo spiritualibus. Et circa infirmos Infirmarius, & infirmorum Custos, & circa hospites, receptor hospitum: & his omnibus, scilicet Conventui, infirmis, & hospitibus deserviens, coquinarius, & custos cellarii. Alii circa indumenta, ut vestiarius, sartor, sutor: alii circa opera Domus, ut præfectus operum; alii circa culturam horti, ut hortulanus. Sunt igitur in universum, quadraginta septem genera officialium apud nos, scilicet: Magister Ordinis, Prior Provincialis, Prior Conventualis, Supprior, Magister Novitiorum, Magister Converforum, Corrector familiæ, Cantor, Succentor, Sacrista, Lector, Magister studentium, Librarius, Curam gerens de scriptis, Examinator, Circator, Custos Dormitorii, Portarius, Depositarius, Procurator, Eleemosynarius, Refectorarius; servitor mensæ, Lector in mensa: Corrector in mensa: Infirmarius, Custos infirmorum. Receptor hospitum, Coquinarius, Custos cellarii, Vestiarius, Sartor, Sutor, Præfectus operum, Hortulanus. Sunt insuper alii, quibus Ordo non indiget continuè, sed in casibus, & ad tempus, ut sunt Definitor Generalis Capituli, & Socius ejus; Elector Magistri Ordinis, Elector Prioris Provincialis, Definitor Capituli Provincialis, Visitator, Prædicator generalis, & Socius Prioris Conventualis ad Capitulum, & Confessor. Similiter præter hos sunt alii quorum officia patent ex Ordinario: ut Hebdomadarius, & Ministri Altaris, Lector Kalendarum, & alii qui in tabula scribi solent. Item cum sunt aliqui Fratres qui sciunt artes aliquas mechanicas, ut fuere, scribere, radere, dolare, & hujusmodi, debent hoc facere, prout eis injungitur: sed hæc non computantur inter officia. Item ubi paucitas est Fratrum, solent plura officia injungi uni & tunc ipsius interest omnia quæ pertinent ad illa exequi. Videtur autem tam ex ratione, quàm ex consuetudinibus nostris, quod ea quæ Religiones prædictæ super hujusmodi ediderunt, possunt apud nos distingui, & assignari modo prædicto.

Ista quæ scripta sunt de Officiis Ordinis, non sunt scripta ad hoc, quod inferant aliquam necessitatem: sed ad hoc tantum, ut Fratres quibus imponuntur aliqua officia, & non sunt in illis plene instructi, possint hic respicere si velint; & si aliquid ibi invenitur, quod eis rationabile videatur, possunt acceptare si volunt: alioquin in nullo tenentur ex vi hujusmodi scripturæ; propter quod dicunt Instructiones.

## S E R I E S   C A P I T U L O R U M.

I.	<i>De Officio Magistri Ordinis.</i>	XXVIII.	<i>De Officio Receptoris hospitum</i>
II.	<i>De Officio Prioris Provincialis.</i>	XXIX.	<i>De Officio Coquinarii.</i>
III.	<i>De Officio Prioris Conventualis.</i>	XXX.	<i>De Officio Custodis Cellarum.</i>
IV.	<i>De Officio Supprioris.</i>	XXXI.	<i>De Officio Vestiarii.</i>
V.	<i>De Officio Magistri Novitiorum.</i>	XXXII.	<i>De Officio Sartoris.</i>
VI.	<i>De Officio Magistri Conversorum.</i>	XXXIII.	<i>De Officio Sutoris.</i>
VII.	<i>De Officio Correctionis familiae.</i>	XXXIV.	<i>De Officio Praefecti operum.</i>
VIII.	<i>De Officio Cantoris.</i>	XXXV.	<i>De Officio Horrularum.</i>
IX.	<i>De Officio Succentoris.</i>	XXXVI.	<i>De quibusdam communibus, ad</i> <i>Officiales multos spectantibus.</i>
X.	<i>De Officio Sacristae.</i>	XXXVII.	<i>De Officio Definitoris Capituli</i> <i>Generalis.</i>
XI.	<i>De Officio Lectoris.</i>	XXXVIII.	<i>De Officio Socii Definitoris Capi-</i> <i>tuli Generalis.</i>
XII.	<i>De Officio Magistri Studentium.</i>	XXXIX.	<i>De Officio Electoris Magistri Or-</i> <i>dinis.</i>
XIII.	<i>De Officio Librarii.</i>	XL.	<i>De Officio Electoris Prioris Pro-</i> <i>vincialis.</i>
XIV.	<i>De Officio Examinatorum.</i>	XLI.	<i>De Officio Definitoris Capituli</i> <i>Provincialis.</i>
XV.	<i>De Officio Circatoris.</i>	XLII.	<i>De Officio Visitatoris.</i>
XVI.	<i>De Officio Custodis Dormitorii.</i>	XLIII.	<i>De Officio Prædicatoris Generalis.</i>
XVII.	<i>De Officio Portarii.</i>	XLIV.	<i>De Officio Socii Prioris Conventu-</i> <i>alis ad Capitulum Provinciale.</i>
XVIII.	<i>De Officio Depositariarum.</i>	XLV.	<i>De Officio Confessoris.</i>
XIX.	<i>De Officio Procuratoris.</i>	XLVI.	<i>De Officio Prædicatoris communis</i>
XX.	<i>De Officio Confiliariorum.</i>		
XXI.	<i>De Officio Eleemosinarum.</i>		
XXII.	<i>De Officio Refectorarii.</i>		
XXIII.	<i>De Officio Servitoris mensæ.</i>		
XXIV.	<i>De Officio Lectoris mensæ.</i>		
XXV.	<i>De Officio Correctoris in mensa.</i>		
XXVI.	<i>De Officio Infirmarii.</i>		
XXVII.	<i>De Officio Servitoris Infirmorum.</i>		

## C A P U T   I.

## De Officio Magistri Ordinis.

*Circa Ordinem in Genere.*

**M**agistri Ordinis Officium est, de toto Ordine sibi commisso gerere assiduam sollicitudinem: paupertatis, humilitatis, & omnium observantiarum Ordinis, totiusque sanctitatis quantum possibile est naturæ suæ, præ omnibus in se monstrare indicia; ut non solum præsentibus Fratres exemplo ædificet, sed etiam absentes fama reficiat. Fratres præsentibus verbis, absentes verò litteris promovere ad omne bonum: & Deo, ac Beatæ Virgini, & Beato Dominico recommendare in orationibus Fratres, & Ordinem incessanter, & ad hoc etiam bonorum suffragia procurare. Debet quoque habere secum Regulam, Constitutiones, Privilegiorum Ordinis transumpta, admonitiones Capitulorum Generalium, Breviarium, & Missale bene correctæ: & hoc scire bene, & Fratribus super his satisfacere. Item ipsius interest pro posse laborare, ut intersit Capitulo Generali.

*Circa Capitulum Generale.*

**I**n Vigilia Pentecostes post Primam, prælectis in Capitulo Kalendis, & tabula, faciendum est sermo aliquis brevis de pertinentibus ad Religionem, & statum Fratrum ab ipso, vel ab eo cui ipse injunxerit ad hoc idoneo: & postmodum admonitiones, circa ea quæ pertinent ad instans Capitulum. Orationes quoque aliquæ vel Missæ pro ipso Capitulo sunt Fratribus injungendæ. Potest etiam dare licentias aliquas generales durante Capitulo, vel de loquendo, vel de aliis secundum quod viderit expedire. Ipsius etiam est congregare tunc Definidores, & in Definitionibus minus exercitatos dirigere: de Constitutionibus confirmatis, vel inchoatis,

& de aliis actis præteriti Capituli, cum necesse fuerit, rationes quæ moverunt Definidores, reddere. Summa quoque cura est ei adhibenda, ut Constitutiones utiles pro Ordine procedunt, aliæ verò non: & idem circa admonitiones, & alia agenda in Capitulo faciendum. Et circa hujusmodi tunc providendum est ei, & frequenter per totum Capitulum cogitandum. Litteræ generales aliquæ de aliqua consolatione, & utili exhortatione ad Fratres omnes, & Sorores, tunc sunt ab eo transmittendæ: & tam tempestivè promulgandæ cum indulgentiis, si quæ novæ fuerint, vel litteræ Papales, vel alia præter acta per Ordinem mittenda; quod ante Definitionem possint omnia à Fratribus transcribi. Curandum quoque est ei, quod acta modo debito, & decenter formentur, & quod omnia fiant in Capitulo ordinatè. Committere etiam alicui debet, quod habeat curam de litteris, de beneficiis concedendis, alii vel aliis, de legendis illis quæ fuerint transcribenda. Omnibus etiam qui scribunt ei, sive Fratribus, sive extraneis de aliquo quod requirat rescriptum; per litteram decentem rescribendum est rationabiliter, & prout poterit gratiosè, & ut plenius expediantur litteræ, debet sibi de pluribus providere dictatorem idoneis, tunc habendis. In tenendo quoque Capitulum curandum est sibi quod dissolutiones non fiant, quod in loquendo, & in aliis, modus, & forma scripta fervetur, quod proclamationes iniquæ, vel indifferetæ, doloisæ, & frivolas reprimantur, quod absentes etiam leviter non infamentur, & hujusmodi multa. In terminatione verò Capituli, in ipso Capitulo potest præfigere terminum, infra quem recedant Fratres: si timetur de mora Fratrum, & Domus gravamine. Denunciare quoque quod proponant inter dirigere, ut sciant Fratres ubique ubi poterit inveniri, si eo indiguerint: & tam præ-



præsentium, quàm absentium Fratrum orationibus se recommendare. Et his factis ad absolutionem ibidem faciendam est procedendum.

Circa Provincias verò debet habere curam magnam, quòd bonos Provinciales habeant, cum ex ipsis pro magna parte dependeat bonus status Ordinis in Provinciis. Et ideo debet interdum electoribus Priorum Provincialium litteras ad hoc pertinentes dirigere: interdum etiam concedere eisdem, quòd possint eligere de aliis Provinciis; interdum etiam circa personam eligendam eos dirigere; cum autem electio devolute fuerit ad eum, cum diligenti discussione prout utiliùs poterit providere. Item pro communi bono Provinciæ debet quandoque speciales litteras specialibus Provinciis mittere, secundum exigentiam negotiorum, & temporis: vel Visitatores interdum secundum formam taxatam cum discretione, cum major fuerit necessitas, (præcipuè cum consilium Definitorum in hoc concurreret) destinare. Item Provinciis magis desolatis, vel minùs sufficientibus sibi, debet esse favorabilior in concedendis Fratribus utilibus, & idoneis, sive ad legendum, sive ad prædicandum, sive ad alia Ordinis negotia peragenda: vel in collocando Fratres de illis Provinciis alibi ad proficiendum in huiusmodi gradibus, per quos possint utiliter revelari. Suum est etiam transferre Fratres de Provincia ad Provinciam; pro utilitate vel Ordinis, vel Fratrum transferendorum, vel Provinciæ, à qua, vel ad quam translatio huiusmodi fuerit facienda. Contentiones quoque, si quæ fuerint inter Provincias debet dirimere, & à mutuis injuriis conservare easdem. Per Fratres venientes ad Capitula, & alias cum commode poterit, de statu Provinciarum debet inquirere diligenter: & ad habendam notitiam qualemcunque de regimine earum, ut Acta Capitulorum Provincialium ad se deferantur ad Capitula generalia, si voluerit, mandare.

#### *Circa Conventus.*

Interest etiam ipsius, ut ad Conventus ad quos non declinat, interdum litteras mittat consolatorias, si sint in tribulationibus; vel de concordia, si sint inter se discordes, vel aliàs secundum quod exigunt causæ variæ emergentes: vel etiam mittat Visitatores secundum formam taxatam, si major necessitas, & Prioris Provincialis carentia, vel absentia, vel negligentia, & sufficientia hæc requirant. Sanè cum declinat ad Conventum aliquem in transitu, semper debet intrare Capitulum, & ibidem Fratribus congregatis recommendandos recommendare Fratrum orationibus, & causam sui transitus (nisi sit res secreta, referare eisdem.) Nisi verò arcta necessitas ipsum festinare compellat, non debet, si audivit aliqua notabilia ibidem corrigenda, ipsa incorrecta dimittere. Si vera non audivit nihilominus, vel in Capitulo, vel coram senioribus aliquibus debet se offerre ad corrigendum, si aliqua videntur suam correctionem requirere. Quod si videatur ei, ut isti intendat, debet seorsum summam illa, quæ eos moverunt prælibare: & tunc sic ei visum fuerit, postea Capitulum, vel quoad omnia, vel quoad illos casus tenere. Ante recessum autem suum, debet cum omnibus in Refectorio, si fieri potest comedere, & in Capitulo aliquem sermonem, vel collationem, vel admonitiones aliquas proponere Fratribus, tam Clericis, quàm Laicis, secundum exigentiam status eorum: & in fine consueta absolutionem facere generalem; & se specialiter, & negotia si quæ grandia habet, tunc temporis Fratrum orationibus recommendare. Cum verò moram trahit in aliquo Conventu, debet tam frequenter, quàm

diligenter tenere Capitulum: & cum non tenet, interdum tam utiles, & tam efficaces admonitiones proponere; quòd ex ejus mora non solum in ejus præsentia, sed etiam post recessum sequatur in eadem Domo evidens Religionis augmentum. Melius quoque est, ut necessitates suas de communi provisione Conventus, vel aliquibus amicis Ordinis manifestè recipiat, quàm quòd aliquid fiat circa hoc per modum occultum, vel ab aliquo Fratre singulariter procuratur. Cavendum est autem ei diligenter, nè reddat onerosum se in expensis, aut in servitiis, quæ Fratribus aliis fieri non consueverunt, aut fastu aliquo tamquam non sit unus illorum, aut in serviendo nimias fieri sibi reverentias: sed potiùs laboret, ut societas sua non solum Fratribus, sed etiam familiæ (cum qua etiam habenda est ei aliqua Religiosa collatio) sit amabilis, & accepta. Non decet etiam ut extrà Domum facile comedat, vel inter seculares discurrat. Cum autem eum ire oportuerit inter seculares, cum societate moderata ire eum convenit, ne nimis magna societas attribuat pomper, vel nimis modica apud imperitos pariat contemptum. Sed in hoc tamen secundum conditiones Regionum est temperandum. Fratres quoque qui occasione ejus superveniunt, ne ex eorum mora Domus gravetur, debet breviter expedire, & licentiarum curialiter commorantes sine causa.

#### *Circa Fratres.*

Ad ipsum quoque pertinet majorum Fratrum excessus viriliter corrigere; minoribus verò se talem exhibere, quod ad illum non timeant accedere. Dignos honore pro meritis, vel aliis conditionibus decenter honorare, irreligiosos, & malè viventes à sua gratia, & familiaritate ad correctionem repellere. Laborantibus laudabiliter, & fructuosè pro Ordine se gratum ostendere: infirmis corpore, seu mente piè condescendere, protervorum, contumacium duritiem frangere. Novitiis tentatis, & afflictis, dulces consolationes impertire, petitiones Fratrum rationabiles libenter exaudire: cum verò repellendæ fuerint, causas quare recipi non debeant prudenter explicare; querelantium de aliis, causa diligenter audita, quod justum fuerit ordinare. Dissolutiones notabiles coram se nunquam sustinere, de utilibus, vel de confessione loqui secum volentibus facillè locum dare. Fratres omnes advenientes (nisi sit certum quòd inordinate vadant) cum læto vultu, & ad osculum pacis semper recipere: discussa verò causa itineris, eosdem secundum merita tractare. Recedentes ad partes remotas cum osculo licentiarum; absolutionem generalem si petierint, eis conferre; & se per eos Fratribus ad quos declinaverint recommendare, & salutare eosdem. Apostatis, & ejectis ad se confugientibus audientiam præbere, ipsisque auditis scribere eorum Prioribus Provincialibus, & Conventualibus: & secundum eorum relationem, quod visum fuerit expedire. In similibus, & dissimilibus se singulorum utilitatibus secundum diversos status eorum, coaptare.

#### *Circa Curiam Romanam.*

Curia Romana visitanda est à Magistro tam pro ipsius reverentia, quàm Ordinis utilitate, temporibus opportunis: ubi si eam turbata invenierit in aliquo contra Ordinem, vel Fratres aliquos, debet ad sedandam ipsam sollicitè laborare. Indulgentias, concessionem etiam verbo solo, utiles Ordini quas poterit impetrare, D. Papæ, & Cardinalium, & aliorum Curialium benevolentiam erga Ordinem

captare, negotia magna si quæ habet Ordo, pro viribus promovere, Cappellani, & Penitentiarii Fratribus, & si qui sunt alii in Societate Curialium, tenere Capitulum, & ipsos diligenter corrigere: apponere etiam diligentiam, quod inde cautè removeantur, si qui fuerint minus apti, & quod pauci sint ibidem in societate alicujus Curialium, & quod qui fuerint, tales sint, quod ex eorum mora in Curia honor sequatur Ordinis, & utilitas animarum. Providendum est etiam ab ipso, quod in Conveni- tibus Civitatum, ubi Curia fuerit, semper sint sive de ipsa Provincia, sive de aliis, Fratres personati discretione, & honestate pollentes: & præcipuè Prior, & Lector sufficientes, & famosi. Constituendos semper ab ipso aliquis Frater in Curia litteratus, discretus, & zelator Ordinis, honestæ, & amabilis conversationis inter seculares; firmus in amore status Ordinis, & personatus: qui sit ibidem Generalis Ordinis Procurator, habens super hoc suas litteras cum discretione formatas. Cui etiam committenda est potestas aliqua super Apostatas Ordinis, & super Fratres ad Curiam inordinatè venientes: & etiam super illos, qui ordinatè veniunt: ut cum consilio suo procedant, & circa alia quædam, prout visum fuerit expedire. Et de expensis ei necessariis, debet cum Definitoribus Generalis Capituli, vel per se, si commodè poterit, quod expedierit ordinare: & licentias ei dare, quæ ad exequendum suum officium utiles reputantur.

#### *Circa Nationes.*

**L**icet autem de omni fructu animarum per Ordinem faciendo sit ei multum curandum, tamen specialiore curam, & zelum ferventior habere debet circa Barbaras nationes, & Paganos, Saracenos, Judæos, Hæreticos, Schismaticos, & hujusmodi qui sunt extra Ecclesiam: ut per Ordinis laborem, & sollicitudinem in viam dirigantur salutis, & Christi in eis gloria dilatetur. Et idèd curandum est ei, ut semper in Ordine sint aliqui tractatus contra errores eorum in quibus Fratres exercere se valeant competenter: & ut aliqui idonei insudent in locis idoneis ad linguas Arabicam, Græcam, & Barbaras addiscendas. Et in Provinciis, quæ sunt ad hujusmodi fructum faciendum aptiores, debet super hoc excitare Fratres: & non quoscumque, sed qui circa fructum hujusmodi fervent, & aliter sunt idonei, ad hujusmodi negotia deputare.

#### *Circa Extraneos.*

**C**UM aliqui extranei voluerint Magistrum visitare, non debet esse ad eum difficilis accessus: sed sine mora in loco opportuno, vel exeundo ad eos, vel ipsis introductis ad eum, sui debet præsentiam exhibere acceptabilem; affabiliter omnes recipere, & secundum conditiones eorum plus vel minus honorare. Si verò petitiones aliquas faciunt, si commodè fieri potest, debet omnibus libenter satisfacere: vel si non possunt exaudiri, de impotentia tali sunt eis rationabiles causæ assignandæ. Caveat autem omnino ne incivile aliquid in eo inveniatur, & det operam quantum potest, ut nullus scandalizatus ab eo recedat. Circa legationes, & alios nuncios ad se missos, sic se debet habere urbanè in loquendo, & in necessitatibus eis providere faciendo: ita quod recedentes occasionem habeant bona loquendi de eo. Cum Religiosis tractandum est ei de sanctitate, cum secularibus sunt ei verba salutaria verbis secularibus immiscenda. Nulli qui manifestè non sit indignus, negare debet in propria persona gratiam hospitalitatis, aut eleemosynas quæ fieri consueverunt in Ordine. Benefactoribus, &

*Cod. Regul. Tom. IV.*

amicis Ordinis specialibus, dignæ sunt gratiæ reddendæ, & in amore Ordinis sunt per ejus diligentiam confirmandi. Ipsi autem aliundè venientes (cum eos tales cognoverit) sunt cum omni devotione suscipiendi, & omnis humanitas tam in hospitalitate, quam in aliis quæ nos decuerint, est eis ab ipso exhibenda. Prælati per quorum Dioceses transit, & præcipuè sub quibus morantur Fratres, sunt ab eo visitandi: & si quas habent erga Fratres turbationes, pro posse conandum est ei ipsos pacificare, & Fratribus gratiam eorum acquirere; aut in ipsa continuanda (si habent) eos solidare. Magnates, sive sint Principes seculares, sive personæ Ecclesiasticæ, quos non expedit per Fratres quoslibet, vel argui, tempore opportuno cum discretione, & modestia charitativè de salute sua debet etiam commonere. Ad pacem Fratrum Minorum custodiendam diligentiam debitam debet adhibere, ipsosque visitare; aut si non potest per se, per Fratres ad eos missos excusare. In visitatione verò cum opportunitas fuerit, collationem efficacem aliquam eis facere, eosque cum omni devotione recipere, & tractare: pedesque eorum personaliter interdum lavare, & excessus Fratrum contra eos sine dilatione dignè corrigere. Providendum autem est ei, quod omnes cum quibus eum esse contingit, antequam recedant ab ipso aliquam adificationem in verbo, vel in facto reportent. Ad trahendum quoque ad Ordinem personas idoneas, curam debet apponere diligentem.

#### *Circa Divinum Officium.*

**N**on convenit Magistro libenter se absentare à Divino Officio, & maxime à Completorio: nisi forte propter impotentiam corporalem, aut si habeat occupationes circa majores utilitates. Cum autem præsens fuerit in Choro, debet primum locum in dextro Choro tenere: tempore communionis absolutionem in Capitulo facere, & Missam celebrare Conventualem, Fratribus infirmis, ubi præsens est sacram ministrare Communionem, & extremam Unctionem: & sepelire Defunctos, recipere Novitios, recipere ad beneficia, recipere Legatos, & Magnates in Conveni- tibus in quibus fuerit; in magnis solemnitatibus facere Officia, & alias Conventuales Missas interdum, cum requisitus fuerit à Cantore celebrare. Extra Chororum verò cum majori maturitate, & diligentia quam ab aliis communiter consuevit fieri, est officium dicendum ab ipso, & celebrandum frequenter. Officium quoque mortuorum, non debet ab eo prætermitti.

#### *Circa Mensam.*

**C**UM comedit in Conventu, non est ei sustinendum quod ei singularitates notabiles fiant: cum vero habet unde possit aliquibus aliquid mittere, illi sint potius eligendi, quibus cedit ad consolationem: ut sunt Novitii, vel tentati & hujusmodi, vel qui sunt magis indigentes, ut debiles, vel infirmi, vel qui pro aliqua ratione sunt honorandi, ut qui fuerint nobiles, vel divites in seculo, vel sint in Ordine Lectores, & similes. Protrahenda est ab ipso comedendo sic mensa curialiter, ut qui morosius comedunt, comestionem interrompere non cogantur: nec signum facere debet quousque videat, quod comestio communiter sit completa. Quod si quis morâ notabili faciat alios plus debito expectare, per servitorem potest ipsum priusquam signum faciat, ut finem faciat commovere. Cum autem extra Refectorium comedit in hospicio, vel in infirmatorio, cavendum est ei, ne occasione ipsius superfluitates fiant incon- suetæ, & maxime si adsint extranei. Nec danda est

est loquendi licentia passim, sed modò uni modò pluribus, modò omnibus, modò nulli secundum diversas circumstantias secum comedentiù: præcipuè verò cum intersint extranei, cautè sunt hujusmodi licentiæ dandæ. Interest autem valdè ipsius aliqua verba ædificatoria, & spiritualis consolationis interferere comestioni, & frequenter lectionem aliquam in mensa, in parte, vel in toto habere: nisi pro reverentia personæ excellentis quæ adsit intermittatur; aut de ejus beneplacito fieri procuretur.

#### *Circa Cameram.*

**C**UM autem Camera sit ei concessa propter certas utilitates Ordinis, attendendum est ei, ne redundet in damnum Ordinis talis concessio: quod fieret, si fierent ibi dissolutiones; si protenderentur vigiliæ ultra signum; si fierent ibi comestiones, vel potationes, nisi tempore suæ infirmitatis; si permitteret fieri ibidem fastum aliquem in lecto, aut in aliquo apparatu. Et ideo sunt hæc ab ipso, & familia coerenda. Nunquam etiam dormire debet in Camera, sine duobus Sociis, & lumine.

#### *Circa Itinera.*

**I**N itinere constituto, ut tempus utiliter expendatur, sunt ei cum Sociis aliqui Psalmi, & Orationes devote dicendæ, aliquæ salutare collationes habendæ: sed cum tali moderamine, ne vertantur in tedium grave Fratribus, quibus non molestum, sed jucundum debet se Socium exhibere. Adjungentes se quoque ei debent ab eo, vel Sociis semper aliqua salutis monita reportare. Cum opportunitas occurrerit, non est omittendum quin per eum, vel Socios prædicatio fiat. Illi autem qui causa Consilii, vel loquendi de salute ad eum, accesserint, benignè sunt audiendi, & cum favore dimittendi. Quamvis autem Fratres viatores non debeat facile à sua Societate repellere; tamen cavendum est ei, ne ex multitudine Fratrum concurrentium, vel ex superfluitate expensarum, quam cohibere possit, graventur hospites, & sine utilitate eorum transeat. Et de salute animæ est cum habitantibus collatio semper habenda, & ad beneficia Ordinis sunt interdum recipiendi; & laborandum, ut nihil fiat, in quo male ædificentur, & quod bonus odor, & gratia apud eos remaneat post recessum.

#### *Circa Litteras.*

**L**itteræ ineptæ nunquam ab eo sunt mittendæ, sed decenter formatæ, plus vel minus secundum exigentiam materiæ, vel personarum, quibus dirigendæ sunt. Et ideo sunt omnes ante sigillationem sollicitè respiciendæ. Scribentibus, diligenter est rescribendum. Verba pungitiva sunt in ejus litteris semper devitanda, & inferenda lenitiva, & gratiosa: dandaque est ei opera, ut fructum quem verbis facere non potest, litteris compleat apud absentes, sive Fratres, sive extraneos in variis casibus emergentibus, prout fuerit opportunum. Non sunt etiam litteræ passim dandæ, sive de beneficiis Ordinis, sive de precibus, sive de testimonio, & similibus: sed cum multa cautela, & deliberatione; Fratribus, & aliis qui scribunt, scribere non omittat.

#### *Circa Potestatem.*

**I**cet autem Magister habeat plenam, & generalem potestatem in Ordine, tamen nunquam est ei utendum hujusmodi plenitudine potestatis, ubi causa rationalis non occurrerit. Specialiter vero est cavendum ei ne in temporalibus gravet Provincias, vel Conventus, vel Fratrem aliquem: utpote libros, vel paramenta unius alteri concedendo, onus pecuniæ alicui solvendæ

imponendo, & similia, sine causa rationabili evidenti. Officia inferiorum non debet sibi assumere libenter, nisi causa urgente. Licentias, quæ per alios expediri possunt raro dare debet, sed potius Fratres ad Prælatos suos mittere pro iis. Et quas dederit, quæ secretum non requirant, Prioribus Provincialibus, vel Conventualibus, prout magis convenit significare debet. In concedendo verò licentiam alicui Fratri confitendi alii, quam Prælato suo debet habere cautelam, sciens quod hujusmodi confessiones interdum in grave periculum Ordinis redundant. Item in licentiando aliquem ab Ordine, cavendum est ei, quòd nihil faciat nisi quod liceat, & quod expediat, & quod salutem Fratris non negligat propter onus. Cum autem fuerit faciendum, sic provideatur, quod habeat locum, ad quem transeat antequam recedat, quod evagationi periculosa non exponatur. Circa dispensationem, & licentias, quæ sibi reservantur, ut de studio in liberalibus artibus, de eundo ad Curiam, vel quæ non consueverunt fieri per aliquem de facili, ut de ingressu mulierum in claustra, & similia: talem mediocritatem tenere debet, quod propter nimiam ejus duritiam circa hoc major fructus non impediatur; vel grave scandalum generetur, & rursus ex nimia facilitate periculosa dissolutio in Ordinem inducatur. Circa se vero quantum valetudo permittit, ipsi parum dispensationibus est utendum: & cum necessitas requirit aliud, hujusmodi necessitas est opportuno tempore insinuanda Fratribus, ut non scandalizentur in ipso.

#### *Circa Socios.*

**E**ligendi sunt à Magistro Socii Deum timentes, Ordinis zelatores, discretionem pollebentes, religiosæ, & amabilis conversationis, corpore potentes, qui inter Fratres se sicut unus cæterorum gerentes, nihil in hoc Officio querant nisi solam Ordinis utilitatem. Horum enim commune erit officium, quæ viderint in eo corrigenda, interdum cum humilitate, & modestia ei dicere; interdum quæ in aliis sciverint, vel audiverint emendanda, eidem tempore suo referre, agenda ei ad memoriam reducere, & circa eadem ipsum sollicitare. Secreta quæ ad ipsum veniunt sub districto silentio custodire. Si quæ gravia, vel periculosa Ordini multum sciverint in eo, Definitoribus, vel aliis qui prodesse possunt, & non obesse, tempore suo non tacere. Fratres cum eo loqui volentes, etiam in hoc timidos ad eum adducere. Advenientes ad eum sive Fratres, sive alios extraneos benigne recipere, & ad eum ipsos introducere, vel ad ipsos eum evocare. Ipsorum negotia si quæ habent sollicitè promovere, & curam habere, quod charitativè tractentur à Fratribus in hospitalitate, & hujusmodi, cum fuerit faciendum. Dare operam ad pacificandum eos, quos turbatos viderint occasione repulsarum petitionum, vel alia de causa erga Magistrum; & quòd in pace recedant, & cum gratia. Cum fenserint murmur de factis aliquibus Magistris, eidem charitativè narrare debent: & murmurantes pro posse reddendo rationes de factis, vel quas fortè ignorant, sedare. Contra neminem ipsum provocare, nisi fortè causa correctionis, prout necesse fuerit. Horum unus debet esse Conversus, cujus erit officium speciale custodire sigillum, sigillare litteras, & pertinentia ad hæc in promptu habere: libros Magistris, & vestes aliquas cum fuerit necesse, portare in via, & circa necessitates ejus corporales sollicitudinem gerere, & sustinere labores. Alius debet esse Notarius competens, qui magis debet laborare ad notandum sententiosè, & breviter, quam ador.



adornata verba multiplicare. Cùm Magister commiserit ei litteras sibi missas, debet eidem legere, & sensum ei referre summam, & plenè: & notare diligenter ad quas litteras, vel ad quos articulos sit respondendum. Sialiquid secretum in eis contineri advertit, statim supersedere debet à legendo, & reportare Magistro. Congregationibus, & similibus personis, & pro magnis negotiis, decentes litteras facere, & de littera magis legibili, & meliori. Litteras de beneficiis, & alias quæ committuntur aliis scribendæ, vel faciendæ, ante sigillationem debet inspicere, ut videat si sint debito modo formatæ, & scriptæ. Potest, & præter istos (si visum fuerit) tertium assumere Socium, virum consilii, & litterarum, cum quo possit habere consilium, vel de scripturis conferre: modò in via, modò in Domo, & in iis quibus sibi studendum est, ipsum adjutorem habere; vel aliqua sibi agenda, ei interdum committere, cùm viderit expedire. Præter supradicta verò sunt alia quædam scripta in Regula, & in Constitutionibus, & ordinario, aut in usu. Alia verò quædam quæ dicere in singulis casibus est magis rationis benè dispositi, vel unctionis, quàm hominis: veluti nihil subito negare, vel concedere, non de facili aliquid in futurum promittere, quorundam consiliis interdum acquiescere, quorundam non; de nocte Deo, de die proximis vacare, benignè omnes audire, & similia quæ sunt ei sollicitè peragenda. Quod similiter intelligendum est de aliis Officialibus infra scriptis.

## CAPUT II.

## De Officio Prioris Provincialis.

*Circa principium regiminis.*

**O**fficiu Prioris Provincialis est, circa principium regiminis sui cum timore, & tremore incedere; per orationem ad Deum concurrere; frequenter orationes aliorum sibi sollicitè procurare, pro potestate committenda supra se in confessione, ad Magistrum recurrere: novitates nullas citò inducere, quousque magis per experientiam, quàm per aliquam sapientiam sit edoctus: mutationes paucas facere, quousque de statu Provinciæ, Conventuum, & Fratrum notitiam habeat plenior: Fratrum Deum timentium, & Religionem zelantium, & ampliori discretione pollentium magis consiliis adherere: notam fovendi partem aliquam, si forte inter aliquos reputetur, declinare pro posse; & cavere ne ex amore privato, vel familiaritate, aliquid faciat non faciendum, aut facere videatur. Item ad ipsius pertinet officium diligenter considerare, quæ de Officio Magistri sunt prædicta, & ea quæ dicuntur infra de Officio Prioris Conventualis, & ea quæ de illis competunt sibi, secundum statum suum: & cum his, quæ continentur in præfenti nota de officio suo, quod debet studiosè perlegere, & opere adimplere. Laudabilia quæ in antecessoribus suis fuerunt, prudenter inquirere, & inventa pro viribus observare: & per eorum Socios laude dignos intrui in officio humiliter, & devotè. Item ipsius est in Choro sinistro stare, & quod Officiu Divinum dicatur reverenter, & devotè, & secundum modum Ordinis, tam in Choro, quàm extra, diligentiam apponere: & de Cantoribus competentibus, prout potest Conventibus providere. Item interest sua, cum Magister præfens non est, celebrare Missam in maioribus solemnitatibus, & ministrare Sacramenta decedentibus; & huiusmodi, quæ supra dicta sunt de Magistro Ordinis.

*Circa commune bonum Provinciæ.*

**I**tem ad ipsum pertinet commune bonum Provinciæ procurare sollicitè, sive apud Magistrum, sive in Capitulis Generalibus, & Provincialibus. Item de iis quæ videntur corrigenda, vel facienda, quæ per se non potest commodè expedire, memorialia facere, & ipsa Capitulorum tempore promovere. Item in emergentibus necessitatibus Fratrum, in diversis locis consilium dare, sive per recursum ad Curiam Romanam, sive aliis modis, prout variæ necessitates exigunt; ad communem pacem Provinciæ dare operam efficacem. Partes si quæ sunt pro viribus auferre, instruendo unitatem, & concordiam ponendo; querelas, si quæ sunt inter Conventus de terminis, vel aliis quibuscunque, citò terminare. Conventus novos, qui evidenter reputantur utiles procurare, de minù necessariis non curare. Regulam, Constitutiones, Privilegia, Acta Capitulorum, Litteras Magistri benè correctas secum portare, & ad exemplar suum ubique per Conventus facere scribi, quæ non habentur: quæ verò habentur perlegi, & corrigi diligenter, & interdum facere legi, ubi viderit expedire. Infirma Fratrum, vel Conventuum aliquorum sine causa rationabili numquam debet aliis recitare. Quòd Fratres ubique pacem habeant erga Clerum, & Populum, & Prælatos, & alios, laborare. Quòd metas privilegiorum, vel concessionum, quæ habuit à Prælati in confessionibus audiendis, vel absolutionibus, & dispensationibus, & huiusmodi, Fratres non transgrediantur; & quòd ad hæc exequenda non ponantur Fratres nisi sufficientes, monere, & cavere. Discursus Fratrum restringere, nec permittere, quòd discurrant propter negotia quæ possunt per litteras expediri.

*Circa Conventus.*

**I**tem circa Conventus debet apponere curam quam potest, ut habeant omnes Priores idoneos: & ut in quolibet sit Lector, & aliquis, vel aliqui gratiosi Prædicatores; similiter aliquis, vel aliqui viri consilii. Et ubi non poterunt haberi tot Lectores, quot sunt Conventus; saltem sit aliqua lectio, vel de summa Casuum, de textu Sancti Thomæ, de Artibus, vel de Historiis, vel de aliqua alia summa, & huiusmodi. Conventus autem desolatos, & pauperes, & remotiores, magis debet habere cordi, & plus cavere ab eorum gravamine, & eis magis subvenire in quibus potest; sive in Fratribus concedendis, sive in aliis; & ad subveniendum eis, Conventus alios, & Fratres animare, eosdem quoque per litteras consolari frequentius, & excitare in bonum. In missione verò novorum Conventuum, sic sollicitè providere debet de Fratribus Religione claris; quòd à principio Religionis rigor in illis servetur, & fructus animarum cum ipsis perveniat ad totam viciniam, & honor Ordinis, & fama in illis partibus dilatetur.

*Circa Priores.*

**I**tem circa absolutiones Priorum qui boni reputantur, non debet esse facilis, nec propter eorum instantiam, nec Fratrum aliorum importunitatem. Magis autem debet eos animare ad oneris sustentiam propter Deum, & Ordinem, eosque fovere, & adjuvare in quibus bono modo potest: eosque molestantes comprimere, pacemque eis prout possibile est procurare. Priores verò minù idoneos facile debet absolvere, cùm speratur quod meliores possunt haberi; & quandoque etiam super eos aliquibus aliquam potestatem tradere, vel in recreationibus recipiendis, vel huiusmodi, cùm causa rationalis hoc requirit.

*Circa Fratres.*

**I**tem ipsius est de Fratribus periculosis, & dissolutis, sollicitè ordinare, quòd non ponantur in locis dissolutis, in quibus minus viget disciplina: sed in domibus, in quibus melius custodiri possint, & corrigi. Et quantum fieri licet, condiciones eorum Prioribus ad quos mittuntur, notificare debet. Et cum transferantur de loco ad locum, providere, ut benè affociantur, & certum tempus habeant pro itinere taxatum. Qui autem pestiferi fuerint iuventi secundum quòd graviores eorum culpæ requirunt, gravius, vel per carceres, vel percussiones, vel per ejectiones à Fratrum societate, vel aliter puniantur. Perturbatores Conventuum, aut Priorum aliòd transferre, colligationes in malum, per dispersionem dissolvere. Talem se debet omnibus exhibere, quòd ad confitendum eidem non timeant accedere. Extra Capitulum quoque Fratribus aliquibus interdum charitativas facere exhortationes, prout statum eorum viderit indigere. Diligenter quoque debet ubique advertere, qui & quot sint in quolibet Conventu, qui sint apti ad proficiendum in studio; & huiusmodi si sint benè morigerati, ad studium promoveri: vel ad studia meliora mittendo, vel in ipsi domibus propriis libertates aliquas concedendo, vel occupationibus aliquibus exinendo; insuper de libris eisdem providendo. Et eos etiam, de quibus est bona spes, quòd possint esse utiles ad Prioratus, & officia Ordinis magis necessaria, in scientia, & huiusmodi promoveri. In recipiendis verò Conversis pluribus, vel qui non noverint officia, in quibus possint Ordini deservire, & etiam Clericis minus idoneis, dignam debet adhibere cautelam.

*Circa Visitationem.*

**I**tem visitare frequenter Provinciam debet prout potest, & frequentius Domos quæ plus indigent. Cum autem non potest in propria persona, debet interdum cum necessè fuerit, per alios Fratres discretos, & acceptos Fratribus hoc supplere; taxata eis per litteras discretè potestate. Cum autem de Provincia recedit, semper relinquere Vicarium, vel Vicarios per diversas partes Provinciæ: & interdum etiam cum præsens est in Provincia in aliquibus locis magis remotis, Vicarium, vel Vicarios instituire; potestate eis taxatâ semper per litteras, & expressâ. Item cum Visitatores assignati à Capitulo Provinciali visitare non possunt, pro eis Visitatores idoneos substituere. Porro in visitatione tantum debet in qualibet domo morari, quòd diligenter, & plene, quod requirit visitatio valeat exercere. Episcopum loci, Fratres Minores, & alios amicos Ordinis visitare, vel cum ipsis eum visitantibus competentem colloquutionem, & collationem habere. Populo, Clero, & Religiosis (ubi hoc expedierit) prædicare; scandala, & turbationes si quas invenerit erga aliquos Religiosos, Prælatos, Clerum, & alios, sedare curabit. Cum Fratribus in Refectorio, in Officiis divinis, & in Dormitorio aliquo tempore interesse. Fratribus tam Clericis, quam Laicis sui copiam facere, sive de confessione, sive de quibuscumque aliis loqui voluerint cum eo, sive in Capitulo, sive extra. Collationes Fratrum audire, ut de profectu eorum aliquid in studio eorum advertere possit. Saltem semel audire computationem domus, & statum, quoad temporalia. Auscultare infirmos, pusillanimes, & tentatos, & Novitios singularibus collationibus consolari; Novitiis Con-

versis aliquas privatas collationes facere. Familiam ubicumque superfluum invenerit, removere. Si quæ majoris ponderis ordinare voluerit, prius discretorum consilium convocare. Et quantum potest fieri rationabiliter dare operam, ut omnes in pace, & consolatione relinquatur. Et sic inter eos in illo tantillo temporis studeat conversari, quod plûs eos exemplis, quam verbis ædificet, & informet.

*Circa Capitulum Provinciale.*

**I**tem ad locum Capituli Provincialis debet aliquantum tempestivius aliis venire, ut cum Fratribus domus tractet, si expedierit, de aliquibus ad Capitulum pertinentibus: & ut Fratres, qui quandoque citius veniunt pro aliquibus negotiis, expediat. Item interest sua tunc temporis litteras sibi missas per se, vel per Secretarium respicere, & ea ad quæ respondendum est notare: & quæ sine Capitulo potest facere citò expedire. Ea verò, quorum responsio ex Capitulo dependet, in memorialibus ponere, vel ipsas litteras distinctè pro diversis Conventibus ad confusionem cavendam in diversis locis servare, & quam citò poterit expedire: illas verò quæ responsionem non requirunt, statim discerpere. Item providere debet, quòd Acta Capituli Generalis, & litteræ Magistris, & si quæ aliæ litteræ, vel scripta emanaverint à Capitulo Generali per Provinciam habendo, legantur ante electionem Definitorum: & ordinetur quòd certo loco, & certo tempore conveniant, qui habent transcribere, & per aliquem, vel aliquos legantur, & ad scribendum necessaria ibidem ministrantur de domo; ita quòd ante Definitionem Capituli omnia huiusmodi sint transcripta, & tunc Acta Capituli, & si quæ alia mittenda sunt in scriptis per Provinciam, sunt ab eodem Capitulo celeriter secundum modum eundem scribenda. Item non debet dare licentias veniendi ad Capitulum sine causis rationabilibus, & qualiter veniunt, condigne cum consilio Definitorum in ipso Capitulo confundere debet, & punire: vel segregando à Capitulo, vel statim remittendo, vel aliis prout major excessus eorum exigerit. Ordinare etiam debet quòd nimis tempestivè non veniant, & quòd non nimis morentur qui venire tenentur. Item Definidores minus expertos in aliquibus dirigere, & de conditionibus personarum, quarum notitiam non habent, (cùm de eis agitur) insinere eosdem quantum commodè, & licitè potest, & Ordinis utilitas requirit. Item dare operam quòd paucae mutationes Fratrum fiant, & quæ sunt, non fiant sine causa valde rationabili: cum ex huiusmodi mutationibus frequenter inconvenientia multa oriantur. Item cavendum est ei, ne in suis agendis sit ita favorabilis maioribus Conventibus, & personis contra minores (quibus magis est subveniendum) quod inde scandalum apud eos, & turbatio subsequatur. Ordinandum est etiam ab eo, quòd Fratres qui tunc mittuntur de Conventu ad Conventum, certam, & bonam societatem, & tempus ad viam habeant arripiendam, & consumandam. Eo modo expedit tunc ordinare propter discursus evitandos, quod Conventus qui carent Prioribus habeant potestatem eligendi, prout sibi visum fuerit aliunde: & confirmare in domo, vel vicino Conventu aliquo interdum, & pronuntiare, quod ad eum nulli Fratres mittantur pro huiusmodi, & similibus, quæ per garziones, & litteras valeant expediri.

## CAPUT III.

## De Officio Prioris Conventualis.

*Circa se ipsum.*

**O**fficiū Prioris Conventualis est diligenter notare ea, quæ de supradictis Officiis Magistrī, & Prioris Provincialis sibi competunt, secundū suū statum, & ea adimplere. Item pro Religione primo, & pro studio secundo, plusquam pro aliis quibuscunque zelare. Item non tantum extra domum morari, quod ea quæ sunt intus agenda negligat; nec tantum intus residere, quod fructus quos potest extra facere, damnosē perdat. Item amore quietis, Fratrum, & Ordinis negotia non negligere, & rursus propter nimiam occupationem circa curam ad alios, nimis à se exire. Item circa occupationes odiosas, & devotionem hominum ad Ordinem suffocantes, (ut sunt visitationes, & correctiones potestativæ Monasteriorum, receptiones arbitrorum, & similia,) se de facili non implicare. Circa fructum vero animarum, qui fit per prædicationes, per charitativas admonitiones, per consilia, per confessiones, per paces, & huiusmodi, quæ magis decent Ordinem, & spiritum magis sapiunt, libenter intendere debet spiritualibus quoque exercitiis intra claustrum, ut sunt scholæ, collationes, sermones, Officiū divinum, & huiusmodi, libenter interesse. Circa coquinam verò, vestiariam, vel hortum, vel ædificia, & huiusmodi quotidianas angustias, & minoris valoris, quæ per alios Officiales exerceri solent, occupari raro. Item ipsius interest in absentia Magistrī, vel Prioris Provincialis, vel de eorum mandato (si præsentibus existunt) recipere Novitios. In magnis solemnitatibus facere officium. sepelire Fratres, infirmis ministrare Sacramenta, & alia similia, quæ supra dicta sunt in officio Magistrī. Non autem debet de facili unquam deesse à Completorio. Cum autem est in Choro, stare in dextra parte debet.

*Circa Majores.*

**I**tem ad ipsum pertinet, Magistrum, vel Priorem Provinciale, Visitatorem, & omnes Majores suos cum debita reverentia suscipere, & tractare: statum sui Conventus cum quæsierint, vel expetierint, fideliter eis exponere, eorum mandata, & ordinationes, & Capitulorum Generalium, & Provincialium devote suscipere, memoriæ commendare, Fratribus frequenter exponere, & ut plenarie observentur operam dare. Utilitatem quoque Domus, & Fratrum suorum sollicitè procurare, gravia si quæ sibi imponuntur ab eis, sine murmure portare, eos pro sua absolutione, vel aliis negotiis, non graviter molestando: repulsam petitionum suarum patienter sustinere, & causam quare hoc fiat ab eis rationabilem esse (licet nesciat) supponere; & in suis angustiis de multitudine negotiorum, & impotentia satisfaciendi omnibus, eis potius compari, quam de repulsa huiusmodi indignari. Pro eis quoque orare, & alios frequenter inducere ad hoc ipsum. Si quæ in eis corrigenda viderit, vel de aliquo quocumque tractare cum eis habuerit, cum digna humilitate loqui debet eisdem.

*Circa Conventum.*

**I**tem ipsius inter est Conventui in victu, & in vestitu, & infirmitatibus, & aliis necessitatibus, prout potest, commoditatem procurare. In Refectorio, in communi minutione, & rasura, & ubique libenter esse cum Conventu. Singularitates in cibo, vel extraordinariis comestioni-

bus, & huiusmodi, cavere. In vestium pretio sequi communitatem, tam in se, quam in aliis. Singulares provisiones in necessariis nulli concedere, sed de communi omnia providere, nunquam apud se, vel alium, nisi communem custodem, & nonnisi pro libris pecuniam habere, superfluitates in hospitio, & infirmitorio, & horum frequentationes præter necessarias, restringere; & in dispensationibus circa corporalia se non facilem exhibere. Ipsos quoque Fratres in spiritualibus debet in Capitulo informare, ad omne bonum sanctis exhortationibus animare, magis in dulcedine spiritus, quam per potentiam pertractare. Curandum est ei multum de pace Conventus conservanda prout fieri potest: nec facile devianandum est ei à concordia ipsius, vel voluntate, vel consilio, vel petitione. Debet quoque ab ipso assignatos habere Fratres, qui audiant computationem, & statum Domus sciant, & de quorum consilio in ædificiis procedatur. Dispensationes verò in jejuniis, in abstinentiis cum toto Conventu, nunquam sunt faciendæ, etsi personis aliquibus sit interdum meritò indulgendum. Debita magna contrahere, vel emptiones, vel venditiones magnas, vel alia magna facere non debet, sine consensu Conventus, vel Consiliariorum: qui ex parte Conventus ad hoc fuerint assignati, & quibus super his fuerit commissa potestas. Cum autem accedit ad Capitulum, vel aliàs longè; debet semper Vicarium relinquere, sive Supporem, sive alium utilem, & idoneum pro Religione: & prout fieri potest acceptum communitati Fratrum. Debet autem ei potestatem taxare, & in iis quæ videntur utilia instruere diligenter. Item cum egreditur civitatem, semper Supporem, vel pluribus, causam viæ quod vadat significare, & interdum ipsi Conventui, si major ratio hoc requirit.

*Circa Officiales.*

**I**tem ad officium ejus pertinet Officiales idoneos cum consilio Fratrum discretorum, vel constituere, vel absolvere: ipsos verò constitutos in suis officiis diligenter informare, & potestatem quam eos habere voluerit taxare, & si expediens viderit in scriptis eisdem tradere licentias quoque aliquas generales dare pro loquendo; vel de remanendo ab horis aliquibus, vel aliis quibusdam, quæ ad exequendum officia sua necessaria reputantur. Non licet autem ei aliqua officia ad manum suam tenere, nec de ipsis se multum intromittere; sed potius officialium negligentias corrigere, & in eis quæ faciendæ fuerint, ipsos frequenter sollicitare, & instruere. Fratres verò ipsos perturbantes corripere, reprimere, & pacem eis Fratrum procurare. Cavere etiam ne occasione officiorum, ea quæ sunt Ordinis negligent Officiales, aut omitant; nisi quantum propter officium compelluntur, vel de licentia rationabiliter eis permisum fuerit, aut concessum.

*Circa varietates Fratrum suorum.*

**I**tem ipsius est cognoscere tam interius, quam exterius varias condiciones, & complexionem & dispensationes Fratrum suorum, & non eodem modo tractare omnes: & coaptare se (quantum ratio, & Religio permittit) singulis, secundum eorum dispositionem; & absque peccato debet aliorum infirmitates, & defectus tam morum, quam corporum portare. Aliorum proterviam, & contumaciam humiliare, pusillanimes roborare, desolatos, & tristes consolari, naturaliter impatientes ad horam sustinere: vitiosos debet corrigere, de Societate Fratrum ejicere contagiosos, ferventiores plus debito refranare: periculosos sollicitè custodire, ipsosque si contingat interdum



dùm exire, associare caute: juvenes de facili non exponere: maturos, & idoneos ad fructum faciendum, non permittere otio de facili torpere: inutiles ad fructum animarum, circa negotia, & officia domus occupare. Cùm autem tempus extiterit, quòd Fratres ad prædicandum, vel quærendum necessaria fuerint dispergendi; est ei de hoc tractandum cum Fratribus senioribus, & discretis. Summopere verò illi, qui apti sunt ad magna, vel officia Prioratum, vel Lectoratum, dare opportunitatem ad proficiendum in studio: & ad hoc etiam compellere ipsos cùm fuerint negligentes. Sic agendo in similibus, & dissimilibus, modò privatè, modò publicè, modò dure, modò blandè, modò verbis, modò disciplinis, modò pænis, modò recreationibus, modò per se, modò per alios Fratres discretos agendo, modò licentias negando, modò concedendo dare debet singulorum, & Ordinis profectibus operam efficacem. In trahendis verò, & recipiendis Novitiis, tantam debet in Deo habere fiduciam: quòd nunquam propter onus domus, aut expensas in vestibus, si pauperes fuerint, repellat aliquos, qui ad Ornem idonei reputantur. Nec rursum debet ita esse facilis, quòd Ordo oneretur personis inutilibus, & veniat in contemptum. Nullum quoque debet licentiarum ab Ordine, abique Magistris, vel Prioris Provincialis licentia speciali.

#### *Circa Fratres aliorum Conventuum.*

**I**tem Fratribus, & Conventibus vicinis, debet se favorabilem, si eo in aliquo indigerint, exhibere: eis piè in eorum necessitatibus, in quibus poterit subvenire, bona aliqua procurare. Advenientes Fratres charitativè suscipere, & tractare: & secundum quòd eorum status requirit plus, vel minus honorare. Quando verò de aliis Provinciis venerint lætius eos videre, & in provisione eorum, quibus indigerint, ut sunt scutellæ, nautum, vel vestes interdum, & hujusmodi: antequam cogantur petere, prævenire, & ipsos commodius recreare. Cavendum est tamen ne curialitatis causa ad hospites, Fratres ad hoc se extendant, ut in hospitio nimis sine necessitate rationabili detineantur: vel quòd ibidem dissolutiones fiant, vel quæ sunt Religionis dissipentur: quin potius ad Capitulum evocandi sunt, & corrigendi charitativè, & ad ea servanda, quæ sunt Ordinis inducendi, & si necesse fuerit, compellendi.

#### *Circa Extraneos.*

**I**tem laborandum est ipsi, ad amicos Ordinis conservandos, & multiplicandos, & habendam gratiam Prælatorum, Magnatum, Sacerdotum, Cleri, & Nobilium, & si fieri potest, omnium aliorum. Proinde debet omnes affabiliter recipere, eos etiam in suis negotiis honestis libenter per Fratres, & per se juvare, illorum aliquos magis interdum visitare, ad hospitalitatem aliquos magis familiares recipere, & invitare: & Fratribus eis notis aliquas licentias super hoc cùm expenderit dare. In hoc tamen cavendum est, ne superfluitates aliquæ, quæ paupertatem nostram non deceant, pro eis fiant: & ne ad tantam recipiantur familiaritatem, quòd infirma nostra videntes minus appretient, quòd autè in reverentia habebant. Providendum est ei cum discretione, qui inducantur in hospitium, & qui in refectorium, & quòd quando comedunt in hospitio pauci Fratres, aut interdum nulli, cum eis comedant: cum autem in refectorio deputandi sunt Fratres, qui eos associant intrando, & exeundo, & eos collocent

in suis locis. Hoc provisio, quòd in mensa Prioris non ponantur passim personæ minores, nec muretur ordo deferendi scutellæ, nisi pro magnis personis, sicut sunt Episcopi, Comites, & majores hjs: & nihilominus ultima scutella feratur tunc Priori, & pro hujusmodi personis, & non minoribus, in refectorio remaneat ad gratias. Alii verò in Ecclesiam sequantur Fratres, vel alii Fratres ducant eos ad capitulum, vel ad locutorium: & ibi redditis gratiis, ducantur ad lotionem manuum in lavatorio. Majoribus verò, qui remanent in refectorio, ministratur ibi aqua ad lotionem prædictam post gratias, & postea secundum morem patriæ, tam hi, quam alii prædicti ducendi sunt ad hospitium, ad bibendum, vel ad capitulum ad loquendum: & quocunque ducuntur habenda sunt cum eis verba sancta, & edificatoria. Instruendi sunt quoque ab eo fervientes, & Fratres, ad quos supradicta pertinebunt, circa prædicta, & alia facienda: & providendum est, quòd tales fervitores tunc ponantur, qui omnia expedire faciant, & decenter. Cavendum est autem ne in mensa Prioris collocentur nisi personæ dignæ reverentiæ: nec etiam omnes hujusmodi immediatè juxta eum collocentur, nisi magna reverentia hoc exquirat: quòd etiam strictius servandum est circa Priorem Provinciale, & Magistrum, cum in illa mensa fuerint. Non debet autem cedere Magister loco suo, qui est ante campanam, nisi pro Rege, vel Cardinali, vel Legato, vel Episcopo, vel Electo. Pro Abbatibus vero, & Majoribus, ut sunt Cluniacenses, Cistercienses, & similes: Archidiaconis, & Decanis, Magister potest aliquantulum cedere, ita quòd campana sit inter utrumque. Priores vero Provinciales, vel Conventuales pro minoribus causis possunt cedere, primo, vel secundo modo: ita tamen, quòd non sine rationabili, & decenti causa.

#### *Circa fructum animarum.*

**I**tem ad officium ejus pertinet scire clare, & plene, & cum nescit diligenter certificari ab aliis, cujusmodi potestatem habeat Ordo in confessionibus audiendis, in prædicationibus, in dispensationibus, & in absolutionibus circa Fratres, & alios multos. Scire etiam cujusmodi potestatem habeat ipse ab Episcopo suo, vel Episcopis vicinis, circa confessiones, & absolutiones tam pro se, quam pro aliis Fratribus: & quid in hujusmodi potest committere Fratribus, & quid non. Et cavere debet ne ultra potestatem, quæ habetur, fiat aliquid à quocunque. Procurandum etiam est ipsi, quid, & quantum, & quibus expediat in hujusmodi committere Fratribus. Ipsos vero, qui novi sunt Sacerdotes, vel etiam antiqui minus instructi circa ista, instrui diligenter, ne circa salutem animarum oberrent. Et licet quantum rationabiliter fieri potest sit ei zelandum pro animarum salute, tamen magis expedit pro Ordine, & Fratribus, quòd minor potius fiat fructus, quam cum fructu multo fiant Fratres occasio periculi, vel scandali; dum minus idonei laxantur indifferere ad prædicandum, ad consilia danda, & ad confessiones audiendas, & similia.

#### *Circa temporalia.*

**I**N procurandis quoque temporalibus, sive per se, sive per Fratres, cavendum est ei quantum fieri potest, ne graventur homines notabiliter, & ne fiant quæstus inhonesti. Cogitandum quoque est ei, quòd hujusmodi sic acquisita, cum timore Dei, & paritate congrua

expendantur: ne propter negligentiam custodiendi depereant, vel prodige consumantur. In ædificiis vero nulla curiositas, sed sola Fratrum commoditas est attendenda qualiscumque, & Religionis opportunitas est ei quærenda. Et quia Fratres laici propter Fratrum, & Religionis servitia corporalia concessi sunt in Ordine, non sunt recipiendi, nec procurandi, nisi quibus necessario indigent Fratres; et attendendum est ei, quod qui erunt in domo, omnes utiliter occupentur.

#### *Circa familiam.*

**F**amilia quoque nonnisi necessaria, & de cuius honestate, & fidelitate firma præsumptio habeatur, nullatenus est habenda. Circa quam providendum est etiam, ut ipsi habeant Fratrem instructorem, & correctorem, ut per ejus diligentiam apud Fratres proficiant in his, quæ pertinent ad salutem animarum suarum. Provideatur autem, quod non sit notabilis in lascivia, vel ætate, vel pulchritudine, vel ornatu. Cum autem recipiuntur, fiat eis protectio, quod Fratres nolunt eis tenere in aliquo, quin Fratres possint eos quandocumque voluerint, etiam sine mercede licentiarum, vel expellere: si sibi à mortalibus peccatis non caverent, vel bona domus distraherent, quamdiu essent cum eis. Providendum est tamen ipsi, quod illi, qui laudabiliter Fratribus serviunt, non fraudentur iustâ retributione: etiam si Fratres ex pacto eis non teneantur; & quando incurant infirmitates, vel impotentiam in servitio Fratrum, non expellantur, sed charitative cum illis agatur.

### CAPUT IV.

#### De Officio Supprioris.

##### *Circa Priores, & Majores.*

**O**fficiū Supprioris est, cum institutus fuit quærere diligenter à Priore, & retinere memoriter, cujusmodi potestatem vult eum habere, sive in præsentia, sive in absentia sua, & non ultra se extendere. Aliquando etiam eadem, quæ dicta sunt de officio Prioris inspicere, & notare quid sibi convenire possit, sive ratione officii Supprioratus, sive ratione Vicariæ, cum Vicarius Prioris relinquatur, & illa cum illis, quæ Constitutiones sibi concedunt facere sollicitè. Item ipsius est conservare memoriter mandata, & ordinationes Prioris Conventualis, Visitatoris, Prioris Provincialis, Capitulum Generalium, & Provincialium: & dare operam, quod à Fratribus plenariè compleantur. Item ipsius est Priorem fideliter adjuvare: quæruforum, & turbantium alios, non se receptorem exhibere; & de his, quorum curam ei injunxit Prior, ut hospitum, vel infirmorum, & hujusmodi, sollicitè servare, vel curare. Ad ipsum etiam pertinet pacem Prioris erga Conventum, quantum potest, procurare: & in factis ejus, quæ turbant aliquos, quantum conscientia permittit, ipsum apud alios excusare: pro his quoque, quæ utilia sunt Conventui, sive corporalia, sive spiritualia, apud ipsum intercedere; & gravamina, si quæ facit, eidem ipsi charitative ostendere, & quandocumque occurrerit occasio inter Priorem, & Conventum, fidelis mediator esse. Ideo enim Supprior est, & super alios, ut sit mediator eorum. Ipsi etiam Priori debet majora quando emergunt reservare, & quæ corrigere non valeret ei denunciare, & de his, quæ agenda sunt, vel corrigenda frequenter cum eo tractare. Item notabilia, quæ emerferint in absentia Prioris, debet eidem cum venerit referre, licet fuerint

correcta, & circa ea, quæ fuerint facienda ab ipso, cum fuerit oblitus, vel negligens, aut occupatus aliis, ipsum debet sollicitare. Item ipsius interest specialiter Visitatorii, & Provinciali statum Domus, & Fratrum, & Prioris enarrare fideliter: & super his scribere Priori, vel Capitulo Provinciali, vel Generali interdum, cum major necessitas hoc requirit.

##### *Circa Conventum.*

**I**tem ipsius officium est de Conventu magnam, & specialem curam habere, & quasi continue cum ipso esse. Cum autem propter processionem, vel funus, vel alios casus emergentes fuerit convocandus Conventus, debet de convocando ipso, & de ducendo, & reducendo diligentem curam habere. Provide etiam debet, quod non nimis citò, vel nimis tarde, sed debito modo furgat; quod signa, quæ ipsum convocant, debito modo fiant: quod nunquam inutiliter moretur aliqui expectando: quod hora debita comedat, & intret dormitorium, quod nunquam sine rationabili causa extraordinarie congregetur, & omnia fiant decenter, & ornate. Cum autem in absentia Prioris tractatur de Priore in Conventu, vel de aliquo; sive tempore quo tractatur de mittendo ad Capitulum, sive alio; debet ipsum regere, & inordinationes, & insolentias, si quæ emerferint, cohibere. Si autem aliqua ordinantur, quæ Priorem, & alios, qui non adsunt, non expediat scire, potest imponere, quod illud non reveletur. Hebdomadam etiam suam, ubi non est multitudo Fratrum nimia, debet in Conventu, suo tempore facere, & in Conventu ubique in sinistro Choro primum locum habere: & in absentia majorum signa facere in Choro, & in fine Horarum *Fidelium* dicere; & in absentia Prioris, quæ dicta sunt supra de Priore, supplere pro eo. Item debet habere curam, quod sigillum Conventus custodiat: & quod nihil sigilletur cum illo, nisi negotia Conventus.

##### *Circa Religionem.*

**I**tem ad ipsum pertinet, quod Religio in Domino plenè servetur, & distinctè. Et ideo curare debet, & apud Priorem laborare, quod habeantur in Domo bene correctæ, & bene legibilia, Regula, Constitutiones, litteræ Magistrum, Acta Capitulum, & præcipuè admonitiones: & quod totum officium Ecclesiæ diligenter servetur. Ut autem per oblivionem non negligatur, debet ordinare communicato consilio Prioris, si præsens fuerit, quod interdum cum plures Fratres interfunt, legantur Constitutiones, & litteræ prædictæ, aliæque Rubricæ de officiis, quorum notitia frequentius indigent Fratres. Debet etiam laborare, quod habeantur in domo vitæ Patrum, & liber Collationum, & hujusmodi libri, ex quorum lectione proficiunt Fratres in Religione; & præcipuè juvenes sollicitare, quod in hujusmodi partem studii ponant: & ordinare, quod in Refectorio in serò legantur: Item ipsius est advertere defectus, & offensas, quas faciunt Fratres in quocumque officio in Conventu, vel qui aliquid de Religione omittunt, vel in aliquo reprehensibiliter gerunt se: & ipsos quandoque extra Capitulum, quandoque in Capitulo accusare, & corrigere. Item si dubietas de aliquo pertinente ad officium, vel Religionem inter Fratres oriatur, certitudinem debet habere à majoribus: & quod diffinitum fuerit, facere observare. Manifestos quoque errores, & inordinatos, qui sunt publicè in Conventu statim corrigere, maxime in absentia majorum.

*Circa Vacationem Prioratus.*

**I**tem ipsius interest, vacante Prioratu, ad tractandum de Priore creando convocare Conventum, & cum consilio Fratrum diem ad electionem Prioris assignare: absentes vocandos vocare, ac dare operam, quod bonus Prior eligatur. Ad Priorem Provincialem mittere garziones pro huiusmodi negotio, vel alios, cum necesse fuerit, & à missione Fratrum quantum commodè fieri potest, abstinere. Item ad eum pertinet apponere curam, quod Prior citò habeatur, & interim Conventum in bono statu custodiat: quod pauca immutet, quod nihil magnum interim attentet, nisi fortè magna necessitas, vel evidens utilitas hoc exposcat, & consilium magnum concurrat. Debet quoque Priorem cum aliunde venerit, vel statum Domus, vel Fratrum ignoraverit, sollicitè in huiusmodi instruere, prout viderit expedire. Ipsique prout poterit, solatio esse, onera ipsius, circa primordia maximè, fideliter ferendo.

## CAPUT V.

## De Officio Magistri Novitiorum.

*Circa se ipsum.*

**O**fficiū Magistri Novitiorum est in primis inquirere à Priore, quam potestatem velit eum habere super Novitios in confessione, & dandis licentiis de loquendo, & huiusmodi: & in providendo eis in necessitatibus, quoad vestes, quoad jejunia, & aliis huiusmodi. Item quas licentias Generales vult ei dare ratione officii quoad personam suam, sive de loquendo cum omnibus, sive cum solis Novitiis: vel de intrando officinas, vel de remanendo ab horis interdum, & cavere ne licentias petat, vel recipiat, nisi quas rationabiliter reputat sibi necessarias propter officium suum, & quod ipsis ad aliud non abutatur. Item diligentiam magnam apponere debet circa Novitios, sciens quod tota spes eorum Religionis, dependet ex informatione eorum primitiva. Se quoque eis ita amabilem debet reddere, quod sit eis ex hoc occasio libentiùs in Ordine remanendi. Item respicienda sunt ab eo diligenter ea, quæ habentur in Constitutionibus ad eum spectantia, & complenda.

*Circa ingressum Novitiorum.*

**I**tem cum aliquis debet ingredi, ducendus est ab eo in aliquem locum extra capitulum idoneum antequam intrer Capitulum: & ibidem debet dicere aliqua verba ei consolatoria, & inquirere de his, quæ in capitulo publicè sunt inquirenda. Et si invenerit in eo aliquid de impedimentis, debet hoc notificare illi, qui habet eum recipere, antequam ulterius procedatur: & fiat tunc, quod ei videbitur faciendum. Si verò nihil talium invenerit, nihilominus debet ei dicere, quod hæc inquirentur ab eo in capitulo, & quomodo debeat respondere. Item ibidem debet eum instruere, quomodo sit venia facienda in capitulo, deinde in choro, & si viderit expedire ei, ipse Magister faciat, vel ab alio Fratre faciat fieri coram illo, ut melius sic addiscat. Item debet eum instruere quid debeat facere, vel respondere in capitulo, ad ea, quæ dicentur ei, secundum quod scriptum est in Constitutionibus: & quid postmodum sit ei faciendum in choro cum illuc ducetur. Item debet eum docere quomodo in capitulo removebit vestes seculares usque ad tunicam, & providere, quod omnia pertinentia ad vestes sint parata in capitulo, antequam eum

inducat: Postea debet eum introducere, & usque ad locum veniæ ducere, & ibidem propè eum stare: & dirigere, si necesse fuerit in agendis, & juvare ad ipsum vestiendum. Et egrediente Conventu ipsum ducere in fine, usque ad locum veniæ antè Altare, & ibidem interim propè eum stare, quousque finitis Orationibus fuerit erigendus ab ipso. Quo erecto ducendus est ab ipso, extracto aliquantulum caput ad receptorem, & aquà benedictà aspersus, ad osculum recipiendus, & ab omnibus Fratribus, per choros diccurrendo: & primò per dextrum, deinde per sinistram, ipso Magistro eum semper sociante, & in omnibus eum dirigente. Deinde ad locum tonsionum immediatè est ducendus ab ipso: proviso prius, quod in hoc nullus sit defectus. Facta autem tonsura, & rasura, postmodum citò hora competenti ducendus est ad locum, in quo deponat omnes vestes seculares, & seculares: ut solum ea, quæ sunt Religionis, deinde habeat. In remotione secularium vestium, & inductione regularium, curialiter est instruendus.

*Circa Professionem.*

**P**orrò ut sciatur quando sit completus annus probationis, scribenda est ab ipso dies receptionis: & appropinquante termino anni, animandus est ab ipso ad profitendum, si viderit eum utilem pro Ordine, aliter non. Et cum petierit recipi ad professionem, antè diem professionis petitionem ejus in capitulo proponere debet, & de eo cum requisitus fuerit, sive pro eo, sive contra eum, fidele testimonium perhibere: ita tamen quod per testimonium, vel consilium suum nulla mala suspicio possit in cordibus Fratrum de ipso generari: de aliquibus illorum malorum, si quæ sunt, quæ ipse per confessionem novit, & aliter, & ab aliis nesciuntur. Sanè cum recipiendus fuerit Novitius ad professionem, assignanda est dies professionis, & ante illam instruere eum in omnibus, quæ ei tunc fuerint agenda: videlicet qualiter venia sit facienda, & ad verbum dicentis: *Quid petis?* respondendum est: *Misericordiam Dei, & vestram.* Et cum erectus fuerit, & propositum ei fuerit de voluntate profitendi, quid respondendum? quomodo verba professionis sunt ei cordetenus retinenda, & quomodo flexis genibus inter manus recipientis sunt dicenda: & quomodo antequam dicat illa, si vult petat quod mutet ei in professione alia vota, si quæ alia habeat. Deinde quomodo solus ille, qui recipit ad professionem, post illum receptum, recipit eum ad osculum pacis. Ad ipsum etiam pertinet providere, quod aqua benedicta, & liber, in quo est oratio benedictionis vestium, sint in promptu, & benedicendam vestem offerre benedicienti: & deinde professio tradere (quod non solet fieri nisi de scapulari) postmodum autem debet mittere professum ad locum suum. Si autem viderit expedire, debet suggerere Priori, quod adhuc ad majorem humilitatem, & informationem, sit cum aliis Novitiis in capitulo eorum, & sub cura sua ad tempus: secundum quod utilitas illius, & Ordinis requirit.

*Circa repulsam.*

**I**tem ipsius interest, cum aliquis minùs benè se habet in probatione, circa tempus professionis consulere, quod adhuc stet in probatione, nisi omnino sit certum, quod nullatenus expediat, quod recipiatur, & hoc ad videndum si melius se habebit: cum protestatione tamen, quod adhuc tanquam Novitius, & solum ad probationem retinetur. Si ergo benè se postea habuerit, debet ipsi postmodum adiutorium præstare.



stare, quòd ad professionem recipiatur. Si autem non fuerit spes in processu temporis, quòd bene se habeat, procurandum est ei tam apud Novitium, quàm apud Fratres, quòd recedat: & dandum est ei consilium, & auxilium, quòd in aliqua Religione sibi magis comperenti ponatur. Non autem debet esse facilis ad repellendum, nisi magnæ causæ concurrant: & Fratribus minùs rationabiliter motis ad repellendum eum, prout melius potest, bono modo contrarium persuadere, & pro Novitio stare. Nunquam autem repellendus videtur invitus Novitius pro illiteratura, vel impotentia aliqua, vel deformitate corporali, & hujusmodi defectibus, qui ab initio noti fuerunt Fratribus: nec propter infirmitatem supervenientem, nisi à principio receptioni facta fuisset protestatio expressa, quòd pro hujusmodi casibus, vel pro sola voluntate, possent eum Fratres repellere si vellent. Cum autem recedere debebit, providendum est sollicitè ipsi Magistro, quòd tam urbanè, & caute, & occultè, & cum omnibus bonis suis, quæ portare voluerit recedat: quòd aliis non sit scandalum, nec ipse scandalizatus recedat, sed potius quantum fieri poterit ædificatus, & cum amore Ordinis, & Fratrum.

#### *Circa Scholam, & Capitulum.*

**I**tem ad eum pertinet laborare, quòd aliquis locus sequestratus, & remotus ab accessu secularium, & idoneus habeatur, qui sit quasi schola Novitiorum, ad quem ducendi sunt, cum ipse, vel alius Frater habuerit loqui cum eis de eorum necessitatibus, & de quocumque alio. In hoc loco instruendi sunt in cantu, & legendo quæ nesciunt, addiscere possunt. In hoc repetendum est ab eis quidquid habent legere, vel cantare in Conventu: & auscultandum, & reddendum cordetenus illud, quod de Psalterio, & divino Officio cordetenus scire oportet; videlicet Officium Mortuorum, & de Beata Virgine, Psalmi de Horis diurnis, & Vesperarum per ferias. In hoc faciendæ sunt eis admonitiones interdum, vel collationes, vel colloquutiones ædificatoriæ ab ipso, vel Fratribus ad hæc gratiosis: ipso procurante familiares colloquutiones, & consolationes. Cavendum tamen est ei, ne Fratres quicumque adjungant se eis sua voluntate, nisi de sua licentia, & quibus viderit expedire. In hoc etiam loco docendi sunt de Regula, de Constitutionibus, de Officio, & aliis, quæ in docendo locutionem requirunt. In hoc etiam loco (si alius aptior non habetur) tenendum est eis capitulum: in quo cavendum est, quod Novitius per multos dies non accuset se, nec accusetur, quousque multoties viderit quomodo alii se accusant, vel accusantur: nec molestandi sunt in aliquo pro culpis, quas in primis incurrunt. Si verò non fuerit nisi unus Novitius, vel duo, mittendi sunt aliqui de juvenibus profectis ad capitulum eorum, qui se accusando multis diebus, exemplo suo eos doceant, quomodo sunt hujusmodi faciendæ. Cavendum est autem ipsi Magistro, nec in capitulo eorum aliquid fiat, quòd alicui verecundiam inducat: & quòd modus capituli scriptus in Constitutionibus bene fervetur; quod magis informationi eorum intendat, quam punitioni culparum. Sunt etiam instruendi, quod ad locum capituli sui conveniant, cum in capitulo Fratrum dicitur: *Excant Novitii*, si tunc debet eis capitulum teneri, vel alio tempore cum teneri debet: & quomodo finito capitulo recipiant disciplinas, qui recipere debent. Et postea, vel alio certo tempore, & loco assignato ab eo, loqui de confessione. Cum

*Cod. Regul. Tom. IV.*

autem tanta fuerit multitudo Novitiorum, quod Magister non potest plene sufficere omnibus, potest aliquibus magis novis, aliquos magis instructos assignare: qui circa eos curam habeant de aliquibus, prout eis videbitur expedire. Non tamen debet ita aliis imponere onus, quin ipse nihilominus sit frequenter cum eis, & eis quantum poterit intendat.

#### *Circa necessitates.*

**I**tem ipsis Novitiis semper pie compatiens debet cogitare, quod competenter secundum quod Ordo, & facultates permittunt, habeant necessitates in victu, in vestitu, in lecto, in infirmitatibus, & in hujusmodi: & dispensare quandoque cum necessitas fuerit in vigiliis, & facile in jejuniis Ordinis. Cavere etiam debet ne singularitatibus aliquibus in abstinentiis, vel vigiliis, vel aliis afflictionibus indiscretis, conterant corpus suum. Porro circa pauperatatem, & necessitates, quas interdum secundum Ordinem oportet sustinere, sic debet eos animare, & ab omni superflua recreatione retrahere, ut à principio quantum fieri potest asperis assueti semper Ordinem tolerabilius ferant: & declinare, prout commode potest, ut causa recreationis ad commune hospitium, vel minutionem, vel infirmitarium (ubi interdum fiunt dissolutiones majores) sed alio ducantur. Et cum oportebit ducere illuc, habeatur cura ab ipso, vel ab alio, quod tarde veniant, & cito recedant; & Fratres cauti reddantur, quod coram eis dissolutiones non fiant. Ipsos quoque debet Novitios confortare, quod in quibuscumque aliquo indigerint, ad eum sicut ad matrem recurrant. Et debet eos docere, ubi sit lectus, vel cella sua, ut si die, vel nocte ipso indigerint, sciant, ubi poterunt eum invenire, & illuc ad eum recurrant. Debet etiam & docere eos, quomodo in necessitate in loco silentii per unam dictionem, vel imperfecte loqui possunt: & quomodo in hujusmodi locis digito ori superposito sciant petere licentiam loquendi.

#### *Quo ad membra sua.*

**I**tem ipsius officium est informare diligenter, & sollicitè Novitios circa hominem exteriorem, & interiorem. Circa exteriorem, quo ad membra sua, ut manibus caveant ab omni tactu indecenti, & ab injurioso: pedibus à vagis, & incertis discursibus, & ne intrent loca prohibita. Cum federint ne coxas nimis disjunctas teneant, vel unam tibiam super aliam ponant; cum maturitate incedant, nec se moveant de facili ad eundem sine causa præmeditata. Cum autem steterint, non sicut arundo mobilis, sed potius appareant sicut fixi super gradum suum. Oculis quoque caveant ab intuitu rei, quam non licet concupiscere, à vagatione, ab haulu vanitatis, & aspectu turpi, & curioso. Linguam assuescant refrænare, licet invitam, & libentiùs audiant quam loquantur. Cum autem loquendum fuerit, pauca sint verba, & priùs ad linam quam ad linguam veniant. Omnibus autem cum reverentia loquantur: per pluralem dicendo potius *vos*, quam per singularem *tu*: nunquam de Fratre, vel Fratribus loquendo vocent eum sine additione hujus nominis *Frater*, nec nomen novum imponant *Fratri*, vel impositum recitent ullo modo, nec aliquid cum juramento quantumcumque levi, more secularium proferant. Cum autem majoribus loquuntur, semper caputium extrahant: vultum non tristem habeant, sed jucundum moderate. Os ad cachinnos, vel ad risus dissolutos pronum non habeant, licet ad risus mediocres ipsum interdum aperiri sit tolerabile. Cervicem, & collum erectum non habeant, sed potius mediocriter

X.

ter

ter inclinatum. Iram, vel impatientiam in vultu, vel actu aliquo non ostendant: Supercilia non erecta, sed potius depressa habeant. Aures, non ad rumores seculares, & otiosa, sed ad ea, quæ Dei sunt, & salutaria faciles, & veloces habeant. Nares ad fetores aliquos si occurrant, non sicut delicati cum scandalo intuentium nimis notabiliter obturent; sed pro odoribus, in quibus malè delectati fuerant in seculo, ista in pœnitentia patienter ferant. Quòd in faciendo venias non prosternant se super ventrem, sed super latus, & in longum, tibiam unam super aliam tibiam tenendo. In prostrationibus verò super cubitos se appodient iunctis manibus stando. In inclinationibus verò usque circa genua caput deponant. In genuflexionibus, stent super genua capite elevato.

#### *Quo ad vestes.*

Item quo ad vestes informandi sunt, ut eas diligenter secundum modum Religiosum, non lascivum sibi coaptent, in omni loco, & tempore providentes, quod inferiores tunicæ non appareant ultra superiore, & quòd tunicæ non nimis sint succinctæ, aut brevitate notabilior, & maxime cum transeunt per villas. Quòd cappa, vel caputium non sint ultra formam Constitutionum longa: in Conventu, & in quocunque loco, caputium non nimis super oculos habeant: quod ad cameras è contrario vadant, & stent capite cooperto. Quòd in cameris sedendo vestes circa se non nimis elevent: sed potius se ipsos honestè cooperiant. Quod in discalceando, & calceando se sotularibus, aut caligis, tibias non nimis elevent. Quòd ubicunque sedeant, caveant ne vestes eleventur. Quòd cum tunicas deponunt, retento caputio per aperturam tunicam superiorem, vel inferiorem si voluerint deponant. Et quòd cum intrant lectum, aut surgunt, vel ad ministrandum in Altari se parant, nunquam, sine caputio in capite appareant. Quod in Conventuali loco discalceati, vel in caligis, vel soccis, sine sotularibus nunquam vadant. Quòd sedendo, vel inclinando, cappam super genua compliceant, vel caputium, cum fuerint sine cappa. Quòd in loco Conventuali, nunquam deferant ad modum mantelli cappam. Quòd in rasura, & lotionem capitis, caputium inversatum retineant, & in lotionem pedum nunquam ultra genua se discooperiant. Quòd ad primam tunicam cingulum, & cordam pro brachiali habeant. Quòd ad disciplinas se parando, cincti corrigia retenta, & cappa, & caputio, vel caputio solo pro tempore, superiores partes tunicarum cadere primò permittant, & postea cappam, vel caputium super caput replicent. Quòd cappellum nunquam sine necessitate ferre assuescant, & quando ferunt vile sit: & quòd nunquam in loco Conventuali extra caputium appareant. Quòd provideant ne pellicem per collum, vel alias appareat unquam Quòd ad extraneos cum bottis magnis nunquam vadant, & de die sine necessitate nunquam ferant: quòd cum jacent, caputium, vel in capite retineant, vel ipso caput cooperiant, & quòd sic semper se cooperiant, quòd aliquid indecens in eis videri nunquam contingat. Quòd lectum postquam surrexerint decenter cooperiant, & quòd subitus, vel circa, nihil appareat, quòd videri, vel non deceat, vel non expediat. Quòd lectisternia, & vestes munde custodiant; & non sub lecto, sed in loco honesto alio replicata reponant, & interdum excutiant, & tempore suo ad lavandum tradant, & de modo excutiendi doceantur. Quòd cum serviunt in Refectorio, vel Hospitio, cappam deponant. Cum autem in lavandis pedibus, vel capitibus occu-

pantur, honestè se succingant, caputii prima parte cum corrigia ligata. Quòd ad lectum, vel cellam alterius, sine causa valde necessaria non accedant. Quòd vestes, vel sotulares (cum alii indigent) habita licentia libenter concedant. Quòd abjectas, & humiles vestes carius complectantur. Quòd quando novæ dantur, veteres semper reddant, & quæ sunt ultra numerum in Constitutionibus expressum.

#### *Circa loca, & primo de Choro.*

Item ad officium ejus pertinet instruere eos circa loca, quæ eis licet intrare sine licentia, quæ non; & quando sunt signa, ad quæ loca debent convenire secundum varietatem signorum, sive ad Ecclesiam, sive ad Capitulum, sive ad scholam, sive ad Refectorium, sive ad collationem, sive ad repetitionem officii, sive ad infirmitorium cum infirmi fuerint, & hujusmodi. Item quòd nunquam se ingerant inter Fratres colloquentes, nisi vocati fuerint, aut adducti. Quòd in omni loco ubi Conventus fuerit congregatus, religiosius, & maturius se gerant, & in Choro præ cæteris, præcipue quando ministrant ibi in aliquo officio, vel quando sunt admonitiones, adorationes solemnes, ut in die Parasceve ad adorationem Crucis; vel oblationes, ut in festo Purificationis cum cærei offeruntur, & hujusmodi, & maxime vero tempore communionis; circa quæ, & similia instruendi sunt, quomodo se habeant secundum formam traditam in Ordinario, cujus Rubricæ ad hæc pertinentes suis temporibus sunt eis exponendæ, & addendæ, quæ in illis minus plenè continentur: sicut est, quòd mappam cum duabus manibus urbanè sub mento applicent, quòd recepta hostia terram non osculentur, sed solum aliquantulum caput inclinent, & recedant ad locum, ubi flexis genibus hostiam consumant; qua consumpta ad calicem cum reverentia accedant, & alia ad hujusmodi pertinentia ordinatè faciant, & honestè. Docendi sunt etiam, quos libros, & quibus horis ad Chorum deferant, & ut finitis horis reponant eosdem decenter: & quomodo de nocte candelas pro absconsis accendant tempestivè, & ad libros ipsas teneant; caventes, ut poterint, ne lumine lædant oculos aliorum, & cum aliis diligenter cantent, & psallant.

#### *Circa Refectorium.*

Item instruendi sunt circa Refectorium, quomodo lavandæ sunt manus: ad quod cum primo debent venire, vestes replicent, ne eas deturpent, & ubi lotis manibus sedeant. Quomodo intrantes Refectorium, ante imaginem quæ est ante mensam Prioris aliquantulum inclinent. Quòd in prandio, vel cœna ordinatè intrent, & sedeant, & exeant sua loca tenentes. In collatione verò non exigitur istud. Quòd collocantes se ad sedendum, non nimis unum super alium se comprimant: sed tantum sit spatium, quòd competenter in illo valeant excreare. Quòd se collocent ante præparatam aliquam portionem. Quòd non nimis citò postquam sederint ad modum secularium comedere incipiant, sed cum maturitate, mappa explicata, & pane inciso. Quòd panem, vel aliam pistantiam superflue non scindant, vel in frusta comminuant, sed forum quantum comedent. Quòd paraturas panis notabiles non faciant. Quòd vinum (nisi temperatum fuerit) temperare assuescant. Quod à deturpatione manicarum, & cappæ, vel mappæ nimia, caveant. Quòd pro modica effusione vini, vel aquæ, vel aliis hujusmodi minimis, in fine veniam facere

cere non oportet. Quod singularitates in comestione non faciant: sed comedant, quod apponitur cum gratiarum actione; & si aliquod genus ciborum non consueverint comedere, affuescant, ut possint inconsueta comedere. Quod scutellas, quando comederint quod placebit, ponant in loco apto ministris ad tollendum. Quod oculos vagos ad respiciendum quid alii faciant, non habeant. Quod circa finem mensæ advertant quando alii finiunt comestionem, ita ut eos in protrahendo comestionem expectare non faciant. Quod cum alii replicare mappas cœperint, & ipsi replicent decenter: semper reliquias, & panem removendum anreponant, vel servientibus discurrentibus ad tollendum, in canistro eorum projiciant decenter. Quod etiam prædicta, & alia hujusmodi, quæ ad honestatem pertinent, servant etiam alibi ubicumque eos comedere contingat, & magis quando seculares contigerit interesse. Quod (nisi forte aliquando data fuerit licentia loquendi ab aliquo, qui hoc possit,) nihilominus servant silentium, aut valde parum loquantur.

#### *Circa Locutorium.*

Item instruendi sunt, quod ad locutionem, vel ad locum alium loquendi, facile non vadant, nisi vocati fuerint, vel ex aliqua causa rationabili, & præmeditata. Tolerabile est autem, ut interdum vadant illuc ad horam, propter tollendum fastidium, vel aliquam recreationem habendam, sed cum licentia, & speciali ad hoc Socio deputato, qui ad recreationem honestam eis faciendam idoneus reputetur. Verum in hujusmodi locis non est loquendum de facili, nisi sedendo, & sine clamore: & nunquam est coram Novitiis disputandum, vel contentiose loquendum; sed de aliquo utili querendum, vel conferendum. Si autem ad seculares vocati fuerint, nunquam sine licentia speciali, & Socio ad hoc deputato, est ad eos eundum. Cum autem sint cum eis, debent dare operam, ut eos ædificent, religiose, & mature se habendo: vultus hilaritatem præstendendo, de rumoribus non curando, verba salutaria inferendo, eos si perversi fuerint reprehendendo, & mala quæ fecerint detestando, & eis de religione, vel pœnitentia potius persuadendo, & periculum status secularis ostendendo. Non autem est immorandum cum eis in quacunque locutione, sed inventa curialiter aliqua occasione recedendum est festine. Item docendi sunt quod semper libentius morentur in claustris cum Fratribus, quam extra cum secularibus. Item quod libentius in claustris morentur in loco silentii, ut sunt cella, oratorium, & hujusmodi, quam frequent locutoria. Item quod libentius intersint in locis omnibus cum Conventu, quam extra in locis aliis extra Conventum, ut sunt hospitium infirmorum, & hujusmodi. Item quod libentius declinent ad loca, ubi sunt maturi, & religiosi aggregati, quam ubi sunt dissoluti, & leves. Item quod libentius currant ad loca in quibus audiuntur utilia, ut sunt scholæ, & locus collationum; quam ad alia in quibus contigit interdum audiri inutilia, ut sunt hortus, & plateæ curiosorum. Item quod libentius veniant ad loca, in quibus in aliqua actione salubri occupantur, ut est lotio pedum vel vestium; quam inutiliter discurrant per Domum. Item quod plus diligant loca, in quibus exercentur magis utilia, scilicet pertinentia ad Religionem, & virtutem, ut est Capitulum, & Oratorium; quam alia in quibus minus utilia, & pertinentia ad scientiam, vel corporis necessitatem, ut sunt scholæ, Infirmitorium, & Refectorium, & hujusmodi.

*Cod. Regul. Tom. IV.*

#### *Circa tempus.*

Item instruendi sunt circa tempus, quod ipsum non solum quando sunt in occupationibus Conventualibus, sed etiam totum residuum utiliter expendant. Et ideo inter duo signa post dictum Officium de B. Virgine, & quodcumque Conventus congregatur, vel congregatus aliquid expectat, & intrando lectum, & surgendo, vel in lecto cum jacentes dormire non possunt; vel cum spatiando per hortum, vel claustrum deambulanti soli, & hujusmodi similibus temporibus, debent aliquas orationes dicere, vel aliquid salubre meditari. Similiter, tempus quod est inter gratiarum actiones, & dormitionem in æstate post prandium, in oratione, vel lectione, vel aliqua actione utili sub silentio occupent. Item tempus quodcumque conceditur ad loquendum, si in hoc recreare moderate voluerint, reddere sibi utiles recreationes hujusmodi ad finem debitum dirigendo: videlicet ut fortiores ex hoc reddantur ad Ordinis actiones, & servitium Creatoris, vel in hujusmodi recreationibus de repetitionibus lectionum, disputationum, vel sermonum, vel aliis utilibus cum aliis pertractando, vel dum his vacant, aliis, vel aliquibus quæ sibi agenda sunt; ut si habent aliquid facere in vestimenta, vel similibus, tunc intendendo. Sunt etiam docendi, quod in cella nunquam sint otiosi, sed legant, aut scribant, aut orent, aut meditentur utilia. Item juvando Fratres in quibuscumque officiis, vel servitiis libenter occupentur. Quod non de facili, otiosi discurrant. Quod aliqua mechanica, quæ nesciunt, ut sunt scribere, qui nesciunt, vel similia interdum addiscant. Quod ad officium mortuorum extraordinarium libenter remaneant. Quod in itinere rumores, & otiosa declinent: sed de aliquo utili querant, vel conferant cum socio, vel cum aliis, cum quibus fuerint, sive in Domo, sive in via; quod aliquem librum ferant, in quo cum non melius fecerint, & vacaverint, semper legant.

#### *Circa servitia.*

Item ipsius est instruere Novitios, quomodo servire debent in Missis privatis, in ministerio Altaris, in Conventu, & incensando Chorum: in Refectorio, & hujusmodi, tam in spiritualibus, quam corporalibus servitiis diversis; secundum quod in Rubricis, & in descriptionibus officiorum diversorum continetur, & addat, quod minus continetur in illis. Sunt etiam animandi, quod libenter in hujusmodi serviant, vel suppleant vices Fratrum cum fuerint requisiti, & præcipue in magis humilibus, sicut est lotio pedum, mundatio Domus, lotio vestium, serviri infirmis, parare mortuos, & hujusmodi. Cavendum est tamen ei, ne de facili occupentur in servitiis extra Conventum, propter dissolutiones, quas facilius videre ibidem possunt.

#### *Circa reverentiam.*

Item instruendi sunt, quod reverenter se semper habeant, & ubique. Quod quando transseunt ante imaginem aliquam, vel Altare, vel alia sacra, inclinent, & caput extrahant aliquantulum. Quod in Officio Divino dicendo extra chorum reverenter se gerant, cum maturitate dicendo: quod dicendum est sollicitè providendo, in nullo alio se occupant, & humiliter inclinationes, & prostrationes bono modo faciendo. Quod non solum Prælati suis, immo etiam omnibus honorem exhibeant, & præcipue senibus Sacerdotibus, Prioribus in Ordine, sanctitate famosis, & hujusmodi, pro ut variae conditiones requirunt. Fiat autem reverentia hæc multis modis: scilicet cum trans-



eunti assurgitur, cum ante alium non nimis propè transitur, cum ante alium inclinatur, aut genuflectitur; cum sedenti decenter assistitur, cum iuxta sedentem sedere volens aliquantulum à longè se collocat, vel sedere volenti sedens assurgit, vel cedit, vel loqui volens ante alium extrahit caputium, vel in humili servitio ministrat, vel alium in via, vel in omni verbo anteponit, vel cum prære in aliquo cogitur, cum reverentia hoc facit, & aliis variis modis, quæ secundum plùs, & minùs sunt exhibende diversis, & præcipuè Prælati, non solum Ordinis, sed etiam Episcopis, quibus secundum consuetudinem regionum sunt interdum manus osculandæ, vel genuflexiones faciendæ, similiter Regibus, & Magnatibus.

#### Circa Confessionem.

Item instruere debet eos circa Confessionem, quomodo plenè, & benè confiteri sciant, suppledo cum nesciunt per interrogationem de peccatorum generibus, & circumstantiis: quod, & de quibus circumstantiis debeant confiteri. Item quando recordantur, vel advertunt in scripturis aliquod peccatum, quod ante nesciebant, vel quod non sunt confessi, vel aliquod de novo occurrerit in cogitationibus, vel omissione alicujus eorum, quæ sunt de Ordine, & similibus: debent citò venire ad confitendum ista. Item quando possunt scribere confessionem, ut per scriptum melius sciant quando erunt, plenè & benè confessi.

Item attendendum est ei, quod det eis bona consilia, quomodo expediantur de restitutionibus, de irregularitatibus, de votis, si istis fuerint irretiti. Item & docendi sunt, quod in confessione nihil celent, nec de præteritis, nec de emergentibus, nec de tentationibus quibuscumque, nec de visionibus, aut visionibus sibi accidentibus, nec de singularitatibus, si quas supra alios facere voluerint: & quod super his, & similibus semper credant Magistro suo, ne forte aliquo modo decipiantur. Item cum fuerint nimis scrupulosi, quomodo non oporteat eos de aliquibus, vel timere, vel confiteri: cum autem fuerint negligentes circa confessionem, quod certo, & assignato tempore confiteantur. Item quomodo venientes ad confessionem debent facere veniam, & dicere *Mea culpa*: & erecti flexis genibus, inclinato capite, & procumbentes, extracto caputio incipere debent, dicendo: *Confiteor Deo Omnipotenti, & B. Mariæ semper Virgini, & B. Dominico P. N. & omnibus Sanctis, & tibi Pater, quia peccavi nimis cogitatione, locutione, opere, & omissione, mea culpa*, vel causa brevitaris, sic dicere: *Mea culpa, ego peccavi in hoc, & in hoc, & in fine dicere: Et in multis aliis, mea culpa, precor te orare pro me*; & recepta pœnitentia, & absolutione, & completa instructione, si in aliquo Confessor cum instruere voluerit, surgere debet, caputium reponendo ut primo. Item quod nunquam cum conscientia alicujus peccati mortalis ingrediantur lectum de nocte, vel accedant ad Sacramentum aliquod, vel ministerium Missæ, sive in Conventu, sive in privatis Missis, nisi prius confiteantur. Item quod non confiteantur, nisi Magistro suo, vel Priori, sine licentia speciali. Item quod quando per primam Confessionem generalem non est eorum conscientia satisfactum plenè, possunt secundo, vel pluries Confessionem generalem iterare, ut tunc eis plenius satisfiat, cum sciunt melius confiteri.

#### Circa Orationes.

Item circa Orationem debet eos instruere, quod non solum Psalmos, vel orationes formatas debent dicere: immò secundum varias necessitates modo pro peccato, vel offensa aliis, vel talibus remittendis, vel cavendis, vel pro talibus defectibus tollendis, vel talibus gratis, aut virtutibus conferendis, & similibus devotè supplicare. Item, quod orationi ad contritionem, vel devotionem incitandam potius debent intendere, quam in multis dicendis laborare. Item non solum sui, sed etiam parentum, & amicorum, familiarum, & benefactorum, & etiam peccatorum, & infidelium Deum ignorantium, aliorum, qui adhuc longe sunt à Deo, & per diversa detinentur peccata, debent memores esse. Item tempora otiosa debent in aliqua oratione occupare, & aliquem locum ad hoc idoneum in Ecclesia eligere: vel ante Altaria singula discurrendo ibidem, ad quodlibet aliquam orationem facere specialem, vel in quocumque loco facere idem. Item, quod in orationibus communibus magis, quam in privatis debent confidere, & illis libentius interesse: sive in Horis, sive in privatis post Completorium, post Matutinas, & quod ad hæc benè, & devotè dicenda, debent magnam curam adhibere; & quod ante plenam terminationem Horarum, vel gratiarum, è Choro sine necessitate non recedant, nec etiam ipsis terminatis, nisi prius aliquantulum orent, vel Deo se commendent. Item, quod cum legendo, vel audiendo intelligunt aliqua, in quibus peccaverunt, vel omitendo, vel committendo, vel aliqua bona, quæ eis defunt: debent in ipsa lectione converti ad orationem, pro malis amovendis, vel bonis adipiscendis. Item quomodo in perplexitatibus, dubiis, & tentationibus, & difficultatibus, & in principio novarum actionum ad orationem recurrere: & quomodo pro malis quibuscumque, quæ vident, vel audiunt, tollendis, vel remittendis assuescere supplicare, & pro bonis gratias agere, & in omnibus tam prosperis, quam adversis, semper Deum laudare oporteat. Item quomodo laborare debent, ut in his, quæ dicunt orando, cor versetur; quod si non semper fecerint, non tamen debent propter hoc desperare, quin orationes sint fructuosæ; nec propter impugnationes, quas aciores interdum ibi faciunt inimici, debent eis cedere, & orationes dimittere. Item, quod in orando non debent se super ventrem, nec se totos extendere, vel caput nimis inclinatam tenere: sed potius stando super genua, erecti, vel aliquantulum incurvati orare debent.

#### Circa Studium.

Item instruendi sunt ab ipso circa studium, quod secularibus scientiis neglectis, se totos transferant ad divinas: & inter alias à principio magis vacent utilibus, & planis, quàm subtilioribus, & obscurioribus; & præcipuè illis, quæ utiliores sunt ad informationem, & inflammationem ipsorum, ut sunt Meditationes B. Bernardi, S. Bonaventuræ, & Divi Anselmi: Liber Confessionum S. Augustini: Collationes, & Vitæ Patrum, & Dicta eorum: Passionis, & Legendæ Sanctorum. Epistola ad Fratres de Monte Dei: D. Bernardus de gradibus superbiæ. Item Lib. de diligendo Deum. Et Libri Fr. Ludovici Granatensis. Item Tractatus de vitiis, & virtutibus, & similia. Item, quod potius intendant pauca sapere, & memoriæ commendare, & circa illa se afficere, & se informare, quam multa legere. Item quandoque alia audiunt, vel legunt, considerent,

si possint sibi ad aliquid valere, & indeali quam ædificationem trahere. Item, quod semper libenter audiant, & ad docendum non festinent. Item, quod quando incipiunt facere collationes, vel sermones, potius studeant circa bonum modum dicendi, & utilem materiam, quam circa multitudinem verborum: & quod semper multitudinem caveant, sive in audiendo lectiones plures, & nimias, sive in legendo nimis: sive in docendo multa in collationibus, & in sermonibus, & lectionibus, si quandoque contingat ipsos Lectores fieri. Item, quod nunquam sic sint ardentes circa scientiam, quod propter studium negligant ea, quæ sunt Religionis, vel virtutum, vel charitatis. Item, quod nunquam de libris, & scriptis suis sint avari, sed libenter illa aliis communicent; & quod nunquam confidentiam de sciendo aliquid ponant in scriptis, sed potius ingenium, & memoriam excitent ad sciendum cordetenus quidquid possunt.

#### *Circa Meditationes.*

**I**tem circa Meditationes instruendi sunt, quod tempus interdum expendant: vel cum sunt in via, vel cum per claustrum, vel hortum, vel alibi per Domum quasi spatando deambulant; vel cum sunt in orationibus secretis, vel in cella, vel in lecto vigilando quiescunt. Sunt autem Meditationes huiusmodi habendæ quandoque circa Dei beneficia generalia, vel particularia: quandoque circa peccata in gratitudinis humani generis generalia, vel propria modo circa opera creationis, modo circa opera Redemptionis, ut est Incarnatio, Passio, & huiusmodi; modo circa præmia bonorum, modo circa poenas malorum: modo circa vindictas jam factas, modo circa misericordias exhibitas, modo circa creaturas, modo circa scripturas, modo circa proprios defectus: modo circa profectus, modo circa fallacias demonum, modo circa ministeria Angelorum, modo circa exempla Sanctorum, modo circa peruersitates perverforum, modo circa statum suum interiore, modo circa exteriorem: modo circa facta recogitando, modo circa facta faciendo, modo circa Dei omnipotentiam, modo circa ejus scientiam, modo circa bonitatem, modo circa severitatem, modo circa ejus misericordiam, modo circa iustitiam, modo circa judicia manifesta, modo circa occulta. Sunt autem in huiusmodi, & similibus, diversæ trahendæ affectiones, modo spei, modo timoris, modo doloris, modo gemitus de malis, modo suspiria ad bona, modo admirationis, modo exclamationis, modo gratiarum actionis, modo supplicationis: modo verecundiæ, modo reverentiæ, & huiusmodi, quæ per experientiam melius, quam per doctrinam addiscuntur.

#### *Circa alia exercitia multa.*

**I**tem instruendi sunt, quod de visionibus videntis, & miraculis faciendis non curent, cum hæc parum valeant ad salutem, & interdum in his homines illudantur; sed potius curent de virtutum operibus, in quibus salus consistit. Item, quod si consolationes divinas, quas audiunt alios recipere, non habent, non inde contristentur; sed sciant hoc interdum ex causa subtrahere pium Patrem. Item, quod si compunctionis, vel devotionis gratiam non habent, non ex hoc reputent se non esse in statu bono: dummodò bonam habeant voluntatem, cum ipsam solum respiciat Deus. Item circa conscientiam dirigendi sunt, quod ipsi purgandæ, curam magnam habeant, & opponant: quod non nimis scrupulosam, vel audacem habeant, quod contra ipsam nihil faciant, quod erroneam ad consilium deponant. Item intentionem in omnibus operibus

saltem à principio ad Deum erigant, & vana si quando advenerint, abjiciant. Item, quod nullam affectionem carnalem ad aliquam personam habeant suspectam, vel in se diu durare permittant: & quod caveant ne affectiones sanctæ in carnales transeant. Item quod propriam voluntatem frangere assuecant, sensum singularem penitus dimittant, privatum amorem ad aliquid nunquam habeant. Item, quod in omnibus obedientiam præponant, & propter ipsam omnia alia etiam bona dimittant. Quod tam sibi, quam aliis in melioribus bonis, quam minoribus libentiùs vacent, & intendant. Quod virtutes eorum, quos audiunt laudabiliùs vivere, diligenter notent, & imitentur pro posse. Quæ autem suprâ ipsorum vires, vel naturam sunt, potius admirentur, quam imitentur. Quod super lapsus aliorum non indignentur, sed compatiantur, & sibi à similibus timeant. Quod de factis aliorum non cogitent, nec de domus negotiis sint in aliquo solliciti, sed tantummodo de se. Quod omnia agent cum discretionè, quæ summè consistit in hoc, ut non sensu suo se regant, sed alteriùs, & maxime Magistri sui. Quod ea, quæ audiunt in scripturis de virtutibus, & operibus à Deo acceptis, studeant exercere; & vitia, seu mala, quæ quotidie in ipsis scripturis plus, & plus cognoscunt, diligenter cavere.

### CAPUT VI.

#### *De Officio Magistri Conversorum.*

**A**D Officium Magistri Conversorum pertinet scire à Priore, postquam imposuerit ei istud Officium, qualem vult eum habere potestatem super eos: sive Novitios, sive Professos, sive in confessionibus audiendis, sive in licentiis dandis, sive in corrigendis excessibus. Item respicere diligenter, quæ prædicta sunt de Officio Magistri Novitiorum, & illa, quæ de illis ad Conversos, sive Novitios, sive Professos pertinere possunt, notare, & circa illos executioni mandare. Item debet eisdem exponere de Regula, & Constitutionibus, quæ ad eos pertinent: & ea, quæ dicuntur in Actis Capitulum Generalium, vel Provincialium, vel in Capitulo Conventuali, vel à Priore Conventuali, vel à Priore Provinciali, vel Visitatoribus, vel à Suppore, vel Vicariis ipsorum. ad hos pertinentia sollicitè retinere, & eisdem notificare, & observanda imponere: & *Ecce noster*, & *Ave Maria*, & *Credo in Deum*, cum nesciunt docere, non in scriptis, sed cordetenus. Item debet eis tenere Capitulum tempore, & loco ad hoc à Priore assignato, & accusationes Fratrum Clericorum, quas in capitulo suo, vel extra de eis faciunt retinere: & eos super his in capitulo proclamare, & Fratres Clericos, qui interdum ad capitulum eorum propter hoc veniunt, recipere ad accusandum, & excessus majores Priori relinquare ad corrigendum. Ipsum quoque Priorem Conventualem invitare frequenter ad tenendum eis capitulum: & tam ipsum Visitatorem, quam etiam Priorem Provinciale (cum ad domum veniunt de corrigendis circa ipsos, debet instruere. Item studium debet apponere, ut fiant eis exhortationes utiles, & ad statum suum pertinentes: sive sermones, sive collationes, sive per alium, sive per se: ita tamen quod pauca semper dicantur eis una vice. Procurare etiam debet, quod sit aliquod signum in Domo, per quod convocentur, vel ad suum Capitulum, vel ad Capitulum Clericorum, secundum diversitatem signorum: & cum vocandi fuerint, debet illa signa facere. Accusationes quoque eorum contra Clericos (si quas habent) debet ex par-

re ipsorum in Capitulo Clericorum facere, & molestatores eorum accusare, & ab injuriis aliorum prout potest defendere: & cum irrationabiliter aliqui insurgunt in eos, in Capitulo, vel extra quantum potest cum bona conscientia, eorum innocentiam ostendere, & in sua iustitia semper eos fovere. Item debet esse certus, quod confiteantur frequenter, vel sibi, vel Priori, vel alii de licentia speciali; & si negligentes fuerint, statuere eis certum tempus, & locum, in quibus confiteantur. Item debet eos in officiis, quæ eis imponuntur interdum instruere, quomodo illa faciant sollicitè, & plenè, & diligenter. Item illis qui nesciunt, aliquam artem in Ordine necessariam, debet assignare de illis qui sciunt aliquem, qui eos doceat, & ad discendum eos compellere. Item debet eos summe incitare ad laborandum semper, & libenter in aliquo opere pro Conventu: & propter hoc licentiarum eos ab omnibus horis sive de die, sive de nocte, præterquam à Completorio, à quo non sunt licentiandi, nisi propter servitiis quæ tunc ex necessitate sunt facienda. In Festis, etiam similiter sunt licentiandi propter officia quæ tunc oportet fieri, & etiam concedendum est eis, quod nunquam teneantur ad Missam Conventualem, vel Horas Canonicas præter Completorium: sed sufficiat eos audire aliquam Missam privatam, & dicere horas ubi voluerint. Illis etiam qui instante hora dormitionis de die laborant, poterit indulgeri ne surgant ad Matutinas. Coercendi sunt etiam à multitudine Missarum audientiarum, & ab audiendo Horas Conventuales, cum propter hoc labores omittant. Instruendi sunt etiam diligenter ab eo quando sunt inter extraneos, ut honeste se habeant, & mature, & quod ad mensas magnorum se non collocent, nisi invitati, & tunc etiam cum quadam difficultate. Item debet esse sollicitus pro eis, quod in infirmitatibus, & aliis eorum necessitatibus, charitative ministrentur ei necessaria. Item cum senserit eos scandalizatos ex aliquibus ordinationibus quæ interdum sunt circa eos per capitula, vel majores, quæ reputant fieri in eorum contemptum, piè, & prudenter debet eos sedare: ostendendo quomodo non in contemptum eorum hæc fiant, sed propter aliquam causam rationabilem. Sicut supra Priores, & Lectores, & alios interdum sunt similia, non in contemptum eorum, sed propter aliquam utilitatem Ordinis, ostendendo quomodo in statu honorabili magis sunt apud nos, quam alii Conversi in aliis Ordinibus. Item debet eis reducere ad memoriam, quomodo, faciunt candem professionem, quam & Clerici: ut ex hoc intelligant se ita esse obligatos, ad ea quæ sunt Ordinis, & sic non negligent ea, quæ sunt Religionis. Item ubi habent dormitorium separatam, debet jacere cum eis, ubi vero non habent separatam, debet saltem jacere propè eos. Debet etiam quandoque de eis sollicitudinem specialem habere, ubique notare defectus, & offensas eorum, & ipsos charitative corrigere, vel ad partem, vel in Capitulo. Cum aliqui fuerint ei inobedientes, quod supravires suas est, debet majoribus referre, ut per eos melius emendentur.

## CAPUT VII.

*De Officio Correctoris familiae.*

**F**RATER cui imponitur cura de familia, debet præ cæteris Fratribus curare, quod non recipiantur in familia nisi tales, de quibus sit bona spes, quod honeste se habeant inter Fratres. Cum autem recepti fuerint, debet habere cu-

ram quod sibi, vel alii confiteantur frequenter, & de hoc debet esse certus. Instruendi sunt etiam ab eo, cum ei confitentur, vel alio cui confitentur, ipso procurante. Circa confessionem, quod piene sint confessi, & quod sciant benè confiteri. Item informandi sunt ab eo singulariter, & insimul de modo habendi se honestè, & cogitandi, & laborandi pro salute sua; & interdum faciendæ sunt eis aliquæ collationes ab ipso, vel ab alio, ipso procurante, & ordinante: & curet, quod veniant ad sermones, qui sunt ad populum in Domo cum possunt, vel ad sermonem qui fit Conversis interdum, si Priori visum fuerit. Item quod laborent fideliter, & diligenter in suis officiis: & qui fuerint in coquina mundè faciant omnia, & bono modo parent quæ habuerint ibi præparare, & ea quæ nesciunt sollicitè addiscant, vel à Fratribus, vel ab aliis de familia qui sciunt. Item quod per villam non discurrant nisi pro necessitatibus Domus, & cum licentia; nec pro servitiis Fratrum specialibus dimittant communia, nisi de licentia Prælati speciali. Item debet Priori ostendere, & apud eum procurare, si clausura Domus est minus bona, quod sic aptetur, quod non possint egredi de nocte, vel hora dormitionis: ne forè ex nimia requisione ab eorum devotis, videantur modo aliquo abhorreret. Item debet esse sollicitus quæ sit fama de eis, vel intus, vel extra, & considerare facta eorum, & vitam; & quod invenerit, vel per alios audierit corrigendum in eis, ad partem corrigere, vel interdum in communi quasi per modum capituli possunt eis penitentia aliquæ tolerabiles tamen injungi. Et est eis dicendum in principio quando veniunt, quod si volunt esse cum Fratribus, quod ipsi ita corrigantur. Cavendum tamen est omnino ne unquam ipse, vel alius Frater eos percutiat, non solum ex ira, sed nec ludo, nec etiam causa correctionis. Fratres quoque qui excedunt in eos, vel indebitè eos molestant, vel aliquod malum exemplum ostendunt eis, vel in aliquo reprehensibiliter se habent circa eos, debet proclamare in Capitulo: & cum minus rationabiliter loquuntur contra eos, debet eos excusare prout potest cum bona conscientia, dum non sunt in culpa super illis quæ dicuntur. Item cum aliquis petit recipi in Conversum, debet fidele testimonium perhibere quid super hoc expediat: magis attendendo Ordinis utilitatem quam illius petitionem. Cum autem aliquis invenitur talis, quod non expedit Fratribus, ut cum eis moretur, debet apponere curam quod sic urbane licentietur, quod non scandalizetur contra Fratres, sed cum amore eorum, & Ordinis recedant, & ad id laborandum est circa omnes qui recedunt à Fratribus quocumque modo. Porro circa advenientes garriones debet cavere, quod nunquam introducantur alicubi ultra portam: nisi prius constet, quod sint apud Fratres alios unde veniunt intimi, & familiares valdè, & quasi unus ex eis. Debet autem instare apud Procuratorem, vel Priorem, quod fiat eis in porta, vel in villa quoad jacendum, illud quod fuerit faciendum. Debet etiam laborare quod illis qui gratis serviunt, & propter Deum Fratribus, vel laudabiliter se habuerunt inter eos, Fratres sint magis grati, devoti, & in suis necessitatibus ampliorem eis exhibeant charitatem. Ipsi etiam interest majorem apponere diligentiam, quod omnia quæ de ipsis ordinantur in Capitulis, vel à majoribus, executioni mandentur: sicut est illud, quod divisi jaceant tam illi de Domo, quam extranei. Quod non habeant vestes notabiles in pulchritudine,



dine, vel ornatu, vel pretio, vel colore: & rursus, quod non habeant vestes similes Conuersis, nec tondantur ad modum eorum. Quod non recipiantur ad secreta, & familiaria seruitia Fratrum, ut est lavare pedes Fratrum, servire in hospitio, in Refectorio, in Infirmaria. Quod carnes pro eis non parentur. Quod nullus Frater singularem habeat gartionem. Quod quando mittuntur, ita provideatur eis in expensis, quod alios Fratres non gravent, & similia. Et quæ non potest deducere ad effectum, debet ad Priorem deferre, & ipsum sollicitare, ut hoc faciat observari.

## CAPUT VIII.

## De Officio Cantoris.

*Circa libros, & scripta.*

**O**fficiu Cantoris est sollicitare Priorem, ut totum officium bene correctum habeatur in Domo, & si negligens fuerit circa hæc, apud majores eum accusare, & laborare sollicitè quod hoc faciat emendare. Pertinet etiam ad eum libros Ecclesiasticos corrigere diligenter in cantu, & verbis, & punctuationibus, & accentibus, & hujusmodi: vel per se, si scit, vel per alios si nescit, adhibita auctoritate Prioris; & eosdem mundos servare, præparare, & reparare in camisiis, & coopertoriis, & in ligaturis, & malè tractantes accusare. Item debet respicere diligenter totum officium, & firmare cordatenus, & maxime ea quæ ad ipsum pertinent, secundum quod notata sunt in diversis locis, & rubricis; & in notula præfenti, quæ continet multa, quæ alibi minus plenè sunt notata. Item oportet procurare quod aliquod armarium habeatur in Choro, vel in Sacristia, vel alibi, prout videbitur locus magis idoneus deputatus ad hoc, in quo libri omnes de Choro reponantur: præter libellos processionales. Et inde per ipsum, vel per alium, si Prælatu visum fuerit, deportentur ad Chorum tempore officii, prout necessarii fuerint, & postea reportentur. Ipsius autem est distribuere ipsos per Chorum, prout videbitur expedire, sive pro funeribus, sive processionibus. Item ipsius interest ponere in aliqua cedula, quæ affigenda est parieti in Sacristia in loco apto, numerum Missarum, & Orationum, quæ injunguntur in Capitulo, vel à majoribus cuilibet Fratri, vel Conventui, ut Fratres sciant ad quid tenentur, & quando solverunt totum, & de Missis quæ debentur à Conventu specialem curam debet habere, ut solvantur quam citò commodè fieri potest, & facere memoriale de solutis. Item quando emanat aliquod mandatum, quod fiat aliquod Festum, vel memoria alicujus Sancti, vel alicujus defuncti Anniversarium, vel memoria alicujus animæ perpetuò per Orationem aliquam in Missa, debet hoc inferere per scripturam in libris, in suis locis. Item ipsius est procurare apud Prælatum, quod aliquæ rubricæ de officio, quæ magis sunt necessariae ad sciendum, legantur in Refectorio interdum, maxime quando Fratres plures interfunt; & similiter illæ, quæ habent majorem difficultatem, & minus sunt usitatæ, ut sunt illæ, quæ pertinent ad tres dies lamentationum, & similes, legantur instantibus diebus, ad quos pertinent. Item ad ipsum pertinet formare litteras, quæ interdum ad alia loca mittuntur pro suffragiis impetrandis, & procurare per quem mittantur. Forma autem hujusmodi litterarum est talis: *Tali die obiit Frater talis in tali Conventu.* Similiter recipere hujusmodi litteras quando mittuntur aliunde, & tradere eas ei, qui legit Kalendas, ut eas re-

citet in Conventu ante illud: *Commemoratio Fratrum, & Sororum &c.* similiter in rotulis qui mittuntur interdum pro suffragiis scribere. Et scribi solet hoc modo. *Titulus Fratrum Prædicatorum talis loci: anima ejus, & animæ omnium fidelium defunctorum requiescant in pace. Oramus pro vestris, orate pro nostris. Die tali fuit rotulus apud nos.* Item debet auscultare Fratrem, qui voluerit, qui habet aliquid legere, vel cantare, loco, & tempore ad hoc assignato. Et etiam si fuerint aliqui rudes in his, debet eos per Priorem facere corrigi. Interdum etiam cum occurrunt novæ historiae, vel alia ad cantandum difficilia, debet convocare Conventum hora qua videbitur Priori, ut communiter cantus hujusmodi prævideatur, & repetatur. Item ipsius interest facere tabulam semper, nisi forte ad alleviationem ejus alii injungatur à Priore. Debet autem ipso procurante haberi tabula bona, & ad hoc officium apta, & de littera bona, per illum, qui eam scribit, vel alium sibi ad hoc assignatum, & ita tempestivè, quod in Sabbato legi possit cum Kalendis post lectionem de Constitutionibus, vel de Evangelio illa tabula, quæ est pro septimana; illa verò quæ fit pro Festis, & aliis diebus, in menia præcedentis diei. Debent autem omnes absque acceptione personarum scribi ad officia tempore suo, qui possunt, & sciunt ea facere: nisi forte aliquibus ex causa de licentia Prioris parcatur quoad aliquod officium; hoc tamen proviso, quod in Festis, & diebus quando plures conveniunt, talis Sacerdos ponatur ad officium, qui laudabiliter sciat dicere, & maxime Missam. Qui autem ex impotentia, vel ignorantia, vel de licentia non facit illa officia, debet sic in aliis recompensare, quæ potest facere, & ad illa scribi, ut fiat æqualitas qualiscumque. Cum autem post tabulam scriptam aliquis de Fratribus scriptis in ea debet recedere, vel infirmatur, vel alias habet causam rationabilem, quare non potest facere illud, ad quod scriptus est: debet hoc notificare Cantori, qui debet tunc alium scribere loco ejus. Quotiescumque immutat aliquid circa tabulam post pronunciationem ejus, debet notificare illi qui scribitur, & illi qui deletur. Porro defectu Fratrum qui defuncti, nec alios posuerunt loco sui, debet supplere autoritate sua, per se, vel alios, & omnes debent eidem in hoc obedire: & facientes defectus, debet tempore suo in Capitulo proclamare. Frater qui per quatuor dies facit officium ad quod scriptus est, & postea impeditus non potest residuum facere, septimanam fecisse reputetur. Si Prior ordinaverit, quod aliqui Fratres scribantur in tabula per septimanam, vel quindenam, vel mensem, vel amplius, ad aliqua officia, quæ non pertinent ad Ecclesiam: ut est servire infirmis, vel in hospitio, & hujusmodi; faciendum est secundum modum quem dixerit, & de personis, & de tempore. Tabula verò scripta collocanda est in Sacristia, vel in alio loco idoneo eminenti, & aperto, ut possint ibidem legere, qui eam non audierint, vel audientes non intellexerint: vel qui audierint, & oblivioni tradiderint, & ut sciatur quid quid debet facere, & quos defectus quis faciat

*Circa Sedes.*

**I**tem ad ipsum pertinet stare in Choro dextro, potest tamen causa officii mutare sedem, & stare modo supra, modo infra, modo in Choro majori, modo in Choro minori, & quandoque transire ad sinistram. In festis vero Duplicibus, & Toris Duplicibus, licet habeat stare in medio Chori incipiendo aliquid: tamen potest post inceptionem discurrere ante Fratres sui Chori, ad incl-

tandum eos ad cantandum melius: & interdum in Choro suo sedere inferius, vel appodiare se in aliqua sede. Ipsius est etiam collocare Novitios, vel alios Fratres de novo venientes in Choro altero, prout viderit expedire in suis se diebus secundum tempus, quo steterint in Ordine: quod à supervenientibus quærere, pertinet ad ipsum. Cum autem aliqui extranei intrant Chorum, vel ponunt se in ostio, pertinet ad ipsum secundum quod digniores fuerint, eos trahere ad locum honestum. Si autem abjectæ fuerint personæ, urbanè eos trahere à sedibus dignioribus, vel à toto Choro, si sine scandalo fieri potest. Ipsius etiam est dare operam, ne extranei nimis facili ter intrent Chorum, & maxime laici, vel pueri. Quod si Clerici aliqui cantent cum Fratribus, ipsius est in pausis, & cantu eos rectificare, ut Fratribus se conforment, & eos in locis debitis collocare. Ad ipsum etiam pertinet sic providere cum consilio Prioris utrique Choro de Fratribus, qui sciunt legere, & cantare, quod non sit inæqualitas notabilis. Cum autem propter absentiam Fratrum aliquando Chorus alter nimis est vacuus, debet innuere aliquibus de alio Choro, ut ad alterum se transferant, & illi debent in hoc obedire eidem: vel ad horam, vel ad diem, vel plus faciendum quod ipse ordinaverit. Ipsius etiam est novos Sacerdotes instruere circa Missam; & providere eis de auditore, & instructore idoneo in Missis primi, quousque sint sufficienter edocti. Similiter omnes promotos de novo debet in suis officiis instruere diligenter. Cum autem Abbas, vel Episcopus, vel alius extraneus celebraturus est in Conventu, debet providere quod tales ponantur ad officia, qui omnia sciant facere decenter, & ordinatè: & quod talem Sacerdotem sibi assistentem habeant (si viderit expedire) qui eos sciat in omnibus rectificare discretè. Cum autem tales celebrant, vel ministrant in Conventu, vel etiam Fratres celebrent, de quorum ruditate timet, debet accedere versus Altare interdum, ut si voluerint aliquid ab eo quærere, habeant ejus copiam, vel ipsemet eos in aliquibus præveniat: ut quando debet dici *Credo*, vel non, vel quando debet dici *Flectamus genua*, vel non; vel cujusmodi Orationes debent dici, & hujusmodi, maxime quæ non habentur semper in memoria à minus providis. Debet etiam notificare Sacerdoti in Missa, vel ante, quando aliqua Oratio, vel aliquæ Orationes sunt ex aliqua injunctio ne dicendæ in Missa: ut pro infirmis, vel pace, vel hujusmodi.

Item Missas, quæ non debentur, vel ratione diei, vel ordinis, vel alicujus injunctio nis, non debet dicere pro arbitrio suo in Conventu, sed cum consilio Prælati. Cum autem Missa fuerit celebranda, potest interdum inter primum signum, & secundum ad Sacristiam ire, ad sollicitandum Sacerdotem, & ministros super faciendis. Item ad officium ejus pertinet facere Officium, cum hebdomada pertinet ad Chorum dextrum: & semper ita cito venire ad officium, & maxime in septimana sua, quod in principio inchoationis sit; & ita continuè, & finaliter ibi manere, quod ex ejus absentia non sit defectus in aliquo. Item debet excitare dormientes in Choro, & torpentes incitare ad cantandum, & psallendum: & interdum eos ad librum ducere, ad melius cantandum, maxime in Festis devotioribus. Item Antiphonas in Choro suo imponendas debet injungere, similiter omnia cantanda, vel legenda, quæ ex Ordinario, vel tabula non sunt determinata à quo debeant dici, debet imponere in hebdo-

mada sua. Item Antiphonas de Choro suo debet reincipere, præter Antiphonas super Magnificat, & Benedictus in Duplicibus, & Totis Duplicibus. Similiter Alleluja in Missa in hebdomada sua, cum cantatur à pluribus. Item inchoare Psalmum ex parte Chori sui modo mediocri, & tenere tonum, & exaltare vocem, tam in Psalmis, quam in aliis, quando nimis demittitur, & facere signa cum manibus percussione ad pausas in Psalmis, vel Hymnis, & aliis hujusmodi faciendis distinctè cum notabiliter confunduntur, & ad illos, qui confundunt pausas, interdum accedere, ad corrigendum eos, sine strepitu manuum, & ira, sed cum pace & honestate, ne correcti perturbentur, & adstantes offendantur. Item Sacerdoti, in Festis præcipuis deferre versiculum, quem oportet dicere ante Laudes. Item, quando tarde surgitur ex errore ad Matutinas, facere festinare officium, & abbreviare lectiones. Item pertinet ad eum in hebdomada sua, in solemnibus processionibus, in sepultura officio, in ministratio ne Sacramenti infirmis, & hujusmodi, providere de ministris, si non sunt scripti in tabula: & si sunt scripti, reducere ad memoriam quid facere debeant. Debet etiam providere, quod omnes vadant ordinate, & quod qui facit officium, habeat librum sibi necessarium: & juxta eum stare frequenter, & rectificare eum, & alios omnes in his, quæ agenda sunt, vel dicenda. In Processionibus vero solemnibus pertinet ad utrumque, scilicet Cantorem, & Succentorem de his curam habere. Item ipsius interest in hebdomada sua cum Prælati non vult, vel non potest facere officia, quæ ad eum pertinent, & est præsens, de consilio ejus imponere alicui alii hujusmodi officia. Si autem non est præsens, vel ei loqui non poterit, debet alicui injungere, quod faciat officium: hoc observato, quod hujusmodi officia semper injungantur personis senioribus, & qui sciant ipsa facere competenter. Ipsius etiam est corrigere errores in quocumque errent, sive ab aliquo, sive à Conventu, sive in legendo, sive in cantando, sive in annexis Officio: ut sunt inclinationes, prostrationes, genuflexiones, sessiones, stationes, & similia, in quocumque loco, præterquam in Refectorio, in lectione, & super hujusmodi facere proclamationes. Ipsius autem correctionem omnes sequi debent (etiamsi erret) dummodo error non sit intollerabilis, & obedire ei in his, quæ pertinent ad officium, licet proclamandus sit in Capitulo, & corrigendus super his, in quibus erraverit.

## CAPUT IX.

## De Officio Succentoris.

Officium Succentoris est respicere diligenter, quæ prædicta sunt de Officio Cantoris, & circa ea, quæ dicta sunt de libris, & scriptis sollicitare Cantorem, & juvare eundem diligenter: & quæ ad se pertinent de illo titulo memoriter retinere, & studere in Officio diligenter, & firmare corderenus, & de distributione librorum in suo choro executioni mandare. Item pertinet ad eum juvare Cantorem circa tabulam faciendam, vel ipsam facere pro septimana sua, vel semper, si à Priore fuerit ordinatum. Defectum verò Fratrum debet in hebdomada sua supplere secundum modum, qui supradictus est de Cantore in Choro suo. Ipsius est etiam stare in Choro sinistro, & mutare sedem suam potest ratione officii in Choro suo, cum voluerit. In Festis Duplicibus, & Totis Duplicibus, post in ceptionem, quæ fit in Missa, vel in Choro, potest facere, quod supra notatum est de discursu, & sessione, & apodiatione Cantoris. Item de

ex-

extraneis collocandis, vel repellendis, & de Clericis, qui cantant in Choro suo reſtituendis, debet habere curam, ſicut ſupradictum eſt de Cantore. Cum autem Chorus ſuus nimis à Fratribus vacuus fuerit, ſi in alio abundat, poteſt innuere Cantori, ut aliquos mittat ad Chorum ſuum. Ad ipſum etiam pertinet facere in ſeptimana ſua circa Miſſam quicquid ſupradictum eſt ab illo loco: Cum autem tales in Conventu celebrant, vel Fratres, &c. uſque ad illum locum: Item officium ejus pertinet &c. Item ipſius eſt, cum hebdomada ſua fuerit ex parte ſui Chori, facere officium, & exequi diligenter ea, quæ circa officium Cantoris ſupra notata ſunt ab illo loco: Semper ita cito venire, &c. uſque ad illum locum: Ipſius autem correptionem &c. in quantum pertinent ad Chorum, & ſeptimanam ſuam: hoc excepto, quod correptiones, & directiones in Officio non pertinent ad eum ſuper totum Chorum, ſed ſolum ſuprà Chorum ſuum, niſi tempore hebdomadæ ſuæ, præter errores intollerabiles, quos ſemper poteſt corrigere Cantore non corrigente. Ad Cantorem vero pertinet illa omni tempore, quando ſibi videtur expedire. Item ad ipſum pertinet acquieſcere Cantori in dubiis, & etiam ſi male corrigat, vel dicat non debet ei contradicere in Choro, ſed corrigi debet in Capitulo. Item, quando Cantor non eſt præſens, debet ſupplere vices ejus, & tranſire in ejus ſeptimana ad Chorum ejus, & è contrario, quando Succentor, vel non habetur, vel non eſt præſens in Choro, debet Cantor facere pro eo, vel alii committere, ut ſuppleat vices ejus. Cum autem conſtituuntur aliqui adjuutores Cantoris, vel Succentoris, vel utriuſque; eorum intereſt ſupplere vices eorum cum deſunt, & cum præſentes ſunt juvare poſſunt eos, ſi in quibus fuerit de conſilio Prælati ordinatum.

## CAPUT X.

*De Officio Sacriſtæ.*

**O**fficium Sacriſtæ eſt curam habere de Eccleſia ſæpe ſcopanda, & ab araneis, & huiusmodi purganda, & munde ſervanda; & de choro magis, quam de navi, & de præſbyterio tam majoris Altaris, quam minorum, quam de choro. Et ubi eſt conſuetudo in majoribus Feſtis in æſtate herbas virentes, vel ramuſculos aliarum arborum, & in hyeme paleas ſternere in choro, & præſbyterio, & ante parva Altaria, & in Sacriſtia, & in capitulo: & habere curam de reparandis coopertoriis, ne unquam pluât in Eccleſia, & de aliis reparandis in Eccleſia, vel Sacriſtia, cœmeterio, & de ſeris, & clavibus oſtiorum omnium. Et debet hæc claudere, & aperire tempore ſuo, ſequens ordinem Prioris de horis claudendi, & aperiendi oſtium Eccleſiæ de die.

*Circa Pulſationes*

**I**tem ad eum pertinet omnis pulſatio, quæ fit in Eccleſia, niſi quando ſiunt cauſa Capituli, vel ſermonum. Porro primum ſignum ſic debet fieri, quod non ſit nimis prolixum, nec nimis breve, ſed mediè temperatum: hoc tamen magis, vel minus pro tempore obſervetur. Similiter ſignum, quod fit pro collatione, ad quod ſufficiunt quaſi quinque iſtus ex utraque parte campanæ. Secundum vero ſic debet eſſe prolixum, quod à principio illius poſſint convenire Fratres de omni loco in quocumque fuerint in domo, ad Eccleſiam: & tunc debet ſtatim terminare cum venerint omnes, non expectato

*Cod. Regul. Tom. IV.*

etiam ſigno Prælati. Spatium verò quod eſt inter duo ſigna, ſic debet eſſe temperatum præciſe, quod illo ſpatio poſſint eſſe Fratres expedi de Horis Beatæ Virginis, quas habent dicere: & de neceſſitate camerarum, & lotionem manuum hora Primæ. Ad Veſperas verò tali debet hora pulſare, quod poſt ſecundam menſam tempore binæ reſectionis, vel poſt Veſperas tempore jejunii, non ſit multum de ſpatio, vel tempore uſque ad horam Completorii. Ad Completorium vero tali debet hora pulſari, quod factò ultimo ſigno in æſtate ſit adhuc quaſi dies, in hyeme vero quaſi nox. Spatium verò, quod conceditur ad orandum poſt Completorium, nec nimis prolixum ſit, nec nimis breve; ſed mediè temperatum, & tam moderatum, quod Fratres communiter ſine ſaſtidio poſſint illud tempus in oratione expendere, quod reputatur poſſe fieri, cum tempus eſt tantum præciſe, quod poſſint in illo dici Pſalmi ſeptem, & Litanias. Signum vero ultimum ſic faciendum eſt, quod bene poſſit audiri ubique per totam domum. Cæterum de modo pulſandi ad Miſſam, & ad funus, poteſt conſuetudo patriæ obſervari. Conſuetudo tamen Ordinis magis generalis videtur eſſe, quod pulſatio ad Miſſam fiat per tres interruptiones. Ad funus verò, et ad proceſſionem, & ad unctionem faciendam, convocantur Fratres per ſignum in campana factum tantum ex una parte. Ad ipſum etiam pertinet habere curam, ut ſollicitet Priorem, & Fratres de bonis campanis habendis, & moderatæ magnitudinis, & de habendo horologio tali, quod non ſit notabile curioſitate, vel pretioſitate, magis autem detur opera, quod ſit verax, & certum. Et de conſilio Prioris, & Fratrum, horam ſurgendi ad Matutinas, & Primam, & Nonam tempore dormitionis diurnæ obſervet. Debet autem valdè eſſe ſollicitus circa pulſationes tempore ſuo, & modo debito faciendas, ne earum inordinatione contingat Conventum turbari, vel impediri.

*Circa Luminaria.*

**I**tem ipſius intereſt cura de habendis lampadibus, & oleo, & cera, & candelis, & cereis, & candelabris competentibus; & in miniſterio circa Altare majus, & in proceſſionibus, circa funera, & de miniſtrandis his tempore ſuo, & in lampadibus, cereo Paſchali: & aliis cereis circa majus Altare in Miſſa, in Veſperis, in Matutinis, in Completorio accendendis, & extinguis, & melius inflammandis, & emungendis. Similiter curam debet habere, & providere, quod non ſolum in majori Altari, ſed etiam in minoribus, cerei aliqui competentes ſecundum varietates dierum, & Feſtorum, & candelæ ſufficientes ibidem in choro ſemper ſine defectu habeantur. Debet etiam providere de candelis in hoſpicio, in infirmitorio, reſectorio, & Fratribus itinerantibus, & ſimilibus, vel plus, vel minus, ubi hoc ordinatum fuerit à Prioribus. Porro expenſas ad ſupradicta debet accipere à Procuratore, vel de quaſtu proprio, vel de oblationibus, vel alio modo, ſecundum ordinationem Prioris, & de omnibus computationibus ſecundum tempus computare. Beneficia verò collata Sacriſtiæ ſpecialiter debet recitare in Capitulo. Debet etiam habere ferrum, & lapidem, cum quo ſolet ignis excuti ad habendum ignem, ſi fortè eſſet neceſſe; in quo caſu contingit ignem non inveniri in domo. Item debet providere, quod hoſtiæ pulchræ cum pixidibus decentibus, & vinum purum, & ſanum, & bonum, & aqua recens, & munda, cum ampullis honeſtis: calices, veſtimenta,



ra, libri necessarii pro Missis, carbones in patellis tempore magni frigoris, flabella tempore mufcarum, thuribulum cum carbonibus, & thus in diebus festivis in majori Missa, & Crux deferenda in Totis Duplicibus, cufini, & mappulæ ad tergendas manus, & aliæ ad purgandos nares, candelabra, instrumenta apta ad candelas tenendas in Missis, & omnia alia necessaria pro Missis, tam in majori solemnitate, quam aliis semper habeantur in promptu, & in certis, & competentibus locis inveniantur, & reponantur. Cavere quoque debet ne hostiæ propter loci humectationem, vel alias corrumpantur, & cum minus idoneæ fuerint, alias ministrare. Debet etiam providere, quod in Sacrificia in loco competenti semper inveniantur aqua ad lotionem manuum volentium celebrare, vel ministrare, & mappulæ ad extersionem faciendam. Solent etiam haberi ibidem à quibuidam pectines honesti ad capillos componendos, & forcipes ad ungues scindendos ab illis, qui interdum his indigent, & hoc ibidem volunt facere. Debet etiam providere, quod in Sacrificia sit piscina, vel pelvis, in quibus recipitur ultima ablutio, & quod munde, & honeste, & sollicitè custodiantur in omni munditia, & quod in istis nunquam alia ablutio recipiatur, vel ad alios usus applicetur. Debet etiam procurare, quod aliqua scamna lignea sint circa minora Altaria apta ad orandum, in quibus interdum procumbere possint Fratres ministrantes, vel assistentes.

#### *Circa Sacramenta, & Sacramentalia.*

**I**tem accuratius quoque debet habere diligentiam magnam quod locus honestus, & decentis pulchritudinis habeatur super Altare, in quo Corpus Domini in pixide habeatur, & honestè sub clavi servetur.

Item, quod Oleum infirmorum ad faciendam Extremam Unctionem semper habeatur in Domo, & in honesta ampulla in loco honesto sub clavi conservetur.

Item si debent fieri Ordines in Domo, vel Confirmationes, vel Consecrationes Ecclesiæ, vel Altaris, vel Episcoporum, vel benedictio Abbatum vel Cæmeterii, & similia; debet providere cum consilio Capellani Episcopi, ut secundum Ordinarium ejus omnia ad huiusmodi pertinentia fiant, & habeantur in promptu. Si vero fiant aliquæ coronæ, ejus est assistere Episcopo, & ministrare forcipes ad capillos incidendos, & ipsos debet recipere, & comburere. Et cum instat inunctio faciendæ pro fratribus, vel communio infirmi decubentis, vel etiam ad Altare non potentis venire, vel etiam extraordinaria Communio Fratris alicujus ex alia aliqua causâ faciendâ in Conventu, debet de omnibus ad hoc pertinentibus gerere sollicitudinem, & de necessariis providere: & convocandos convocare vel verbis interdum, vel cum pulsationibus, cum Conventus fuerit convocandus. Item circa funera ejus officium est providere de fossis faciendis, & de loco fossarum, cum consilio Prioris. Item de cereis, & candelis, & candelabris, & thure & thuribulo, & carbonibus pro thuribulo, & de convocandis Fratribus suo tempore, & de Cruce deferenda, & aqua benedicta, & stola, & libello Sacerdoti recepturo funus, & de libellis manualibus, & aliis necessariis ministrandis tam pro Fratribus, quam pro extraneis defunctis curam debet habere. Item debet, si contingat Episcopum, vel Abbatem utentem mitra, vel annulo, vel baculo, vel Cardinalem, vel Legatum, vel alium dignitatis excellentis

apud nos facere officium in Missa, vel Processione, vel aliter quocunque modo, debet cum consilio Capellani sui, vel aliorum factorum ejus, de necessariis, secundum suæ dignitatis exigentiam providere, & gerere sollicitudinem, quod non sit defectus in aliquo, & quod fiant omnia ordinate.

#### *Circa ornatus, & pavamenta, & mundicias.*

**I**tem ad officium ejus pertinet apponere curam, quam potest, quod habeantur indumenta pro Ministris, & ornamenta pro Altaribus honesta, & pulchra, & diversa, secundum diversitatem temporum, & Festorum; ita quod in diebus festivis meliora producantur. Porro ad ornatum Altaris cujuslibet, præter illam mappam, quæ adhæret lapidibus, debet habere aliam desuper: quæ tam longa sit, quod quasi usque ad terram ex utraque parte descendat, super quam palla iterum collocetur, quæ sit adeo longa, & lata, quod quasi totum Altare desuper cooperiat, super quam est corporale collocandum. Cum autem ita fuerint replicata, debet haberi aliquod ad totum grossum coopertorium cooperiendum Altare. Cogitandum est etiam ei, quo habeantur aliquæ Reliquiæ in vasis pulchris, & decentibus, vel arcellis, & Cruces, & imagines competentis decoris: & de his aliqua sunt ponenda in Festis majoribus super Altare ad ornatum. Debet etiam habere curam, quod ampullæ, piscine, & pelves, & alia vasa, & utensilia, camisæ, albæ, pallæ, & tobalæ, & Altarium corporalia, & manutergia, & cætera omnia linea in usus Altarium, vel ministrorum sic frequenter laventur, quod semper inveniantur munda, & nitida, & præcipuè ea, quæ sunt circa Altaria. Corporalia verò, & panniculi pro abiteratione calicum, & manuum post ultimam abluitionem, lavanda sunt separatim ab aliis, & lotio in piscinam scaram mittenda. Cum autem consumpta fuerint vetustate comburenda sunt, & cineres in eandem piscinam mittendi.

#### *Circa Custodiam rerum.*

**A**D ipsum etiam pertinet cum de novo ponitur in officio, facere memoriale de numero calicum, librorum, paramentorum, & omnium huiusmodi, quæ sunt valoris notabilis, & sunt ab eo custodienda. Et cavere debet ne perdat aliquid de istis, sed potius secundum ejus industriam augmentetur. Et cum absolvitur, successoribus per memoriale debet rationem reddere de prædictis. Debet etiam cavere vestimentis, & paramentis à putrefactione, & corrosione, interdum ad ventum, & calorem exponendo, non in locis humidis, sed siccis, & à tineis conservando. Debet curam habere, quod diluta refarciantur, & læsa in aliquo, sive vasa, sive utensilia, & huiusmodi, reparentur diligenter. Vetusta, & minus utilia, quæ possunt vendi, de licentia vendantur, & eorum pretia in aliqua meliora commurentur. Item debet oblationes omnes Ecclesiæ recipere, & diligenter custodire, & eas Procuratori integre reddere, vel necessaria pro Sacrificia de illis procurare, & residuum eidem Procuratori, si quid fuerit, reddere: vel in alios usus expendere, secundum quod Prior duxerit ordinandum. Pro receptione verò, & custodia horum solent interdum haberi trunci in Ecclesia, vel pixides clausæ desuper, cum modicis aperturis, vel alia huiusmodi apta ad securam reservationem. Sunt etiam habenda aliqua armaria, & arcæ fortes, & aptæ ad custodiam rerum, vel in Sacrificia, vel extra in loco securiori,

riori, vel utrobique. Et Sacristia debet esse foris in ostiis, fenestris, & clavis, in qua etiam, propter rerum custodiam jacere potest cum uno socio, vel duobus, cum locus ad hæc aptus fuerit; & hoc, si Priori videbitur expedire.

#### *Circa Ordinarium.*

**A**D eundem pertinet scire bene Ordinarium totius Officii, ut per eum quandoque Fratres rectificentur de aliquibus, quæ requirunt: & ea, quæ in eodem scripta sunt præter supradicta ad eum pertinentia; ut in cineribus in capite jejunii, & ramis in die Palmarum, & similibus sollicitè exequatur. Debet etiam habere curam, quod Ordinarium de Ministris, & Missa majori, & aliis habeatur in Sacristia, ut Fratres per hujusmodi scripturam certificari possint, cum de aliquo dubitant de prædictis. Summas quoque, & tractatus Magistrorum de officiis Ecclesiæ, debet procurare libenter cum poterit, ut in Sacristia inventiantur. Postremò, quia in magnis Conventibus difficile est omnia supradicta ab uno executioni mandari; tamen cum socius ei datus fuerit de consilio Prioris, possunt supradicta sic per eos dividi, ut utroque sciente, quid ad se pertineat, nec confidende de alio in his, quæ ad se pertinent, fiant ordinatiùs universa.

### CAPUT XI.

#### De Officio Lectoris.

##### *Circa Doctrinam.*

**O**fficium boni Lectoris est conformare se capacitati auditorum; & utilia, & expedientia eis utiliter, & intelligibiliter legere: opinioniones novas refugere, & antiquas, & securiores tenere: ea quæ non bene intelligit nunquam dicere: à fastidiosa prolixitate, quæ accidere solet ex nimia repetitione ejusdem, aut ex involuntione verborum, vel ex aliis causis, cavere semper. Dare operam, ut ex lectionibus suis proficiant auditores, aut circa veritatem librorum, aut circa quæstionum utilium intelligentiam, aut circa aliqua, quæ possint ad morum ædificationem esse: literam tantum legere, relicta multitudinem eorum, quæ dici possunt ad singula; quod auditores sub eo proficiant ad sciendum Biblia, & historias, & sententias, maxime lectiones, aut omnes, aut saltem unam continuare libenter. Tempore verò vacationum, & in alio tempore, libenter legere debet aliquid Fratribus aliquibus in camera, qui habiles ad proficiendum in studio reputantur. Dubitantibus vero, & interrogantibus de aliquo debet benignè, & charitative satisfacere, prout potest, & scit. Cum verò exigente intelligentia, & utilitate auditorum, interdum expedit disputare, eligenda est ab eo materia utilis, & intelligibilis, maxime si sit disputatio inter minus peritos. Ut autem melius, & fructuosius officium exequatur, debet studere diligenter, & præcipuè in scriptis, quæ communi iudicio meliora reputantur. Et ut melius possit vacare studio, ab aliis occupationibus, sive in domo, sive extrà, potest salvâ obedientiâ subtrahere se libenter.

##### *Circa Vitam.*

**I**tem ad ipsum pertinet, ut sicut alios præcellit in scientia Divina, ita, & in exemplo totius sanctitatis, & virtutis, & præcipuè humilitatis, patientiæ, & sobrietatis. Debet etiam animare alios sermonibus, collationibus fraternis ad omnem Religionem obedientiâ specialiter, & juvare efficaciter Prælatos. Item ad Prælatos semper pacem habere debet. Item ad Prælatos semper cavere ne perturbatores, vel discoli, vel indi-

*Cod. Regul. Tom. IV.*

sciplinati apud eum refugium inveniant, vel favorem. In Refectorio, vel Choro debet libenter esse cum potest, & à Capitulo, vel Completorio nunquam sine magna, & evidenti necessitate remanere. Dispensationes verò in jejunio, & abstinentiis (cum non indigent) aut nunquam, aut raro, & cum difficultate recipere; cum verò recipit, caveat, ne in infirmatorio, vel hospitio, occasione ejus fiat aliqua dissolutio, aut in vigiliis, aut superfluitatibus, aut inordinatis locutionibus, & similibus. Item nomine Magistri, vel Lectoris quantum in eo est, non debet permittere se vocari, sed solum nomine Fratris. Cum habuerit, debet se ad Socium habere non sicut dominus, sed sicut Socius, & Frater, nec permittere debet, quod ei faciant servitia, quæ non solent aliis Fratribus fieri, ut est facere lectum suum, & discalceare eum, & similia. Debet etiam cavere ne camera sua sit in occasione dissolutionis, aut ex vigiliis, aut ex frequentibus ibidem colloctionibus, vel conventiculis, vel clamoribus, vel hujusmodi aliis. Item non debet verecundari, quin libenter quærat ab aliis dubitationes suas, immò quodcumque occurrunt notare debet diligenter, & cum invenerit à quo possit edoceri, quicumque sit ille, quærere debet humiliter, & audire, & retinere diligenter. Debet etiam procurare quantum in eo est, quod habeat aliquem Sublectorem, qui legat interdum cum hoc requirit multitudo, vel utilitas auditorum, & eidem charitative in omnibus assistere debet. Porro monitiones emanantes à Capitulis circa Lectores, debet diligenter retinere in memoria, & servare. Licentiis verò generalibus de loquendo, vel remanendo à choro, & similibus non debet uti propria auctoritate, & ad libitum suum, sed prout Priori visum fuerit, & causa rationabilis requisiverit. Postremo vero, ut Deo, & Prælati, & Fratribus sit acceptum ejus obsequium, non debet se reddere difficilem ad legendum, vel quærere in hoc aliquid, quod sapiat vanam gloriam, ut est legere in majoribus Conventibus, vel anhelare ad habendam licentiam in solemnibus studiis; vel ferre graviter, si de modo legendi in aliquo corrigatur; sed bono animo debet implere quicquid à suis majoribus fuerit ordinatum, & se corrigere libenter in his, quæ fuerint sibi dicta corrigenda.

### CAPUT XII.

#### De Officio Magistri Studentium.

##### *Circa Studium in genere.*

**O**fficium Magistri Studentium est habere zelum, & curam specialem de studio promovendo, modis omnibus, quibus potest. Et ideo debet habere in memoria ea, quæ scripta sunt in Constitutionibus, & Ordinationibus, quæ emanaverint, vel emanant quotidie à Capitulis, vel Generalibus, vel Provincialibus, à Priore Provinciali, vel Visitatoribus circa studium, & dare operam, ut diligenter servantur. Ipse etiam est notare diligenter, & suggerere admonitiones, quas reputat expedire fieri Fratribus, pro studii promotione in domo. Debet quoque sollicitare Priorem, & majores, ut procurentur libri utiles pro Conventu: negligentias verò Prioris, & Fratrum circa studium Priori Provinciali, & Visitatoribus referre fideliter, & super his accusare eosdem, vel in domibus propriis, vel mittere accusationem ad Capitulum Provinciale. Interdum procurare etiam, & pro posse suo laborare, quod necessaria ad studium, scilicet cellæ aptæ, atramentum, sebum pro tempore ad lum-

men, & similia sine defectu habeantur in domo, & Fratribus cum his indigerint, ministrantur. Ipsius etiam est habere sollicitudinem, quod habeantur scholæ competentes, & aptæ in fenestris, & sedibus, & contra pluviam bene munitæ. Et ubi veniunt seculares, debet providere, quod recipiantur, & collocentur honorifice, juxta exigentiam sui status.

#### *Circa Sermones.*

**I**tem ipsius interest, injungere sermones, qui solent in capitulo fieri in omni festo novem Lectionum, nisi legatur in scholis: & in capite jejunii, & in vigilia Natalis Domini, & in aliis casibus emergentibus, sicut est tempore Capitulum Provincialium, vel Generalium, & quandocumque in casu aliquo sunt faciendi. Non sunt autem ad hujusmodi sermones passim admittendi extranei, nisi ubi interesse voluerit competens multitudo, & hoc de licentia, & cum scientia Prælati, & debet dici illi, qui facturus est sermonem, quod extranei debent adesse; & in hoc casu non injungantur sermones alicui nisi tali, de quo credatur, quod sit idoneus ad laudabiliter proponendum. Porro sermones, qui fiunt in Generali, vel Provinciali Capitulo, debet injungere de licentia, & scientia majoris Prælati. Extraneis vero non debent hujusmodi sermones injungi, nisi de scientia, & voluntate Prælati. Cum autem contigit pertransire Cardinalem, vel Legatum, vel Episcopum magnæ literaturæ, vel Magistrum aliquem in Theologia, vel alium magnæ autoritatis virum, & in prædicatione exercitatum: vel Ministrum Fratrum Minorum Generalem, vel Provinciale, vel aliquem de Ordine nostro Priorem, vel Lectorem, vel Fratrem alium in prædicatione famosum: debet cum Prælato conferre, si sit horum aliquis invitandus ad prædicandum Fratribus in Capitulo aliqua die, & fiat quod ei videbitur faciendum. Hujusmodi vero sermones Capituli fieri solent vel post Matutinas, cum sunt noctes prolixæ, vel post Primam, cum hora illa non est in aliis occupata, vel post Nonam tempore dormitionis diurnæ, vel alia hora, secundum ordinationem Prioris, in qua Fratres possunt commodius interesse. Pertinent vero ad ipsum pulsare hora competenti pro sermone hujusmodi. Cum autem horam variari contingerit, debet in præcedenti Capitulo, si hoc sciverit, Prælato dicere, ut Fratribus prædicatur. Debent autem hujusmodi sermones Fratribus tam tempestivè injungi, ut se de modico tempore non valeant excusare. Debet etiam dirigere Fratres, maxime juniores, indicando, in quibus libris invenire possint opportunas materias ad prædicandum, & magis utiles ad salutem audientium: & diligentiam adhibere, quod tales libri in domo habeantur, aut procurentur, quibus Fratres magis proficere valeant; & circa hoc frequentius sollicitare Priorem, aut alios, ad quos spectabit, providere. Unde cum aliquis Frater se excusat à faciendis sermonibus sibi injunctis, nec apparet rationalis causa, præter solam ignaviam, non debet esse facilis ad relaxandum eum; sed omnino urgere, & omnem operam polliceri. Si autem imminenti die prædicationis, appareat ei, quod debeat esse defectus sermonis ex causa quacumque, debet rogare Prælatum, vel alium ad hoc idoneum, quod suppleat hunc defectum, vel ipsemet suppleat: & ille, qui defectum hujusmodi facit, suo tempore, vel in ipso die sermonis in Capitulo corrigatur. Si autem aliqui Fratres adeo sunt inepti, quod non speretur, quod unquam possint habere modum prædicandi; non oportet, quod sit nimis importunus istis,

ad injungendum sermones. Ipsius etiam est præmonere Fratres, quibus injunguntur sermones, ut caveant à prolixitate sermonum: interdum juxta eos sedere, ut cum nimis prolongant sermones, faciat eis signum. Cum autem aliquid reprehensibile dixerint in sermone, debet ipsa die hora competente charitative ostendere Fratri, ut aliàs caveat circa illud; vel si melius ei videbitur, & fructuosius, antequam sermo fiat in Conventu, prævidere quid ibi sit dicendum, & blandè corrigere, si quid displicuerit; ne fortè Frater concionaturus animum despondeat. Porro sermones ad populum in villa, vel extrà, debet alii, cui Prior injunxerit imponere, & annexa illi officio exequi: vel ipsemet, ubi propter paucitatem Fratrum, hoc ei committitur à Prælato.

#### *Circa Collationem.*

**C**irca collationes, quæ fieri ejus opera, & diligentia inter Fratres soleant, advertat in primis, quod ad eas non sunt admittendi extranei, sive seculares, sive Religiosi alterius Ordinis, nisi essent adeo familiares, quod in defectibus Fratrum, si quos ibi viderent, credatur eos non esse scandalizandos. Tam vero circa collationes privatas, quàm circa publicas disputationes, ad eum spectat suggerere Priori admonitiones, quas in capitulo faciat Fratribus, ad hoc, ut bene se habeant, & religiosè in omnibus prædictis. Item ad ipsum pertinet convocare Fratres aliquo signo ad collationes in loco apto ad hoc, secundum ordinationem Prioris, & hoc semel, vel bis in septimana, vel frequentius, ubi, vel quando non sunt lectiones. Facienda autem est hujusmodi convocatio cum signo ad hoc determinato, vel post Nonam, binæ refectionis tempore, vel post Vesperas tempore jejuniis, vel inter comestionem, & Completorium in Quadragesima; vel alia hora, in qua Fratres commodius possint interesse, secundum voluntatem Prioris. In hujusmodi autem collationibus solet interdum recitari aliqua quæstio determinata in scholis ab illo, cui fuerit injunctum, vel recitari aliqua ab aliquo, qui eam præviderit, ex injunctione sibi facta: & post recitationes, Fratres qui volunt opponant recitanti, & ità exercitent se opponendo, & respondendo. Vel solet ab eo quæri aliquid de lectionibus, vel quæstionibus auditis à Fratribus, ut videatur de profectu eorum. Vel solent fieri collationes de moralibus, vel de certa aliqua materia, ut de Evangelio, vel de Epistola, vel de summa de vitiis, & virtutibus, vel de casibus, & similibus: ità quod quilibet Frater sciat de quo titulo debeat recitare: vel de quolibet, ad voluntatem cujuslibet, & ab illis, qui non sunt adhuc sufficientes ad majora, saltem aliqua notabilis autoritas recitari. Solet autem interdum ordinari, quod unus Chorus dicat una vice, & alius alia vice; vel certis Fratribus injungi, quod faciant collationem, alii in una die, alii in alia die, & sic de aliis. Et de modis istis quis serveretur, fiat cum consilio Prioris, quod melius videbitur. Fratres autem, qui non faciunt, quod debuerint, vel in aliquo offendunt, vel falsum dicendo, vel auctoritatem aliquam non bono modo assignando, vel confusè, vel prolixè loquendo, vel ibidem clamorè contendendo, vel alias quoquo modo reprehensibiliter se habendo: debet ibidem verbis corrigere, cum humilitate, & curialitate; & de excessibus gravioribus suo tempore in Capitulo accusare. Cum vero sunt intermissæ aliquando collationes, & debent resummi, debet hoc prædici in Capitulo præcedenti, & ordinari quomodo fiant.

#### *Circa*



*Circa Disputationem.*

**I**tem ipsius interest instare, quòd fiant disputationes cum expedit, vel quòd non fiant, vel raro fiant: vel quando non est ad hoc Lector sufficiens, vel non sunt qui convenienter possunt apponere, vel respondere; vel non creditur, quòd sequatur inde notabilis utilitas propter statum auditorum. Cum autem fiant, debet conferre cum Lectore, quòd fiant de utili materia. Debet etiam ante prædicare Fratribus tempestive, de quo fieri debet disputatio, ut sibi provideant; & docere, in quibus scriptis, & ubi possint de illa materia invenire. Debet autem semper injungere alicui, ut sibi provideant de respondendo, si necesse fuerit, ne sit in hoc unquam defectus. Debet autem injungere Fratribus, qui sunt ad hoc idonei, quòd semper in omni disputatione sint parati apponere in aliquo: & quòd sibi in hoc provideant illi, qui sine prævisione ad hoc sufficere non putantur. Non debet autem aliquis incipere, opponere, vel respondere in scholis, nisi prius ei hoc impositum fuerit, vel licentiam habuerit. Extranei vero quando veniunt ad disputationes, honorandi sunt, ut cedatur eis ab omnibus cum volunt opponere, & invitentur ad respondendum; & si malè dicunt, non confundantur: nec contendatur cum eis, & caveatur ab eorum offensa. Porro si quis, vel Frater, vel Lector in disputando in aliquo reprehensibiliter se habuerit, debet cum super hoc suo tempore in Capitulo proclamare. Si autem aliquis contentiosius notabiliter in disputatione se habeat, & non operatur de ejus correctione; debet ei imponere silentium extra scholas in aliquo loco charitative, vel suggerere Priori, quòd hoc faciat in Capitulo publice, vel privarim, si magis visum fuerit expedire.

*Circa Lectiones.*

**I**tem ad ipsum pertinet conferre cum Fratribus, quot lectiones, & quæ sint lectiones legendæ; & ad illud, quòd ei visum fuerit utilius, inducere Lectorem. Ubi vero est studium solemne, vel magna multitudo Fratrum, vel aliorum auditorum; debet procurare si potest, quòd habeatur aliquis Frater, qui legat extraordinarie tempore vacationum: & in diebus vacationum, quibus non legit Lector saltem sit aliqua lectio levis, vel de historiis, vel de aliqua summa, vel similibus: & si aliqui sunt juvenes habiles ad proficiendum, habeant aliquem Lectorem in Grammaticalibus, vel Logicalibus, & similibus, prius super hoc licentia impetrata. Item debet procurare, quòd fiat repetitio Lectionum semper, vel per eum, vel per alium, vel per alios: vel modo per istum, vel modo per alium, vel una lectio per unum, alia repetatur per alium, prout ab ipso, vel à Priore fuerit ordinatum. Fratres verò qui proficiunt, & non sunt multum provecti in scientia, & maxime juniores, sunt compellendi, ut repetitioni hujusmodi intersint.

*Circa Profectum Fratrum in studio.*

**I**tem ad ipsum pertinet gerere sollicitudinem circa Fratres omnes, & singulos, quomodo se habeant circa studium, vel qui frequentant scholas, collationes, disputationes, repetitiones: vel qui non libenter in cellis resident, vel sunt vagi: vel qui student, in quo student: qui habent voluntatem proficiendi in studio, & qui non curant: qui student ordinatè, & qui confuse: qui circa utilia, qui circa curiosa: qui libenter audiunt vel interrogant, quòd nesciunt, & qui non: & quidquid circa hoc, & simi-

lia invenerint reprehensibile in aliquo, studeat emendare, modò per admonitiones secretas, & charitativas, modo per accusationes in Capitulo, & modis aliis, quibus poterit diligenter. Cum autem fuerint aliqui in Conventu, de quorum profectu in studio multum speretur, & sunt benè morigerati; debet laborare, ut detur eis occasio, & adjutorium ad proficiendum in studio; juvando eos ad hoc, in quibus potest per se, & innotescendo hoc majoribus, intercedendo pro eis, ut mittantur ad studia meliora, aut parcatur eis ab aliis occupationibus; ut fiant eis aliquæ recreationes (si fuerint debiles) ut habeant aliquas licentias ab officio remanendi, & similia, quæ possunt ad promotionem valere prædictam. *Hæc fere omnia ad officium Regentis pertinent, juxta Constitutiones nostras distinct. 2. cap. 14. de Studentibus.*

## CAPUT XIII.

## De Officio Librarij.

*Circa Armarium.*

**O**fficio Librarij est, habere curam ut potest, quòd habeatur bonus locus pro Libraria, & securus, & benè aptus contra pluviam, & intemperiem, & copiam habens boni aeris pro libris custodiendis. Armarium autem, in quo libri reponuntur, debet esse de lignea materia, ut melius custodiantur à putrefactione, vel nimia humectatione, & habere multa intermedia, & distinctiones, in quibus reponantur libri, & scripta diversarum facultatum, & diversi libri, & hujusmodi ejusdem facultatis separatim, & non confusè, cum signationibus debitis factis per scripturam: quæ applicanda est unicuique interstitio, ut sciatur, ubi inveniatur, quòd quæritur. Debet autem ipse custodire clavem hujusmodi armarii, seu Librariæ, & aperire, & claudere tempore suo: & habere cellam pro studio (si locus est aptus) in ipsa libraria: vel propè, ut citius inveniatur, cum quæritur pro aliquo negotio ad suum officium pertinente.

*Circa Libros.*

**I**tem ad ipsum pertinet habere chartam, in qua sint scripti omnes libri Conventus, & cum augmentantur, vel minuuntur, scribere, vel abradere in charta illa, sicut fuerit faciendum. Hujusmodi autem chartam debet tradere successorì suo, cum dimittit officium, & accipere à prædecessore cum assumit officium de novo: ut sic semper possit reddi ratio de libris, cum exigitur à Prælato: ne per oblivionem eos deperire contingat. Ipsius etiam interest habere curam, quòd per se, vel per alium, secundum ordinationem Prioris reparentur, cooperiantur, & benè ligentur, & signentur in unoquoque volumine in tergo cujusmodi libri, vel liber sit, vel cujus scriptum, vel scripta contineantur in illo, & in principio cujuslibet ponatur titulus hujusmodi: *Iste liber est talis Conventus Fratrum Prædicatorum.* Et si fuerit dignum, quòd dator libri in memoria habeatur, addatur, & dicatur, *quem dedit talis N. pro anima sua.* Debet etiam dare operam, quòd libri communes sub eo augmententur, acquirendo elemosynas ad hoc aliquas cum potest: vel à Novitiis cum intrant, & habeant libros aliquos; vel laborando, quòd de libris Fratrum decedentium aliqui ad usus communes applicentur, & modis aliis, quibus poterit diligenter. Item debet apponere curam, quòd libri, qui non habentur in omni genere facultatum, habeantur. Cum habentur aliqui duplices, vel tri-

plices, de quibus Fratres non multum indigent, retentis melioribus alii cum licentia vendantur, & pretium in alios usus librorum, qui non habentur, convertatur; & idem fiat de veteribus, vel alijs parum valentibus. Item semel in anno, vel bis, debet omnes recolligere, & ad locum idoneum reportare, cum socijs ad hoc sibi deputatis ad vertendum, & ad videndum ne aliquis depereat, vel ne aliquis à vermibus destruat. Quod si aliquem invenerit deesse, debet diligenter laborare, quod reinveniatur. Si autem aliquis læsus fuerit in aliquo debet apponere curam, quod reparetur, & cavere in posterum ab his, quæ libris invenerit nocuisse. Et cum viderit aliquos libros de armario otiosos, debet illos ad armarium reportare. Item ad ipsius pertinet providere, quod in aliquo loco silentii, & apto, sit aliquis pulpitus magnus, vel plures, in quibus ligentur aliqui libri, quibus frequentius Fratres indigent cum habentur: ut est Biblia glossata in toto, vel in parte, Biblia sine glossis, Summæ de Casibus, Concordantiæ, Interpretationes, Decreta, Decretales Decisiones morales, Sermones varii de Festis, de Dominicis per totum annum; Historiæ, Sententiæ, Chronica, Passiones, & Legendæ Sanctorum; Historia Ecclesiastica, & similia multa ut communis Fratrum in promptu possit illa habere. Armarium vero sic debet apertum tenere certo tempore, vel esse juxta eum, vel in ipso; ut qui volunt aliquid in transitu videre in alijs libris, qui sunt, vel habere ad horam brevem possint copiam eorum de facili habere.

## CAPUT XIV.

*De Officio Examinatorum.*

**O**fficio Examinatorum est reddere cautos Fratres, qui aliquem volunt examinari, quod non præsentent aliquem de quo certum sit, quod non sit sufficiens; ne fiat ei, qui talis est, confusio pro nihilo. Illos etiam de quibus veraciter constat per certos testes, vel facti evidentiam, vel famam publicam, quod sunt bene sufficientes, non oportet examinare, sed referre Priori hujusmodi certitudinem. Cum autem de aliquo propter dubium fuerit examinatio facienda, non expedit, quod fiat cum aliqua solemnitate, vel acerbè: sed ita urbanè quod ipse, qui examinatur, quod sit examinatus plenariè non advertat, quod fiet quando divisim, vel etiam simul Examinatores eundo per horum, vel alibi loquuntur latinè cum eo, modo de rumoribus mundi, modo de rebus pertinentibus ad scientias, modo de scientia aliqua inquirendo, in qua studuit, & quantum, & ubi, & sub quibus Magistris: & sic intrando quasi insensibiliter ad inquirendum aliquid de scientia, in qua studuit, & modo transferendo se ad alios rumores, modo revertendo ad propositum. Magis autem attendendum est ad ingenium, ad facundiam, ad aptitudinem ad addiscendum, & ad bonam dispositionem ingenii naturalem: quam ad hoc, quod multa audierit, & diù. Possunt etiam examinare illos, qui sciunt scribere, imponendo eis, quod faciant aliquam litteram de aliqua materia, quam dent eis quasi ad videndum quomodo sciunt scribere: & tunc possunt ex modo dictandi, aliquid perpendere de sufficientia illius. Possunt etiam inquirere si sciunt cantare, & legere, ut si in hujusmodi sunt excellentes, possit facilius cum eis in alia insufficientia dispensari. Potest autem sufficiens, quo ad scientiam reputari quicumque talis est,

quod ex bono ingenio, & alijs bonis naturalibus, & ex scientia jam acquisita, vel ex alijs, quæ apparent in eo potest æstimari, quod possit Theologiam addiscere, & apud Fratres proficere ad hoc, ut possit tantum intelligere de scripturis, quod possit fieri Prædicator, vel Confessor securus. Veruntamen secundum statum, & indigentiam Provinciarum, vel Conventuum, & abundantiam, vel penuriam litteratorum in natione facilius sunt aliqui recipiendi in uno loco, quam in alio; & possunt secundum modum patriæ, alicubi aliqui sufficientes judicari, qui alibi insufficientes reputantur. Porro inquisitio de moribus sic cautè est facienda, vel à socijs, vel à notis, quod ipsi non advertant propter quid fiat. Hujusmodi autem inquisitio fieri debet maximè circa vitia, quæ sunt quasi naturalia, & inseparabilia: ut innata iracundia, ebrietas; vel à debilitate naturæ proveniens, vel à viciosa consuetudine: dispositio ad furiositatem, vel malitiam, vel percessionem, vel hujusmodi perpetranda; & de receptione talium, & similium, de quorum correctione vix spes habetur summopere est cavendum. Si verò post examinationem de scientia, & moribus hujusmodi, videatur Examinatoribus, quod indubitanter recipi debeat examinatus sic à Conventu: possunt antequam plus procedatur, inquirere leviter de illis impedimentis recipiendorum, quæ in Constitutionibus sunt expressa: ne forte in vanum ulterius procedatur, si tale aliquod habeat, propter quod nullo modo sit recipiendus. De omnibus autem, quæ invenerint, debent Priori, & Conventui relationem facere fideliter, nec zelo receptionis, & repulsionis in partem aliquam declinare.

## CAPUT XV.

*De Officio Circatoris.*

**O**fficio Circatoris debet imponi tali Fratri, qui sit zelator Religionis, & maturus, & industrius ad cognoscendum ea, quæ sunt Religionis, vel contra; non præceps in zelo suo. Hujusmodi ergo officium est circuire per totam Domum, & per omnes officinas, & in Ecclesia exteriori, & ubi Fratres solent Confessiones audire, vel loqui, vel morari cum exterioribus; & per omnia alia loca infra ambitum clausuræ exterioris, semel vel plures in die; præcipuè cum viderit expedire. Specialiter verò post prandium tempore dormitionis id facere tenetur, & notare, si alicubi invenerit in quocunque loco aliquid fieri ab aliquo Fratre, sive majore, sive minore, quod sit contra Religionem, vel debitam honestatem. Præcipuè autem debet circuire post ultimum signum, vel cum lumine, cum profunda nox fuerit, vel sine lumine, cum adhuc dies sit, per hospitium, & infirmitorium: ad videndum, si sunt adhuc in locutionibus, vel aliquibus dissolutionibus Fratres aliqui; & postea singula claudenda, ad videndum utrum sint bene clausa. Et tempore Matutinarum interdum per dormitorium, & cellas, ad videndum, si aliqui remanserint in locis istis. Ipsius etiam interest providere, ne aliquod ostium faciat inquietudinem tempore ventoso; & ponere repagula in ostijs, & fenestris, cum fuerint reponenda. Cum autem pluvia superinundat, debet citò succurrere in locis, in quibus maximè nocere potest, & præcipuè circa libros. Si aliqui remanserint in lectis, vel si dicunt Matutinas, qui remanent de licentia, loco, & tempore debito, vel si qui habent licentiam causa studii, vacant studio tunc, vel revertuntur ad lectos. Verum non est ejus singula circumeundo corrigere, sed notare, & memorariæ

riæ commendare, & proclamare proclamandos in capitulo, & referre graviores dissolutiones, & magis inusitatas Prælati, ut majus apponant consilium; & tempore visitationis Provinciali, vel alii Visitatori statum Domus quo ad Religionis observantiam plenius indicare. Potest tamen aliquod leve verbum dicere interdum, vel signum aliquod facere in transitu, ad dissolutiones aliquas compescendas, & præcipue post ultimum signum, vel tempore dormitionis diurnæ. Ad ipsum etiam pertinet diligenter notare, si clausura Domus sit bona, si bona ostia, si bonæ claves ubique; & si quid in his emendandum fuerit pro hoc instare apud Prælatos frequenter. De claudendis vero ostiis aliquibus, vel clavibus ostiorum aliquibus custodiendis, & accipiendis, & reddendis, facere debet prout Prior ordinaverit. Porro si Conventus adeo magnus fuerit, quod unus Circator non sufficiat, debent assignari duo, vel plures; & ita inter se dividere officium per loca, & tempora; quod nihil ex mutua confidentia negligatur. Si autem Circatorem recedere contigerit ad breve tempus, debet alicui vices suas committere: si ad longum tempus, debet ad memoriam reducere Prælatum, quod alicui vices suas imponat, usque ad suum regressum. Item Prior, & Supprior possunt, & debent interdum hujusmodi officium exercere (non obstante, quod sit alius Circator) cum eis videbitur expedire.

## CAPUT XVI.

## De Officio Custodis Dormitorii.

**C**ustodia Dormitorii solet injungi Fratribus per septimanas in tabula; vel alicui Converso, seu Clerico, qui ad alia minus utilis invenitur, potest injungi simpliciter. Hujusmodi autem officium est claudere, & aperire dormitorium suis temporibus. Cum autem post ultimum signum, vel secundam mensam tempore dormitionis fuerit claudendum, debet facere custos aliquod signum modicum cum clavibus parum antequam claudat, ut si qui adhuc extra sunt intrare festinent. Verum si fuerint hospites Fratres, debet investigare utrum fuerint expediti, & si sic, propter eos non oportet amplius expectare. Si autem non fuerint expediti, & intrare debent dormitorium, potest aliquantulum expectare, & signum eis facere, quod festinent. Ad eum etiam pertinet claudere, & aperire fenestras communes dormitorii, & cellarum, & camerarum etiam proprias singulorum in absentia Fratrum, cum fuerint aperiendæ, causa aeris, vel pluviae, vel caloris, vel frigoris, vel venti, vel alicujus inquietudinis, & hujusmodi. Ipsius etiam interest providere, ne aliquod ostium faciat inquietudinem tempore ventoso, & ponere repagula in ostiis, & fenestris, cum fuerint reponenda. Cum autem pluvia superinundat, debet cito succurrere in locis, in quibus maximè nocere potest, & præcipue circa libros. Defectus autem circa ostia, & fenestras, & claves, & repagula, & cooperturam dormitorii, cellarum, camerarum, & domorum aliarum, & viarum, si quæ sunt his annexæ, debet significare Priori, & instare, ut emendentur. Item ad ipsum pertinet providere de oleo in lampadibus dormitorii, & camerarum, & viis inter hæc: & accendere, & extinguere hujusmodi lumina tempore suo. Item ipsius est, si aliquæ immunditiæ inveniantur in cameris, quæ sunt abstergendæ, vel dormitorium sit scopandum, vel cellæ; hoc per se facere, si potest commodè, vel cum aliis adiutoribus sibi datis. Item debet habere curam, quod sic semper sit aptatum dormitorium, quod si quos intrare contigerit, nihil ibi videant, quod eorum offendant aspectum. Et debet alio-

rum negligentias in hujusmodi supplere, faciendo circa hæc, quod fieri debet; & ipsos super hujusmodi negligentias in capitulo proclamare. Item si fuerint plura ostia in dormitorio, debet habere locum ad sedendum vel studentum propè illud, per quod communius est ingressus secularium de die, & alia si fuerint claudenda claudere. Juxta introitum verò illius ostii, debet esse campanula parva, in qua faciant illi, qui introducunt extraneos, vel ipse si præcaverit ingressum istorum, signum, si illi Fratres omiserunt facere signum: ut Fratres, qui sunt in dormitorio, vel in cellis hoc audito caveant ne apud eos aliquid videant, quod eorum offendant aspectum, & in quo malè ædificantur. Ipse etiam debet esse sollicitus, ne per illos, qui sic intrant, vel etiam occasione aliquorum operum, libros aliquos, vel res alias deperire contingat. Item causa servandi dormitorium securum, vel saluum potest remanere à Matutinis, vel aliis Horis, vel à prima mensa, cum necesse fuerit, & Prior duxerit ordinandum. Si vero non hoc fuerit visum Priori, nihilominus cum vadit ad Horas, vel ad mensam, debet habere curam, quod claudantur, quæ claudenda fuerint, vel ponatur ad custodium elius loco sui. Notare quoque qui aliqua reprehensibilia habet, vel faciunt circa lectos, & cellas suas, & ipso in capitulo proclamare. Fratribus verò, qui circa se sunt negligentes, aut in coopertoriis, aut in cussinis, aut in lecti commoditate aliqua, & similibus, compati debet, & procurare, quod eis melius provideatur.

## CAPUT XVII.

## De Officio Portarii.

## Circa statum Portarii.

**C**ustodia portæ debet injungi tunc Fratri Converso, vel Clerico, si potest haberi, qui sit ætate provectus, religiosus, aspectu gratus, & in actibus securus: contra omne vitium, discretus in sensu, prudens in responsis, dulcis in affectu; qui nullum multiplicibus interrogationibus fatiget, nullum dura responsione, aut injuriosa, vel rustica collatione commoveat: qui scandalizatos sciat placare, & omnes cum eo moram aliquam contrahentes, vel eadem se applicantes, verbis, & factis ædificare sufficiat. Hic debet habere locum aliquem aptum juxta portam intrinsecus, in quo cum non habeat aliam operationem, operetur aliquid, si est Conversus, vel legat, vel scribat, vel aliud honestum faciat, si est Clericus. Non autem debet esse vagus, sed ibi continue residere: nisi forte ex causa rationabili interdum declinet, & alium, vel socium, si habet loco sui, ponat. Cum autem alibi eum declinare oportet, & nullus ibidem remanet, sic debet ostium firmare, quod nullus ante suum introitum possit intrare. In hoc quoque loco, cum socium non habuerit, poterit tempore dormitionis diurnæ remanere, propter advenientes: vel vigilare, vel paululum dormire, & in nocte à Matutinis remanere, nisi per Priorem aliter fuerit ordinatum, videlicet, ut de die dormiat, & aliquis sit in loco illa hora pro eo: & hoc idem servetur de remanendo à prima mensa, & collatione, hoc addito; quod cum comedit in secunda mensa, ordinetur, qui tunc portam custodiat loco ejus. Si autem socium habuerit Fratrem, tunc per septimanas possunt dividere quis de die lectum intraret, & in prima mensa comedit, & intersit collationi communi. Si verò fuerit secularis socius, tunc secundum ordinationem Prioris fiat de dormiendo de die & comedendo in prima mensa,



mensa, & de conveniendo ad collationem communem: ita quod facius semper portam custodiat, cum ipse fuerit absens. Porro ab Horis diurnis, & Missa semper remanere potest, si fuerit Conversus, & Missam audire in mane privatam, antequam in suo officio eum oporteat occupari. Si autem fuerit Clericus, eodem modo ab Horis potest remanere, nisi propter paucitatem Fratrum sit ejus præsentia interdum necessaria: & semper Missam audiat Conventualem, vel privatam; ita tamen, quod in his casibus, aliquis sit in porta loco ejus. Si fuerint duo Fratres ad portam, tunc si sunt ambo Clerici, vel unus, semper Clericus unus sit in Missa majori, si potest alius competenter supplere, quæ tunc circa portæ custodiam sunt agenda.

#### *Circa multa Officia ejus.*

**I**tem ad eum pertinet habere curam de portis, per quas est ingressus ad curiam exteriorem, & ad claustrum claudendis, & aperiendis suo tempore; & claves vel servare, vel tradere illi servandas, de quo Prior ordinaverit. Si aliqui de nocte pulsaverint ad intrandum, vel exire voluerint, debet investigare causas, & cum difficultate, & non sine licentia speciali tunc alicui aperire.

Item, cum aliqui Clerici, vel Religiosi, vel peregrini transeuntes petunt hospitium, vel comestionem, debet vel urbanè ostendendo paupertatem Domus, vel consuetudinem contrariam eos expedire: vel procurare, quod petunt, ab illis, ad quos pertinet, si fuerint personæ dignæ, vel de scandalo, si non fiat, timeatur. Cum autem aliqui recipiuntur ad comedendum ad portam intus, vel extra, debet gerere curam de ministrando eis charitative, & munde, quod fuerit ministrandum, & curialiter licentiaré, cum fuerint expediti. Item ipsius est cum omnibus, qui cum eo resident, vel moram contrahunt, aliquid loqui de Deo; & cavere, ne quis scandalizatus recedat ab eo. Item, cum videt aliquos per Domum discurrentes, debet eos pacificè, & curialiter revocare. Eos verò qui quandoque intrant sine licentia, & non consueverint licentiaré ad intrandum, debet similiter pacificè, & mansuetè inducere ad egressum. Cum pulsatur ad portam, cito debet adesse per fenestram parvam aliquam, (quæ semper debet esse in ostio,) antequam ostium aperiat, respicere personam pulsantis; & si fuerint tales, quas non oportet introduci, ut mulieres, & viles personæ, debet eis satisfacere sicut poterit in his, quæ petunt, sine introductione. Cum autem introducendi fuerint, si sunt personæ excellentes, ducat eos ad Capitulum, & advocet illis Fratres, qui fuerint advocandi. Si fuerint personæ mediocres, remaneant prope portam, & ibi advocentur ad eos, qui fuerint advocandi. Si vero Prælati, vel Religiosi, primo ducantur ad Ecclesiam ad orandum, quam ad Capitulum. Si vero fuerint Fratres extranei, ducantur ad Ecclesiam, & quæratur qui det eis benedictionem, & significetur statim hospitium receptori. Si vero persona fuerit excellens, ut Episcopus, vel Abbas, vel vir nobilis, magnus amicus Fratrum, vel similis; dum venerit ad Domum Fratrum, debet hoc indicare Prælato, etiam si non petatur ab eis. Item in recipiendo advenientes, debet habere modos diversos secundum differentiam personarum: omnes quidem in primò occursum, debet affabiliter recipere, & joculari, si vero fuerint Religiosi cum humili inclinatione, & reverentia. Si Episcopi, vel Abbates excellentes, cum majori humilioratione, vel osculando manus, vel flectendo genua, se-

cundum morem patriæ, Si Fratres Minores, vel nostri extranei, vel magni familiares, cum summo gaudio, & charitate magna. Si fuerint Principes, vel sublimes in statu sæculari, cum magno honore tam per se, quam per alios Fratres, ad hoc idem per ipsum invitatos. Debet etiam habere magnam sollicitudinem de cognoscendis familiaribus Fratrum, ut cum venerint, nullus defectus fiat circa eorum receptionem: & debet Fratribus qui non cognoscunt eos, eorum notitiam dare; & Prælatos incitare ad ostendendum eis omnem familiaritatem, & humanitatem in hospitio, & in aliis quibuscunque. Item in vocando Fratres ad portam, debet servare modum, qui à Prælato fuerit ordinatus. Ordinant autem Prælati quandoque ex causa, quod aliqui Fratres nunquam vadant ad portam, aut nunquam ad mulieres, aut nunquam ad talem, vel talem personam, aut nunquam nisi prius dicatur eis, talis aut talis vocatur à tali: quandoque autem dant licentiam aliquibus, ut Confessoribus, vel aliis, qui possint ire, quandoque vocantur: de aliis volunt, ut non vadant sine licentia speciali, primo quæsita à Portario, non à Fratre, vel è contrario ab ipso, non à Portario. In his ergo, & similibus observare debet Domus consuetudinem, & ordinationem Prioris. Item ipsius interest notare Fratres, qui in aliquo excedunt circa portam, aut nimis loquendo cum mulieribus, frequenter, & leviter veniendo, & morando in porta aut qui duos se exhibent ad veniendum ad Confessionem, & similia, & referre Prælati, vel proclamare interdum, vel facere proclamari eisdem. Si quis etiam sit defectus in seris, in portis, in clavibus, & repagulis pertinentibus ad suum officium, debet hoc indicare Priori, & instare, quod emendetur. Porro si duo, vel plures fuerint Portarii, debent onera, & officia ita inter se dividere, quod in spe alterius, alter defectum non faciat, sed fiant omnia plene, & ordinate.

#### CAPUT XVIII.

##### De Officio Depositariorum.

**C**ustodia Depositorum solet imponi duobus, vel tribus Fratribus, discretis, & securis, quorum quilibet debet habere clavem unam de loco depositi, nec alii committere, sed apud se diligenter custodire. Isti autem debent habere curam, quod locus depositorum sit ita firmus, & securus in omnem eventum, quod nec ab interioribus, nec ab exterioribus, possit aliquatenus temeraria manus ad Depositum aliquod unquam extendi. Porro in recipiendo Deposita, cavere debent ne unquam recipiant aliquod depositum sine licentia speciali, vel generali: nec deposita recipiant, quæ secundum Constitutiones nostras recipi non debent, nisi fortè ex depositione Prælati expresse facta super hoc, interdum ex causa. Item securius est quod semper illud, quod recipitur, recipiatur signatum, vel clausum quam aliter: quia in rebus, quæ sunt in pondere, numero, & mensura, si aliter reciperentur, videretur secundum jura, quod periculum transfret ad depositarium, & non apud deponentem remaneret, & idèd si periret, posset agi contra depositarium, sicut de commodato. Item debet in aliquo memoriali subscribi cujus sit Depositum, & quid inde depones ordinaverit, de reddendo sibi, vel alii: vel quid inde sit faciendum, si contingeret non repeti, vel deponentem mori. Item solet interdum per chirographum cujus una pars sit apud deponentem, alia apud Depositarium, ordinari de deposito, secundum voluntatem

tatem deponentis, de modo reddendi; licet istud, secundum jura non reputetur multum efficax ad aliquod probandum. Item cavendum est depositariis, ne unquam aliquid accipiant de deposito, nec etiam pro mutuo, sine voluntate deponentis, nec depositarius tenetur super hoc in contrarium obedire Prælati. Item Depositum semper reddi debet secundum formam traditam à deponente, nisi in casibus quatuor exceptis à jure. Primus est, cum quis gladium deponit, & furens reperit. Secundus, cum deponens fuerit deportatus, nam bona ejus tunc in publicum deferuntur. Tertius est cum fur deponit, & reperit, sed repetitio domini cum fure concurrat. Quartus, cum fur rem furtivam deponit apud illum, à quo furripuit. Et sciendum quia si res deponitur præfente Prælati, & Capitulo, tenetur Ecclesia illa deposito, aliter non; nisi solus ille, vel illi apud quos deponitur, ut Sacrista, Thesaurarius, & hujusmodi. Cum autem redditur depositum, semper sub bono testimonio reddi debet, propter calumnias evitandas, quæ nasci possent, si aliter fieret.

## CAPUT XIX.

## De Officio Procuratoris.

Procurator licet versetur circa temporalia, tamen quantæ virtutis debeat esse, debet considerari ex verbis Beati Benedicti, de statu Cellerarii (qui apud nos Procurator vocatur) sic loquentis: *Cellerarius Monasterii eligatur de congregatione sapiens, maturus moribus, sobrius, non multum edax, non elatus, non turbulentus, non injuriosus, non tardus, non prodigus: sed timens Deum, qui in congregatione sicut pater curam gerat de omnibus: sine jussione Patris nihil faciat, quæ jubentur, custodiat, Fratres non contristet.* Si quis Frater ab eo forte irrationabiliter aliqua postulat, non spernendo eum contristet, sed cum humilitate male petenti denegat: animam suam custodiat, memor semper illius Apostolici præcepti: *Qui bene ministrat, gratum bonum sibi acquirit.* Infirmorum, hospitum, pauperumque cum omni sollicitudine curam gerat, sciens sine dubio, quod pro his omnibus in die judicii rationem redditurus est. Omnia vasa Monasterii, cunctamque substantiam, ac si Altaris vasa sacra conspiciat, nihil ducat negligendum, nec avaritiæ studeat, nec prodigus sit, aut extirpator substantiæ Monasterii, sed omnia mensurâtè faciat secundum jussione Abbatis sui. Humilitatem autem super omnia habeat, & cum ex substantia non est quod tribuatur, sermo bonus responsionis porrigat, ut scriptum est: *Sermo bonus, super datum optimum.* Omnia quæ ei injunxerit Abbas, ipse habeat sub cura sua, à quibus eum prohibuerit, non præsumat Fratribus constitutam annonam sine aliquo typo, vel mora offerat, ut non scandalizentur, memor eloquii Divini, quid mereatur, *qui scandalizaverit unum de pusillis istis, expedit ei, ut suspendatur mola asinaria in collo ejus, & demergatur in profundum maris.* Si congregatio fuerit magna, dentur ei foliata, à quibus adjutus, & ipse æquo animo adimpleat officium suum. Horis competentibus dentur, quæ danda sunt, & petantur, quæ petenda sunt, ut nemo perturbetur, neque contristet in Domo Domini.

## Circa Actus multiplices.

AD hujus officium pertinet, recipere omnia, quæ dantur Domui, vel procurantur, vel obveniunt quoquo modo: nisi quando fortè Pri-

Cod. Regul. Tom. 1<sup>a</sup>

or in aliquo aliter interdum duxerit ordinandum. Item facere, & solvere omnes expensas, quæ fiunt in Domo, nisi fortè circa Sacristiam, vel opera, vel alia hujusmodi Prior aliter ordinaverit. Item recitare fideliter beneficia omnium in Capitulo. Item computare de omnibus coram Priore, & Suppore, & Fratribus consiliariis, quoties ipsis visum fuerit, & debet habere proprium scriptum, in quo recepta, & expensa sollicitè scribat quotidie, ne per oblivionem aliquid omitatur; in quo etiam status Domus quo ad ea quæ debentur eidem, diligenter, & per singula aperte describat. Item ipsius interest emere omnia, quæ emenda sunt tempore suo, ut ligna, oleum, corium, & similia, quæ solent emi. Similiter vendere, si quæ vendenda fuerint, de his quæ sub manu ejus sunt, ut bladum interdum, vel vinum superfluum, & hujusmodi. Item cum instat tempus ad procurandum in aliquo, vel querere; debet suggerere Prælati tempestive, quod ordinent de Fratribus ad hoc mittendis. Cum autem aliqua quæfita fuerint, debet habere curam qualiter apportentur, & apportata qualiter in locis debitis reponantur, & conserventur. Item debet habere sollicitudinem generalem, ne aliqua res ex mala custodia pereant, vel male tractentur, ne fiant superfluitates in hospicio, vel infirmatorio, vel alibi, & ea quæ remanent, diligenter recolligantur: quod officiales particulares, ut servitor hospitum, servitor infirmorum, Coquinarium, Refectorarium, & similes, officia sua diligenter faciant; & ad hæc videnda interdum discurre debet per officinas, & supplere defectus eorum, & super hujusmodi facere proclamationes in Capitulo. Item ipsius est habere specialem curam quotidie de Conventu, & hospitibus, si fuerint procurandi, & de piscantiis, secundum possibilitatem Domus, & Prioris ordinationem faciendis. Circa horam verò prandii debet semper visitare coquinam, & si res non sunt paratæ, facere differri pulsationem cymbali. Et cum viderit expedire, vel causâ hospitum, vel Conventus, ut juvet in coquina, ut melius fiant omnia, potest à prima mensa remanere. Ad ipsum autem pertinet tempore minutionis generalis, vel particularis, tempore rasuræ, tempore lotionis pedum, vel caputem Conventus, tempore ignis faciendi propter frigus pro Conventu, cogitare, & providere de necessariis ad hoc, & pro ministris ad hoc necessariis requirere Prælatum, ut eos assignet, vel in tabula pronuncientur. Item debet habere curam de cognoscendis amicis Fratrum, & familiaribus: & cum ad Domum veniunt, eos honorificè, & devotè recipere, & tractare. Licet autem sine licentia generali, vel speciali nihil dare debeat, tamen debet considerare, quibus expediat aliquando aliqua servitia fieri, vel de fructibus horti, vel de mittenda aliqua piscantia, vel faciendo aliquam remunerationem pro servitiis exhibitis, vel in domo à gartionibus, vel extra ab aliquibus pauperibus, licet gratis: & similia, & suggerere Priori, quod bonum videbitur in hac parte, & cum licentia ejus facere, quod fuerit faciendum. Circa gartiones debet habere diligentiam, ut videat qui valent, qui utiles, qui fideles, qui necessarii, qui superflui, qui religiosi, qui irreligiosi, qui suspecti, qui securi sunt: & quod ei videbitur bonum de abjiciendis, de retinendis, de recipiendis de novo, suggerere Priori; & cum consilio, & licentia jus facere, quod fuerit faciendum. Item ad ipsum pertinet juxta posse suum procurare per se, & per alios utilitatem Domus in testamentis, & aliis modis, quibus poterit, juxta modum, qui fuerit consuetus in Domo.

Z

CAP.

## CAPUT XX.

## De Officio Consiliariorum.

**Q**uædam modica frequenter oriuntur in Religione, quæ Prælatus potest sine consensu aliorum expedire. Quædam vero sunt adeo magna, quod nullo modo debent sine consilio Conventus expediri: quædam vero media, ad quæ expedienda solent assignari Fratres aliqui à Conventu, de quorum consilio, quæ huiusmodi sunt expeditur, ne vel Conventus in huiusmodi nimis fatigetur, vel Prælatus pro suo libitu faciens ista, minus sapienter procedat. Debent ergo ad hoc assignari, si possibile sit, Fratres, qui bonæ sint discretionis, exercitati in agendis, amatores boni, in sensu suo non nimis abundantes, auctoritatis competentis, & qui Dei spiritum habere credantur. Porro ad horum officium pertinet audire cum Priore, Suppore, & Procuratore computationem, & scire statum Domus in his, quæ habentur, & quæ debet Domus. Item dare consilium circa ædificia, circa officiales creandos, vel absolvendos, & mutandos, circa Fratres ad Ordines promovendos, circa missionem Fratrum, & combinationem: vel causa prædicationis, vel quæstus, circa familiam recipiendam, vel abijciendam, vel sustinendam, circa provisiones in necessariis emendis, vel procurandis, circa distributionem librorum Fratrum defunctorum, & similia, in quibus necessario non requiritur de jure consensus Conventus. Porro in apponendo sigillum Conventus aliqua littera, vel charta, in alienatione, vel emptione rerum immobilium, & mobilium, in magna summa, in receptione Fratrum, & similibus, in quibus requiritur de jure consensus Capituli, cavere debent, ne dent consilium sine licentia & cum scientia Conventus (nisi forte super his commissionem habeant à Conventu) sed referre debent talia ad Conventum.

## CAPUT XXI.

## De Officio Eleemosynarii.

*Circa petitionem eleemosynæ.*

**E**leemosynarius dicitur, qui habet petere eleemosynam. Porro ad istud officium debet poni talis Frater Conventus, qui sit securus contra omne peccatum, affabilis in verbis, amabilis, & honestæ conversationis inter homines, qui sufficiat aliqua verba ædificatoria simplicia interdum dicere: prudens in observando quid, & quando, & qualiter, & à quibus petere debeat, non importunus notabiliter in petendo, nec tedious se reddens hominibus; nec de fructu sui laboris, & industriæ superbiens inter Fratres. Ad huiusmodi officium pertinet esse sollicitum qualiter caute, & religiose melius possit procurare eleemosynas pro Fratribus, sine in pane, sive in piciantiis, sive pro infirmis sive in denariis, sive in aliis rebus secundum morem patriæ, & ordinationem Prioris. Quod autem in pecunia acquirit, debet secundum ordinationem Prioris, vel in pane, vel in aliis necessariis expendere, vel Procuratori tradere. Debet autem sibi familiares acquirere, qui eum, & Domum juvent, & dirigant interdum in procurando aliquas eleemosynas de testamentis, vel aliis eleemosynis. Item eundo per villam, non se debet à Socio separare, maxime cum aliquam domum intrat; & cavere debet ne unquam cum mulieribus longas collocautiones habeat, vel frequentes, sedens cum eisdem. Ubi autem est consuetudo, quod petitur eleemosyna panis, clamando pro Fratribus, debet sub nomine Prædicatorum, & non alio. Ad Magnates autem cum transeunt, non debet pro eleemosyna accedere, nisi prius habita col-

latione cum Prælato. Et cum accedit, debet explorare modum Curia illorum virorum, videlicet utrum in propria persona soleat ab eis peti eleemosyna, vel ab eleemosynariis suis, vel aliis de curia sua, & consuetudinem curia servare. Item cum Fratres habent aliquid mandare, vel explorare aliqua quæ per eos expediri possunt, & procurari in villa, debet hoc libenter expedire, ne discursus per alios oporteat multiplicari.

*Circa largitionem eleemosynarum.*

**P**orro ad largiendam eleemosynam communem secundum possibilitatem Domus, solet Frater aliquis assignari: vel idem, qui habet petere eleemosynas, aut alius qui sit pius in compatiendo, mansuetus in tolerando improbitates, & molestias petentium, discretus in distribuendo, sollicitus in congregando, quæ fuerint largienda. Ad huius officium pertinet recolligere debito tempore in Refectorio, in procuratione, in hospitio, in infirmitorio, in coquina, tam Conventus quam infirmarum, in domo familiarum, & ubicumque solet in domo comedi, ea quæ remanent ad eleemosynam pertinentia: & servare munde, & honeste in vasis propriis ad hoc deputatis, in loco honesto usque ad tempus distributionis. Ea vero, quæ in infirmitorio colliguntur, in quibus aliquid de carnibus, vel brodio carniū potest inveniri, sic debet semper separare, & custodire, & dare alicubi in villa, non in porta secundum consilium Prioris: ita quod nunquam aliquid mixtum de istis, inveniatur in eleemosyna communi. Eleemosyna communis secundum morem patriæ, & ordinationem Prælati, debent, vel certis personis dari, vel ad eleemosynam venientibus ad portam, certis diebus, & horis, & locis ad hoc assignatis. Cum autem datur ad portam, cavere debet, ne ingerentes se improbe, vel tumultum facientes percutiat, vel asperis verbis corripiat, sed cum omni patientia eos ordinate, & pacifice faciens residere, ministrare charitative quod habet, & de verbis dulcibus consoletur eos. Si qui verò inter istos veniunt, qui videbitur magis reverendæ, & verecundiæ personæ: ad partem eos segreget, ministrans eis honorabilibus, quod poterit, & à verecundia ipsis caveat prout potest. Infirmis vero, & magis miserabilibus, abundantius prout potest aliquid debet dare. Item debet sollicitè curare, ne ea, quæ debent in eleemosyna dari, per negligentiam pereant, vel in usus alios transferantur. Diligenter etiam debet considerare, si sit aliquid in Domo, sive legumina, sive herbæ in horto, sive alia quæcunque non sint necessaria Fratribus, & instare apud Prælatum, quod huiusmodi in eleemosynas largiantur.

## CAPUT XXII.

## De Officio Refectorarii.

*Circa Mensam Conventualem ordinariam.*

**A**d officium Refectorarii ponendus est Frater Clericus, vel Conversus, qui sit industrius, & diligens ad faciendum honeste quæ huiusmodi requirit officium. Porro ad ipsum pertinet præparare mensam tempestive ante comessionem, decenter, & munde: & sic plene in ea singula ponenda collocare, quod servitores non habeant ponere nisi pulmenta, falsas, & piciantias. Proinde debet à principio aptare mappas, ponere panem, & vinum ubi usus est vini: vel in singulis vasis pro singulis Fratribus; vel in vase uno pro multis, secundum consuetudinem, & scyphos. Item sal, & aquam in tor vasis, quot competentem possint habere, qui voluerint. Item cochlearia, cum fuerint apponenda aliqua, ad quæ sunt necessaria. Item can-



delas cum decentibus candelabris cum cœnatur, vel sit collatio tarde, tor, quot sufficienter illuminent unumquemque. Sic autem aprandæ sunt mappæ, quod à parte interiori remaneat tantum de mensa nudum, quod vasa pro vino, pro sale, pro aqua, pro candelabris, & ossa fructuum, & paraturæ pomorum, & huiusmodi inutilia remanentia, ibidem valeant collocari, ne mappam deturpent. Alia vero prædicta, quæ super mappam collocantur, debent cooperiri de parte mappæ dependente, super illa replicata honeste, quousque Fratres sedentes partem illam replicent super genua. Debet etiam habere curam, quod tempore magni frigoris, quando Prior dederit licentiam, ut stupa Refectorii calefiat (ubi est usus stupharum) vel ubi non est usus huiusmodi, carbonem accensi habeantur in Refectorio in patellis congruis deferendis per servitores: & in aliquo vase, vel in aliquibus aqua calida, vinum calidum pro illis, qui voluerint vinum suum calefacere. Debet etiam expedire in solo caputio, & frequenter circuire per mensas ad videndum si deest aliquid alicui de communi: vel si quis aliquid dimittit, illud reportet, vel det alii, qui non habuerit. Si qui vero fuerint Fratres, qui propter infirmitatem, vel alia de causa, de licentia utantur aliquibus aliis quam communibus, vel aliter paratis; debet esse sollicitus circa illos, ut sciat sine defectu, prout Prior duxerit ordinandum, & debet circumeundo eorum Prælatum se præsentare frequenter, ad videndum, si quid dixerit ei faciendum. Cum aliquis Frater tarde venit, & non audeat intrare sine licentia, ipsius est petere pro eo licentiam, & providere de loco, si forte sedes omnes fuerint occupatæ, & eidem ministrare, vel servitoribus hoc suggerere. Si autem aliquos extraneos contingit in Refectorio comedere, tunc magis debet esse sollicitus, ne ibi videant aliquid quod eos minus ædificet, & secundum eorum statum magis curare de eis, & Priori reducere ad memoriam, si vult eis mittere aliquid vel vult eis aliquid melius ministrari, in pane meliori, vel aliis quibuscumque. Porro ea, quæ remanent, & recolliguntur de mensa, quæ uno deferuntur ad coquinam, ipsius est servare, & sequestrare: seorsim ponendo ea, quæ pertinent ad eleemosynam, & alia, quæ possunt iterum Fratribus dari, & illa, quæ magis competunt familiæ, vel operarariis, quando sunt tales, quibus provideatur in cibo, vel in in huiusmodi usus alios reservare. Cæterum cum Fratres conveniunt solum causa collationis, vel in die Parasceves ad Refectorium, non sunt mappæ ponendæ; nisi solum ea, quæ pertinent ad horam illam, & diem.

*Circa mensam extraordinariam.*

Item ipsius est servire Novitiis, & illis, cum quibus dispensatur, ut bis comedant tempore jejunii: & certo tempore ad hoc facere signum, & præparare ea, quæ fuerint præparanda sine defectu; & ministrare illis prout à Priore fuerit ordinatum. Si autem aliquos Fratres cum licentia contingat præoccupare horam comestionis causa egrediendi, vel post utramque mensam venire, & comedere in Refectorio: debet istis servire, & adstare ipsis; & ea, quæ Conventus sunt eidem ministrare. Si aliquis extraneus ibi de licentia comedat, debet eidem servire, & ministrare, secundum statum personæ suæ, & familiaritatem ad Fratres, plus, vel minus. Debet autem cum tanta disciplina, & religione se habere in omnibus, ne occasione officii frangat silentium cum aliquibus; nec clamet alte pro negotio, nec ad fenestram coquinæ tumultuose, nec multum, nisi de necessariis loquatur. Benigne autem, & mansuete se habeat ad omnes,

*Cod. Regul. Tom. IV.*

& charitative, & hilariter serviat, & faciat, quæ fuerint faciendæ. Caveat autem sollicite, ne alicui, vel in mensa ordinaria, vel extra ministret, nisi quæ secundum ordinem fuerint, nec ministrare permittat. Et licet ab acceptione personarum sit ei cavendum, tamen Novitiis, & magis indigentibus debet ostendere ampliora viscera charitatis.

*Circa Domum Procurationis, sive Dispensam.*

Item ipsius est habere domunculam juxta Refectorium, quæ dicitur Domus Procurationis, vel Dispensa, quam debet mundam habere, & sic aptare modis diversis in fenestris, in pericis, & in armariis, & in arcis, & similibus; quod commode possint ibi servari, & collocari, quæ sunt ibi servanda, vel reponenda. In hac verò debet servare panem, & ministrare per totam Domum ubicumque fuerit ministrandus: hoc servato moderamine, quod in infirmitorio, meliorem infirmis ministret, ubi varietas, & panis habetur. In hac etiam debet servare caseos, fructus, & cæpas, & huiusmodi, quæ sibi traduntur à Procuratore, vel quotidie, vel certis diebus, secundum ejus ordinationem ministranda. In hac etiam debet servare mappas, canistros, utensilia necessaria ad suum officium, nisi forte in Refectorio reponantur in alio loco apto. Tempore quoque comestionis, vel collationis instante, debet de cellario vinum apportare ad hanc: & si temperatum non fuerit temperare, & inde in Refectorio ministrare; vel tradere servitoribus ministrandum. Ibi etiam debet in certo loco reservare ea, quæ pertinent ad eleemosynam, quæ de Refectorio colliguntur, ut eleemosynarius inde accipiat tempore opportuno.

*Circa Lavatorium, & munditias, & alia quædam.*

Item ad ipsum pertinet providere de aqua in lavatorio, & ipsum lavatorium frequenter mundare, & mundum servare. Item de manutergiis in clauistro providere, & illa frequenter mundare, & interdum alicubi temovere certa hora, propter advenientes ea deturpantes. Item debet providere, quod mappæ de Refectorio laventur, & mudentur tempore congruo, & quod justæ, & lagenæ, & scyphi pro sale, & aqua, & utensilia, & cætera omnia, quæ ad Refectorium pertinent, laventur, & tergantur, & munda servantur; & Refectorium, & Procurationis Domus scopentur, & ab araneis, muribus, & huiusmodi immunditiis laventur, vel purgentur sæpe, & diligenter, prout requirit necessitas. Cum autem Magnates comedunt in Refectorio, debet providere, quod semper pulchras mappas, & honestas, scyphos, & scutellas, & cochlearia, & huiusmodi habeant in mensa sua: insuper pulchra manutergia debet habere, quæ ante eos ponantur cum comedunt; & alia similia, quæ eis apponantur in manuum lotionem. Debet quoque sollicitare Coquinarios, ut sic tempestive parent omnia, quod facto signo in Ecclesia omnia sint parata, & ipso audito, & inquisito utrum sint omnia parata, sine mora debet cymbalum pulsare, si omnia sunt parata, ne Fratres otiosi spectent. Et huiusmodi mora similiter cavendum est in pulsando cymbalum ad collationem, post signum factum in Ecclesia. Ad ipsum etiam pertinet habere curam, quod sedes aptæ habeantur in clauistro, in quibus sedeant Fratres post manuum lotionem. Cum autem aliquid aptandum fuerit in refectorio, vel extra, vel aliqua enundanda, vel reficienda, circa ea, quæ pertinent

*Z 2*

ad

ad officium suum: debet pro his instare sollicite apud Procuratorem, vel Prælatum, si negligens fuerit Procurator. Cùm autem scit aliquos extraneos debere comedere in refectorio, vel debere xenia deferre, vel aliàs intraturos; debet Priorem cautum reddere, ne aliquos sedere in terra permittat: quod si aliqui redierint jam, & alii debeant supervenire, debet hoc Priori dicere antequam aliquos intrare contingat. Debet quoque vel semper certis sic adstare in refectorio, vel circa illud, quod cùm necesse fuerit, possit faciliè reperiri: præcipuè ubi magnus est Conventus, & multæ occupationes circa refectorium occurrunt. Ubi verò propter paucitatem Fratrum modica sunt agenda, debet cum circa refectorium non est occupatus, in aliis occupari libenter.

## CAPUT XXIII.

## De Officio Servitoris Mensæ.

*Circa primam Mensam.*

**S**ervitor, seu Servitores primæ mensæ, auditò signo post Horas in Ecclesia factò, debent festinè ad refectorium ire, & remota cappa in capitis solo remanentes, juvare Refectorarium, in faciendis, quæ ad eum pertinent circa illam horam, si fortè illa non complevit. Pulsato vero cymbalo debent incipere ponere scutellas, incipiendo à mensa Prioris ( præcipuè ubi est magnus Conventus) nisi fortè propter magnum frigus, & muscas interdum dimittant; & si necesse fuerit aliquos de Fratribus, qui manus jam laverint, ad adjuvandum se in hoc advocare. Facta autem benedictione, & residentibus Fratribus scutellas quæ positæ non fuerint, ponant: vel si nullæ positæ fuerint festinè, & mature easdem apportare debent, incipiendo tunc ab inferioribus. Collocatis vero primis scutellis sine mora longa apportare debent quidquid est iterum apportandum ante remotionem primarum scutellarum; ita quod si falsa fuerint apportanda separatim ab alio, cum ferculo illo, vel ante oportet; & idem est observandum in tertio, vel ultimo ferculo, si fuerint apportanda in comparatione ad præcedens. Cum autem communiter videntur Fratres expediti de pulmento, vel alio ferculo, tunc primo debent illud communiter removere; caventes ne removeant aliquid à conspectu Fratris, qui illud non elongaverit à se, & amplius non videatur curare de illo. Ipsorum etiam est circuire cum aliud non habent facere, ad videndum si deest aliquid, vel aliquis aliquid dicere velit. Appropinquante autem fine primæ mensæ, cum omnia vasa, in quibus ministratur, apportaverint ad coquinam, debent fructus, si qui fuerint supra in canistris, vel aliis vasis decedentibus, & paraturas fructuum, & restas ovorum, & nucum, vel hujusmodi, & inutilia in aliis vasis decentibus recolligere separatim, & ad procuratorem deferre. Tandem cum Fratres communiter cessant comedere, in sportis, vel aliis vasis honestis recolligere panis particulas, quæ supersunt. Attendendum autem est eis in omnibus, quod disciplinate se habeant, & mature incedant: ne in frangendo silentium, vel clamando, vel tumultuando ad fenestram coquinæ, vel contendendo cum aliquo, vel frangendo, vel effundendo aliquid, aliquem scandalizent, & præcipue cum extraneos contigerit interesse: circa quos magis debent esse solliciti, & tanto plus, quanto fuerint honestiores, vel excellentiores personæ. Ipsorum etiam est tempore comessionis primæ mensæ curam habere de ostiis, & fenestris claudendis

& aperiendis, prout fuerit opportunum, & de catis, & de hujusmodi animalibus excludendis. Cum autem plures sunt Servitores scripti, ubi propter paucitatem Fratrum unus tantum sufficit; debent inter se ordinare, quod unus interdum comedat, & alter serviat vicissim. Porro ad servitores secundæ mensæ pertinet, quod egresso Conventu de refectorio ipsi remaneant, & ibidem gratis redditus remotis cappis parent mensam, in qua debent comedere, qui comesturi sunt in secunda mensa: & ipsis serviant portando, & reportando, & alia faciendo, quæ dicta sunt supra de servitoribus primæ mensæ. Si autem aliqua superfuerint in mensa, quæ non pertinent ad eleemosynam, si possunt iterum dari Fratribus, illa debent colligere, & ponere separatim: quæ omnia faciendâ sunt post secundam mensam, si forte illa durante non habuerint ad hoc tempus. Si autem illis factis adhuc durante mensa tempus fuerit, debent in scyphis tergendis, vel in aliis ad adjutorium Refectorarii pertinentibus occupari; vel si Fratres voluerint, & eis vacaverit, legere aliquid submisce. Finirà vero secundâ mensâ, debent facere de remanentibus in illa, sicut supra dictum est de reliquiis primæ. Tempore vero jejunii debent mappas, & omnia ( præter scyphos) removere de mensa in prandio, & in suis locis reponere, similiter semper in cœna. Cum vero bis comeditur, debent mappas post prandium in mensis dimittere usque ad cœnam replicatas decenter.

*Circa Collationem.*

**A**D Servitores vero primæ mensæ pertinet auditò signo in Ecclesia pro collatione convenire, & juvare Refectorium in his, quæ ad collationem pertinent, & servire in collatione. Servitores vero secundæ mensæ servire debent illis, qui post Conventus recessum à collatione immediate habent bibere, & juvare si necesse fuerit Refectorarium, in his, quæ tunc habere facere, si potest breviter absque Complectorii amissione. De cibando verò Servitore uno, vel pluribus in mensa, debet fieri prout Prior ordinaverit, considerata paucitate, vel multitudine Fratrum.

## CAPUT XXIV.

## De Officio Lectoris Mensæ.

**A**d officium verò Lectoris Mensæ pertinet prævidere diligenter, lectionem non solum quoad punctuationes, & modum accentuandi; sed etiam quoad scientiam, ut sciat sensum eorum, quæ dicuntur, & ut sic etiam ibi proficiat in addiscendo. Cùm autem de aliquo dubitaret sive quo ad sensum, sive quo ad modum legendi, debet recurrere ad glossas, & postillas, vel ad Fratres, per quos possit instrui, & maxime ad Correctorem mensæ. Cùm autem accipit benedictionem in prandio, vel cœna, debet accipere in medio Refectorii: in Collatione verò de sede, in qua sedet, factò signo à Præfato, vel Hebdomadario, si Prælatus non fuerit præfatus. In prandio vero, & cœna debet expectare, quod omnes sedant pacifice, antequam incipiat legere. In Collatione verò postquam aliqui licet pauci convenerint, potest incipere ad signum prædictum, vel sine signo illo, cùm desunt illi, ad quos pertinet illud facere. Debet autem se sic disponere in sede, in qua legit, quod pro magna parte habeat vultum versum ad Conventum, si loci dispositio hoc permittat. Porro in legendo debet cavere ne nimis submisce, vel clamose legat, nec nimis cursim, sed morose valde, & distinctè, & sonore, & pausas faciat interdum competentes. Debet autem aurem ap-

ponere ad intelligendum, si in aliquo corrigitur, & correctionem quæ sit à Correctore, etiam si minus bene dicit, humiliter suscipere, & exequi; dummodò manifestum errorem non dicat. Cum autem legitur in Bibliis, debet sic incipere: *Talis Libri, Capitulum tale*, dum incipit lectio in principio Capituli: si autem incipit infra Capitulum, debet sic incipere: *Talis libri, Capitula tali*. Cum incipit in principio alicujus libri, sic debet incipere: *Incipit liber talis*. Cum autem incipit in aliquo Prologo, si sit unicus Prologus in libro illo, debet sic incipere: *Incipit Prologus in talem librum*. Si verò multi, debet in primo sic incipere: *Incipit primus prologus in librum talem*, in secundo verò sic: *Prologus secundus in librum talem*, & sic deinceps. In Epistolis verò Divi Pauli debet sic incipere: *Incipit argumentum*, &c. postea legere argumentum, deinde dicere: *Incipit Epistola talis*. Si autem legit Homiliam, præmissis textu Sancti Evangelii, & præmissis: *In illo tempore, &c. & reliqua: & lectio Sancti Evangelii, &c.* debet sic incipere: *Homilia talis*. Cum autem legit Evangelia, & venit ad Passionem debet transire usque ad Resurrectionem. Ubi autem est consuetudo, quod legatur tabula in mensa in Festis majoribus, debet eam prævidere, & legere circa finem mensæ. Cum verò finitur liber, debet sic terminare: *Explicit liber talis*. In legendo autem talem, vel talem librum, sive in collatione, sive in collatione, non debet aliquid propria autoritate facere, sed quod ei dictum fuerit à Correctore in mensa. Regulam debet legere prima die post Dominicam, quando non contingit extraneos interesse in Refectorio. Ad ipsum etiam pertinet habere curam de libro, in quo legitur, custodiendo, & portando in Refectorium, & reportando. In terminatione vero lectionis, debet aliquod signum tunc facere cum cera, vel speram superponere, ut sciat ubi debeat reincipere, vel ostendere successoribus, sive aliis, qui legerit loco sui. Cui debent extranei interesse, si non est talis Lector, qui consueverit bene legere, debet alii magis idoneo ad legendum committere lectionem: vel rogare Prælaturum, ut hoc faciat, præcipiè cum illi extranei litterati, & intelligentes reputantur.

## CAPUT XXV.

## De Officio Correctoris in Mensa.

Officium Correctoris in Mensa, est ordinare cum Prælatu, quid, quo tempore, sive in prandio, sive in cæna, sive in collatione legatur. Ipsi etiam interest cum consilio Prælati observare, quando Fratres melius sunt in Domo: tunc facere legere frequenter in anno Acta Capitulum Generalium, & Provincialium, litteras Magistrorum, & Constitutiones; & notas aliquas de Rubricis magis utiles, & frequentius necessarii secundum judicium Cantoris. In collatione vero, & in cæna debet providere, quod legantur libri aliqui bonæ edificationis, & præsertim historię, quæ retineri valeant, continentes: ut sunt vitæ Patrum, libri collationum, & similes. In prandio vero, etsi frequentius Biblia est legenda, tamen possunt interdum utiles libri aliqui legi. In vigiliis vero, & Festis, & in diebus privilegiatis, ut sunt dies Rogationum, & hujusmodi, possunt legi Passiones, vel Homiliæ, vel Sermones Sanctorum edificatorii, & in die Parasceves solent legi Threni Hieremiæ, vel Sermones devoti de Passione. Porro ipse est prævidere diligenter lectionem, & studium suum circa illa maxime applicare: & Lectorem instruere cum petierit, vel etiam si ipse non petierit, prævenire eum in hoc, maxime cum in

lectione occurrerit aliquid difficile, vel dubium in accentuando, vel pronunciando. Cum autem sedes sua nimis distat à loco lectionis, vel non est bene disposita ad intelligendum Lectorem, potest de licentia eligere locum alium ad sedendum in Refectorio, propinquum Lectori ante faciem constituto. Cavendum est autem ei ne correctionibus nimis curiosis, seu inusitatis, vel minus utilibus molester Lectores, vel auditores. Si autem contingat, quod extranei litterati debeant interesse, & Lector non reputetur multum idoneus ad legendum: providendum est ei, quod alius legat loco ipsius, & super hoc Prælaturum adeat. Cum vero aliquem Lectorem viderit frequenter circa aliqua deficere, debet his observatis ad aliquem locum congruum ipsum advocare, & ipsum circa defectus, & ignorantias suas instruere charitative. Ut autem, quæ ad istud officium pertinent, melius fieri possint, debet procurare, quod habeantur in Domo aliquæ summæ de modo accentuandi, & pronunciandi, & ad Grammaticam pertinentes, per quæ Fratres in legendo possint dirigi, & Corrector in corrigendo, & hoc debet Corrector, prout poterit procurare.

## CAPUT XXVI.

## De Officio Infirmarii.

Infirmarius dicitur, qui habet curam generalem infirmorum, & infirmitorii. Debet autem ad hujusmodi officium poni Frater, qui sciat esse patiens ad molestias infirmorum, & compatiens infirmitatibus, & necessitatibus eorum: qui sit dulcis eloquio, verbis consolatoriis affluens, & providus, & discretus in procurandis, servandis, & ministrandis necessariis; nec tenax in dispensando necessaria, nec prodigus in consumendo aliqua sine causa. Ad hujusmodi igitur officium pertinet, habere curam de omnibus, quæ ad infirmitarium, vel infirmos pertinent generaliter, vel in casibus variis, & emergentibus, quæ pro aliquibus haberi debent, vel fieri: & providere de his, quod habeantur sine defectu tempore opportuno.

## Circa Res habendas.

Proinde debet sollicitudinem habere apud majores quantum potest, quod habeatur infirmary sanum & bonum, & bene dispositum in officinis commodè aptis, sufficientibus, commoditate camerarum, & horto seu prato ad recreationem infirmorum: in quo etiam sint aliqua loca, seu domunculæ, & arcæ, & armaria apta ad repositionem rerum omnium, quas ibidem servare oportet; & quod hujusmodi domus frequenter purgetur, & munda fervetur, & reparetur, & reficiatur, cum necesse fuerit diligenter. Debet etiam providere, quod habeantur ibidem competentia vasa, vel utensilia, mappæ, scyphi, scutellæ, mensæ communes, & singulares pro comedentibus in lecto, instrumenta, & hujusmodi necessaria abundanter: circa coquinas, circa lectos, circa comestionem, circa medicinalia, balnea, vel stuphas, circa minutiones, circa rasuram, circa lisiones pedum, & caput, circa portionandos, urinaria quoque, & sellæ pro impotentibus surgere, & ire ad cameras communes: feretrum quoque, & coopertoria propria, & alia necessaria pre mortuis, & loca apta ad lavandum mortuos, & lavatorium commune pre manibus, & receptacula aquarum, quæ effunduntur interdum: libris quoque pro Officio Divino dicendo, & ad legendum interdum pro consolatione, & edificatione infirmorum, ut sunt vitæ Patrum, & similes libri. Candelæ quoque, & oleum pro



lampade, servitores secundum exigentiam multitudinis, & secundum conditiones infirmorum, procuranda sunt apud Prælaturam. Et cavendum ne extranei serviant infirmis, sed Fratres invicem, ubi hoc potest commode observari. Ubi vero extraneos advocare compellit necessitas, cavendum est ne alicui ad huiusmodi recipiantur servitia, nisi adeo familiares sint, quod Fratrum secreta possint eis revelari secure. Ipsi est etiam, si novit per se medicinam, vel alios Medicos Fratres, vel extraneos, adhibere consilium medicinæ, circa infirmos, & procurare, quod fiat, quod faciendum fuerit pro salute: ordinare etiam, & providere quid quotidie comedatur, sive ab illis, qui veniunt ad mensam communem, sive qui decumbunt; & habere sollicitudinem, quod tam hoc, quam medicinalia tempestive, & suo tempore ministrentur, sicut requirit conditio, & necessitas infirmorum. Necessaria vero pro expensis debent à Procuratore recipere, vel aliter si Prior duxerit ordinandum: & omnia computare, & in capitulo recitare, si quæ specialia beneficia notabilia fuerint collata infirmis. Ipsi etiam interest frequenter visitare infirmos, & discurrere per coquinam, & officinas alias ad videndum si fiant omnia, quæ fieri debent: & si quid negligentia invenerit, corrigere debet, & cum commode potest, apponere manum ad adjuvandum. Notare etiam si aliqua fiat dissolutio, vel inordinatio ibidem, & illud interdum charitative corrigere, & interdum etiam Prælati referre, interdum etiam in capitulo super huiusmodi proclamare. Si quæ vero dicta fuerint in capitulo, quæ ad infirmos pertineant, debet illa infirmis referre; & cum eorum infirmitates aggravantur, Prælati in capitulo dicere, ut faciat orare pro eis. Mortuos quoque de novo, ipsi Prælati in capitulo ad memoriam, ut Fratres recommendentur reducere, & habere curam, quod per Domo alias cito significantur per Vicarium.

#### *Circa Infirmos.*

Porro cum aliquis de novo mittitur ad infirmitorium, debet eum cum omni charitate suscipere, & dulciter consolari; & secundum suam necessitatem de eo sollicite cogitare: sive in assignando locum, & lectum, si expedire eum jacere in infirmitorio, sive à speciali servitore si indiget, & aliis huiusmodi, quibus ejus infirmitas noscitur indigere. Si autem commissum fuerit ei à Priore, quod curam habeat de ponendo Fratres in infirmitorio, debet esse sollicitus de his, quibus indigent, cum ei dicitur, vel advertit: & eos prævenire antequam petere illud cogantur. Cum vero aliquis abutitur infirmitorio, sine causa rationabili ibi nimis morando, debet hoc caute suggerere Prælati, ut ipse faciat, quod circa hoc fuerit faciendum. Circa vero illos, qui ex nimia humilitate, vel religione petunt licentiam recedendi antequam expediat eorum statui: debet etiam Prælatum cautum reddere, vel ipsemet debet esse cautus; si data est sibi potestas in huiusmodi licentiis concedendis, ne cedat eis sua religio in corporis notabile detrimentum. Cum vero nullus infirmus fuerit, debet habere curam de domo infirmitorii claudenda, & custodienda.

### CAPUT XXVII.

#### De Officio Servitoris Infirmorum.

Servitor infirmorum dicitur, qui deputatus est ad serviendum infirmis; vel in communi, quo ad illos, qui veniunt ad mensam commu-

nein, vel singulariter alicui, vel aliquibus cum decumbunt. Hujus autem officium est sollicitum esse, ut fiant omnia facienda ratione officii diligenter, & suo tempore: & pium esse ad infirmorum necessitates, patientem ad eorum molestias: consolationes charitativas verbis, & factis impendere eis, & omnia, quæ ad studium, vel alias occupationes (quæ non sunt de necessitate salutis, vel Ordinis) postponere, propter huiusmodi pietates.

#### *Circa communem Servitorem.*

Porro qui deputati sunt ad serviendum communiter omnibus, sive ad serviendum in domo, in qua comeduntur carnes, sive in domo recreationis; debent scire diligenter illud, quod supra notatum est circa officia Refectorii, & servitorum primæ mensæ, vel secundæ, circa mensas parandas, & servitium ibidem faciendum, & renovanda, & recolligenda in fine, & mundities faciendas, & utensilia, & huiusmodi custodienda, & lavanda: & lavatorium, & similia, & illa omnia, quæ illi ad suum usum pertinere videntur exequi diligenter. Debet autem in infirmitorio esse domus aliqua pro procuratione, vel duæ pro duabus prædictis domibus in loco, vel in locis idoneis, quarum, vel ejus custodiam, debet, vel debent habere qui est, vel qui sunt principales servitores. Cum autem comessionis hora appropinquat, debet huiusmodi servitor facere signum cum campana, quæ ad hoc debet apta haberi in infirmitorio, in loco idoneo; ad convocandum Fratres in infirmitorio constitutos. Cum vero eos convenisse viderit, debet aliud modicum signum facere ad manuum lotionem: quo facto sine aliqua expectatione eorum, qui non venerunt, debet fieri benedictio. Si vero aliquid mittatur infirmis, debet cavere ne deferens introducatur: quousque provideatur, quod nihil ibi videri possit, quod ipsum valeat scandalizare. Debet etiam providere, quod liber aliquis ædificatorius habeatur semper in promptu, in quo, vel ipse quando non est in aliis occupatus, vel aliquis Frater alius de comedentibus legere possit interdum in mensa si velit. Si vero mensæ fuerint mobiles, debet eas in fine reponere in loco suo. Expeditis vero omnibus, quæ ad comessionem pertinent, debet habere curam de claudenda Domo, in qua comeditur: si ibi lecti non fuerint, in quibus aliqui jaceant tempore, & hora à Priore determinatis. Debet autem cum infirmario conferre in fero de his, quæ agenda sunt pro infirmis, vel paranda, & innotescere ei, de multitudine infirmorum, & conditionibus eorum: & cum multiplicentur, vel minuuntur, ut faciat melius quid, & quantum sit in crastinum præparandum. Ipsi etiam est accipere, & apportare panem, & vinum de Refectorio, & cellario, prout fuerit ordinatum, & cavere ne superflue apportentur, & ne ea, quæ remanent percant, vel inutiliter consumantur; sed pro elemosyna, vel ad aliquos usus, sicut ordinatum fuerit diligenter ferventur. Debet etiam sæpe cum necesse fuerit visitare coquinam, sollicitare coquinos, & eos juvare cum potest, & ipsi indigent, ut melius, & citius omnia expediantur. Cum vero non sunt tot infirmi, vel tot facienda, quod oporteat eum morari multum in infirmitorio, debet cavere multum, ne otiose ibi commorans, effundat se in dissolutionibus, & omittat ea, quæ ad studium pertinent, & ad Religionem, & Conventum: & committere potest aliqua, modica infirmis facienda, qui possunt illa facere; ut est completio alicujus modici servitii, vel quod unus, qui non comedit serviat alii, vel quod

quod removeat mappas, vel menfas cum comederint aliqui, & hujusmodi, ut possit ipse cum aliis interesse Conventui. Cùm autem expeditus fuerit de Conventu, redire debet ad videndum, si quæ commisit, facta fuerint; & si quid deest supplendum ab eo. Debet etiam curam habere de faciendis lectis infirmorum, qui non habent proprios servitores, cum ipsi voluerint.

*Circa Servitorem specialem.*

**P**orro ad Servitorem deputatum alicui, vel aliquibus decumbentibus pertinet ejus coopertoria, & vestes, & hujusmodi de dormitorio apportare, si ipse voluerit, vel indiguerit; facere lectum infirmi, procurare ei urinaria, vel alia vasa, seu fellam, & hujusmodi, quæ fuerint necessaria; reservare urinam ad ostendendum, assistere eidem de die, & nocte cum fuerit necesse, juvare eum in discalceando, in surgendo, in intrando lectum, & similibus. Jacere in infirmatorio, vigilare coram eo cum fuerit necesse, servare eum in calore, & coram eo stare ne se discooperiat. Quærere consilium diligenter cum Infirmario de infirmitate ejus à Medico, & quæ Medicus mandaverit exequi diligenter, sive in medicinalibus, sive in cibis, sive in aliis quibuscumque. Habere etiam curam specialem de eis, quæ paranda sunt in coquina pro eo quotidie hora debita, & in hoc faciendo juvare, vel totum facere si fuerit necesse: & de aptando mensam circa eum commodè, & omnibus ad mensam pertinentibus ministrandis, & recolligendis, & reponendis in locis suis, & de calefaciendo aquam, vel vinum, & brodium, & similia. Vestes etiam ejus, & coopertoria, & alia lavanda lavare, & purgare locum, ubi jacet. Procurare etiam omnia quæ sunt in casu necessaria, vel causa balnei, vel minutionis, vel lotionis pedum, vel capitis, vel cocturæ alicujus, & similia (dummodò in aliquod periculum mortis non sint, vel gravis mutilationis) & his assistere, & juvare, vel totum facere, cum potest, commodè, & honestè. Panem vero, & vinum, & hujusmodi communia debet accipere à communi servitore, alia vero, quæ non habentur communiter, quæ tamen sunt necessaria, interdum debet quærere ab Infirmario. Ipsius etiam interest providere de lumine, & libris pro Officio dicendo, cum eo, vel coram eo, cum ipse non potest, in quo etiam non est omitendum, quin dicatur coram eo Officium Missæ, cum ad Missam ire non potest. Cùm vero potest, sed debilis est, eum juvare debet, eundo, & redeundo. Debet etiam aliquem librum consolatorium, & edificatorium habere in promptu, in quo aliquid legatur coram eo interdum ad ejus consolationem. Et tam per se, quam per alios Fratres ad hoc idoneos, quos interdum debet ad hoc inducere intendere consolationi, & edificationi ejusdem. Si quid vero petierit, vel facere voluerit, quod suæ contrarium sanitati sit, caute debet eum admonere. Si autem non sit contrarium, debet ei obtemperare, cum commodè fieri potest: excogitare quod ei prodesse possit, sive quo ad corpus, sive ad animam, debet totum, sive per se, sive per alios facere, vel procurare diligenter.

*Circa Sacramenta suscipienda.*

**P**orro circa Confessionem, & Unionem, & Communionem petendam, si fuerit negligens, debet eum caute sollicitare: & cùm hæc facienda fuerint, significare illis, ad quos pertinet, & necessaria ex parte infirmi sollicitè procurare; & ingravescente infirmitate reducere ad memoriam Prioris in Capitulo, ut faciat orare pro eo, si Infirmarius hoc non fecerit. Cùm ve-

ro mortì appropinquaverit, debet facere signum cum tabula, ad convocandos Fratres ad commendationem faciendam: cineres, & locum præparare cum super eis fuerit deponendus; & pertinentia ad hoc, & similia circa statum illum dirigere, & facere, & fociis ad hoc cum indiguerit advocatis, vel à Prælato petitis. Cùm vero mortuus fuerit, debet habere curam de aqua calefacienda pro ablutione corporis ejus, & involvenda, & coopertorio ad hoc deputato apponendo: ipso vero sepulto sererum, & coopertorium reportare ad sua loca. Deinde vestes ejus, & coopertoria, in quibus jacuit (si apportata fuerint de dormitorio) debet tradere vestiario: ut ipsis lotis, & mundatis per eum diligenter, de illis postea fiat, quod fuerit faciendum. Si vero coopertoria prædicta erant de infirmatorio, ipsa & capitergia, & hujusmodi, quæ cum eo fuerint, debet tradere Infirmario; ut illa faciat diligenter mundari, & aptari antequam in usum Fratrum iterum assumantur: fotiales vero, & bottas, & consimilia debet reddere in futoria. Debet quoque Infirmario reducere ad memoriam, quod habeat curam, quod in primo sequenti Capitulo recommendetur anima defuncti Fratris: & quod cito denunciatur per alios Conventus, & ipsius in hoc supplere negligentiam, si forte ipse negligens extiterit. Si vero aliquem extraneum in Domo aliquo casu contigerit ægrotari, ad Infirmarium pertinere, ut secundum voluntatem Prælati ordinet, ubi ponatur, & qualiter, & per quos servietur eidem tam charitative, & sollicitè, secundum exigentiam personæ, quod in hoc nunquam negligentia committatur.

CAPUT XXVIII.

*De Officio Receptoris Hospitum.*

**A**D receptionem hospitum talis Frater Clericus, vel laicus est ponendus, qui sit industrius in agendis, hilaris vultu, verbis affabilis, charitativus in necessitatibus, promptus in omni obsequio, disciplinatus in moribus, in expendendo mediocris, inhonestis foliatis carens, non tardus in labore, competenter potens, edificatorius in verbo, & qui sciat moribus aliorum, & diversitatibus variis prudenter, & religiose se conformare, & gratum cunctis servitium exhibere.

*Circa Curam, quam debet habere.*

**A**D hujusmodi officium pertinet habere curam de domo, vel de domibus hospitum (si sunt plures) custodiendis, claudendis, aperiendis tempore suo, mundandis, & honestè, & commodè aptandis, in formis, in sedibus, in mensis, & hujusmodi: & quod habeatur lavatorium pro manibus intus, vel extra in vicino, & receptacula aquarum, quæ effunduntur, ut domus non madescat. Et mensæ, & sedes, sive sedilia sufficientia, & quod habeatur interdum aliqua domuncula pro procuracione, & aræ, vel armaria, seu fenestræ, & perticæ, & hujusmodi, ad repositionem, & conservationem rerum, quas ibidem oportet servari interdum. Et quod habeantur ibidem scyphi, & vasa propria, & cochlearia, & vascula pro sale, & hujusmodi vasa, seu utensilia, prout necesse fuerit, sive ad pedum lotionem, sive ad alios usus; quæ debet mundare frequenter, & diligenter, & in locis debitis custodire. Debet etiam curam habere de lectis eorum parandis honestè, & munde ubicunque fuerint, & habere aliquas caligas, & tunicas, & caputia munda, & bottas sub aliqua clave, quas possit indigentibus tradere, pro tempore, ad mutandum

dum sua: candelas etiam pro necessitatibus hospitum, sive in domo, sive in via cum recedunt: campanulam etiam aliquam, cum qua fiat signum cum fuerit communis hora comedendi pro hospitibus, nisi sit consuetudo in illo Conventu, quod fiat cum cymbali ictibus. Porro panem à refectorio recipiat, vinum vero à Cellario, quale per Procuratorem fuerit ordinatum. Quæ vero pertinent ad forulares, vel vestes, à Vestiario si modica fuerint, vel à Præfato si fuerint magna, querere debet, & accipere. Ea verò, quæ ad cibum pertinent, vel alia quæcumque, debet ministrare Procurator, & pro eis recurrendum ad eum.

#### *Circa Fratres Hospites.*

Cum igitur intellexerit Frater hospitarius adventum Fratrum aliquorum, qui non sunt de Conventu, vel etiam de Conventu, qui diutius steterunt extra Domum, statim ad hos debet festinare, & occurrere læto vultu; & si non sunt auctoritatis magnæ, debet dare osculum pacis: si vero sunt grandis auctoritatis, non debet se ingerere ad osculum pacis, nisi primo inviteretur ab eis. Deinde ducere eos ad benedictionem, si non receperunt, & querere Sacerdotem, si ipse non est Sacerdos, qui eam faciat: & ipsam receptam acceptis baculis, & libris, & aliis si quæ gerunt, quæ sunt ab eo custodienda, ducere eos ad hospitium, & significare Præfatis adventum eorum. Si vero fuerit Magister Ordinis, vel alius recipiendus à Conventu, sua interest pulsare campanam Capituli, ad congregandos Fratres hora competente ad benedictionem, & ipsam receptam iterum pulsare ad Capitulum, cum dubuerit intrare Capitulum, primo super hoc ejus inquisita voluntate. Cum ergo refederint in hospitio, si tali venerint hora, quod jam comederint, debent invitari ad potum: deinde ad requiescendum in lectis, si voluerint, & hora hoc requisierint, & de loco camerarum edoceri. Et si non est dies, in quo eos oporteat jejunare, inquisito de qualitate refectiois, quam illa die habuerint, debet hoc significare Procuratori: ut secundum exigentiam necessitatis, debito modo paretur, quod poterit haberi. Si vero nondum comederint, nec audierint Missam, debet de Missa audienda, vel celebranda cum ipsi voluerint, & de ministris habendis providere. Si vero fuerint fatigati, & quiescere voluerint, fiat hoc si voluerint ante Missam, vel post: & interim sollicitare Procuratorem de providendo, quæ fuerint necessaria ad refectioem; & ipse sollicitè adjuvet in præparando, & ordinet, si necesse fuerit per Prælatum, quod aliquis, vel aliqui interim sint cum hospitibus, qui eos assolent, & dirigant si aliqua voluerint. Cum ergo fuerint omnia præparata, si fuerit hora consueta comedendi pro hospitibus, faciendum est signum prædictum aliter non. Quod etiam observandum est omni tempore circa hospitum comestioneem; & deinde ablutis manibus, & dicta benedictione, & collocatis Fratribus ab eodem secundum statum eorum, prosequenda sunt cætera, quæ ad mensam pertinent. Porro in parandis, & serviendo, & removendis mensis, & colligendis reliquiis, & reponendis, tam illis, quam scyphis, & aliis hujusmodi, observanda sunt ea, quæ supra dicta sunt circa Refectorium, & servitores primæ mensæ, & secundæ, & servitores infirmorum, prout & quantum competere possunt in Hospitio. Habendus est etiam aliquis liber in Hospitio ædificatorius in promptu, in quo dum comeditur legi possit interdum aliquid ab aliquo, si visum fuerit expedire. Ablutis vero manibus post refectioem

offerendus non est potus, nisi aliqui petierint, vel indiguerint, & sit in patria talis usus. Ordinandum vero est à Præfatis, quod cum comedunt hospites hora comestioneis Conventus, nec sunt expediti finita prima mensa Conventus, quod aliquis, vel aliqui de Fratribus, qui comederunt, veniant ad Hospitium, & suppleant vices Receptoris hospitum: ut ipse comedere possit in secunda mensa, & facta comestione redire debet ad videndum, si sint omnia bene facta, & supplendum, quod factum fuerit minus. De lotione vero pedum, & ministratioe potus in prandio, & cæna tempestive fieri debet provideri hora talis, quod eorum occasione non protrahantur vigilæ post signum dormitionis, nisi forte propter tardum adventum hospitum si observari non possit: in quo casu si fieri non possunt omnia consueta, fiat quod secundum horam fieri poterit bono modo: sive in procuratione eorum, sive in aliis. Cum autem ad lectos ducuntur, providendum est eis de urinalibus, vel aliis vasis idoneis ad urinam, & edocendi sunt de loco camerarum, si usque tunc nesciunt: & ostendenda sunt eis tunicæ, & caligæ, & caputia ad mutandum, si aliquo indigent: & si nox fuerit, dandæ sunt eis aliquæ candelæ, cum quibus vadant ad cameras, vel alibi, & cum quibus dicant Officium. Si vero vestes eorum indigent lotione, cum eorum licentia debet procurare, quod laventur. Si vero habeant magnam indigentiam in forularibus, vel aliqua veste, vel fecerint aliquas rationabiles expensas in via nondum solutas, ut de naulo, & hujusmodi; debet hoc ostendere Priori, ut antequam petant, cum ejus licentia, illud quo indigent offeratur eisdem. Quanto autem sunt magis extranei, vel de nationibus remotioribus, vel de majori labore veniunt, vel sunt majoris auctoritatis ratione status seculi, vel ratione majoris status in Ordine, vel si sunt Novitii; tanto in omnibus sunt magis charitative tractandi. Quod si fuerint consueti vagationi, & discursui, vel de modica religiositate notati, tanto disciplina religionis, & austeritatis circa eos magis est observanda, & exclusi cito de hospitio mittendi sunt ad Conventum, & ad Capitulum suo tempore vocandi. Qui ergo digni sunt secundum ordinem prædictum officio charitatis, cum recedere voluerint, invitandi sunt ad manendum, & morandum secure, & ad hoc quodammodo sunt cogendi. Ad benedictionem vero vocandi sunt ab ipso aliqui de Fratribus antiquis, & præcipue Præfatis, & cum osculo, & recommendatione sui, & orationibus eorum, & aliorum Fratrum, sunt per eos licentiandi, & usque ad portam, vel plus, secundum quod Præfato visum fuerit per aliquos conducendi. Porro in communibus, & quotidianis servitiis receptor hospitum debet esse sollicitus, tempestive parare omnia diligenter, & conferre cum Procuratore, ut provideat de necessariis, secundum multitudinem, & conditiones hospitum; & servientes in coquina pro hospitibus sollicitè juvare, cum necesse fuerit diligenter. Et si aliqua dicantur in Capitulo, quæ pertinent ad hospites, debet ipsis referre, si in Capitulo non fuerint. Quod si aliqui in hospitio nimis morari voluerint, vel nimis cito recedere, debet Præfato suggerere, quod viderit expedire; similiter de eis ad Capitulum convocandis, vel Chororum interdum cum circa hæc acediosi videntur. Cum verò Fratres Minores apud nos contigerint comedere, vel hospitari de nocte, in omnibus devotiis, & hilarius debet eis assistere, & ministrare quam Fratribus nostris.



*Circa hospites extraneos.*

**C**um aliquos alios extraneos, sive Religiosos, sive seculares hospitari contigerit apud nos, pertinet ad eum habere curam diligentem, secundum consuetudinem Domus, vel ordinationem Prælati, ubi & quid comedant, ubi jaceant: & conducere eos per officinas cum illas voluerint visitare, ducere ad Refectorium, lotis prius manibus cum ibi debent comedere, & in locis debitis collocare; & finita mensa cum eis remanere, & ducere eos ad Ecclesiam, ad gratias, vel ducere extra, & dicere cum eis Officium si fuerint magnæ personæ. Et postea ad loca debita ducere, reddere etiam cantos servitores mensæ, quod eis diligenter serviat secundum statum eorum. Si autem Capitulum, vel Chorum, vel Ecclesiam ad officium intrare debuerint, debet eos in locis debitis collocare, secundum statum eorum; & cum exire debuerint, eos iterum ad debitum locum ducere. Licet autem omnes sic tractare debeat, quod consolati, & ædificati recedant, tamen secundum exigentiam status eorum, & familiaritatem majorem, vel necessitatem, plius, vel minus est cum eis aliquid faciendum. Utrum autem cum Fratribus in hospitio comedere debeant, vel alibi; & utrum illi soli, vel aliqui Fratres cum eis: ad Prælati discretionem pertinet ordinare. Si autem fuerint adeo familiares, quod quasi Fratres habeantur, non oportet omnem sollicitudinem supradictam circa eos habere.

## CAPUT XXIX.

## De Officio Coquinarii.

**C**oquinarius dicitur Frater, qui habet curam de coquina, & de pertinentibus ad coquinam. Ad quod debet assignari Frater laicus, qui habeat industriam in parandis eis, quæ ad cibos pertinent, competenter honestè, & munde. Qui etiam sit discretus in dispensando, & prudens in providendo, & custodiendo, & in occupationibus non turbulentus, patiens, & pacificus cum omnibus, qui secum habent aliquid agere, & non impotens ad officii sui labores. Ad officium ergo hujusmodi pertinet habere curam, quantum potest circa domum coquinæ, quod sit bene epta, & extraneis non pervia: & quod munda fervetur, & suo tempore claudatur. Item, quod habeantur ibidem scutellæ, & vasa hujusmodi utensilia necessaria, & sufficientia, & quod diligenter custodiantur, & frequenter mundentur. Item, quod provideatur per Procuratorem tempore debito, quod habeantur ibidem in promptu semper ligna, sal, oleum, allia, cæpæ, & hujusmodi, quæ quotidie, vel frequenter sunt necessaria: & in loco debito illa custodiantur diligenter, & moderate consumantur, vel expendantur. Item, quod habeantur sub eis custodia legumina, quæ solent comedi in competenti quantitate. Item interest ipsius, quod legumina, vel herbas de horto secundum dies, in quibus illa solent comedi, vel alia pulmenta, faciat tempestive, & diligenter mundari, & parari. Apponenda est etiam magna cura, quod pulmenta bona semper habeantur in Conventu.

*Circa Conventum, & Hospites, & alios extraneos.*

**S**cire etiam debet à Procuratore tempestive quid præter pulmenta debeat præparare: utrum unum pulmentum, vel plura; & habere diligentiam magnam, quod Fratribus nunquam dentur ova putrida, vel pisces, vel alia, vel minus cocta. Cum autem appropinquaverit ho-

Cod. Regul. Tom. IV.

ra comedendi, nunquam debet dicere, quod pulsetur cymbalum, quousque omnia, sive pistantiæ, sive salis, sive alia sunt ita plene, vel fere parata; quod ministrando omnia continue nullam moram oporteat facere. Ipsius etiam est facere scutellas, & dividere, & dispensare pistantias, & alia hujusmodi bona fide, & omnia ad fenestram ministrare servitoribus: nisi forte Procurator aliquando hoc sibi assumere velit: vel ipsemet aliqua de istis committere velit pueris, vel aliis, qui tunc serviunt in coquina. Si autem Prælati ordinaverit, quod alicui, vel aliquibus paretur aliquid aliud, quam communiter paratur propter aliquam infirmitatem, vel causam, vel ad tempus, vel semper debet providere, quod circa hoc non fiat defectus. Similiter debet habere diligentiam debitam circa ea, quæ parantur pro hospitibus, sive operariis, sive aliis quibuscunque quod omnia fiant tempestive, & ordinate, & bene: & quod omnia, quæ de mensis remanent referrentur, sive ad elemosynam, sive ad alios usus, prout eorum qualitas requirit.

*Circa Adjutores.*

**C**irca familiam, quæcunque fuerit in coquina, debet habere curam, ut indoctos charitative intruat in agendis, minus disciplinatos, vel morigeratos, prout poterit bono modo ad honestatem inducat, & corrigenda circa eos, eorum indicet Correctori, & caveat ne res Domus distrahant, vel prodige pro se, vel pro aliis expendant. Summè vero cavere debet, ut nunquam eos percuriat, vel conviciis, aut maledictionibus, vel hujusmodi verbis inordinatis conturbet, vel aliquid faciat, vel dicat coram eis, unde possint habere occasionem detrahendi Ordini post recessum. Debet etiam providere eis de cibo, & potu, & de numero, & horis comestionis, eorum ordinare, & distribuere eisdem, quid in pistantiis, vel aliis fuerit dividendum: & carnes, quæ infirmis remanent, eis interdum dare, & dividere; si Prælati visum fuerit expedire. Debet etiam caute providere, ut cum eis, vel servitoribus hospitum, vel infirmorum, vel aliis accedentibus nunquam litiget, vel clamose contendat: sed in spiritu patientiæ, & mansuetudine omnibus satisfaciat, prout potest. Cavendum etiam ei diligenter, ne unquam extranei intrent coquinam, nisi forte aliqui Coqui Magnatum, cum apud nos comedunt, & Conventum procurant, & tunc valde cavendum est, ne videant aliquid in coquina, quod eos possit offendere; in quo casu cavendum est etiam ne cibi infirmorum cum carnibus unquam parentur in communi coquina Conventus, sed alibi. Ut autem omnia fiant diligenter, debet se extrahere ab aliis occupationibus, & mane brevem Missam audire, & suscitare fervientes in coquina, cum nimis dormiunt: & non solum dicendo, sed manum apponendo dare operam ad omnia peragenda. Cum autem comedere habet in secunda mensa, debet ordinare, quod aliquis de servientibus in coquina interim suppleat vices suas, & dicere quid sit ei faciendum.

*Circa Infirmos.*

**U**bi autem in magnis Conventibus coquina infirmorum separata est à coquina Conventus, debet ibidem esse proprius Coquinarius, qui secundum modum notatum omnia peragat, quæ ad coquinam infirmorum poterunt pertinere. Cujus est etiam habere curam, quod plumæ, vel animalium pelles, si quæ superfuerint, ad usus aliquos referrentur. Si vero coquina infirmorum non est alia à communi Conventus,

A a

sed

sed in communi præparatur pro eis, debet ibidem esse proprius serviens pro infirmis, si communes servitores non sufficiant, qui diligenter ibidem præparet, quæ pro eis fuerint præparanda, sequestratim ab aliis, & distincte. Si vero contingat, quod nullus Frater ponatur in coquina pro coquinario, sed famulus aliquis secularis, debet Procurator supplere quæ prædicta sunt de Coquinario per se, vel per aliquem de famulis ad hoc aptiorem.

## CAPUT XXX.

## De Officio Custodis Cellarii.

**C**ustos Cellarii dicitur Frater, qui habet custodiam vini, & omnium quæ ad potum pertinent. Ad quod officium ponendus est Frater aliquis, qui sciat de his, quæ pertinent ad custodiam vini. Et si nescit, inquirere debet ab aliis, qui dicuntur scire de arte hujusmodi, & exequi, quæ ad hoc pertinent, ne vinum aliquo modo, per ejus negligentiam destruat. Porro ad hoc officium debet habere cellarium, secundum modum terræ in bono loco, & bene aptatum: habens unum ostium ex parte exteriori ad inducendum vinum, & aliud ex parte interiori, ad intrandum illuc secreto cum fuerit necesse. Debet autem, si fieri potest, sic esse dispositum, quod habeat fenestras ad Aquilonem. Cavendum etiam est, ne unquam illuc intrent extranei, nisi valde familiares Fratrum sint. Et ideo expedit aliquam domunculam, vel appendicium fieri ante cellarium extra, in quo reponatur vinum à secularibus, postea introducendum per Fratres, vel familiam, vel alios magis familiares, sive per canales, sive alio modo. Pertinet etiam ad istum officialem appropinquantibus vindemiis, habere curam de dolis diligenter parandis, & habere utensilia in loco debito, vel instrumenta, & similia ad succurrendum, cum timeretur de vini effusione; vel ad reparationem aliquam faciendam, vel alios usus. Debet etiam cum candela frequenter die, & nocte circuire per dolia, ad videndum ne aliquod periculum imminet de effusione. Cum autem dolia evacuata fuerint, debet ea diligenter mundare, & reponere in loco apto custodiæ eorum, ne putrescant, vel deteriorentur. Ipsius quoque interest frequenter tentare vina, ne corrumpantur, & transferre de vase in vas, & miscere ad invicem cum fuerit faciendum: & scire, quæ melius servari possunt secundum ordinationem Procuratoris, vel Prælati, habita cum eis collatione: primo ministrare, quæ ipsi primo dixerint ministranda, & secundum ordinationem eorum scire, quod vinum Conventui, quod hospitibus, quod infirmis, quod familiæ, quod operariis, quod advenientibus diversis dare debeat; & utrum temperatum, & qualiter, vel purum; & utrum in mensura, & quod ipsi ordinaverint, exequatur diligenter. Post comestionem vero debet per omnes officinas, in quibus fuerit vinum, discurrere, & recolligere si quid superfluum in loco quocunque: & ponere in certo loco, ut detur postmodum, quibus secundum ordinationem Prioris, vel Procuratoris visum fuerit expedire. Solent autem ad custodiam hujusmodi reliquiarum, vel deputationem vini haberi dolia, in quo omnes hujusmodi reliquæ reponantur, ut melius conserventur. Debet etiam providere, quod horis debitis inveniantur circa cellarium, cum vinum fuerit ministrandum: nec debet tradere, nisi illis solis, ad quos pertinet ex officio accipere; & nec illis det in aliis horis, vel extra mensuram taxatam, nisi de licentia speciali. Cum

autem aliquid de vino contingit corrumpi graviter, nunquam postmodum dandum est Fratribus, nec miscendum cum alio vino bono: sed secundum voluntatem Prælati fiat de eo, quod ipse dixerit faciendum. Cum autem tempus fuerit procurandi, vel emendi vinum, ubi emitur, vel ex toto, vel ex parte: debet hoc ita tempestive Prælati, & Procuratori ad memoriam reducere, quod valeant in tempore congruo providere. In claudendis vero fenestris, & aperiendis, sive de nocte, sive in calore, sive in frigore, sive in temperie, sive in inquieto tempore, sive in vento australi, sive aquilonari, & claudendo cellarium, & custodiendo clavem diligenter, tantam debet habere curam; ne omissione aliqua contingat lædi vinum, vel in aliquo deperire. Porro ubi non est usus vini, sed cerevisiæ, vel alterius potus; sic facere debet circa illud genus potus omnia supradicta, quæ competunt circa illud, & alia, quæ requirit conditio potus illius, sicut fuerit faciendum.

## CAPUT XXXI.

## De Officio Vestiarii.

**V**estiarius dicitur non Frater, qui facit vestes, sed qui est constitutus tam super eos, qui faciunt vestes, quam super illos, qui faciunt solutales.

*Circa res habendas.*

**A**d officium ejus pertinet habere curam de omnibus, quæ pertinent ad indumenta, & calceamenta, & annexa his: ut sunt cappæ, caputia, tunicæ, pellicea, & capelli, cinguli, cinctoria, vaginæ cultellorum, solutales, concisæ sotularium, bottæ, brachialia, sive cordæ, & ligaturæ ad caligas, & unctum ad sotulares, caligæ, focci, & similia. Item lecti, & coopertoria pro lectis, & cussini, & cervicalia, stramina, paleæ, fiscores, culcitæ, & capitergia pro infirmis, linteamina pro balneis. Item foreli, & camisæ pro libris. Item panni pro lotionem pedum, & caprum; & pro rasura, pellicines, & rasoria, & bindelli pro minutione, & forcipes ad ungues sciendendas, & si quæ sunt alia. Ad horum autem conservationem, & repositionem debet habere domum aliquam idoneam, & in loco apto præter illam, vel illas, in quibus operantur sutor, & sartor: qui debent habere duas, vel unam in duas distinctam, in quibus ipsi famuli seculares, si qui fuerint necessarii, operari debent; & omnes sub cura Vestiarii, & ejus obedientia debent esse. Interest etiam ipsius curam habere de omnibus prædictis procurandis, reparandis, reficiendis, ministrandis, recolligendis, & conservandis: & expensis pro hujusmodi factis computandis, quas recipere debet, vel à Procuratore, vel aliunde, vel ipsemet, vel ab aliis quærere secundum ordinationem Prælati, & consuetudinem Domus. Cum autem hyemale tempus appropinquaverit, debet apponere curam, quod id, quod dandum est Fratribus pro vestibus, sic tempestive procuretur, quod antequam frigore Fratres lædantur, omnia habeantur. In distributione vero interest ipsius videre quid quisque habeat, ut melius sciatur indigentia cujuscumque. Debet autem scire à Prælati, quæ liceat eum dare sine licentia ipsius, & quæ non; & quod jusserit observare. Cum autem Frater aliquid petierit de prædictis, & indiguerit, debet ei charitative sine difficultate ministrare, si potest sine licentia, vel licentiam procurare. Si autem non indiguerit, debet eum charitative

monere, ut superfedeat à superfluitate quam petit. Quod si noluerit, debet hoc ipsum indicare Prælati, & facere quod iusserit faciendum. Nihilominus debet inspicere Fratrum necessitates, vel intelligere, cum ab aliis ei significantur. Et licet Frater indigens nihil petat, debet ei tanto magis sollicitè providere, quod humilitas sua dignor est favore. Cum autem novum aliquid datur Fratri, debet vetus reddere, nisi de licentia (si indigerit illo) eum retinere contingat. Cum autem emenda fuerint aliqua de prædictis, sive de bonis Conventus, sive ex pecunia specialiter ad hoc alicui data, debent omnia emi per manus ejus. Nunquam autem sine licentia ejus debet aliquis sibi facere scindi vestem, vel hujusmodi, aut in Domo, aut extra: nisi forte in itinere constitutus. Eius etiam est recipere, sive pannos, sive vestes, sive denarios, qui dantur pro hujusmodi, vel Conventui, vel etiam Fratri cuicunque, & custodire: & facere quod de his fuerit faciendum. Ad ipsum quoque pertinet Novitiorum vestes præparare cum fuerint induendi, & in Capitulum portare, & vestes eorum seculares servare; nec sine eorum voluntate aliquid facere de eisdem. Debet etiam providere Receptorii hospitum de vestibus pro hospitibus ad mutandum, & familiæ de competentibus vestibus, & calcamentis, secundum ordinationem Prælati, cum Domo ipsi ad ista tenetur: et advertere ne vestes deferant lascivas, seu minus honestas. Servitoribus etiam infirmorum, & hospitum ministrare debet illa, quibus indigent pro illis, quibus serviunt, sive pro lectis, sive pro aliis quibuscunque ad suum officium pertinentibus. Cum autem in Dormitorio sit aliquis lectus de novo, vel aliquis est, qui non habet necessaria, ipse est in hujusmodi, sive ibi, sive alibi providere in tota Domo quæcunque necesse fuerint. Tempore vero Capituli supervenientis multitudinis Fratrum, cum non sufficiunt lecti, aut suppellectilia Domus, ipse est procurare de foris, quod deest: & signare cujus sit unumquodque, & habere curam de reddendo tempore suo; proviso, quod si aliquid deturpatum fuerit, vel in aliquo læsum, prius reparetur, & munda. Item ad ipsum pertinet habere aliqua grossa scapularia pro Conversis, quæ eis tradat quando serviunt in coquina, vel cæmento, vel hujusmodi operibus, quæ solent vestes deturpare. Similiter pro Fratribus, vel famulis, qui serviunt in coquina, vel pro Fratribus qui raduntur, & illis qui radunt; aliquas camisas, quibus tunc utantur desuper ad munditiam conservandam. Porro cum lotio communis vestium fuerit faciendum, debet de omnibus ad hoc pertinentibus, sive lexivio, sive ministris, & similibus curam habere, & hoc in Capitulo prædicere: ut certa hora, & certo tempore deferant Fratres, quæ fuerint lavanda, & cum signis apposis vestibus, tradere singula ipso præsentem. De quibus custodiendis, & reddendis singulis, quæ ad curam ipsius pertinent, & idem in unctione communi somnarium observetur. Cum autem aliqua viderit circa lectos, vel alibi, sive coopertoria, sive alia ad suum officium pertinentia otiosa, vel derelicta, debet ipsa recolligere sollicitè; & bortas, & pellicia omnia, tempore certo ad vestiariam deferre, & dare operam circa omnia, quæ sunt in vestiaria sic custodienda, & excutienda, vel ad Solem, vel ad aerem pro tempore exponenda; ut à tineis, vel à muribus, vel alias non lædantur. Cum autem Frater indiget aliqua reparatione vestis, ut cum manicis aliis indiget, vel soleis, & similibus, super his debet providere, quod fiant. Cum autem indiget aliquibus futoribus ad hujusmodi opera peragenda,

*Cod. Regul. Tom. IV.*

nunquam debet eos introducere ad loca Fratrum secreta, nisi sint valde honesti, & familiares: sed in loco à secretis Fratrum remoto, in Domo alicubi sunt ponendi; vel in villa ad eos, vel ad domos proprias interdum hujusmodi opera sunt mittenda, dummodo sint talia, quæ possint à secularibus sine scandalo videri. Quod si seculares Domum frequentant, debet cautos reddere Fratres, ne quid per manus temerarias perire contingat. Quod si Frater aliquis circa custodiam hujusmodi negligens fuerit, vel vestes suas male tractaverit, vel in aliquo circa ea, quæ ad suum officium pertinent offenderit, pertinet ad ipsum illum in Capitulo proclamare, & suggerere Prælati de admonitionibus, quas viderit faciendas circa ea, quæ ad suum officium pertinent quoquo modo. Cum autem perperderit, quod aliqui Fratres aliquas superfluitates habeant in vestibus, & coopertoriis, & hujusmodi, debet instare apud Prælatum, quod iungat in Capitulo: quod quicunque habet aliquid extra numerum taxatum à Constitutionibus, vel aliter superfluat, sic, vel sic, reddat infra certum tempus vestiario. Tempore vero scrutinii cum invenitur aliquid superfluum de his, quæ ad ipsum pertinent, debent omnia talia sibi tradi. Si vero aliquis Frater aliunde asportaverit aliquam vestem, vel nimis longam, vel in aliquo notabilem, seu etiam sotulares; pertinet ad ipsum hujusmodi vestem corrigere, vel Prælati suggerere, quod auferatur ei; si secundum Ordinem tolerari non debet. Ubi autem pro vestibus faciunt fieri Fratres pannos de lana, vel empta, vel alias data, debet sic hoc fieri caute, quod apud extraneos inde facile non possit murmur exoriri.

## CAPUT XXXII.

### De Officio Sartoris.

Sartor dicitur Frater Conversus, qui scit artem scindendi, & suendi in pannis, & in pellibus, & cognoscendi pannos: & si quid minus plene scit, in istis debet addiscere diligenter.

#### *Circa Res habendas.*

AD hujus officium pertinet habere secretam aliquam domum bene fenestratam ad habendum multum de lumine, in qua sit aliquod incisorium, scilicet locus aliquis de asseribus complanatis collocatus in alto, & aptus ad scidendum; insuper perticæ, & arcæ, & armaria, & hujusmodi ad repositionem, & custodiam rerum, quæ apud eum ponuntur. Ad istum etiam pertinet habere forcipes, acus, fila, & similia ad artem suam necessaria, in locis certis pro se, & suis adiutoribus abundanter, secundum quod requirit multitudo eorum, quos oportet interdum ad suum adiutorium convocari. Non debent autem aliqui famuli recipi ad manendum in domo continuè sine licentia Prælati, nec ad horam etiam sine licentia Vestiarii. Debet autem illis, qui debent in domo comedere secundum ordinationem Procuratoris, & quid, & quando, & ubi comedant providere, & de lectis si jacent in domo, secundum ordinationem Vestiarii, super hoc cum Prælati collationem habere. Si vero pro pretio stant cum Fratribus, pertinet ad Vestiarium solvere, & ipse est, ad hoc eum instigare. Si vero adverterit in eorum aliquo aliquid propter quod non expediat, vel deceat, eum in domo commorari, utpote quia destruit bona Domus, vel est mala vitæ in aliquo, vel similia; debet Vestiario sine mora, vel Prælati significare. Debet autem tam honeste coram eis se habere, quamdiu sunt apud nos, & eos in his,



quæ ad salutem pertinent dirigere, & instruere: quod non se ingerant inter Fratres, vel in loca ubi non debent, & similiter quod ipsi ex conversatione inter Fratres, meliores fiant, & Fratres ab eorum societate non molestantur in aliquo, vel perturbentur.

#### *Circa actus ejus.*

**P**orro in operando sic debet esse sollicitus, quod non solum de die, verum etiam de nocte, tempore, quo Fratres vigilare solent, operetur ad lumen, orationibus pro Matutinis breviter consummatis. Similiter in æstate, dum Fratres dormiunt in meridie, potest commodè sustinere, & licentiam obtinere, quæ de facili dari debet, & in hoc indulgeri, ut possit à Matutinis remanere, & dormire tunc: ut possit hujusmodi vigiliam de die melius sustinere. Propter opus etiam potest ab Horis omnibus, præterquam à Completorio remanere, & sufficit unicam Missam privatam breviter, & expedite audire. Sic autem debet subjacere Vestuario, quod in omnibus præferat ea, quæ ipse dixerit; nec sine ejus licentia debet aliquid dare Fratribus licet etiam modicum: ut capellum, vel focos, & hujusmodi; nec magnum quid pro eis facere, ut est scindere tunicam, ponere novas manicas, & similia. Modica tamen, ut est suere aliquid in tunica, vel apponere modicam petiam in veste, & hujusmodi, debet facere sine licentia speciali. In scindendis vero vestibus Fratrum, debet diligenter curare, quod religiose, & non seculariter fiant, vel cum aliqua lascivia parentur, sed uniformiter: & ideo debet habere formas aliquas, vel exemplaria de pergameni, vel signo pro capitiis, pro capellis, pro manicis, & similibus; ut uniformiter, & modo religioso ad illa exemplaria faciat universa, & fiant in competenti mensura. Cum autem aliquis pannus ei apportatur à quocunque, etiam Vestuario, & videtur reprehensibilis in pretiositate, vel colore, vel aliis: nunquam debet ipsum incidere quousque Prælati ostenderit, ut ipso examinato ab eo jubeat, quod voluerit. Cum autem non habuerit certum opus, debet circa illa quæ reparanda sunt, vel paranda pro futuris temporibus sic vacare, quod tempore necessitatis majoris illa expedita sint, & tunc possit melius se impendere necessitatibus instantibus.

#### CAPUT XXXIII.

##### De Officio Sutoris.

**S**utor dicitur Frater laicus, qui scit artem faciendi sotulares, & suendi in corio. Cum autem hujusmodi officium imponitur ipsi, pertinet ad eum scire omnia circa hujusmodi materiam, quæ dicta sunt de Sartore circa pannos: cavendum est ei diligenter, ne faciat sotulares, qui in forma, vel strictura, vel in aliqua alia nota, aliquid sapiant seculares; sed potius humilitatem, & religionem, nec sint in altitudine nimia reprehensibiles. Cum autem habet famulos, possit in ministrando eis cibum, officium per septimanas dividere cum Sartore, ne uterque insimul occupentur in eo, quod potest per alterum fieri competenter. Cum autem officinæ hujusmodi operariorum sunt ita extra clausuram clausi, quod de nocte non possunt ire illas ad operandum, debent aliqua apportare ad dormitorium, vel ad locum aliquem intra clausuram prædictam, tempore hyemali, in quibus operentur nocte, caventes à tumultu. Cum autem indiger Sutor Sartore in juvando ad unctionem, Sartor Sutor ad lotionem vestium & similium; debent libenter mutuo se juvare. Porro cum non est ali-

quis in domo Frater ad artem hujusmodi, vel earum alteram exercendam, sed famulus aliquis secularis, pertinet ad Vestiarium hujusmodi famulo committere omnia, quæ ad officialem pertinent prædictum, vel aliqua: & ordinare de eo, & circa eum hoc, & alia, prout viderit expedire: Si vero nec Frater, nec famulus sit in domo ad ista facienda, quod valde cavendum est, providendum est à Vestuario, quod sic caute per familiares fiant, quod exinde non possunt oriri scandala, vel domus in bonis damnificari.

#### CAPUT XXXIV.

##### De Officio Præfæcti Operum.

**P**ræfæctus operum dicitur Frater, qui constituitur ad exequendum circa opera illud, quod Prælati de consilio operariorum (si magnum quid fuerit) vel etiam alia sine consilio (dummodo non sint magna) duxerit ordinandum. Debet autem ad hujusmodi officium haberi, si possit, Frater qui circa hujusmodi habeat prudentiam, qui inter operarios, & inter alios seculares sciat honeste, & pacifice conversari, qui etiam circa agenda gerat sollicitudinem competentem; & qui à majori bono propter hujusmodi occupationes non avellatur. Cum autem, secundum modum prædictum, instant aliqua opera facienda de novo, vel complenda, vel reponenda: ipsius est cogitare, & providere de materia habenda, & Domum portanda, ut sint ligna, lapides, tegulæ, arena, calix, & similia. Si autem aliqua istorum possunt procurari per Fratrum studium, & laborem, debet super hoc sollicitare Priorem, ut fiat cum debita diligentia, tempore opportuno. Si autem oporteat ista emi, debet cum bonis viris, qui circa hoc habent experientiam conferre, qualiter bona materia, & cum meliori pretio, & quo tempore, & ubi possit haberi; & qualiter deferri, & exequi, quod ipsi consulerint faciendum. Et si statim non ponatur hujusmodi materia in operibus, cum fuerit Domum apportata, vel extra etiam quæsitæ, suum est providere quomodo custodiatur diligenter, ne pereat, vel deterioretur. Porro circa opera, quæ sunt, debet attendere, ne fiat aliquid, quod curiositatem, vel superfluitatem prætetendat: & ad hoc operam dare, quod fiant opera durabilia, & humilia, & paupertati, ac Religioni consona. Ad ipsum etiam pertinet conducere operarios, & sollicitare eosdem, & cum sint in expensis Domus, de cibo, & potu, debito providere eisdem loco, & tempore opportuno: & si debent aliqui jacere in Domo, de loco, & lectis, secundum ordinationem Prælati, ordinare. Debet autem attendere, quod illi, quos assumit, sint operarii boni, & fideles, honestæ conversationis, & famæ; & si contrarium in eis invenerit, sunt ab eo quanto citius licentiandi cum tali cautela, quod scandalizati non recedant. Sic autem se debent habere, & dare operam, quod Fratres alii sic se habeant coram eis, & cum eis, quod non videant apud Fratres aliquid, quod eis cedat in scandalum, vel offensam; sed magis apud Fratres proficiant in his, quæ pertinent ad salutem. Solvere quoque eis mercedem ita tempestive, & fideliter, quod occasione non habeant contra Fratres murmurandi. Item ipsius interest notare, & videre, quæ sunt in Domo reparanda, vel melioranda, sive in tectis, sive in clausuris, sive in his, quæ ruinam minantur, & in aliis quibuscunque: & ostendere Prælati, & secundum dispositionem, & licentiam ejus dare operam ad hujusmodi facienda. Debet etiam diligenter computare quantum recipit, & unde, & quantum, & in quibus expendit; & de hoc.

hoc suo tempore reddere rationem, & procurare quod poterit pro operibus si ei imponatur: & quod datum fuerit pro operibus specialiter, si non ad manus alias, sed ad suas, secundum ordinationem Prælati, deveniat, in Capitulo recitare. Si vero Frater aliquis fuerit in Domo, qui sciat in huiusmodi operari, si ponatur ad operandum, huiusmodi Officiali obedire debet, & eum adjuvare, in quibus dixerit ei, nisi forte ipsi istud officium imponatur.

## CAPUT XXXV.

## De Officio Hortulani.

**H**ortulanus dicitur Frater, qui habet curam, videlicet de horto procurando: ad quod officium ponendus est Frater, qui habeat experientiam circa huiusmodi, vel sciat saltem habere sollicitudinem ad inquirendum ab illis, qui sciunt, & exequendum secundum consilium aliorum.

*Circa virgultum.*

**A**d huiusmodi officium pertinet dare operam ad arbores, vites, arbuta, & omnia ad virgultum pertinentia plantanda, inferenda, riganda, purganda, seu putanda, appodianda, liganda, suffodienda, & similia facienda, pro ut eorum, & terræ conditio requirit. Et cavendum est circa huiusmodi, ne arbores, vel arbuta, vel alia huiusmodi inutilia habeantur, sed ea, quæ fructus utiles, & abunde secundum modum terræ producere solent, varios secundum tempus, & varietates: & præcipue tales, qui infirmis prosint, vel saltem non sint infirmatum facile generativi. Porro providere debet ne arbores altæ sint iuxta clausuram, per quas possit ascensus fieri vel descensus. Item, quod non ponantur nimis spissæ præcipue ubi terra sub arboribus non solum reservatur ad pratum, sed ad aliquid seminandum, quod in decenti ordine, & distantia collocentur: ut non solum ex fructibus, sed etiam recreationem faciant ex decore. Item, quod nunquam sit tanta spissitudo arborum, vel lignorum, quin omnes deambulantes, vel residentes in loco quocunque possint competenter videri. Porro in plantandis arbutis debet attendere quod sint talia, quæ possint in aliquo valere: ut vimina ad ligandum, rosæ ad aquam rosaceam, Altarium ornatum, & similia; & quod hæc talibus locis collocentur, quod non impediunt utilitatem majorem. Sine licentia vero Prælati non debet magnum quid novum facere, ut arborem aliquam eradicare, vel plantare in loco, qui solet ad aliquos usus haberi & similia, quæ possunt fieri.

*Circa terræ nascentia.*

**P**ertinet etiam ad eum dare operam, quod habeantur prata, sive pro infirmis, sive pro hospitibus, sive pro Conventu in locis opportunis, secundum dispositionem Prælati competentia, pro recreatione honesta, & munda; & quod huiusmodi opus exigit, facere diligenter. Item apponere curam magnam, quod habeantur in horto semper abundanter herbæ tempore competenti ad faciendum olus. Item aliqua legumina, quæ recentia Conventui solent dari, ut fabæ, & pisanova. Item, porri, cæpæ, allia, cucurbitæ, cucumeres, pepones, & similia, pro ut gignere potest humus nationis illius. Item salvia, petroselinum, & huiusmodi herbæ, vel floris pro salis, tam sollicitè cultiventur, quod quocumque tempore de ipsis reperiatur copia pro salamentis faciendis, pro condimento pulmenti, pro pulveribus, pro medicinis idoneis. Item radices, ut pastinacæ, & similia semina feniculi,

& anisi, & similia, quæ in varias utilitates, & usus cedere possunt; sive pro Conventu, sive pro medicinis, sive certo tempore consumenda, sive in tempus longius conservanda. Debet autem in ipso horto tales distinctiones, & vias facere, quod omnia sint distincta, & locis debitis sic collocata, quod non contingat ea pedibus transeuntium conculcari. Ubi vero solent multi convenire causa habendi salvia, vel petroselinum, & huiusmodi modica, faciendus est aliquis hortulus prope portam, ubi fieri possint, in quo sint huiusmodi, de quibus extraneis sufficiat, ne ad interiora eos frequenter oporteat intrare.

*Circa utraque.*

**I**tem pertinet ad ejus officium procurare diligenter bonos furculos aliunde ad inferendum bona semina, & huiusmodi præcipue, quæ non habentur in domo, & tempora observentur apta ad singula facienda. Item, ut melius terra fructificet, debet habere curam de ipsa firmanda, & riganda, si haberi valeat aqua, & de fodienda, & eligendis lapidibus, & eradicandis herbis, & harbutis malis: suis temporibus, singulis istis, & similibus faciendis. Scire etiam debet, quo tempore, qui fructus, quæ semina, quæ radices, & similia sunt colligenda, quæ, & quomodo debeant, & valeant conservari, & ubi, & apud quem, secundum dispositionem Prælati: & dare operam, ut fiat circa hoc, quod fuerit faciendum. Si vero huiusmodi Hortulanus sit Conversus, debet propriis manibus laborare in prædictis, & alia, quæ circa laborem diurnum dicta sunt superius de Sartore, possunt ad ipsum pertinere. Si vero sit Clericus, potest idem, licet non tantum laborare, si sciat: si vero sit Hortulanus aliquis extraneus secularis, & familiaris, pertinet ad Procuratorem ipsi præesse; & secundum supra dicta ordinare de ipso. Ipse etiam est custodire clavem horti, & claudere, & aperire tempore opportuno: & cavere ne aliqui extranei indiscrete ingredientiæ dissipent horti bona. Si vero fuerint personæ reverendæ, nullatenus debet eos prohibere, vel moleitare: dare quoque non debet aliquid de horto extraneis sine licentia generali, vel particulari.

## CAPUT XXXVI.

## De quibusdam communibus ad Officiales multos spectantibus.

**D**einde circa Officiales sunt quædam notanda, quæ ad multos pertinere videntur. Debet siquidem omnis Officialis dum imponitur sibi officium aliquod, si videtur sibi, quod non habeat gratiam ad illud faciendum, humiliter excusare se apud imponentem, & ostendere sine falsitate, vel fictione defectus suos circa illud officium. Quod si non audierit illum imponens officium, debet in confidentia de bono obedientiæ suscipere devote, quod fuerit imperatum. Item recepto officio debet considerare cuiusmodi licentiæ generales sunt sibi necessariae ad officium exequendum, pro quibus difficile nimis est recurrere ad Prælatus assidue, & de illis cum Prælato conferre, quas debet Prælatus liberaliter ei concedere. Quod si nolit, debet nihilominus facere, quod potest bono modo, & pro licentiis huiusmodi recurrere ad ipsam, quamquam difficile videatur. Item cum aliqui excedunt circa aliqua de pertinentibus ad officium suum, debet eos super his proclamare, & Prælati suggerere, quod fiant admonitiones utiles aliquæ circa illa, de quibus eidem videbi-

tur expedire. Item cum non sufficit solus peragere ea, quæ sunt officii sui, potest apud Prælatum pro adiutore instare: & cum adiutoribus sibi datis ita sociabiliter, & amabiliter se habere, quod inveniantur assignari. Item cum contingit eum recedere de Domo, vel infirmitate, vel alia impotentia ab officio præpediri, debet officium suum vel aliis committere, vel ad officiales, qui in huiusmodi habent potestatem, vel ad Prælatum recurrere, & sic diligenter advertere, quod ex ejus absentia defectus non fiat. Item debet diligenter advertere, si quæ scripta sunt in Constitutionibus, vel Ordinationibus Capitulorum Generalium, vel Provincialium, vel quotidianorum, quæ ad suum pertineant officium, & illa sollicite custodire. Cum etiam imponitur sibi officium, cui res aliquæ sint annexæ, ut Sacristiæ calices, paramenta, libri, & huiusmodi, & sic de aliis, debet cum recipit officium suum, scire quæ, & quot recipit; & in dimissione si excreverit, vel si aliqua non supersunt, reddere rationem. Non debet autem sine licentia generali, vel speciali aliquid dare de pertinentibus ad officium, vel intus, vel extra, nec recipere: cum receperit etiam de licentia, debet in Capitulo beneficium collatum Fratribus ad suum officium pertinens recitare. Item expensas, quas facit pro officio suo recipere debet vel à Procuratore, vel aliunde, secundum dispositionem Prælati; & de ipsis computationis tempore, vel quodcumque requisitus fuerit, reddere rationem. Item cum Officiales in aliquo non consentiunt, non debet litigare, vel se perturbare; sed ad Prælatum, vel alium recurrere, qui super his habet potestatem. Item cum habet aliquos seculares in adiutorium, vel cum eis aliquid facere causa officii, debet sic honestè, & pacificè cum eis, & coram eis agere universa, quod non scandalizentur: & cum sunt de familia ad suum officium pertinente, curam gerere specialem, & in omni tempore cavere ne unquam aliquem famulum, vel operarium etiam leviter percutiat, vel injuriis laceffet, charitative tamen potest eum corrigere, & instruere. Cum vero unum officium duobus committitur, debet sic providere Prælatus, quidnam ad unumquemque eorum pertineat: ne ferè dum unus in alterum omnia perficienda refundit, interim aliquid ex necessario faciendis, vel negligatur, vel plene omitatur. Denique super omnia cavere debet, ne sit in aliquo negligens circa ea, quæ ad officium suum pertinent: & præcipue in his, unde turbatio, vel danum temporale, vel spirituale Fratrum sequi, vel scandalum possit oriri. Cum autem imponitur ei officium de novo, de quo non est conscius bene, quod sciat illa, quæ sunt in illo officio facienda; debet à Prælato petere, ut per aliquem exercitatum in illo officio se faciat in omnibus instrui diligenter.

#### CAPUT XXXVII.

##### De Officio Definitoris Capituli Generalis.

##### *Circa ea, quæ sunt agenda ante definitionem.*

**A**D officium Definitoris Capituli Generalis pertinet, cum electus fuerit præsens in Capitulo, quod postulet à Priore Provinciali huiusmodi laborem sibi injungi in remissionem peccatorum: & sic ipso imponente recipiat officium humiliter veniam faciendo, & hoc si oportuerit eum ire in regionem longinquam. Bonum est etiam, quod super huiusmodi officium

pro se, & pro socio sibi assignato testimoniales recipiat litteras à Priore Provinciali, & Definitoribus, vel aliquibus aliis Prioribus de Capitulo: quas non negligat propter multas difficultates, quæ ex defectu litterarum huiusmodi possent oriri. In ipso Capitulo, in quo eligitur, debet ordinari de Socio, si præsens fuerit, utrum insimul ire debeant, & quando, & per quas vias. Si autem alter illorum tantum præsens fuerit, debet prædictas litteras procurare, & de prædicta via cum absente per litteras ordinare: quod si neuter præsens fuerit, debet Prior Provincialis prædictas litteras procurare, & Definitori, vel Socio mittere: & qui primo recipit, alteri debet de via prædicta significare. Cum autem declinaverit ad Conventus, & in ipso Capitulo, & inter extraneos, per quos transit, sic in vigiliis, in sobrietate, in silentio, in studio, in oratione, & in omni honestate, & observantia Religionis, in colloquutionibus, & verbis edificatoriis dare debet exemplum, & consolationem omnibus; ut evidenter appareat, quod non immerito ad tantum negotium Ordinis sit assumptus. Si vero Fratres aliqui, per quos transit, vel in ipso Capitulo velint ipsi aliquid dicere de pertinentibus ad Ordinem, quod suum officium possit respicere, debet diligenter audire; sed cavere, ne credat omni spiritui, vel suggestioni; nisi loquentes plene sibi sint noti, vel nisi post inquisierit diligenter à Fratribus discretis, & fide dignis de conditione, & discretionem, & zelo, & intentione, & motu loquentium, & in quibus, & in quantum debeat eis credere. Debet etiam scire, quod melius est frequenter sequi consilium, & sententiam eorum, qui parum ei loquuntur, quam multorum, qui multum se solent ingerere ad loquendum, & solent de singulis judicare: nec est securum conscientiam suam ex huiusmodi auditu formare, quousque constet sibi plenius de auditis. Item postquam factus est Definitor, debet diligenter respicere Acta Capituli præcedentis, & conferre cum Fratribus discretis, tam super illis, quam super aliis, quæcumque ad utilitatem Ordinis possint in Capitulo promoveri, & super his per totum annum frequenter cogitare, & conferre, ut sic melius ea possit promovere in Capitulo, ad quod debet dare operam habendo in aliquo memoriali Constitutiones novas, vel admonitiones, & alia huiusmodi, quæ videntur ei promovenda, quæ proponere debet inter Definidores tempore opportuno.

##### *Circa definitionem.*

**I**tem ad Capitulum debet ita tempestive venire, ne mora ejus Definidores alii ex hoc impediuntur à procedendo in agendis: & cum in Domo fuerit, sic Officium, & Missam dicere, vel audire tempore congruo, quod eorum occasione, vel alia non impediatur, quin semper sit cum ipsis tempestive, vel in Capitulo, vel in loco definitionum. Cum autem in capitulo resederit, sic in loquendo, judicando, & in omnibus, Sociis suis debet deferre, & sibi eos antepone, & in omnibus mature, honeste, & commode agere, iuste, & rigide tamen: & sic sine personarum acceptione pro tempore se habere; quod nec præsumptuosus, vel inutilis, vel remissus, vel sine zelo Religionis valeat ab astantibus reputari. Porro in definitionibus non debet contentiosè aliquid agere, vel clamorè, nec esse multum confirmatus in sensu suo super his, quæ ante deliberaverat, vel aliis quibuscumque emergentibus, præcipue cum in discussione videt validiores ad oppositum rationes, vel videt illos, qui magis exercitati sunt, & dif-



discretionem habentur, à sua sententia discrepare: quod si forte in aliquam declinat sententiam, quæ ante pronuntiationem definitionum videbatur sibi nimis bona, potest, & debet illam sententiam revocare ante definitionem prædictam. Summopere cavendum est sibi cum sit iudex, ne aliquo casu faciat aliquid pro persona aliqua, vel Conventu, vel Provincia, vel Natione, vel contra, quod sapiat acceptionem quamcunque; neque unquam debet declinare in aliquam sententiam, quæ ad enervationem Ordinis, vel minorationem status ejus cedere possit; vel in aliquam ordinationem, quæ intollerabilis Communitati Fratrum reputetur, vel possit esse transgressionum occasio plurimarum: sed sic in omnibus cum zelo sancto, & discretionem intendat, quod in patriam revertens, super aliquo, quod fecerit modico tempore potestatis suæ, non reportet conscientiam remordentem. Si vero aliqua sibi injuncta fuerint a Definitoribus facienda, utpote legere litteras, vel scribere aliqua memorialia de his, quæ leguntur inter Definidores, vel habere curam de aliquibus, quæ inter eos recitantur, vel aguntur: ita quod circa hoc omissio, vel negligentia nulla contingat. Si vero Fratres aliqui velint sibi tradere litteras aliquas vel aliqua pertinentia ad Definidores, debet ea recipere, & Definitoribus in communi præsentare. Debet etiam introducere quandoque Fratres, qui habent negotia, cum commode potest, ad eos. Ipsius est providere, quantum potest, ne ipse, vel alii Definidores tantum occupentur circa alia personalia, vel localia, vel minus utilia, quod communia, & utiliora currente tempore expedire non possint. Item de his negotiis, quæ pertinent ad Provinciam suam, debet conferre cum socio suo, ut ea cum communi consilio (si talia sunt, quæ utrique sunt communicata, vel communicari possint) expediat diligenter, & non confuse. Proinde si habentur litteræ aliquæ, aut negotia aliqua pertinentia ad solum Magistrum, debent ante Capitulum quam cito possunt ei litteras præsentare, & negotia proponere ordinate: scilicet ea, quæ Provinciæ sunt primo, quæ sunt Conventus, vel Conventuum aliquorum secundo, quæ sunt Fratris, vel Fratrum, tertio: quæ sunt eorum, qui non sunt de Ordine, quarto. Si vero pertinent ad Definidores, observata hora ab ipso Definitore, debet ingredi Socius, & cum Definitore reddere litteras, vel proponere negotia ordine supradicto: & debent habere curam de expediendis negotiis, & rescribendo cum fuerit rescribendum. Si vero sunt negotia impertinentia ad Magistrum, vel ad Definidores; ut sunt emptio librorum, & similia, debent cum licentia Magistri (si fuerint necessaria) vel Prioris Domus (si ad eum pervenerint) adiutorio (si indigerint) illa, prout poterunt honeste, & religiose expedire. Si vero fuerit aliquod negotium tale, quod inter utrumque non sit communicandum, debet ille, cui commissum est, vel ad quem pertinet, illud prout commode poterit, expedire. Cum autem inter Definidores agitur de Provinciæ suæ statu, vel aliquibus ad eam pertinentibus, debet super quibus requiritur ab eis, vel à Magistro, per se fidele testimonium dare loquendo de singulis, de scientia, vel credulitate, vel nescientia, prout conscientia sua reperit universa. Si autem aliquid habet referre de sua Provincia, debet omnia sic recitare distincte, ut sciatur à Definitoribus, quid dicat de motu suo, quid ex parte Capituli Provincialis, vel Conventus, vel Conventuum, vel Fratris, vel Fratrum aliquorum.

*Circa ea, quæ fuerint agenda post definitionem.*

Postremo terminata definitione, sua interest dare operam, quod omnia, quæ ad suam pertinent Provinciam, quæ nondum sunt expedita, expendantur: & ubi in ingressu invenerit Fratres turbatos in aliquibus in Capitulo ordinatis, reddere eis rationem super istis, & eos ut commode poterit sedare. In Capitulo vero suo Provinciali, debet reddere omnia, & conferre, quæ ad ipsum pertinent, quæ de Capitulo Generali emanaverint: ut sunt Acta Capituli Generalis, litteræ Magistri, litteræ, vel Indulgentiæ novæ, si quæ sunt impetratæ de novo, & similia: & habere curam, quod ibidem publicentur: & in Constitutionibus inchoatis de novo, vel admonitionibus, si quæ obscuritas invenitur, vel admiratio oritur, declarare intellectum, & rationes assignare, quæ Definidores movent ad ista. Si vero Magister, vel Definidores commiserint ei aliqua verbo, & litteris, in sua Provincia, vel alibi nuncianda, vel exequenda, quod injunctum fuerit diligenter executioni mandare.

### CAPUT XXXVIII.

#### De Officio Socii Definitoris Capituli Generalis.

Officium Socii Definitoris Capituli Generalis est hujusmodi. Cum officium sibi fuerit injunctum, debet cum venia, & humilitate recipere: deinde cum Definitore de agendis (si præsens est) verbo, vel si absens est, per litteras pertractare, & ei tanquam majori in eis, quæ communiter ad eos pertinent obedire. Habere etiam curam specialem de petitionibus Provinciæ, & litteris Capituli Provincialis, vel Conventuum, vel Fratrum portandis; & de negotiis aliis, ut sunt causæ, vel quæstiones, vel alia quæcunque, proferendis, & cum consilio Definitoris, & auctoritate ipsius suo tempore promovendis. Si autem contingat eum ire cum Definitore, licet prior sit in Ordine, debet eum tanquam priorem habere, & procurare apud Priorem Provinciale, quod hoc ipsum ordinetur ab eo.

#### *Circa Capitulum.*

Porro cum in loco Capituli fuerint, debent in dicendo officium, in celebrandis Missis, in jacendo prope eum, si fuerit ordinatum, in scribendo, vel exequendo aliqua pro eo, si voluerit, & similibus, ei assistere reverenter, & diligenter juvare: negotia quoque, prout poterit, debet eidem reducere ad memoriam, & cum eodem, si vult consilium promovere: litteras quoque ad Magistrum Ordinis, & Definidores pertinentes, quas habet cum ejus consilio reddere tempore opportuno. Item dum Definitor vacat definitionibus, debet habere curam specialem de litteris Magistri, & Indulgentiis novis, si ibi fuerint, & sub authentico sigillo habendis, & similibus, quæ oportet ad profectum suæ Provinciæ deferre, & sollicitare Magistrum ad rescribendum illis, qui scripserunt de sua Provincia. Debet etiam litteras procurare de beneficiis, quæ fuerint procuranda pro personis ad suam Provinciam pertinentibus, & prosequi causas suæ Provinciæ, si quæ fuerint vel agendo, vel respondendo quantum de jure potest; & alia negotia suæ Provinciæ, quantum potest sine Definitore expedire, & pro istis cum potest ad eum recurrere: & omnia hujusmodi sic sollicitare expedire, quod facta definitione non oporteat

teat moram contrahere propter ista. Si vero Definitor, vel Magister Ordinis inquisierint aliquid ab eo de pertinentibus ad Provinciam suam, vel ipse aliquid de istis habeat dicere eis, debet circa ista fideliter, & discrete procedere, sicut suprà dictum est de Definitor.

#### *Circa regressum.*

**I**N regressu vero magis specialem curam debet habere de Actis, & litteris, & aliis huiusmodi reportandis, quam Definitor, licet uterque habeat de his cogitare, & reddere omnia, quibus fuerint reddenda. In Capitulo vero Provinciali debet Acta, litteras Magistri Ordinis, & Indulgentias, quæ sunt novæ, & alia pertinentia ad Capitulum illud, reddere Definitori, & laborare cum eo, ut legantur, & fiat de eis, quod fuerit faciendum. Si vero Magister, vel Definitor aliquam commiserint ei agenda cum Definitor, vel soli; debet exequi diligenter prout fuerit sibi dictum.

#### *Circa successionem in definitione.*

**Q**UOD si oporteat eum Definitorum esse secundum formam Constitutionum propter mortem, vel impedimentum Definitoris, tunc ad eum pertinent omnia, quæ de Definitor sunt prædicta, si vero antequam recesserit de Provincia sua, contingat illud impedimentum tali tempore, quod hoc Provinciali possit significare, debet illi notificare; & cum ejus consilio Socium accipere, qui prædicta de Socio prout poterit, compleat diligenter. Si vero in via Definitor impediatur, vel jam intempestive, quod non possit habere recursum ad Priorem Provinciale, tunc sicut poterit provideat de Socio. Denique tam ad Definitorum, quam ad Socium pertinet, cum sunt novi, & in experti in istis, dare operam, ut per expertos circa huiusmodi in his, quæ ne ciunt instruantur: & ipsi cum instant agenda, debent diligenter notare, quomodo se habeant illi, qui magis sufficientes in huiusmodi reputantur, & eisdem prout potuerint se conformant.

### CAPUT XXXIX.

#### De Officio Electoris Magistri Ordinis.

**A**D Officium Electoris Magistri Ordinis pertinet, quod postquam electus est, postulet, (ut supra dictum est de Definitor) si oporteat eum ire longius, à Priore Provinciali huiusmodi laborem sibi injungi in remissionem peccatorum, & injunctum suscipere cum venia humiliter & devote, & hoc si fuerit præfens in loco electionis. De litteris quoque testimonialibus idem fervetur, quod de Definitor est supra dictum: de Socio vero, & via, & tempore eundi, debet facere secundum consilium Provincialis. Porro in via inter Fratres, inter extraneos, in Conventibus, in Capitulo, & ubique, debet illam honestatem, & religiositatem servare, quæ de Definitor sunt superius prædicta. Pro negotio vero electionis, debet a tempore suæ electionis orare devote, & orationes a sanctis personis cum poterit impetrare: ut secundum voluntatem Dei, & utilitatem Ordinis tam ipse, quam alii dirigantur. Cum autem aliquos Fratres invenerint discretos, & Deum timentes, exercitatos in negotiis Ordinis, & personarum, habentes Ordinis notitiam: debet libenter cum eis conferre in sancta & simplici intentione; ut per eos in aliquibus pertinentibus ad negotium plenius informetur. Cavendum est autem ei, ne propter auditum, aut notitiam levem, ad eligendum aliquem inclinetur, nisi prius per fide dignos, & qui talem magis de pro-

pinquo noverint, plenius instruat: nec unquam debet sic animum suum in aliquem firmare, quin si aliquid melius ex collatione aliqua postmodum appareat, paratus sit ad alium transferre vocem suam. Illud quoque diligentissime præcavendum est ei, ne notitia, vel familiaritas, vel confidentia præsumpta de aliquo, vel turbatio contra alium, vel despectio quæcumque, vel alia similes, vel dissimiles causæ, quæ Spiritum Sanctum non sapiunt, eum moveant in aliquo contra aliquem; sed solum pura, & sancta intentio, & recognitio, solum Dei voluntatem, & utilitatem Ordinis investigans. Debet etiam attendere, quod licet in huiusmodi persona sint multa attendenda, si reperiri possent in aliquo, utpote conditio generis, & personæ, scientia, fama, auctoritas, notitia, gratia prædicandi, & inter homines conversandi, & alia multa: tamen super omnia videntur attendenda, vitæ sanctitas, discretio naturalis, experientia prælationis, zelus sanctus, animositas ad mala persequenda, & bona promovenda, maturitas in agendis cum oportuerit, condescensio ad infirma, firma de Deo fiducia in solitis, & gravibus cum emergunt. Cæterum vero tamquam perniciosum, & vilissimum est procul abjiciendum, ne unquam inducat, vel inducere sustineat quemcumque circa huiusmodi negotium ad aliquid, nisi quod pure sanctitatem sapiat, & virtutem; sed sic in omnibus cum timore Dei diligenti deliberatione procedat, & votum suum solum in Deum, & Ordinis transferat utilitatem: habens præ oculis, quod nihil faciat unde malam reportans conscientiam gemere habeat omnibus diebus vitæ suæ, cum aliquid fecerit, quod postmodum nunquam poterit emendare. Si vero facto scrutinio publico nondum valet electio, nec videatur per processum, quod valere possit, nisi mutet vocem suam, multo melius est mutare vocem (dummodo cum bona conscientia fieri possit) quam diu discordiam sustinere. Sed in mutatione istud videtur securius, quod cum oportet mutari propter concordiam, illorum sequatur conscientiam, & sensum, qui secundum suam conscientiam, & sensum melioris, & sanioris sententiæ reputantur. Denique omnia, quæ acta sunt in secreto, sic debet habere secreta, quod nunquam ex ore ejus egrediatur aliquid, unde possit aliquid de illis percipi: vel possit aliquis Frater percipere; quod talis, vel tales Fratres elegerunt hunc, vel illum reprobaverunt, vel illi contrarii fuerunt, & similia, quæ possunt inducereurbationem. Debet etiam esse cautus, quod in collatione facienda de aliquibus eligendis ante electionem inter Electores suos, non est securum consentire propter occasiones, denigrationis famæ multorum, & alia multa, quæ solent inde sequi. Porro in regressu cum declinat ad Fratres, debet laudare quantumcumque potest cum bona conscientia, quod factum est, & super hoc Fratrum animos consolari.

### CAPUT XL.

#### De Officio Electoris Prioris Provincialis.

**A**D Officium Electoris Prioris Provincialis pertinet, ut cum electus fuerit, conferat cum Priore, & Conventu de litteris super hoc habendis, & de socio in via, & faciat, prout super hoc duxerit ordinandum: in aliis autem, quæ ad electionem pertinent, observet habito respectu ad Provinciam, omnia, quæ supra dicta sunt de Electione Magistri Ordinis, habito respectu ad Ordinem Universum. Multum autem attendere debet, quod talis eligatur (si fieri potest) qui sit ad pacem, & consolationem communem

munem Provinciæ, dummodo aliæ circumstantiæ bonæ concurrant: & libentius debet procurare, quod aliquis de Provincia eligatur, dummodo sit sufficiens, & habeatur utilis; quam aliunde, etiam si magis sufficiens habeatur, de quo non speretur, quod possit haberi, nisi cum magna angustia animi sui, & anhelaret ad recedendum, quam citius posset. In formatione vero decreti, si opus fuerit, debet in omni casu sine difficultate qualibet, testimonium perhibere veritati.

## CAPUT XLI.

## De Officio Definitoris Capituli Provincialis.

**A**D Officium Definitoris Capituli Provincialis pertinet, ut post electionem audiat negotia Fratrum modo sequestratim, modo cum aliis Definitoribus, prout ipsi requirunt, & ipse poterit vacare: recipere etiam litteras, vel memorialia, quæ ad Definidores pertinent, cum ei porriguntur; ut ea inter Definidores præsentet tempore opportuno. Postquam autem inchoatum fuerit Capitulum, debet cum Priore Provinciali in loco Definitorum in Capitulo sedere, hoc ordine servato inter Definidores, ut qui primo sedent in Choro, primo sedeant inter eos. Cavendum est autem ei ne aliquid faciat pro Fratre, vel Conventu, vel contra, quod sapiat privatum amorem, vel turbationem, vel vindictam contra alium: sed tantum ea, quæ sapiunt æquitatem, & bonum. Item ne sit facilis ad mutationes faciendas, sive in absolutione Priorum multorum, vel translationibus Lectorum, & Fratrum, nisi quando post discussionem diligentem manifesta ratio reperitur. Item non tantum intentus sit circa particularia facta, ne quod ad commune bonum, & magis, quod pertinet ad statum totius Provinciæ, negligatur. Porro circa Conventus novos, & remotos, & desolatos, vel præ paucitate Fratrum, vel paupertate, vel propter aliqua scandala ibi orta, vel, aliis de causis, ut releventur à gravaminibus, & bene provideatur eisdem, & in aliquo non graventur: similiter circa studium, & omnia pertinentia ad id promovenda. Item circa Fratres, qui notati sunt de scandalo turbationis, & periculosi reputantur, reprimendos, & refrænandos, & in talibus Conventibus collocandos, ubi sub disciplina, & custodia bona alicujus custodiantur; & similibus, quæ sunt majoris necessitatis, debet habere curam majorem quantum in eo est. Sunt & alia quædam notata in Capitulo de Officio Prioris Provincialis circa Fratres, quæ pro magna parte eidem quantum ad officium suum in modico tempore pertinent, consideranda sunt, & sollicite observanda. Item pertinet ad eum, cum aliis dividere Visitatoribus Domus visitandas, & alia quædam, quæ in Constitutionibus expressa sunt, & in admonitionibus Capituli Generalis, quandoque inferuntur: insuper, & multa alia de illis, quæ supra notata sunt de officio Definitoris Capituli Generalis, quæ omnia sunt ab eo consideranda diligenter, & prout competunt observanda. Deinde finita definitione, cum aliquos turbatos viderit de aliqua ordinatione, non debet ita se super aliquo excusare, (licet in illo non confenserit) quod super focios suos calumnia devolvatur; vel quæ acta sunt inter eos, de quibus oritur turbatio, per quos factum sit, reveletur.

## CAPUT XLII.

## De Officio Visitatoris.

*Circa ea, quæ præcedunt visitationem.*

**A**D Officium Visitatoris pertinet, si laboriosa fuerit sua visitatio, postulet à Priore Provinciali laborem in remissionem peccatorum sibi

*Cod. Regul. Tom. IV.*

inungi. Socium quoque de ejus ordinatione, si potest ei loqui, vel scribere, vel si hoc non potest, de ordinatione Prioris sui Conventualis assumere debet. Si vero ante tempus visitandi contigerit eum infirmari, vel aliter impediri, debet Priori Provinciali hoc indicare, ut de alio provideat, qui suppleat vices ejus. Porro tempus ad visitandum debet eligere tale, in quo Fratres melius possint haberi in domo, sine damno prædicationis, vel provisionis temporalium, & quod non concurret cum visitatione Prioris Provincialis, vel nimium sit vicinum visitationi, vel Capitulo sequenti, vel præcedenti Provinciali, vel Generali, si fuerint in Provincia illa celebranda. Cum autem venturus est ad domum aliquam, debet primo significare tempus adventus sui; ut Fratres absentes commode convocari possint. Non debet autem ad convocandos Fratres inferre necessitatem, qui sine magno damno domus, aut salutis animarum convenire non possint: nisi magna, & rationabilis causa, & necessitas hoc requirat.

*Circa quædam in generali.*

**I**nterest etiam ipsius portare secum litteras Magistri Ordinis, & alia, quæ emanaverunt à Capitulo Generali, vel Provinciali: & facere ea legi in præsentia sua, in Capitulo, vel in mensa cum Fratres communiter interfunt. Debet autem summam in omni Conventu videre, & inquirere, si habentur libri Officii Ecclesiastici bene correcti. Item si habentur libri scholastici sufficienter, si habentur paramenta Ecclesiastica, & hujusmodi, quæ pertinent ad cultum Dei competentia. Item quomodo sit Divinum Officium, & quomodo proficitur in studio. Item qui, & quot Fratres sunt in domo, qui multum reputentur idonei ad proficiendum in studio, quos exigentibus meritis ad hoc expediat promoveri: quot boni Prædicatores, quot boni in consiliis, quot boni ad Confessiones; si qui graves in moribus, vel notati publice de scandalo: si multi gravibus, & longis infirmitatibus prægravati: si habentur competenter temporalia, & qualiter. Item si habitant inter devotos homines, si domus est onerata multitudo Fratrum, vel paucos habet, si sunt Fratres de illa Natione, vel aliunde, si libenter morantur Fratres in illo Conventu, vel inviti, si habent pacem Fratres cum Prælati, & similia multa, ut tempore suo his cognitis in genere, sciat melius Priori Provinciali, vel Definitoribus consilium de his, quæ circa domum illam fuerint ordinanda, & ipse nihilominus faciat bonum quod poterit, quantum officium suum se extendit. Porro ante tempus visitationis suæ, non pertinet ad eum facere aliquam inquisitionem ex officio, licet ipse possit audire aliqua, si aliqui gratis ad hoc se ingesserint, vel sine invitatione aliqua gratis dicere voluerint: in quibus tamen non sunt expendendi dies multi; ne in fraudem prolongandi dies officii, hæc fieri videantur.

*Circa Capitulum.*

**C**UM autem primò Capitulum intraverit ad officium exercendum, potest aliquam brevem collationem facere Fratribus de aliqua spiritali materia, & utili si voluerit: deinde commendare Fratrum orationibus, illos, quos voluerit. Postmodum facere injunctionem, & admonitiones de pertinentibus ad officium; sicut viderit expedire. Solet autem in communi visitatione Capituli, ubi aliqua specialis causa hoc requirit, inungi universis absque præcepti expressione, quod quilibet dicat ei illud, quod sibi videtur dicendum secundum suam conscientiam

B b tiam



riam pro bono Ordinis, sive in Capitulo, sive extra, secundum quod requirit natura negotii: videlicet, quod dicendum est in Capitulo, dicat ibi; & quod extra dicendum est, dicat extra. In admonitionibus vero solent Fratres reddi cauti, ne aliquid dicant contra aliquem ex aliqua turbatione, vel motu inordinato; sed solum ex sinceritate fraternæ charitatis, & amore Ordinis. Item ne taceant aliquid dicendum, vel ex familiari amore personæ, vel timore quocunque, vel alia quacunque ex causa minus religiosa. Ipsi etiam Prælati, & Fratres potest injungi, si videatur expediens, quod occasione eorum, quæ dicuntur ex consuetudo modo contra aliquem nihil postmodum dure agant, cum etiam sit consuetum, quod ipsi Priores instanti visitatione soleant animare in Capitulo Patres ad dicendum fideliter omnia, quæ videntur eis dicenda. Item, quod caveant quod non dicant inutilia, vel quæ alias sunt correctæ; vel quæ secreta sunt dicenda, non dicant in publico, & similia. Item, quod in proclamando se habeant modeste, & formam Constitutionum observent diligenter. Hæc quoque, & similia plura, vel pauciora possunt dici, secundum quod ratio suggeret, statu domus, & circumstantiis ad hoc pertinentibus consideratis. Post hujusmodi vero injunctiones, & admonitiones antequam procedatur ad culpas audiendas, dandum est aliquod tempus Fratribus ad loquendum sibi secreto, si voluerint; ut ex aliquibus auditis magis instructus, sciat melius quid sit agendum. Si vero sibi videatur, potest vocare aliquos, & maxime discretos, & magis dignos fide, etiam si gratis non veniant, ad inquirendum de statu domus leviter, & summam. Ex his vero, quæ sibi dicuntur ad partem, non multum expedit, quod conscientiam suam formet, nisi postquam diligentius investigaverit de conditionibus personæ loquentis; si forte eum non cognoscit, ex discretione, & zelo, & motu, & modo. Ex his autem, quæ dicuntur in occulto, non debet ad aliquam sententiam contra aliquem in aliquo procedere, nisi in publico recitentur. Instruere etiam debet sibi loquentes in secreto, cum loquuntur de talibus, quæ solent & possunt in proclamationibus dici, quod non bene liberant animas suas, nisi in publico illa dicant. Si autem viderit aliquos paratos ad dicendum aliqua in publico, quæ dici sic non solent, nec debent, debet eos instruere charitative, si ex simplicitate hæc faciunt, quid eis sit agendum: Si vero sibi videatur malitiose id fieri, terroribus, & comminationibus, debere eos in iustitia refrænare, & condigne punire postmodum secundum quantitatem excessus, si procedunt. Porro cum prælibatis prædictis, teneret Capitulum de culpis, sic cum debito moderamine, & discretione cuncta sunt eidem agenda; ut visitatio, quæ inducta est ad correctionem malorum, non sit occasio excessuum augendorum. Proinde curandum est ei, quod male accusantes reprimat, & refrænaret, & quod bene accusantes juvet; quod dubia diligenter inquireat, quod accusato det licentiam, & tempus ad respondendum: quod in frivolis non permittat se occupari, quod ea, quæ digna sunt reprobatione cum audiuntur, valde verbis reprobet, & insinuet esse horrenda; quod laudabilia sic commendat, quod ad similia animæ advenientes, quod injungendo penitentias prudenter discernat quantitates culparum, & prout possibile est sine transiitione puniat iusto modo, & plus quam in quotidianis Capitulis puniri soleant excessus, ne visitatio veniat in contemptum. Ante injunctionem vero penitentiarum, aggravet culpas, quas audivit dignas majori reprobatione in quolibet accusato; ut per hæc au-

dientes inducantur efficacius ad cavendum. Ad hoc, si in his, quæ in secreto, vel in publico, in domo, vel etiam extra domum audivit, videatur quod circa aliqua majora sit plenius aliquid inquirendum, de quibus per communem modum supradictum visitandi nondum ei est satisfactum, potest procedere ad præcepta, vel omnibus, vel aliquibus facienda, in publico, vel secreto, secundum quod negotii natura requirit. Cavendum tamen ne faciat aliquid contra aliquem injuriose: in gravibus vero ne ita parcat alicui, quod culicem excolare, & camelum glutine videatur. Sunt & alia ei diligenter observanda, quæ in Constitutionibus, & admonitionibus Capitulum, & supra in *Capitulo de Officio Prioris Provincialis* circa visitationem sunt conscripta. Cum autem ad terminationem visitationis accedere voluerit, si vel aliquas ordinationes, vel admonitiones arctius custodiendas relinquere, debet primo super his cum discretis Fratribus conferre, & eorum sensui, qui noverunt plenius statum domus, & patriæ, quam sensui suo credere. Potest autem, & hujusmodi in scriptis in aliquo memoriali relinquere in custodiam Superioris; ut sciatur tempore suo si illa fuerint correctæ, vel observata, & ipse potest memoriale retinere. Finaliter autem principaliter debet intendere ad hæc, & laborare, quod per visitationem suam sequatur correctio excessuum, pax, & tranquillitas relinquatur. Propter quod si videt aliquam turbationem, debet ante terminationem visitationis dare operam ad quietandum; si religio in aliquo deperat, reformetur obedientia, concordia, devotio, & omne bonum in Fratribus augeatur.

#### *Circa quædam post Visitationem.*

SI vero Fratres, vel Conventus rogaverit eum, vel super aliquibus promovendis apud Priorem Provinciale, vel ad Definitorum Capitulum Provincialis, vel Magistrum Ordinis, vel alibi: si sibi rationabilia videntur, debet eis libenter acquiescere, & super his memoriale facere, & proponere ea tempore opportuno: nec Fratrum defectus, nisi solum Provinciali, vel Definitoribus, vel Magistro, prout est secundum ordinem faciendum dicat; sed potius bona de Conventibus visitantis prædiceret, prout secundum conscientiam facere poterit bono modo.

### CAPUT XLIII.

#### De Officio Prædicatoris Generalis.

AD Officium Prædicatoris Generalis pertinet, cum ad hoc assumitur, cum venia suscipere illud officium, & ad Capitulum Provinciale venire, nisi de licentia, vel ex causa remanserit. Cum autem non venerit, debet se excusare per litteras continentes causam absentiarum suarum. Ipse etiam est de corpore Capituli Provincialis, & pertinet ad ipsum electio Definitorum Provincialis, & Generalis Capituli, & Visitorum, & discussio petitionum Capituli ejusdem, & similiter, quæ ad ipsos pertinet. Et ideo solet specialiter talibus concedi, quod habeant speciale sigillum. Ad hoc etiam debet apponere curam, quod habeat majorem notitiam Fratrum de Provincia, & exercitium circa ea, quæ in Capitulo sunt agenda, vel pertinent ad communem statum Domus, vel Provinciæ. Debet etiam frequentius, & libentius ubique prædicare, præcipue si gratiam habeat prædicandi. Non est autem propter hoc officium exemptus in aliquo ab obedientia Prioris sui, vel à communi vita Fratrum aliorum: nisi quo ad hoc, quod potest sine licentia speciali ire ad Capitulum Provinciale, ut prædictum est. Sed de Socio, & tempore eundi, stare debet ordinationi Prioris sui, dummodo sic ordinauerit, quod speretur, quod possit illuc commode pervenire.

## CAPUT XLIV.

## De Officio Socii Prioris Conventualis euntis ad Capitulum Provinciale.

*Circa quædam ante Capitulum.*

**P**Riori Conventuali ituro ad Capitulum Provinciale, eligendus est in Socium Frater, qui possit laborem viæ secundum formam Ordinis sustinere: qui commode exercitium habeat, vel saltem aptitudinem ad ea, quæ in Capitulo agenda sunt, quod etiam fidelis reputetur ad agendum pro omnibus, sive pro Conventu, sive Fratribus singulis; sive Prælati, sive Lectore, quod secundum veritatem fuerit faciendum. Ad hujusmodi vero officium pertinet accusationes Prioris, si quæ fuerint, petitiones, & litteras, & negotia quæcumque, sive Conventus, sive Fratrum singulorum recipere, & portare ad Capitulum; & dare operam, quod illa, quæ sigillanda sunt, sigillentur.

*Circa Capitulum.*

**C**UM autem fuerit in Capitulo, pertinet ad eum sicut ad membrum, cum sit de corpore, circa omnia, quæ ad causam pertinent, sicut prædictum est de Prædicatore Generali. Specialiter verò negotia Conventus, vel Fratrum suorum, debet procurare; videlicet litteras missas Priori Provinciali, vel Definitoribus, vel aliis reddere tempore opportuno. Accusationes Prioris sui in Capitulo deferre, & simpliciter proponere, prout fuerint formatae. Si autem aliquas alias de motu suo facere voluerit, eas sequestrare & distincte ab aliis opponere Petitiones singulorum Fratrum ad Provinciale, si quæ sibi commissæ fuerint, ostendere, & procurare. Si verò à Provinciali, vel Definitoribus aliquid ab eo fuerit inquisitum, de statu Prioris, vel Conventus, vel Fratrum aliquorum, sic simplicem veritatem dicere debet, quod pro aliquo, vel contra aliquem nunquam inclinet se: nisi quantum requirit æquitas, & veritas, omni motu inordinato excluso. Cum autem aliquid dicit, debet hujusmodi distinguere discretè, quid dicit de motu suo, quid de aliorum, & quorum: quid de voluntate Conventus, vel totius, vel majoris partis, & quæ sit pars illa major, si expedierit enarrare. Item pertinet ad ipsum ostendere Priori Provinciali indulgentias Domus, quas habet, aut in Lectore, aut in Prædicatoribus, aut in Fratribus expeditis in consiliis, aut in Confessoribus, aut in Cantoribus, aut in Conversis, secundum varia exercitia, aut in paucitate Fratrum, & similibus, & gravamina, aut in infirmis, aut in discoloris, aut in nimia multitudine Fratrum, & similibus, & laborare debet per se, & per Fratres sibi notos, & amicos sui Conventus, ut domui suæ per Priorem Provinciale, & Definidores utiliter provideatur. Cavendum etiam est ei, ne de motu suo, vel aliorum de suo Conventu, quia partes locuti fuerint, sibi procurer aliquid, quod ad turbationem Conventus: vel Fratrum de Conventu suo, qui meliores, & discretiores reputantur valeat provenire.

*Circa quædam post definitionem.*

**V**erum si contingat Priorem suum absolvi, vel post definitiones omitti aliquid eorum, quæ in suo Conventu sunt necessaria, ut provisio de Lectore, & hujusmodi: tunc cum illis, qui fuerint in Capitulo de domo sua, vel etiam aliorum Fratrum, vel quibus Conventus suus confidit, debet tractare quid possit fieri pro domo sua; sive in postulando, quos possit eligere, sive in confirmationis commissione; sive in provisione de Lectore, & similibus. Deinde in regressu non debet moram contrahere, sed sicut poterit, bo-

*Cod. Regul. Tom. IV.*

no modo ad Conventum suum festinare. Et si aliqua negotia fuerint, quæ expediat eis tam cito scire, debet hoc, quam cito poterit per litteras intimare, si ante aduentum suum hoc præfieri expediat. Cum autem venerit cavere debet ne rumores inutiles de Capitulo referat, vel infirma, vel aliquid, unde Fratres turbet contra Priorem Provinciale, vel Definidores, vel aliquos Fratres, qui minus fuerint favorabiles, vel contrarii in suis negotiis, sed potius ea referat, quæ ad consolationem, & pacem Fratrum debeant provenire; & det operam pacificare Fratres in communi, & singulariter, si aliquos eorum viderit turbatos super iis, quæ acta sunt in aliquo, vel omissa, super his reddens, prout poterit excusationem rationabilem.

## CAPUT XLV.

## De Officio Confessoris.

**F**Rater, qui confessiones auditurus est, necessarium est, ut sciat quantum potestatis habet. Item, ut sciat quæ & qualiter à confitente inquirere debet. Item oportet eum esse cautum circa absolutiones, & circa excommunicationes, dispensationes, & alias satisfactiones, & circa casus matrimoniales: & circa pœnitentiarum injunctiones, & simoniarum resignationes, & circa modum habendi se ad confitentem & specialiter circa secretum Confessionis.

*Circa potestatem.*

**C**irca potestatem notandum est, quod Frater, cui non est dictum à Prælato suo, vel ab alio, qui possit ei dare jurisdictionem, quod audiat Confessiones, de nullo peccato mortali potest absolvere. Ille autem, qui habet potestatem à Diocesano videre debet, quam potestatem habeat, & ad majorem certitudinem, bonum est, quod de hoc litteras habeat, vel memoriale aliquod.

*Circa inquisitionem.*

**C**irca inquisitiones notandum est, quod duo sunt genera interrogationum, quæ à peccatore confitente querendæ sunt. Quædam enim pertinent ad ipsam personam confitentis: quædam vero ad facta personæ. Illæ vero, quæ pertinent ad personam naturaliter sunt priores: unde nisi Sacerdos sciat, potest inquirere à confitente utrum sit Clericus, vel laicus: & si Clericus, utrum Religiosus, vel non, & utrum habeat beneficium Ecclesiasticum, vel non, præcipue cum cura animarum. Si laicus, inquiri potest cujus officii sit, & utrum in matrimonio sit, vel solutus: & utrum paterfamilias, vel de familia alterius. Cognito vero qualis sit persona, secundum statum suum, vel personæ, possunt fieri aliquæ aliæ interrogationes. Mulieres verò præcipue inquirendæ sunt de iis, quæ ad eas pertinent. Milites inquirendi sunt præcipue de rapinis, & injuriis, de venditione justitiæ, de profusione pecuniæ causa adulationis, vel histriotonatus facta: de vana gloria, & laboribus, & doloribus, quos pro ea habent: & sumptibus, quos propter ea faciunt. Mercatores verò querendi sunt de mendaciis, & perjuriis, & venditione ad terminum in fraudem usurarum facta, & de aliis fraudibus. Burgenses verò inquirendi sunt de societate, de modo, & causa congregandi divitias. Inquirendi sunt etiam de invidia: mos enim civium est: alios aliis invidere. Illi vero, qui sunt de familia alicujus potentis inquirendi sunt utrum domino suo fideles extiterint, de adulatione, de mendaciis, de rapinis, de pravis consiliis, de iniqua acceptance munerum,

B b 2

&

& utrum domino præcipienti aliquod impium obediunt. Clerici vero inquirendi sunt de perceptione simoniaca beneficiorum, & Ordinum: & si deferviant, prout beneficia sua requirunt: & an dicant officium, secundum quod Ordo eorum requirit, & de modo dispensandi redditus suos. Alii, qui habent curam animarum, inquirendi sunt, utrum sint solliciti, quomodo de cibo spirituali filiis suis provideatur: & aliis, quæ ad regimen animarum pertinent. Inquirendi sunt agricolæ de fraudatione suilaboris, & utrum reddant, quæ sunt Cæsaris Cæsari, & quæ sunt Dei Deo: de falsis testimoniis, & de usurpatione alienarum terrarum, & de invidia: & de accusatione proximorum apud Deum. De fide non est tutum interrogationem facere, licet hoc aliqui magnifaciant nisi in casu, in quo illa persona suspecta esset de fide. De peccatis vero occultis, ut est de peccato contra naturam, non est inquirendum, nisi cautè, ne aliquid manifestetur simplicibus, quod ipsi nesciant, quod possit eis esse occasio peccandi. Modus autem inquirendi poterit esse talis: poterit quæri utrum insultus carnis aliquando patitur: & si responderit, quod sic: poterit quæri, utrum titillatio ducat eum ad aliquid faciendum: & si sic, quod est illud, & sic nihil ei manifestatur, sed datur ei occasio manifestandi se. Aliqui tamen quæruunt utrum vigilando semen effuderit absque naturali usu mulierum, & si responderit, quod sic: qua occasione ei accidit. Sed inexperti opus carnale, non intelligerent, quid esset effusio feminis.

#### *Circa absolutiones vero.*

Notandum est, quod non est requirendum ab eo, qui confitetur iuramentum, vel votum, vel alia obligatio, quod abstineat à mortali: sed sufficit, quod habeat bonum propositum, & bonam voluntatem abstinendi, & specialiter à luxuria: & quod remittat odium, si quod habet contra aliquem: & quod velit satisfacere pro posse de injuriis, si quas fecit: & quod pœniteat de omni peccato mortali, quod fecit: ad minus in generali. Si autem dicit se nolle, vel non posse abstinere ab aliquo mortali, non est injungenda pœnitentia: sed significandum est ei, quod si decederet in tali statu, damnaretur. Verum dandum est ei aliquod consilium, quod faciat, ut Deus illustret cor ejus ad pœnitentiam: & dicendum est ei, ne in tali statu communicet.

#### *Circa Excommunicationes.*

Notandum est, quod ille, qui audit confessiones, non debet se intromittere ad dandam alicui absolutionem ab Excommunicatione, nisi sciat se potestatem habere: & nisi sciat formam, secundum quam debet fieri absolutio. De qua forma breviter notandum est, quod minor Excommunicatio absolvitur solo verbo: major absolvitur ita: *Authoritate, qua fungor, absolvo te ab omni vinculo Excommunicationis: vel specialiter ab Excommunicatione, qua ligatus es pro hoc facto, vel à tali iudice.* De potestate autem talium absolutionum breviter notandum est, quod ille, qui audit confessionem, non potest absolvere sua autoritate ab aliqua majori Excommunicatione, quam alius iudex tulerit, qui sit major, vel par ei. Item notandum, quod absolutio Excommunicationis debet præcedere absolutionem peccatorum.

#### *Circa dispensationes.*

Notandum est, quod circa dispensationes nullus debet intromittere se de aliqua dispensatione votorum, vel irregularitatum, nisi sciat se habere potestatem licentiandi, & dispensandi: necesse est etiam, ut sciat secundum quam for-

mam debet fieri dispensatio votorum. Dicat ergo peccatori, ut quæ vovit impleat, donec sibi consultum sit ab eo, qui cum eo possit dispensare.

#### *Circa vero restitutiones.*

Notandum est, quod non est alicui danda pœnitentia, nisi voluntatem habeat restituendi proximo, quod ei abstulit, nisi proximus voluerit ei remittere. Caveat vero ne det ei dilationem, nec injungat, quod inde faciat elemosynas: spoliato enim debet illud restituere, vel hæredi ejus, quam citius potuerit, nisi spoliatus det ei dilationem vel non possit invenire, cui restituendum est. Tunc etiam debet erogari de consilio Ecclesiæ in pios usus, & nisi peccator habeat voluntatem sic faciendi, non est ei injungenda pœnitentia. Si vero occultum est factum, instruendus est peccator, quomodo occulte restituat, vel occulte dilationem petat, scilicet per aliquam honestam personam, præcipue Sacerdotem, cui in confessione reveletur, quod tacito nomine peccatoris negotium procuret.

#### *Circa injunctiones pœnitentiarum.*

Similiter oportet esse cautum, ut parvas injungat: melius est enim ponere homines in Purgatorio, quam in Inferno: habet enim Deus, ubi purget filios suos, si non purgentur hic. Dicat etiam quando numerum orationum injungit: quod si aliquando non dixerit, non ei ad culpam impuretur, ad minus mortalem. Item, non injungatur pœnitentia alicui, si habet officium, quod secundum conscientiam suam sine peccato mortali facere non possit, nisi deferat id officium. Item, si habeat aliquam aliam peccandi occasionem, ex qua vero simile est, quod non possit sibi cavere à peccato mortali: nisi eam à se removerit: (ut est cohabitatio mulieris suspectæ, cum qua peccare consuevit) pœnitentia non detur ei, nisi occasionem illam à se removeat.

#### *Circa vero Simoniacos.*

Notandum est, quod ille, qui per simoniam adeptus est aliquod beneficium, non debet recipi ad pœnitentiam, nisi habeat præpositum renunciandi illi beneficio pure, & simpliciter: quæ autem dispensatio possit postea fieri cum eo invenies in *Summis in Tractatu de Simonia*. Forma vero absolvendi à peccatis hæc est: Facta generali confessione in latino, vel in Romano à peccatore, & dicta illa oratione: *Miserereur &c, Absolutionem &c. Et ego absolvo te ab omnibus peccatis tuis, In nomine Patris, &c.* Debet autem tunc esse fides tam Sacerdotis, quam ejus, qui confitetur, quod nisi per culpam confitentis iteriter, remittentur peccatori peccata sua tunc, & gratia Dei infunditur, si prius non erant dimissa, & gratiam non habebat. Si vero prius peccata dimissa, & gratiam prius habebat, tunc augetur Dei gratia.

#### *Circa modum habendi se ad confitentem.*

Item ad officium Confessoris pertinet, omnes confiteri volentes benigne, & affabiliter recipere, & præcipue illos, qui raro confiteri consueverunt. Omnes autem, qui nesciunt modum standi in confessione debet instruere, ut stent flexis genibus, inclinato capite, appodiando se ad dexteram, vel ad sinistram Sacerdotis. Antequam vero incipiat confiteri, potest illis, qui non sunt assueti confiteri frequenter, aliqua verba dicere de pertinentibus ad confessionem: ut quærere de patria sua, vel hujusmodi, ut confitens interim sumat audaciâ ad confitendû. In pœnitentia vero injungenda, debet reminisci, quod præter ea, quæ injungit specialiter, imponat ei etiam omnia bona, quæ fecerit in remissionem omnium peccatorum, & det ei potestatem cuicumque confiteri poterit, quod laxare possit de pœnitentia si



bi in iuncta ab eo, si forte viderit expedire. Debet etiam diligenter observare Confessor, quod semper libentius, & prius audiat confessiones illorum, qui magis indigere reputantur, vel qui raro venire solent, vel qui sunt extranei, vel qui sunt in statu majori, vel de quorum confessione maior utilitas futura speratur.

Porro circa mulieres cavere debet, ne unquam audiat earum confessiones, nisi in publico, & ubi ab aliquo, vel ab aliquibus videatur. Illis vero, quæ vocantur *beghinæ*, & frequenter volunt confiteri, certum tempus assignet ad confitendum: extra quod ipsas non audiat, nec in aliis colloquutionibus frequentibus se eis exponat unquam; & semper potius duris, & rigidis verbis utatur ad eas, quam mollibus.

Deinde circa secretum confessionis sic debet esse cautus, ne unquam directe, vel indirecte, de longe, vel de prope, in genere, vel in particulari, possit aliquid percipi de ore ejus, quod aliquam notam habeat de aliqua revelatione quantumcumque levi. Nec etiam debet in speciali laudare aliquem, cujus confessionem audivit, de virginitate, vel innocentia, & hujusmodi, ne apud sapientes, cum de alio orietur verbum, quem etiam audisset, & non ita laudaret, posset oriri suspicio, quod idem non esset in illo.

#### CAPUT XLVI.

##### De Officio Prædicatoris communis.

###### *Qualis debeat esse in se?*

PRædicator communis habet officium speculi quantum ad bonum exemplum, & habet officium lucernæ ardentis quantum ad prædicationis verbum. Unde necesse est, ut concorder in ipso vita, & doctrina, ne quod per unam manum ædificat, per aliam destruat. Prætendat itaque Prædicator in habitu humilitatem, in moribus honestatem, in verbis discretionem, in zelo animarum charitatem, in cibo, & potu sobrietatem, & in agendis maturitatem.

###### *Qualiter ad Socium?*

PRædicator egrediens, difficultatem non faciat in Socio, sed acceptet illum, quem sibi Prior assignaverit. Ad hæc etiam niti debet, ut quemlibet Socium sustineat, ut possit quemlibet sustinere; in via, & in hospitiiis, non se notabiliter separet à Socio. Item concordet ad invicem, & pacifici, nec loquantur simul asperè, aut contentiosè, & præcipue coram secularibus minus se honorent, aut supportent. Si ad unum mota fuerit quæstio aliqua, alter non respondeat pro eo, dummodo ille sit sufficiens respondere: pro via non litigent, si quandoque erraverint, non propter hæc se oburgent. Iterum, siambo sunt Prædicatores, & æqualem habent gratiam: major in via non sibi solemniores stationes eligat, sed prædicationes suas dividant, prout paci ipsorum, & saluti animarum viderint expedire, nisi Prælatus aliter cum ipsis ordinaverit. De nocte meliorem lectum major notabiliter non eligat, nec in aliis se super Socium extollat.

###### *Qualiter in hospitiiis?*

PRædicator non solum domi studeat, sed etiam in hospitiiis, & in via ædificatoria verba libenter dicat. Non fatiget homines, alios cibos, quam præparaverint postulando, aut etiam aliquos refutando. Item non habeat in consuetudine cibos mensæ diversis mittere, vel dividere,

vel etiam eleemosynas dare pro arbitrio suæ voluntatis. Item in bonis consuetudinibus conformet se his cum quibus conversatur. Sunt etiam alia, quæ apud homines sunt indecentia, sicut dormire in mensa, vel loqui dum quis cibum in ore tenet, & hujusmodi: hæc ubique sunt vitanda. Item, quando Prædicator propter æstum, vel propter viæ laborem sitim patiatur, potest in mensa, vel ante per haustum aquæ illam restinguere, vel vinum cum aqua melius temperare. Committat Socio verbum quandoque in mensa, nec ibi dicantur otiosa, sed seriosa; & de Passione Domini non debet fieri mentio, nisi cum omni reverentia, & maturitate.

###### *Quid prædicandum?*

CUM Prædicator proponit verbum Dei, attendat quid dicat, quia materia sermonis ejus est, Deus, Angelus, Homo, Cælum, Diabolus, Mundus, Infernus, præcepta, consilia, sacra Scriptura, virtutes, vicia. Item, magis illa studeat semper prædicare, per quæ magis videtur posse fructificare.

###### *Quibus prædicandum?*

ATTendat etiam quibus dicat, ut secundum hoc sermonem suum formet. Quibusdam enim competunt subtilia, quibusdam plana, & simplicia, quibusdam instructiva, quibusdam motiva, quibusdam terribilia, quibusdam gaudiosa. Consideret ergo, quid Clericis conveniat, vel laicis, quid Religiosis, vel secularibus, quid militibus, aut rusticis, quid sanis, aut infirmis, quid juvenibus, aut senibus, quid obstinatis, vel humilibus, ac devotis.

###### *Qualiter prædicandum?*

STudeat quandoque prædicare breviter, ferventer, utiliter, faciliter, & decenter: multum denique nitatur quod tractum prædicet, & distinge. Item si Fratres Minores ante sermonis inchoationem supervenerint, verbum prædicationis eis exhibeat, nisi rationaliter quid obftet. Si vero quæstuarii supervenerint habentes litteras Apostolicas, vel Episcopi, studeat ut in pace sit cum eis.

###### *Quæ sunt vitanda in prædicatione?*

NON prædicet sine præmeditatione, sciat alias quid dicere velit, vel debeat. Item vitet, quando bono modo potest prædicare immediate post prandium: id enim tempus est tam audientibus, quam loquentibus minus aptum: sed si oportet fieri temperatius sumat cibum, & potum. Item non rapiatur in iram contra impediētes prædicationem, vel contra pueros ibi flentes, aut etiam contra dormientes, sed benigne moneat eos. Item caveat in sermone derisiones præsentium, vel derogationes absentium: specialiter autem vitam Clericorum, vel Religiosorum coram populo nunquam arguat: nec eos directe, vel indirecte quasi sub pallio notet; quia de talibus non sequitur ædificatio, sed frequenter scandalum, & turbatio plurimorum. Item videat diligentissime Prædicator, ne quando de verbo Dei faciat sibi viam vindictæ, ut videlicet in sermone suas persequatur injurias. Item dubia pro veris non prædicet, nec fabulas vanas, aut scurrilia, quæ possunt sermonem facere contemptibilem, vel minus authenticum. Item non verecunderit idem prædicare sæpius, dummodo bonum sit, & utile, nec etiam id omittat dicere, quod alias prædicavit. Denique tam in sermonibus publicis, quam in collationibus privatis, advertat Prædicator circumstantias, quæ continentur in hoc versu:

Respice quid, cur, ubi, quomodo, quando loquaris.

*Explicit Liber de Institutione Officialium Ordinis Fratrum Prædicatorum, Reverendissimi Patris Fratris Humberti præfati Ordinis Generalis Magistri.*